


LES
CONSOLATIONS
DE LA
PHILOSOPHIE,
ET DE LA
THEOLOGIE.

Par le P. DE CERIZIERS, de la
Compagnie de IESVS.

Edition Cinquiesme.



Ex libris
L. de Ceriers



A R O V E N ,

JEAN VIRET, Imprimeur ordinaire du
Roy, au haut des degrez du Palais.

Chez IACQUES BESONGNE, dans la court du Palais.

ET

CLEM. MALASSIS, dans l'Estr N. DAME.


M. DC. XXXXVI.

Ex libris *Avec Approbation,*
Roys de France, et d'Angleterre.

Handwritten text, possibly a signature or name, appearing in the middle left section of the page.



Handwritten text or a signature, appearing in the bottom right section of the page.



AV SAINCT ESPRIT.



VIRISANT appuy de nos foiblesſes, diuin Paraclet des ames deſolées amour touſiours veillant ſur nos beſoins, Charité qui ne ceſſe iamais de ſoulager nos peines ; C'eſt à vous que tous nos ouyrages appartiennent ; puis que toutes nos ſaintes penſées ſont des preſens de voſtre bonté & des productions de voſtre grace. Mais certes c'euſt cy plus que tous les autres eſt à vous ; puis que c'eſt vne Conſolation que la Sapience donne aux malheureux , & que vous eſtes celle que Ieſus veritable Sapience du Pere, enuoye à ſes Apoſtres , pour adoucir les regrets de ſon abſence. N'eſtes-vous pas le Pere des Pauures, le Tuteur des Orphelins , le Conſolateur des affligez , le doux hoſte du cœur, & le refuge des miſerables ? N'eſtes-vous pas le repos de noſtre rrauail , le rafraichissement de nos ardeurs , le ſoulas de nos larmes & la diuine Panacée de toutes nos douleurs ; Si nous auons vn Aduocat , qui ſollicite ſans ceſſe les bontez de Dieu , au ſecours de nos miſeres, j'apprens que c'eſt de vous que vient

cette voix esclatante , qui par des gemissemens inénarrables, demande des faueurs qu'il nous est impossible d'obtenir, quoy qu'il nous soit necessaire de les auoir. Si ie voy vn esprit porté sur la face des eaux , on m'asseure que c'est celuy de mon Dieu , & que l'abyssme seroit sterile , si son amour n'en eschauffoit la glace. Vous estes donc le diuin Esprit qui vous deuez respendre sur les eaux ameres de nos larmes , autrement leur flux continuel nous traîsnera dans vne mer d'ennuys , sans tarir la source de nos desastres. Helas ! que seruiroient nos sanglots, n'estans pas soutenus de vostre pitoyable voix, ny meslez à ces gemissemens qui ne peuuent estre refusez ny exprimez ? Innocente Colombe , accordez vos souspirs aux nostres , pour leur donner du merite : benissez nos miseres , afin que nous en tirions du profit & vous de la gloire. Espanchez sur nous ces langues ou ces larmes de feu qui font parler sans aigreur & fondre avecque plaisir. O malheurs, ô infortunes , attaquez nous ; ô flammes , ô amour secourez nous : pourueu que ie possede mon Consolateur , ie ne refuse point de disgrâce.

A MON



A MONSEIGNEVR
L'EMINENTISSIME
CARDINAL DVC
DE RICHELIEV.



ONSEIGNEVR,

L'aurois mauuaise opinion de vostre incomparable vertu, si ie la croyois exemptte des attaques de l'enuie: Mais certes j'aurois trop de vanité, si ie iugeois mon discours necessaire à sa defense. Cette grande & glorieuse vie, qui fait le plus beau spectacle de l'Europe, monstre clairement, que comme rien n'est capable de vaincre vostre courage, il n'y a que vostre esprit, qui puisse dignement parler à la Fortune. Ceux qui ont regardé vos triomphes sans ialousie, & qui ont leu les precieux monumens de vos estudes avecque loisir, n'auront point d'autre sentiment que le mien, pouruen qu'ils vueillent estre iustes. Aussi veux-je protester à vostre Eminence, que ie n'ay point de presomptueux dessein: & que le motif, qui me porte à luy offrir cet ouurage, a des raisons toutes pures de vanité, & qui sont pleines de respect. Ma Theologie, toute ignorante qu'elle est des affaires du monde, sçait assez, que sans vostre appuy, elle n'en doit promettre à personne. Et d'ailleurs connoissant

que vostre bonté est le commun refuge des affligés: & qu'il n'est point d'innocence malheureuse, qui ne s'approche de vous avec auantage: elle penseroit rauer vostre gloire, de presenter sans vostre auen du secours à leurs miseres. Elle a mesme si peu d'opinion de ses forces, & de son adresse, qu'elle apprehende d'auoir besoin de la Consolation qu'elle veut donner à l'infortune, si vous ne l'asseurez de l'honneur de vos bonnes graces. Ce qui luy en fait esperer la faueur, outre les preuues generales de vostre generosité, c'est qu'elle ne scauroit s'imaginer, que vous luy refusiez l'entrée de vostre Cabinet, apres luy auoir basti vn Palais dans la plus anguste ville de l'Vniuers. Que si vous me commandez d'expliquer plus nettement mon intention, ie vous diray, Monseigneur, qu'on ne me peut demander pourquoy ie rends cét hommage à vostre Eminence, qu'on ne me demande pourquoy ie suis François. Ces veilles infatigables qui vous attachent comme l'intelligence visible de cét Estat aux pensées de nostre salut: Ce zele que vous auez pour la grandeur de nostre victorieux Monarque: Ces soins que vous apportez à nous maintenir dans les aduantages; que le courage nous donne sur les autres Nations; La constance que vous employez pour corriger ce defaut, que l'on nous reproche dans la qualité de Conquerans; Ce sont à n'en point mentir, des causes assez iustes pour obliger ma plume à l'hommage de vostre merite. Peut-estre ingera-t'on que ie me deuois contenter du culte interieur de la pensée, & que ie pouuois taire vne affection, qui toute raisonnable qu'elle est, ne laisse pas d'estre importune. Ie scay bien qu'une vertu si publique que la vostre n'a nullement besoin de mon suffrage: mais aussi dois-je demeurer muet, parce que ie suis inutile: & n'auoir point de desir: parce que ie manque de pouuoir. Il y a des passions qui peuuent estre discrettes: il y en a, qui veulent estre libres. C'est ce qui me persuade, que vostre Eminence

nence ne condamnera pas un mouuement , que Dieu commande à ses creatures , & que vous souffrirez , qu'un homme qui ne vous peut seruir , vous reuere. Sur cette confiance , ie prends la hardiesse de vous rendre cette preuue de ma deuotion , comme un gage certain des vœux que ie presenteray toute ma vie à Dieu , pour la prosperité de uostre importante personne. Mon zele me sera glorieux , s'il vous est agreable : & j'auray ma recompense , quand j'auray la permission de me dire.

MONSEIGNEVR,


DE VOSTRE EMINENCE,

Le tres-humble , tres-obeissant
& tres-affectionné seruiteur , RENE
DE CERIZIERS , de la Compagnie
de IESVS.

A P P R O B A T I O N.

LE sous-signé Prouvincial de la Compagnie de Ies vs, en la Prouince de Toulouse, suivant les Priuileges à nous octroyez par les Roys tres Chrestiens Henry III. Henry IV. & Louys XIII. à present regnant, permetts à I E A N C A M V S A T, Marchand Libraire Iuré à Paris, d'imprimer vn Liure intitulé, *La Consolation de la Philosophie & Theologie*, composé par le P. R E N É D E C E R I Z I E R S, Religieux de nostre Compagnie, & reueu par trois Peres de la mesme Compagnie, qui l'ont approuué. Fait à Aurilhac le 12. de Iuin 1638.

I E A N F I L L A V.



DESSEIN DE L'AUTHEVR.

IL y a prés de trois ans que ie donnay la troi-
siesme traduction de Boëce au public, & que
ie taschay de faire parler sa Philosophie à nostre mo-
de. L'accueil de beaucoup d'honnestes gens, & l'hon-
neur qu'on luy a fait de ne le point traiter en Estran-
ger ny en Barbare, m'a sollicité d'exécuter vne pensée
qui me vint, trouuillant à cet ouurage. Si mon em-
ploy, m'eust laissé quelques heures libres, elle seroit
maintenant vieille, mais certes ie puis dire avec vn
ancien, que si ce Liure est fait depuis ce long-temps,
que les paroles luy manquoient encore. Quelques-vns
après auoir leu la Consolation de Boëce, se sont
estonnés que ce grand homme qui estoit non seule-
ment fidelle, mais encore Martyr de Iesus-Christ, n'a
touché aucun des motifs, qu'on peut tirer de sa croix
& de ses souffrances. L'auoüe que i'ay eu le mesme
scrupule, & que sans la lecture de ses autres œures
au lieu de louer cette excellente piece, i'estois au
point de douter de sa creance. Neantmoins toutes
choses bien considerées, ie trouue qu'il a fait cette
faute avecque iugement, & que sans remerité on ne
peut soupçonner sa Religion ny blasmer sa conduite.
Il escriuoit en vn siecle, où presque tout le Senat
estoit Payen & le reste de l'Italie Arienne. De sorte
que se seruir de l'exemple du Sauueur, c'estoit pro-
duire vne raison foible pour les Ariens, qui ne le
croyoient pas Dieu, & nulle pour les Gentils qui mé-
me ne le tenoient pas homme. Au moins ne sçauroit-
on dire que ce motif eust esté surnaturel ny aux vns
ny aux autres, puisque le Messie ne passoit parmy eux

Dessain

que pour vn miserable , ou au plus , que pour la première & la plus parfaite des creatures. On peut encore adiouster que cét excellent Philosophe vouloit iustificier la conduite de Dieu à tous les hommes, faisant voir au monde qu'il auoit mis dans la seule Morale des remedes suffisans à tous les maux de la Fortune. Ces raisons à mon aduis, excusent le silence de Boëce, & nous obligent de reuerer vn traual , que nous ne pouuons receuoir avecque murmure , sans nous marquer d'ingratitude. De moy en mon particulier, ie luy sçay gré d'en auoir vsé de la sorte ; puis qu'il me donne le moyen de seruir le public, en adioustant vn crayon de ce qui manque à son ouurage. Je ne suis pas assez vain pour croire , que ie puisse remplir son idée , mais ie suis assez courageux pour m'efforcer de la suiure. Ce sera donc la Theologie ou la Sapience diuine qui parlera dans ce Dialogue , & qui sans s'arrester aux raisons Morales, produira les surnaturelles qu'on a de souffrir avecque ioye. Mille Heros se sont presentez à moy, pour entrer dans ce Colloque & pour seruir de matiere à mes pensées. Les Chrysostomes, les Athanases , les Hierosmes dans la primitive Eglise : Chez nous Pretextat, Gregoire de Tours, & plus pres de nostre siecle, saint Thomas de Cantorbie, saint Anselme, Thomas Morus, Iean Ficher , le Cardinal Pol , & beaucoup d'autres , pretendoient qu'ayans esté les plus illustres Martyrs de la patience, ils deuoient estre les plus humbles Disciples de la Theologie. Dans cette agreable & riche confusion, ie me suis déterminé au choix d'un des plus grands Prelats de l'Eglise , & pour le rang qu'il a tenu , & pour l'exemple qu'il luy a laissé. Qui pourroit mieux soutenir mon dessain & succeder à vn Sénateur Romain, que celuy qui a beaucoup plus esté Vicaire de Iesus-Christ,

de l'Autheur.

Christ, pour porter sa Croix, que pour conduire son troupeau ? Personne ne doit disputer à Celestin V. d'auoir esté cét heureux Cyreneen , qui a pris bonne part aux ameres faueurs du Caluaire. Iamais homme du monde n'a souffert vn plus illustre persecuteur: iamais souuerain Pontife n'a trouué de plus rudes espines sous sa triple Couronne. Boniface son successeur (selon la pensée du Cardinal d'Ailly) fut son Herode à Rome , & Celestin ayant repris son premier nom, fut son S. Pierre aux Liens, à Anagny. Ses fuites de beaucoup d'années, sa prison de dix mois, & sa mort dans le besoin de toutes choses , sont des traicts qui representent assez naïfvement vn miserable. Pour donner plus d'entrée dans mon dessein, j'estime qu'il n'est point hors de propos de recueillir icy les principaux points de son histoire. Celestin qu'on nommoit deuant son Pontificat , Pierre de Moron, estoit natif de l'Abrusso, ou de la terre de Labour. Son pere Angelere receut dès sa naissance des presages de sa sainteté future : parce que sa femme le vid sortir de son ventre vestu d'une robe religieuse. Ce miraculeux enfant n'auoit point de plus ordinaire discours que ces paroles: le veux estre bon seruiteur de Dieu. Apres la mort d'Angelere, sa mere fut auertie du Ciel, de faire estudier son fils , ce qu'elle fit tres-volontiers, quoy que sa resolution fust combatuë de beaucoup de grandes considerations. La vision qui luy representa son petit Pierre gardant vn troupeau de brebis plus blanches que leur laict, la fit chanceler long-temps, pour ne se pouuoir resoudre d'auoir vn berger en sa famille. Mais le succez luy apprit , que le sens qu'elle donnoit à cette instruction celeste, estoit trop materiel , & que ces brebis estoient des ames, & non pas des bestes de pasture. Deuant que de monter dans la

Chaire

Desslein

Chaire de saint Pierre, la vie n'estoit qu'une longue mort, tant il inuenta de nouveaux moyens de l'affliger. Son jeusne continuel luy preparoit des delices dans les plus communes viandes, qu'il s'espargnoit avecque tant de rigueur, que c'estoit excez de manger cinq petits pains & huit oignons en tout un Carême. Ses longues veilles ne permettoient qu'à regret au sommeil de toucher ses paupieres. Apres auoir demeuré trois ans dans un trou de terre, qui seruoit plustost d'estuy que de maison à son corps, il passa dans cette montagne qui luy a donné son nom. De Moron, où il continua cinq années ses grandes austeritez, il changea sa demeure sur une autre montagne nommée Magella. Ce fut en ce desert, que Dieu luy apprit, qu'il falloit vaincre son corps, non pas le tuer; & que sa bonté luy fit comprendre, qu'il aymeroit mieux, qu'on s'approchast de ses Autels par amour, que de s'en esloigner par trop de crainte. En fin comme il eut attiré beaucoup de ieunes gens au desir d'imiter la sainteté de sa vie, Gregoire X. approuua sa reigle à Lyon. Pendant que ce grand Anachorete menoit une vie d'Ange dans les spelonques & les rochers de l'Italie, Dieu pensoit à luy donner le premier Throsne du monde. Les Cardinaux qui depuis deux ans empeschoient le saint Esprit de faire un Pape, s'accorderent en fin tous de prendre ce solitaire pour successeur de Nicolas IV. Le dessein de sa fuite ne luy ayant pas réussi, quelque resistance que fist sa modestie, il fallut obeyr à la volonté du Conclau, où à parler plus proprement, suivre les dispositions du Ciel, qui l'auoit inspirée. Les Roys de Sicile & de Hongrie, & toute la cour de Rome vindrent au rencontre de celui qu'on pouuoit appeller, mesme devant son election la Sainteté. Cét humble Pape ne
pouuant

de l'Authheur.

pouuant souffrir l'éclat d'une si auguste pompe, pour estre accoustumé aux ombres des forests & aux tenebres des cauernes, il en amortit les rayons par l'humilité de sa monture. Comme il fut arriué en la ville d'Aquilée; il prit le nom de Celestin: parce qu'il desiroit que sa vie fût toute celeste. Il crea douze Cardinaux à Naples, entre lesquels il voulut auoir deux de ses Religieux, afin de viure avec eux en Hermite: aussi fit-il dresser de pauvres cabanes dans son Palais, où apres auoir rendu aux Peuples les deuoirs d'un veritable Pasteur, il se retiroit pour vaquer à la perfection de son ame. Mais apres auoir reconnu d'une experience de dix-huict mois, que la quietude du desert ne se trouuoit pas au Vatican, il quitta la premiere grandeur du monde, pour reprendre à Moron sa petite cellule. Iusques-là, cet homme de Dieu n'auoit point eu d'autre persecuteur que soy-mesme: mais Boniface VIII. luy succeda aussi bien en cet office qu'à sa chaire. Ce Pontife, qui peut-estre n'a rien fait mieux que de declarer la sainteté de nostre incomparable Louys IX. ne se pouuant persuader, qu'on perdist iamais le goust de commander, employa la finesse & la cruauté pour empescher son predecesseur de penser à sa premiere place. Apres l'auoir traité avecque l'inhumanité qu'il eust pû craindre d'un cruel ennemy, le Patriarche de Ierusalem le mit entre les mains d'un Chambrier du Pape, qui le laissa dans une tour du Chasteau de Fumon, sous la garde de trente-six satellites. Ce cachot estoit si estroit, que le bon Pape n'auoit point d'autre liét, que le marche-pied de l'Autel, qu'on luy permit d'y dresser de quelques planches; & si puant que deux Religieux, qui luy faisoient compagnie y tomberent bien-tost malades; Nostre saint vieillard y traïna pourtant dix mois entiers:

Dessain

entiers : mais enfin abbatu des austeritez de sa premiere vie : & consumé des miseres de sa prison , il rendit son bien-heureux esprit à celuy qui estoit la seule consolation de ses souffrances. Dieu declara par beaucoup de miracles, le merite de sa vie: vn des plus esclatans fut , que pendant les deux derniers iours de son agonie , tous ceux qui aborderent sa chambre, virent vne grande Croix d'or soustenuë en l'air tout au deuant de sa porte. Voila briefuement ce que souffrit ce grand Pontife de celuy qui deuoit au moins respecter l'innocence de ses mœurs, s'il ne les pouuoit imiter. Quoy que la vie de Boniface soit vn des grâds Problèmes de l'Histoire , ie ne puis croire , qu'il ait autrement auancé les iours de Celestin , ce que quelques Autheurs escriuent. Son esprit luy fournissoit assez d'autres assurances contre vn impuissant , sans luy suggerer de si noires pensées. Clement V. son successeur tenant son siege dans Auignon , luy donna rang parmy les Saincts à la requeste de Philippe le Bel, l'an mil trois cens & treize. Je ne scaurois dissimuler vne erreur qui pourroit en donnant impression d'vne trop naïfue simplicité en cét incomparable Sainct , diminuer l'estime qu'on doit faire de ses peines. Certains ont creu que Celestin n'auoit quitté le Pontificat que par les artifices de Boniface, & le conseil de quelques Docteurs , qu'il auoit instruits à luy persuader cette deuotion. Mais outre que ce genereux Pape auoit assez de familiarité & de commerce avec le Ciel , pour distinguer ses inspirations d'vne voix feinte & pratiquée, il n'y a point de doute qu'il auoit assez de creatures aupres de sa personne pour luy decouurer cette fourbe, quand mesme il ne l'eut pas aperceüe. Petrarque avecque beaucoup d'autres bons Autheurs parle avecque tant d'Eloge & d'estime de

ce

de l'Authheur.

ce grand homme, que nous auons sujet de croire qu'il ne le tenoit pas simple. Pierre d'Ailly Cardinal de Cambray, qui a escrit sa vie, deuroit auoir osté cette pensée à ces fins & deliez du siecle, qui prennent pour foiblesse tout ce que leur vertu ne sçauoit imiter. Cét excellent & iudicieux Historien marque assez expressément les bonnes estudes de Pierre de Moron, pour ne le point soupçonner de niaiserie, & dit en termes tres-expres, qu'il ne quitta sa place à vn autre, que sur l'auis que beaucoup de Theologiens luy donnerent, qu'il nous pouuoit laisser cet exemple. Certes i'approuue la iuste colere de ce grand Cardinal François, qui ne peut supporter qu'on deshonne ainsi la plus belle action de cet innocent Pape. Bien dauantage, ie me plaindrois volontiers avecque luy, de ce que cette generosité n'a point d'imitateurs, & qu'elle ait trouué des Critiques. Si le discours de saint Ambroise est bon, & que la plus grande sagesse du Monde soit le mespris des honneurs, ne doit-on pas cōclurre que Celestin peut tenir vn des premiers rangs parmy les sages; puis qu'il a mesprisé la plus grande dignité de la terre? On auoit veu deuant luy des Prelats sans crosse, des Euesques qui auoient quité leurs Mitres, des Roys qui auoyent foulé leurs Couronnes: mais la Tiare qui couronne la teste des souverains Pontifes, ne s'estoit iamais veüe à leurs pieds. C'est à luy que nous deuons ce grand exemple du mespris du Monde. C'est de luy que nous tenons vn des plus beaux enseignemens que nous ayons, de souffrir, d'aymer, & de chercher la mauuaise fortune. Ce sera donc à ce braue Athlete, que cette grande Dame que j'introduis au commencement de ce Dialogue, communiquera les plus beaux secrets qui peuvent porter nos esprits à la confiance. La taille & les habits

Dessain

habits que ie luy donne , marquent assez ses qualitez & ses deuoirs. Elle ne touche pas la terre de ses pieds: Elle a sa teste dans les Astres: d'autant qu'elle laisse la consideration des choses inferieures à la Philosophie, reseruant le Ciel à son estude. L'estoffe & la façon de son habit avecque les fleurs estrangeres, qui la parsement , insinuent que les cognoissances se tirent plustost de la Foy que du discours , & de la reuelation, que de nos richesses. La blancheur de sa robe est vne preuue de la candeur de ses veritez : & le bleu de son manteau, vne marque de leur origine. Le grand nom qui paroist au milieu de l'agrafe du manteau nous porte à reconnoistre le principal objet de cette science , & la figure du Soleil nous fait comprendre que Dieu est caché au milieu de l'esclat : & que rien ne nous empesche de le voir que le trop grand excez de sa lumiere. Son crespé n'est pas tant vn voile , qui la defende du halle, qu'un auis que ie donne à mon Lecteur, que les connoissances de la Theologie sont vn peu sombres & obscures, ce qu'elles tiennent du teint de la foy, qui est leur mere. Pour ce liure mystereux qui semble composé d'un vieille peau & d'un parchemin tout neuf, il est aisé de conceuoir que ie pretens insinuer l'un & l'autre Testament, qui sert de principe au raisonnement de la Theologie. Sa triple Couronne monstre l'Empire que cette Reine des sciences a sur toutes les autres. Au commencement de chaque liure il y aura vn Sommaire de ce qu'il contient, afin de mettre tout à la fois en vëue ce que ie desire que l'esprit gouste à diuerses reprises. Mon dessein en general est , de monstre la gloire de souffrances , & de fournir les motifs qui nous y peuuent resoudre. Le premier Liure propose l'entreueüe de Celestin & de la Sapience, celui cy represente ses maux, & celle-là

le

de l'Authheur.

le console ; le second declare les droits que Dieu a de nous exercer comme il luy plaist , & ensemble descouuré la moderation qu'il apporte dans l'usage de son pouuoir. Dans le troisieme on verra la fin des miseres de cette vie , non pas dans la mort de l'homme , mais dans sa penible separation d'avecque les creatures , & dans son heureuse vnion attecque Dieu. Au quatrieme on apprendra de l'exemple des Saints, & de celuy du Saint des Saints , que la marque des grandes ames & la plus precieuse faueur du Ciel c'est la souffrance. Le dernier comprend les recompenses de l'aduersité , concludant par vn abregé de quelques puissantes raisons , qui frappent d'autant mieux l'esprit que moins elles ont d'estenduë. Pour suivre Poëte aussi bien dans la forme que dans le dessein de son ouvrage , j'ay inseré quelques vers dans la Prose, qui seroient comme des pauses à ceux qu'une trop longue lecture pourroit ennuyer. Je ne me suis pas d'abord resolu à cette imitation , sur ce qu'il me sembloit indigne de permettre aux Muses d'entrer dans vne si sainte Escole. Toutesfois apres auoir considéré , que la Théologie de Dauid estoit bien aussi serieuse que la mienne, & qu'il seroit aisé à ceux qui n'ayment pas la Poësie , de joindre les deux Proses prochaines , ie me suis arresté à mon exemple, sans escouter la raison avecque tant de scrupule. Si la mienne ne peut agréer, ie consents qu'on la mesprise , & que pour me punir d'auoir mal-fait , on me condamne de ne plus rien faire de semblable. Mon Lecteur se souuiendra pourtant, s'il luy plaist (au cas que quelque chose se rebute dans ces vers) que ce n'est pas sur le Caluaire qu'il faut chercher des douceurs , & qu'il est aussi difficile d'y voir des fleurs , qu'il est souhaitable d'y trouuer des espines. Cette reflection me fait esperer que mes-

Dessein

me dans la rencontre de mes rudesses, on croira que j'ay failly avec estude, & que mes fautes seront prises pour des marques de iugement, plustost que pour des preuues d'insuffisance. Quoy qu'il en arriue, mes Iuges ne scauroient me desobliger : car s'ils approuuent mon travail, ils me font vne faueur qui me recompense ; s'ils le condamnent, ils me corrigent, me donnans sujet de pratiquer ce que ie tasche de persuader à tout le monde. Je proteste que c'est la principale fin que ie me suis proposé ; & quand ie n'en tirerois point d'autre fruit, ie seray satisfait, pourueu que ce petit ouurage fasse du bien, & que la medecine que j'ay preparée avecque quelque soin, opere l'heureux effect que j'attens de sa vertu. Afin qu'il ne luy manque rien, j'adiouste à la fin vn exercice de la Constance Chrestienne, diuisé en trente Maximes, & autant d'affections, qui pourront seruir d'epithemes à ceux, qu'une douleur trop prompte pourroit surprendre. Cette pratique est en forme d'esleuation à Dieu, parce que c'est à luy qu'il faut auoir recours en nos souffrances, si nous voulons qu'elle ayent du merite. Il me reste vn seul esclarcissement à donner, touchant la façon de traiter mon sujet, d'où i'esloigne, tant du texte que des marges, le nom & les paroles des Autheurs, qui me prestent leurs pensées. Sans me mettre au hazard de choquer ceux qui ayment le Grec & le Latin, ie puis dire, que faisant parler la Theologie, j'aurois mauuaise grace de prendre son credit de ceux, qui le tiennent d'elle. De plus, la raison qui est presque le seul appuy de cet ouurage, n'appartenant ny à Platon, ny à saint Thomas, mais au iugement, ie ferois vne iniustice vniuerselle d'attribuer à eux seuls, ce qui appartient à tous les hommes. Si ie me sers en quelques endroits des paroles de


de l'Auteur.

de saint Augustin , c'est plustost pour produire son exemple, que pour aider la Theologie de son autorité. Et puis , mon Lecteur , ie n'ay garde de croire, que vous voulussiez vous enrichir de mes marges. Si vous estes plus docte que moy, vous auez plus de lecture que ie n'en ay : si nous sommes esgaux en capacité , ie ne sçay rien que vous ignoriez. Que si ie suppose que quelqu'un au dessous de moy lise cette piece , ie le supplie de receuoir ce que ie dis sans garant , puisqu'il m'escoute sans obligation. Au reste ie coniure la bonté de nostre adorable Sauueur de benir nos douleurs ; & s'il daigne nous attirer dans sa Croix , qu'il luy plaise nous couronner dans sa gloire.





ARGUMENT DV I. LIVRE.

 *E premier Liare qui sert de fondement aux autres : en propose la forme & la matiere. I. Sa Poësie décrit assez naïfvement les resueries d'un melancolique, dont la mauuaise humeur ne se plaist qu'aux objets, qui peuent nourrir son chagrin & ses inquietudes. Cette piece n'est pas tant le discours de Celestin qui fait le principal sujet de cet ouvrage, que le vray portrait de ceux qui ont besoin de sa Consolation. II. Elle donne entrée à la premiere Prose, & à l'entre-veuë de la Theologie, & de cét illustre Pontife ; sa principale partie contient vn solide discours contre les Stoïciens & les Adamites, monstrant que ceux-là ont esté vains en leurs promesses, & ceux-cy infames en leurs deportemens III. Vn Dialogue de l'homme & du Sauueur en Croix sert de seconde Poësie. IV. Dans la Prose suiuante Celestin commence le recit de ses maux : vers la fin il propose l'ordinaire plainte des hommes sur les miseres de cette vie, comme si la vertu estoit toute seule attaquée & le vice defendu. V. Pour donner appuy à ce sensiment, il se sert de l'autorité de Dauid, tirée de son Pscaume. 71. VI. La derniere Prose a deux Parties. La premiere fait voir à tous ceux qui se plaignent qu'ils tiennent beaucoup plus de biens de la liberalité de Dieu, qu'ils ne souffrent de maux, par sa permission. La seconde introduit la Iustice, qui prouue que l'impieté n'éuit pas les chastimens qu'elle merite, concluant par cet estrange paradoxe ; que iamais Dieu ne punit plus seuerement le pecheur, que quand il ne le punit point. VII. La derniere Poësie est vn commandement de la même Iustice aux hommes de traiter Dieu avecque plus de respect, & d'auoir plus de confiance en sa bonté.*

La Consolation



L A
CONSOLATION
DE LA THEOLOGIE.

I. P O E S I E.



ARRIERE raison importune,
Ne parle plus a ma douleur,
Le bien de prendre mon malheur,
Est ma plus aimable fortune :
Le seul objet de mes desirs,
Se trouve dans les doux plaisirs
Que donne la melancholie ;
Rien ne me sçauroit obliger
Que cette innocente folie,
Dont elle semble m'affliger.
Tout ce qui peut flatter mes larmes
De l'espoir d'un contentement,
Me prepare un cruel tourment
Sous l'apparence de ses charmes :
Quand on approuue le dessein,
Que j'ay de nourrir dans mon sein
Le doux supplice de ma peine,
Je benis & baise la main
Qui tasche de m'estre inhumaine :
Et qui m'est cruel, m'est humain.
Les amertumes sont ma ioye,

A

La Consolation

Et ie crains si fort d'estre heureux,
Que les maux les plus rigoureux
Deuident mes iours tout de soye :
La douleur, les gémissemens,
Me sont d'agreables tourmens,
Toutes ces piteuses alarmes,
Qui nous font espancher des pleurs,
Me donnent, me donnans des larmes,
De riches perles & des fleurs.

La Majesté de ces murailles,
Dont le faîte touche les Cieux,
Me fait vn esclat odieux :
Je n'ayme que les funerailles,
Mesme ie haïrois la mort,
Si les loix de son triste sort
Ne luy rendoient l'honneur sauuage :
Mais sçachant que sa cruauté
Luy fait le tect & le visage,
Je suis rayuy de sa beauté.

Le recoy d'une solitude
Charme plus mes sens mille fois,
Que le Louure des plus grands Roys :
C'est la que mon inquietude
Parlant aux arbrisseaux discrets
Les entretient de mes secrets :
C'est où dans mon humeur plus sombre,
Fuyant toute autre priuauté,
Je vay seul avec que mon ombre,
Pour y chercher la liberté.

Par fois la triste melodie
Des Chats huans, & des Hiboux,
Cachez de l'ombrage d'un houx,
Flatte ma douce maladie :
L'horreur de leurs gémissemens

Me

Me comble de ravissemens
 D'un plaisir qui m'est si sensible,
 Que pour le goûter a loisir,
 Je consens qu'il soit impossible,
 De i jamais changer de desir.

La Philomele languissante
 Accorde sa voix aux soupirs
 Des plus agreables Zephyrs :
 Mais bien que sa voix soit charmante,
 Ses chansons ne me plairoient pas,
 N'accusans point le dur trespas,
 Dont la rage de son beau-frere
 Finit ses miserables iours,
 N'en pouvant estre l'adultere,
 Ny souiller ses chastes amours.

A mesme temps la Tourterelle,
 Et les Passereaux du desert
 Donnent leurs voix à ce concert,
 Et les battemens de leur aïse :
 Les Phantosmes & les Lutins
 Avant-coureurs de nos destins,
 Y promènent leurs noires ombres,
 Et les morts quittans leurs tombeaux
 Rendent ces lieux beaucoup plus sombres
 Que l'espaisseur des arbrisseaux.

Aupres de ce lieu solitaire
 Serpètent deux petits ruisseaux,
 Qui du bransle de leurs roseaux,
 Disent aux Corbeaux de se taire :
 Et puis coulans dans le vaisseau
 D'un marest qui reçoit leur eau,
 Ils flanquent en faueur des Cygnes
 Le petit Fort d'une maison,
 Où les glayeux plantez à lignes

4. *La Consolation*

Cachent la mousse & le gazon.

*Le me retire a ce riuage,
Pour y iouyr de la fraischeur,
Qui garde aux Cygnes leur blancheur,
Et les couure contre l'orage :
Là ie reçois vn grand plaisir
De voir le paresseux loisir
Des Herons qui tiennent la riuë,
Arrestans leurs yeux esbahis :
Afin que personne n'arrine,
Dont ils puissent estre trahis.*

*Le Cygne cherche sous sa plume,
Le feu qui le brusle dans l'eau,
Mais bien qu'il soit dans vn ruisseau,
Ce feu le brusle & le consume :
On croiroit que dans ces glaçons
Il pense desia les chansons,
Dont il prend congé de sa vie,
Alors que la rigueur du sort,
D'une voix triste le conuie
De gousier le fiel de la Mort.*

*Pendant qu'il medite sa game,
L'Air se dissipe tout en eau :
Sur ce melancholique oyseau,
Afin de moderer sa flamme,
Le roy croistre l'herbe & les fleurs,
De l'humidité de ces pleurs :
L'estang mesme bien que paisible
Crespe ses vagues doucement,
Et par vn frisson insensible,
Parle de son accroissement.*

*A peine ce petit murmure
Rend au marests son beau miroir,
Que i'y commence de renoir.*

On

Ou moy mesme, ou bien ma figure :
Je suis alors tout estonné
De m'y voir si bien crayonné,
Et me prenant pour mon image,
Je crains d'estre tombé sous l'eau,
Et pour esuiter le naufrage
Je me saisis d'un arbrisseau.

Ce marest joint un precipice,
De qui le fond semble chercher
L'endroit où le cruel rocher
Roule Sisiphe à son supplice :
Là j'entens bruire le courant
De ce fleuve, dont le torrent
Ne traîne que souffre & que flamme,
Et qui noye le souvenir,
Tout aussi-tost qu'une pauvre Ame,
Se voit contrainte d'y venir.

Cette agreable tromperie
Charme tellement mon humeur,
Qu'un iugement sage & tout meur
Ne vaudroit pas ma resuerie :
Tout ce qu'on cherche du desir
Est mon extrême desplaisir,
La nuit, l'ombre. la solitude,
Les sospirs, les gémissemens
Plaisent à mon inquietude,
Et font tous mes contentemens.

I. P R O S E.

Voilà le triste & inutile diuertissement de mon
esprit, lors que la douleur & le travail fai-
soient de plus fortes impressions sur la constance.

Vn iour que ie m'entretenois des mesmes pensées, & que mon imagination alloit reprendre les plus agreables obiects de ma solitude, j'apperceus aupres de moy vne Dame, dont la majesté me donna autant de respect que sa douceur me causa de ioye. Je ne veux pas nier qu'un abord si impreueu me fust suspect, & que dans les premiers mouuemens de mon ame, la crainte me fit apprehender, qu'on ne voulust tenter ma vertu. Mais enfin ayant remis mon esprit en estat de iuger, ie reconnus qu'elle n'estoit pas vne de ces funestes & criminelles Beutez, qui ne nous descouurent leur esclat, que pour nous allumer de leurs flammes: Son visage monstroit toutes les graces qui peuuent composer cette partie, ses yeux auoient de la douceur, mais ils auoient de la modestie; s'il paroissoit du blanc & du vermillon sur ses jouës, il y paroissoit beaucoup plus d'innocence & de pudeur: si sa bouche sembloit dire qu'il falloit aimer, sa gravité declaroit aussi-tôt que c'étoit quelque autre chose qu'elle. Ce qui me confirma dans cette pensée fut d'appercevoir que la terre qui soustient les hommes, luy estoit inutile, d'autant qu'elle étoit tellement portée dans l'air, que mesme elle ne la touchoit pas de l'extrémité de sa chaussure. Quoy que la hauteur de mon cachot ne s'esleuât gueres au dessus de ma teste, la sienne sembloit atteindre le Ciel & les Astres. Ses habits n'auoient rien de nos estoifes, ny de nostre mode. Vn nombre infiny de ces fleurs, qu'on ne void point dans nos parterres rehaussoit le fond de sa robe plus blanche que la neige. Quoy que ma curiosité m'en descouvriit beaucoup, les replis de ce vestement en desroboient bien d'auantage à ma veüe. Vne riche agraffe arrestoit vn manteau bleu sur ses espauls: Sa figure étoit d'un Soleil, dont les rayons

rayons enfermoyent au centre de leur cercle le grand nom I E H O V A , travaillé avecque tant d'artifice, que la trempe & l'esmail de nostre Oufvèrerie ne fait pas même vn rude crayon de cette delicatessè. Grand nombre d'estoilles d'or, ou d'vn metal plus fin, parsemoit l'azur de ce riche manteau. Vne Tiare esclatante de mille pierreries estoit le seul ornement de sa teste. Au dessus de tout cét habit flottoit vn crespè extrêmement delié, mais quoy que sa tissure fust delicate, si ne laissoit-il pas de rabattre vn peu de l'esclat & des lumieres qui sortoient de ce magnifique vestement. Sa main gauche soustenoit vn Liure, dont vne des faces paroissoit vieille & l'autre toute neuue. Pendant que l'admiration me tenoit attaché à considerer tant de merueilles; cette auguste Deesse mē toucha fort legerement de la main, & me dit. Je voy bien, Celestin, que ie ne suis plus de ta cognoissance, & que les autres amis que tu as faits ont effacé de ta mémoire le souuenir de celle que tu cherissois auparauant, avec de constantes & de tendres amours. Comme ie m'ouïs appeller de mon nom, ie portay la main à mes yeux: comme si i'eusse pû escarter les nuages de mon ame, en desfilant mes paupieres. Mais hélas! mon auuglement estoit interieur; & ce remède ne touchoit que le dehors, toutesfois ne voulant pas entierement paroistre stupide; ie luy parlay en ces termes. Madame; vous me pouuez pardonner cette ignorance; puis que mes trauaux sont venus à tel excez, que ie ne me connois pas moy même. Cela même(repartit elle) que tu ignores ma qualité, fait que tu as perdu cette importante connoissance: bon couraige neantmoins; ton mal peut guerir; ie veux croire, que celle qui t'a fait autrefois connoistre Dieu, te sçaura bien tirer de

ce dangereux auëuglement. A ces mots , comme si ie me fullè resueillé d'un profond sommeil , où mon esprit & mes sens eussent esté également liez, ie commençay de comprendre que celle qui me parloit, estoit la Theologie, dont l'agreable conuersation m'auoit fait goulter de si douces heures. Veritablement ie ne scaurois dire tout ce que ie fis alors ; le transport de ma ioye fut si prompt & si rauissant, que ma raison surprise n'en peut reconnoistre ny regler toutes les faillies. La Physique n'auoüe point de mouuement d'une extremité à l'autre, sans y auoir un milieu, qui soit le passage commun de toutes les deux. La Morale des Philosophes ne veut pas aussi que l'on passe d'une passion à son contraire, sans toucher un point également desgagé de l'un & de l'autre. J'appris alors que celle de Iesus-Christ auoit d'autres secrets, & que comme il est des ames, qui des miseres de cette vie s'esleuent à la iouissance de la gloire, sans souffrir les flammes du Purgatoire, qui est le milieu de ces deux vies, il arriuoit aussi qu'on étoit par fois transporté d'une extrême tristesse à une excessiue ioye, sans que l'esprit fît aucune pause dans l'estenduë de ces mouuemens si contraires. Ah ! que ie sentis de doux transports, à la veüe de celle que j'auois ardemment aimée depuis ma premiere ieunesse ! Un enfant ne sauore pas de plus charmans plaisirs entre les bras de sa mere, que ceux que ie goustay me voyant à ses pieds. Aussi-tost que la ioye me permit de parler, ie me iettay à terre & luy fis ce discours, Quoy, ma bonne Maistresse, daignez-vous bien penser au plus miserable de vos disciples ? n'avez-vous point apprehendé l'horreur de ma prison, & les incommoditez qu'on y souffre ? Peut-estre que vous auez conspiré contre le Ciel, que vous quittez, & que

que vous ne venez pas tant icy pour consoler mes peines, que pour y souffrir celles qu'on vous ordonne? Je sçay trop combien vous estes attachée d'inclination au Dieu que vous adorez par deuoir, pour craindre vn semblable desastre. Quel sujet vous amene donc dans ce cachot? Ne croyez-vous point entrer dans ce Cabinet doré, où vous trouuiez à Rome ~~vn~~ image du riche Palais que vous habitez dans le Ciel? Possible pensiez-vous me rencontrer dans ce magnifique Throsne, où ie representois vn Dieu visible, parmy les Cardinaux, comme au milieu de mes Seraphins, Madame, vous ne verrez point icy de dais ny de balustres; vous n'y trouuerez pas mesmes ces riantes prairies, ny ces belles allées, que la Nature me dressoit de Cyprez & de Sapins au milieu de mon desert. Voilà tout ce qui me reste des magnificences de la Cour de Rome: voilà le seul partage qu'on m'a fait du monde. Mon cher Disciple (repâtit la Sapience) tu sçais bien que j'ay autant aimé Pierre de Moron, que le Pape Celestin, & que iamais l'esclat ny la pompe de ta dignité ne m'a fait considerer ta personne. Ie t'ay suituy à Naples, ie t'ay accompagné dans le Vatican; ie l'auouë: mais qui me peut blasmer de t'auoir abandonné dans les forests & parmy les bestes sauvages? J'ay fait cas de ta personne, lors que les Roys te faisoient escorte, mais ie ne t'ay pas mesprisé quand la rage de tes ennemis poursuivoit ta vie. Non, non, ie ne pretends rien aux droicts des Hommes du temps & de la mode, mon affection ne s'appuye pas des interests de la Fortune: tandis que tu seras vertueux, tu seras mon amy. Bien d'auantage, ie veux que ce qui ruine les amitez du monde, cōserue la nostre, & que ton infortune soit la seule attache de mon cœur. Il ne tiendra qu'à toy de

m'auoir tousiours en ta compagnie, rien ne m'en peut separer que le mespris de mes conseils ou l'inconstance de ton ame. Madame (repris-ie aussi-tost) vous me donnez dans l'offre que vous me faites, l'assurance de ne me quitter iamais. Au moins vous puis-ie protester, que ie me sens disposé à reietter plustost toutes les delices de la terre, que le moindre des contentemens qu'on tire d'une seule de vos paroles. Ne faudroit-il pas que j'eusse oublié les trahisons du Monde; pour y tourner mon cœur & mes pensées, au preiudice de la fidelité que ie dois à vostre seruice? Pouruen que ie vous puisse posseder, ma fortune est assez grande: pouruen que vous vous souueniez de vos promesses, ie suis assuré de ma consolation, puis qu'il vous est aussi aisé d'adoucir mes miseres, qu'il m'est impossible de les porter. Iusques alors, il n'estoit point entré d'autres lumieres dans mon cachot que celles que la Theologie y auoit apportées, ce qui luy auoit osté la veüe de tout ce qui estoit dans son estendue. En fin le Soleil s'y estant glissé par le mesme endroit, qui seruoit de porte & de fenestre, elle apperceut aupres de moy Epictete & Seneque. Comme elle les eut remarquez au manteau Grec, & à la robe Romaine, elle leur dit d'un ton de voix, qui declaroit assez & son despit & sa puissance. Ne sont-ce pas icy ces braues Medecins des ames, qui se vantent de rendre les corps insensibles? Sortez d'icy mal-heureux Empiriques, qui pensez auoir trouué de puissans remedes à nos maux, lors que vous prononcez quelque grande parole sur le suiet de nos miseres. Vostre insensibilité & vos Apathies peuent estourdir les ignorans, mais elles ne scauroient soulager les malades: ces beaux mots ont bien de l'esclat: mais ils n'ont point du tout de force.

Pauvres

Pauvres insensez, monstrez-moy ce Sage, qui rit dans le taureau de Phalaris ? où auez-vous veu ce courageux Misérable, qui chante au milieu de ses fers , & qui souffre les rasoirs & la rouë avecque ioye ? Marquez-moy vn seul frisson de fièvre que vous ayez arresté, iusques à regler l'impatience, ou du moins iusques à preuenir le desespoir ? Dites-moy si vous pouuez que vostre statuë de bois ou vostre homme de bronze , ayt regardé la douleur sans fremir & sans trembler de crainte ? Je n'ignore pas que vous auez quelquefois tenu bonne mine, & que la vanité a contrainct vostre exterieur qui auoit des spectateurs, pour desesperer vostre ame, qui n'estoit veüe de personne. Hors d'icy , trompeurs , ce n'est pas à vous de traiter cét infirme ; vous auez vous-mesme plus de besoin de prendre medecine , que de capacité de l'ordonner. Et puis se tournant à moy, elle continua de la sorte : Vrayement tu as bonne grace de chercher ta guerison aupres de ces graues Parleurs, que ie nommerois volontiers les Sophistes de l'esprit, comme il en est d'autres de l'oreille. Peut estre que ton ame eust tousiours esté enuveloppée de ces tenebres, si tu n'eusses approché la lampe de cét Idolatre, & qu'il falloist estre condisciple de Neron , pour apprendre des secrets vtiles à ta conduite. Mon cher Nourrison, ie ne scaurois te dissimuler mon ressentiment : j'ay honte d'auoir des Escholiers qui ne puissent estre les Maistres de ces Philosophes. Dis-moy franchement ce que tu penses ? ton silence me fait comprendre que tu n'es pas de mon aduis. Je consens que mon autorité ne fasse rien sur ton esprit : mais si ie te laisse ton iugement tout entier, ne me refuse pas vne responce sans obscurité & sans ambages. Ces scauans Medecins à qui tu as abandonné ton salut : ont-ils

guery

guery tout à fait ta maladie ? C. Vous reconnoistrez aisément de l'estat où vous me voyez, que ie suis encore dans toutes mes foiblesses. Th. Ils ont au moins leué la plus importune douleur de tes playes C. L'obligation que ie leur aurois, ne seroit pas petite, s'ils en empeschoient seulement les plus legeres pointes. Th. D'où vient donc que tu t'es adressé à eux ? C. Ie me suis laissé persuader à l'opinion commune ; qui defere beaucoup à l'estime de leur suffisance. Th. Tu parles sagement, le vulgaire des Sçauans fait grand cas des Stoïciens, mais les vrayes Doctes les ont tousiours mesprisez. L'Academie & les autres Escolles ont produit tant de solides raisons contre leur Apathie & leur insensibilité, que ie commenceray de la croire, s'il se trouue encore quelqu'un de leur secte. Et pour ne point toucher ce que l'ancienne Philosophie auance contre cette chimere, ie me veux seulement seruir de ce raisonnement. Ou Zenon & ses disciples pretendent que le Sage n'a point de passions, ou seulement qu'il n'obeyt pas à leur violence. S'ils veulent que le Sage soit tout à fait exempt de passion, voila vne statuë & non pas vn homme; s'ils assurent qu'il ne se rend pas à son excez, disent-ils autre chose que le commun des Philosophes ? ie t'en fais iuge. Que seruent donc ces grands mots, qui disent tousiours plus qu'ils ne disent ; puis qu'ils n'ont point de science particuliere, & que nous serions de leur opinion si nous parlions à leur mode. Voilà l'illusion de certains deuots du temps, qui pensent auoir d'autres secrets & des vertus plus delicatés que le reste des spirituels, parce qu'ils auancent des termes hors de l'usage ordinaire. Or que le sage des Stoïciens soit vne statuë, s'il n'a point du tout de passion, tu le comprendras, te souuenant que le

cœur

cœur humain est au milieu de son petit monde, comme vn vaisseau sur la mer. Il faut des vents qui le poussent & qui l'agitent, autrement il demeure immobile, & iamais il ne s'auancera vers le bien, qui luy est propre, ny ne s'esloignera du mal, qui luy est dommageable. Rien n'est absolument mauuais; tout ce qui possède l'estre a de la bonté: la ciguë qui tuë les hommes, nourrit certains oyseaux: le venin des serpens & le fiel des dragons n'est pas mortel à tout ce qui s'en approche. Neantmoins il est de certains Estres qui ont de telles inimitiez entr'eux, que l'vn est le souverain & dernier mal de l'autre. Pour cette raison Dieu a mis dans les animaux des connoissances & des desirs, qui les approchent de leur bien, & des auersions qui les esloignent de leur contraire. Mon humeur n'est pas de soupçonner les intentions d'autrui, qui me sont cachées; & partant puis que ces Philosophes n'ont pas nettement expliqué leur doctrine, ie ne veux pas croire qu'ils tiennent les affections de l'ame mauuaises. Quelle apparence que des personnes, qui sans doute ont eu la raison bonne, fissent vn outrage si sensible à la Nature, que de l'accuser d'auoir mis dans leurs ames des inclinations funestes, & criminelles? A n'en point mentir, il y auroit de l'iniustice en Dieu, de punir en vous des passions, que luy-mesme y auroit mises, & qui sont des qualitez de nature, & non pas des productions d'habitude. Ne seroit-il pas le mesme, qu'un Iuge qui glisseroit vn larcin dans la pochette d'un de ses hommes, afin de trouuer vn coupable. Il y a de l'impieté & du blasphemé, de penser si indignement de la bonté de Dieu. Mais quand il auroit traité les hommes avecque tant d'iniustice, que de souiller leur naissance de ces crimes inuolontaires, ne seroit-il pas

il pas croyable , qu'il auroit excepté son propre fils d'une loy si peu équitable ? Iesus-Christ a tremblé de peur, Iesus-Christ a souffert les douleurs, Iesus-Christ a souffert les frissons de la tristesse , il a eu des ennuis , des desirs , des craintes, & des amours. Il s'est attendri sur les miseres d'autrui , il a déploré les deffastres de Ierusalem, il a eu pitié de la femme adultere, il s'est mis en cholere contre les profanateurs de son Temple. Donc les passions ne sont pas mauvaises, & le sage n'en est pas exempt, puisque la Sagesse mesme y estoit sujette. Je sçay bien que pour marquer l'empire absolu , que le Sauveur du monde avoit sur les mouvemens de son ame , on les appelle autrement dans l'Eschole, mais pour changer le nó aux passions, on ne change pas leur nature. Quel aveuglement de vouloir persuader à des esprits raisonnables, que c'est vn crime de craindre d'offencer Dieu , de desirer de luy plaire , de ressentir les outrages qu'on luy fait, de se mettre en cholere contre les ennemis de sa gloire , & de se flaistrir de tristesse au rencontre de ceux qui brauent sa puissance ? Je ne me serois pas arrestée à combattre vne erreur que les Peres & les Conciles ont condamnée , si les Stoiciens n'auoient donné que de l'admiration aux sottes testes. Oüy, ie souffrirois que ces orgueilleux manquassent de respect pour les saintes Escritures : ie ne me plaindrois pas qu'ils eussent choqué les sentimens du Christianisme, pourueu qu'ils n'en eussent point corrompu les mœurs. C'est à regret que ie te parle d'une secte , qui est la mal-heureuse fille du Stoïsme. Tu n'ignores pas, que nos Adamites tiennent les maximes de cette extravagante Philosophie, & qu'ils veulent que le Fidele de Iesus - Christ soit aussi insensible que le Sage de Zenon. Il est vray qu'ils donnent d'autres fondemens à leur

à leur Apathie , mais qui ne void , que feignants de releuer l'excellence de la grace, ils taschent d'en supprimer le merite ? Voicy leur discours. Pour ne point deshonorer la grace du Messie , il luy faut accorder la mesme force qu'auoit l'innocence originelle , puis qu'apres la cheute d'Adam, elle luy a esté substituée. Or il est certain que cette premiere iustice estoit dans l'Homme auecque autorité de Reyne , qui tenoit tous les mouuemens de l'ame tellement souples à la raison , que c'estoit plustost vne troupe d'esclaves attachez, qu'une ligue de sujets rebelles. Et partant la vertu du Sauueur reprenant dans l'Homme la place de cette innocence , ne seroit-ce pas l'accuser de foiblesse de croire que la chair luy pût former des obstacles au bien, capables d'en diuertir la poursuite ? Quoy que le diuin Apostre qui estoit vn vaisseau plein de cette grace, criast qu'il sentoit dans ses membres vne loy contraire à la loy de l'esprit : quoy que l'experience leur fist voir dans les cheutes ordinaires des pecheurs, qu'il se souleue dans la chair des mouuemens ennemis de la grace : quoy que la raison leur dit, que le merite de Iesus-Christ donnoit vn secours à nostre liberté , & non pas vn tyran , ils vouloient que la grace rendist l'Homme impeccable , si elle le rendoit vertueux. Le froid & non pas la pudeur les obligeoit de couvrir leurs Corps : les habits leurs estoient des reproches aussi honteux, que les fueilles de Figuier le furent à vostre premier Pere. O Dieu ! faut-il que ie me souuienne de ces monstres ? c'estoit vn plus enorme crime d'entrer dans l'Eglise vestu, que de n'y aller point du tout. Tu ne sçais que trop combien l'impudence de ces ames brutales a causé de blasme aux Chrestiens ; comme si l'aveuglement de ces infames Gnostiques eût esté la veritable de-

Graine

ctrine de l'Eglise. Et pour reuenir à cette insensibilité, que j'ay dit venir de l'Escole de Zenon, il est vray que le diable cauſoit quelque froideur dans les Adammes au commencement de leurs ſales aſſemblées : mais enfin l'iſſuë faiſoit connoiſtre qu'il ne iettoit cette eau ſur la braiſe, que pour allumer vne plus criminelle flamme. De Philoſophes Stoiciens, ils deuenoient Cyniques avecque tant d'effronterie, que le plus vilain eſtoit le plus deuot. Que ſi les pretenſions de tous ceux qui adorent cette ſecte d'inſenſibles ne ſont pas ſi ſales, elles ſont touſiours mauuiſes, puis que la fin de cette Philoſophie ne regarde que l'oſtentation & la vanité ; ſon deſſein, non plus que ſon pouuoir n'eſtant pas de trouuer vn remede aux playes de l'eſprit, mais ſeulement de les couvrir d'un plaſtre. Et ainſi ils n'oſtent pas la douleur & les autres affections de l'ame, mais bien leur nom du Dictionnaire, appellans ioye, ce que les autres nomment volupté, & preuoyance, ce qu'Ariſtote appelle crainte. N'auois-tu pas choiſi de rares Medecins, qui penſent auoir guery vn malade, quand ils luy ont dit avecque deux ou trois ſentences ; que l'Homme ſage ne ſouffre rien, & que ce qui deſchire ſes entrailles ne touche pas meſme ſa peau ? Veux-tu que ie te die ce que tu as fait lors que tu t'es adreſſé à eux ? ce que fait vn pauvre malade, qui ne pouuant aualler le ſené & la rhubarbe, s'amuſe à ſuccer vne pomme, qui ne fait qu'irriter ſa fièvre. Ce n'eſt pas chez Epiſtete ny chez Senecque, qu'on rencontre la guerison de l'ame, il eſt auſſi difficile de trouuer d'vtils remedes dans leurs conſeils, qu'il eſt aiſé de choiſir de beaux mots dans leurs eſcrits. Apres auoir prononcé tout ce diſcours avec vne émotion, qui marquoit aſſez ſon deſplaiſir, elle me monſtra vn Crucifix, qu'elle

qu'elle avoit tenu caché iufques alors, adiouftant ces belles paroles ; Celestin , voilà veritablement la patience, oüy Celestin, voilà la patience. C'est au pied de cette Croix qu'il faut chercher la confolation de tes fouffrances : c'est dans les playes de cét Innocent, où l'on peut trouver le remede des plus redoutables peines. Et puis comme elle eut arresté quelque temps fa veüe sur ce pitoyable objet , elle ouvrit fes yeux aux ames & la bouche à cet amoureux Colloque.

II. P O E S I E.

L'H. *Miracle plein d'amour, amour plein de miracle !
Glorieux deshonneur , honorable spectacle,*

Cher & triste objet de pitié !

Combien nous faut-il de richesses

Pour payer vos detresses ?

CH. *Je meprise vos biens , ie veux voftre amitié.*

L'H. *Souffrez-vous que la mort attaque voftre vie,*

Et que par tant de maux elle vous foit ravie ?

Crüel Deflin , rigoureux fort,

Denois-tu faire ces outrages

Au plus beau des ouvrages ?

CH. *Accufez-en l'Amour , n'en blafmez-pas la Mort.*

L'H. *Pourquoy regardez-vous cette funefte Terre,*

Qui ne merite rien que l'efclat du tonnerre ?

Donx Sauveur regardez les Cieux.

CH. *Ah ! ie le ferois, fi ma haine,*

S'efgaloit à ma peine,

Mais poffedant mon cœur, elle a droit à mes yeux.

La Consolation

*L'H. Mais pourquoy couronner vostre teste d'espines,
Pour qui les diamans & les perles plus fines
Se doivent façonner en fleurs ?*

CH. Ne cherchez point à ma victoire

De plus illustre gloire :

Je suis moins vostre Roy, que l'Homme des douleurs.

*L'H. Et d'où vient que l'amour vous ferme les paupieres,
Et vous ouvre le flanc ? escoutez mes prieres,*

Foible & redoutable vainqueur :

CH. Cette conduite est legitime ;

Pour ne point voir ton crime,

L'amour ferme mes yeux, l'amour ouvre mon cœur.

*L'H. Pourquoi nous tenez-vous vos belles mains d'ivoire,
Demandez-vous le prix de la grande victoire,*

Dont l'effort vient de terrasser

L'enfer & toute sa puissance ?

CH. Ma seule recompense,

Comme mon seul desir, c'est de vous embrasser.

*L'H. Pourquoi permettez vous que ce fer vous attache,
Et que dans vostre sein une lance se cache ?*

CH. Ma lance vous doit entamer,

Ces cloux vous donnent assurance,

De ma perséuerance,

Et que ie suis constant, quand il faut vous aimer.

*L'H. Mais quoy ? pour meriter nostre reconnoissance
Avez-vous deu choisir une infame potence ?*

CH. Sans doute l'Homme à cette fois,

Cette preuve étant authentique,

Se declare Heretique,

S'il doute de mon cœur, en regardant ma Croix.

L'H.

L'H. *Et quoy ne pouviez vous persuader la flamme,
Qui briſoit voſtre cœur & conſumoit voſtre ame,
Sans qu'il fuſt beſoin de mourir ?*

CH. *Et quoy ? ne ſais-je pas le Maître,
Qui doit faire connoiſtre,
Et comme il faut aimer, & comme il faut ſouffrir ?*

II. PROSE.

LA Sapience ayant prononcé les derniers mots de ce beau Dialogue, elle poſa la Croix qu'elle tenoit, ſur l'Autel, & me commanda d'adorer les ſouffrances de ce Dieu, que j'y voyois attaché. J'obeis, mais avecque tant de peſanteur, qu'elle comprit bien que la douleur ne me laiſſoit pas la moitié de mes forces & de ma liberté. Elle diſſimula neantmoins de connoiſtre les langueurs de ma deuotion, afin de n'eſtre pas obligée de m'en faire le reproche. Mais comme ſi elle euſt approuvé l'effort que ie me faiſois, elle me dit, Courage mon cher Nourriſſon, j'eſpere que ton mal ne tiendra pas long-temps contre ce remede. Madame, cela ſeroit bon, ſi ma douleur venoit d'une cauſe ordinaire, & qu'il peuſt y auoir de l'eſperance où il y a tant de malheurs. A ce que ie vois (reprit la Theologie en ſouffriant) te voilà dans l'Hôſpital des incurables. Mais dy-moy, eſt-ce la nature de ton mal ou l'indispoſition de ton eſprit, qui s'oppoſe à la puiffance des remedes ? il y a de mauuais malades à qui rien ne manque que la volonté pour guerir : mais comme s'il y auoit plus de peine à vouloir, qu'à ſouffrir, ils ne veulent pas ſeulement s'ayder d'un bon deſir, pour acquerir une ſanté parfaite. N'en as-tu iamais veu, qui entretien-

nent leur galle , & qui ayment mieux se grater des mois entiers , que de sentir pour quelques momens l'odeur du souffre & du mercure. Je n'ay garde de te soupçonner de cette lascheté, neanmoins ie ne scaurois t'excuser tout à fait ou d'ignorance , ou de foiblesse. Non, non, Celestin, il n'est point d'infortune ny d'accident , pour fascheux qu'on l'imagine , qui ne trouue sa medecine dans la Croix de ton Sauueur. Quelque serpent qui vous picque, vous estes assurez contre son venin , pourueu que vous ayez assez de tourage pour leuer les yeux à celui que la bonté de Dieu vous esleue dans ce desert. Toutesfois de peur que tu ne me soupçonnes de l'ignorance de ces Medecins , qui ordonnent des remedes sans ouïr leurs malades , il me plaist bien d'apprendre de ta bouche les infirmités de ton ame. Je sçay bien que les affligés ont assez d'eloquence, pour lasser l'attention des plus patiens , & que pour l'ordinaire ils parlent aussi long-temps qu'ils souffrent. Je me veux pourtant exposer en ta faueur , pourueu que tu me promettes de garder mes ordonnances , si tu les iuges vtils & agreables. Tu peux perdre vne partie de ton mal en le racontant , & pour moy , ie ne scaurois hazarder qu'un bien peu de patience en t'escoutant. A peine eut-elle achené de parler, que ie commençay ma harangue par mes larmes & mes souspirs, adjoustant comme ie peus ce peu de paroles. Madame, puisque vous me commandez de vous faire le triste discours de mes disgraces , ie serois aussi iniuste de les taire, que ie suis malheureux de les souffrir. Quoy que les prosperitez passées soient des douleurs presentes , ie veux bien me souuenir d'auoir esté Pape , pour vous faire comprendre que ie suis miserable. Je ne refuse pas de vous entretenir de l'excez de mes crimes, pour
vous

vous faire connoistre l'équité de mes peines. Mais avant que d'en faire la deduction & la recherche, ie consens qu'on exerce toutes les rigueurs de la cruauté sur ce reste de corps, que les austeritez m'ont laissé, si mes ennemis trouvent vne accusation, où il y ait tant soit peu de prétexte, & point du tout d'enuie. Qu'ils me prennent dès le berceau? qu'ils examinent mon enfance; qu'ils passent dans ma solitude, pour y chercher les meurtres que j'y ay cachez dans l'obscurité des forests; qu'ils entrent dans les spelonques, où j'ay vescu tant d'années, possible trouveront-ils là de quoy m'affliger. Il est vray que j'ay persecuté vn Innocent, & que l'austerité que j'ay pratiquée sur moy-mesme, m'a presque conuaincu de parricide. Ce crime receura peut estre quelque iour des recompenses de Dieu: & quand il seroit punissable parmy les hommes, ceux qui me poursuivent, ne doivent pas s'interessier à sa vengeance, puisque ie preuenois le dessein qu'ils ont de me faire mourir. Encore desire-riez-vous sçauoir ce que j'ay fait pour leur donner sujet de faire ce qu'ils font. On dit qu'il y a danger d'un schisme dans l'Eglise de Dieu, que ie puis appuyer vne reuolte contre Boniface, à qui j'ay quitté la Chaire de S. Pierre, & que l'opinion de ma vertu (pour ne rien dire de sa vie) peut seruir de motif à ce changement. Sans doute voilà vn accident qu'on doit apprehender: mais faut-il que ie sois vicieux, afin qu'il soit assuré? Voilà vn malheur qu'il faut empescher: mais où est le crime qu'on soit obligé de punir? Qui me sçauroit reprocher que j'en aye eu la pensée, ou donné le conseil? Ouy, mais si vous ne l'auiez fait, vous le pouuez faire: si vous n'en auez formé le dessein, vous en pouuez conceuoir le desir. Et bien, puisqu'on veut chastier des pensées, qu'on

B 3



n'aura iamais , & des pechez qui peuuent estre , ie consens que mes ennemis me chassent du monde ; qu'on me poursuiue comme vne beste sauuage , & si ce n'est assez , qu'on m'enferme dans vne cage de fer avecque les Tygres & les Pantheres. Ce chastiment est trop doux ; qu'on me prepare des rouës, qu'on me dresse des gibets, qu'on m'allume des brasiers, qu'on me creuse de nouueaux Enfers : Ie peux meriter tout cela : bien d'auantage, ie le merite ; puisque c'est assez d'estre capable d'une mauuaise action , pour estre iustement sujet à sa peine. Il n'y a point de sacrilege si enorme , que ie ne puisse faire : que s'il en est quelq'un hors de mon pouuoir , rien ne me scauroit empescher son desir. Ie peux vouloir le massacre de tous les Prestres d'Italie : ie peux souhaiter l'embrasement de tous les temples de l'Europe : ie peux estre Heresiarque ou Heretique ; & si Dieu ne m'assistoit de sa grace , ie peux hair sa bonté, & procurer l'aneantissement de sa gloire. Que s'il y a du crime, de pouoir estre meschant , que mes persecuteurs prouuent qu'ils sont bons , & ie prononce moy-mesme mon supplice. Il n'y a point d'innocence de vie , où il y a capacité de mal-faire : quiconque peut auoir de mauuaises pensées , ne scauroit souffrir d'iniustes chastimens. D'où il est aisé de conceuoir la rage de ceux qui m'oppriment : puisque ce n'est pas assez pour paroistre innocent de monstrier que ie ne suis pas pecheur , si ie ne prouue conjointement, que ie suis mesme impeccable. Peut-on mieux declarer l'enuie qu'on a de nuire à vn homme, que de l'obliger à faire voir qu'il est Dieu , afin qu'on ne l'estime point criminel ? A moins que de meriter les peines que ie souffre, ie ne dois pas ainsi chercher ma iustification. Ie ne pretens rien à l'impuissance de mal-faire, iusques
à ce.

à ce que ie sois dans cet heureux séjour , où nostre foiblesse n'aura plus de tentations. Mais n'ay-je point voulu reprendre ce que j'ay quitté ? Peut-estre seroit-il expedient à l'Eglise que ie l'eusse fait, & que ma simplicité seroit moins dangereuse à son repos, que les finesse de celuy qui la gouerne. Ce n'est pas neantmoins par là , que ie pretens de faire voir mon innocence ; j'ay consenty qu'on me traitast en rebelle : si j'ay tesmoigné tant soit peu d'inclination au changement, ie ne veux pas m'en desdire. A bien considerer les deportemens de ma vie , on ne me iugera pas ambitieux, quiconque voudra peser les soins que j'ay apportez , pour me defaire de la premiere dignité du monde , quand ie la pouuois retenir , ne croira pas que ie tasche de la reprendre , lors qu'il y a de l'attentat en sa recherche. Vous & ce grand Dieu , qui voyez mes plus secretes pensées , & à qui les abysses n'ont rien de couuert , sçauiez la verité de ma protestation. Pour en laisser le iugement à la posterité, j'en vais faire le recit, & que la haine & l'enuie me desmentent si ie déguise tant soit peu la verité. Toute l'Italie sçait que ie n'eus pas plustost aui de ce que le Conclaue auoit fait à Perouse en ma faueur, que ie m'efforçay d'éuiter par la fuite un honneur que ie ne croyois pas estre deu à mon merite. J'ay deux cens mille tesmoins de ce que ie dis possible si j'en eusse moins eu , que ie n'aurois pas esté Pape, & que ie serois encore fugitif. Mais Dieu me vouloit amener ce triomphe dans cette prison, & me preparer par l'éclat de cette pompe à l'ignominie de mes fers , & aux incommoditez de cette grotte. Je laisse, que pendant les dixhuiét mois de mon Pontificat , j'ay assez tesmoigné que mon cœur n'estoit pas dans le throsne où l'on m'auoit attaché. Les pe-

tiſes cabanes d'Hermites, qu'on void encore dans le Palais de Rome, prouuent la verité de ce que ie diſ, & mon ordinaire conuerſation avecque de pauſres Moines, eſtoit vne aſſez bonne caution, que mes aſſections appartenoiſent plus à la montagne de Moron, qu'à celle du Vatican. Si i'auois tant d'amour pour la pourpre, aurois-ie ſollicité avec tant d'ardeur le conſentement de mes amis, & l'approbation des plus ſçauans hommes de l'Europe, ſur le deſſein de m'en deſpoüiller? Aurois-ie fait vn Canon exprez pour declarer, qu'un Pape peut quitter ſa dignité, ſi i'eufſe eu quelque deſſein de la reprendre? Qui eſt aſſez auenglé pour ne pas voir que toutes ces precautions, ces diligences, & ces pourſuites ne pre-
tendoient que d'appuyer ma demiffion, & d'aſſeurer le choix de celuy qui deuoit monter apres moy dans le throſne? Ie m'eſtonne que ceux qui ont la veuë ſi bonne, & qui penerrent dans les intrigues les mieux meſlez, ne veulent pas regarder cela en ma faueur. Mais ſi i'ay deſiré de prendre la place de mon aduerſaire, pourquoy ne l'ay-ie fait? ie le pouuois. Encore y a-t'il bon nombre de Cardinaux à Rome, qui ſe peuuent ſouuenir, qu'il n'a tenu qu'à moy, & que Boniface ne ſeroit plus Pape, ſi i'eufſe autant eu d'en-
uie de poſſeder ſa Tiare, qu'il a eu de crainte de la perdre. Quasi tout leur College tenoit ſa pourpre de mon eſlection, beaucoup de graues Theologiens contredifoient mon deſſein: toute la France y formoit oppoſition: le Roy de Sicile, qui me pouuoit maintenir dans ma Chaire, me ſuggeroit des raiſons pour y porter ma reſolution. Et neantmoins toutes ces conſiderations ne pûrent changer ma volonté, n'y m'inſpirer vne penſée qu'on me perſuade eſtre fauorable à la paix de toute l'Egliſe. Adiouſteray-ie à cela
que

que le Chambellan de Boniface & l'Abbé du Mont Cassin estans venus à mon petit Hermitage , pour y faire office de Sergens plustost que la charge de charitables Pasteurs , ie leur iuray & fis vœu , pour asseurer leur Maistre, que ie ne parlerois à personne du monde qu'à mes Religieux. N'étoit ce pas assez de luy promettre que ie voulois estre muet , pour luy oster l'ombrage que ie voulusse faire des brigues ? Quoy que ces deux Prelats fussent tous à la pension de Boniface, ils virent tant de candeur dans mon procédé , & si peu d'apparence dans son soupçon, qu'ils iugerent qu'on me pouvoit laisser viure , & que la prison étoit vne precaution inutile pour vne personne , qui de son plein gré s'enfermoit dans les cauernes. Leur parole ne pouuant garantir ma promesse , le Pape renuoya vers moy vn second ambassade. C'est icy ma sainte Maistresse , que ie m'accuse moy-mesme d'auoir peché : au lieu de me declarer contre vn homme qui estoit odieux à tout le monde : & d'ouïr le conseil des Princes, qui me permettoient leur appuy, ie me sauuy la nuit dans vn bois, où ie courus quarante jours , sans oser paroistre à la campagne. Iamais chasse ne fut plus eschauffée contre les Sangliers & les Ours, que la recherche qu'on fit de ce pauvre vieillard. La forest n'auoit point de grotte asseurée pour moy ; les tenebres n'estoient pas assez obscures , on pénédroit iusques dans les trous des Renards pour m'y trouuer , on allumoit vn iour artificiel au milieu de la nuit afin de me descouvrir. Le matin il me falloit quitter la cauerne que i'auois choisie le soir , & comme si les antres & les rochers eussent conspiré ma ruine , ie ne m'osois fier vne seconde fois à la mesme retraite. Me pourrois-je souuenir sans larmes du triste équipage de cette fuite.

Je fus contraint pendant tout ce temps là de me déguiser en villageois pour n'estre pas connu. Quel spectacle de voir des hailions sur les espaules de celui qui auoit esté Vicaire de Iesus-Christ, & qui s'estoit autrefois paré des plus precieuses estoifes de la nature ? Tous ceux qui me virent en cét estat, ne me pouuans ayder de leur puissance, me consolèrent de leurs larmes, i'auoüe que ce qui d'abord a soulagé ma douleur, l'aigrit par apres ; & que i'eus vn sensible deplaisir de connoistre à l'œil, que i'auois assez de miseres pour faire pleurer tout le monde. En fin la diligence de mes ennemis m'ayant rendu tous les asyles de l'Italie sans seureté, ie me mis sur mer, pour chercher quelque Isle deserte, où ie peusse languir à repos le reste de ma vie. Cét element infidele ne fut pas plus fauorable à ma fuite que la terre, ie m'embarquay sur vn vaisseau, mais ce ne fut que pour aborder où vous me voyez. Aussi-tost que mon persecuteur eut appris qu'un coup de mer m'auoit jetté aux costes de Sicile, il donna commission au Patriarche de Ierusalem de me faire conduire en son Chasteau d'Anagny. Je n'ay garde de me plaindre du traitement qu'on m'y fit, ie dois compter l'accueil de ses parens, qui ne manquoient pas de seconder sa passion, entre mes bonnes fortunes, si ie les compare aux miseres de ce cachot. Affligeroit-on plus inhumainement vn homme qui auroit esgorgé vne douzaine de souverains Pontifes, qu'on toutment vn foible vieillard, qui n'a pû en fuir vn seul ? Voilà ma bonne Maîtresse, le sujet de mes tristesses : voilà ce qui achene de blanchir ma teste. Mais quand ie n'aurois pas leué par mon procedé les ombrages & le soupçon de mon ennemy, n'a-t'il pas dans ma première vie dequoy s'alleurer du mépris que ie fais de toutes

les

les grandeurs de la terre ? Peut-il ignorer , ayant veu ma conduite , les belles instructions que j'ay receües de vous en ma ieunesse sur ce sujet ? Qu'il considere si ma naissance m'a pû donner des sentimens de gloire, qu'il aille dans tous les antres de la Campagne & de la Pouille , sans doute il iugera, que le bois & les Rochers que j'ay cherchez toute ma vie ne m'ont point donné de si orgueilleuse pensée , que de vouloir estre l'usurpateur de sa dignité. Peutestre que les tenebres où j'ay toujours vescu , m'ont fait venir le goust de la pompe & de l'esclat de la Cour Romaine. Peut-estre que la longue habitude de m'estimer le moindre de mes Religieux me fait desirer d'estre le premier de tous les hommes. Veritablement s'il est ainsi, j'ay sujet de desplorer mon malheur, de n'auoir esté humble que pour deuenir le plus insupportable de tous les superbes. Mais pourquoy ay- ie donc quitté le Pontificat , lors que ie le possédois ? pourquoy ay- ie fait vn decret , pour en iustifier la demission, & rendre le choix de mon successeur Canonique ? Pour adiouster le mespris aux outrages qu'on me fait, on dit que ie suis simple, & que j'ay l'esprit assez foible , pour me laisser porter au changement : ie l'ay toutefois eu assez sage pour faire vne constitution, que mon ennemy approuue avecque des raisons & des Eloges. Ce seroit trop peu d'affliger mon corps, il faut que mon esprit s'en ressente, si ie n'estois stupide, ie ne serois pas assez malheureux. Aprez des outrages d'ennemy ie n'ay garde d'accuser l'infidelité de ceux qui tiennent leur pourpre & leur fortune de mes biens-faits. Je leur pardonne , d'abandonner vn affligé , qu'ils ne peuuent secourir, & qui a assez de maux pour les rendre tous miserables. Je veux mesme croire que leur affection est toute entiere, quoy que

que secrete, & que rien ne les empesche de se declarer pour ma defense, que l'inutilité de ce dessein. Je ne mets pas mes faueurs à si haut prix, que de les obliger de perir avecque moy, cette consolation-là me seroit vne nouvelle douleur. Tandis que quelqu'un de mes amis sera heureux, ie ne seray pas tout à fait miserable : au lieu de croire que j'ay des ingrats auprès de Boniface, ie me persuaderay que j'ay des Anges & de secretes intelligences. Je me flatte volontiers ainsi pour soulager ma peine ; mais certes, ie n'ay point d'illusion assez ingenieuse pour me consoler sur vne des circonstances de mon desastre. Celuy qui me persecute, outre le peu de suiet qu'il en a, s'il se veut souuenir de mes bons offices, a vne obligation toute contraire. Ne pourrois-je pas luy reprocher, qu'il tient de ma faueur le pouuoir qu'il a de me nuire, & qu'il ne seroit encore qu'un petit Clerc, si j'eusse tousiours voulu estre son Maistre ? Je ne veux pas neantmoins que cette consideration exagere son crime, & que celle de bonté augmente sa malice. Il est vray que les moindres ingratitude de ceux qui nous doiuent leur bonheur, passent pour de tres-sensibles iniures. Peut-estre que si ie n'auois point de plus grands maux à desplorer, ce seroit là le suiet de mes plaintes. Mais hélas ! ce qui touche Celestin, ne merite pas d'estre considéré, si le mal qu'on luy fait, n'estoit pas vn scandale public, ie me resoudrois à la patience, si les interets de Dieu & de son Eglise ne souffroient rien, ie craindrois de la vanité & de la complaisance dans mes desastres. Que penseront les ennemis de l'Euangile, quand ils apprendront les dommages que le troupeau de Iesus-Christ aura receu de son propre Pasteur ? L'impieté qui n'a pas mesme du respect pour les plus innocentes actions,

actions, me dira-t'elle point, que celuy qui gouerne aujourd'huy l'Eglise, est plustost Vicaire de ses premiers tyrans, que de son Sauueur ; Autrefois on a veu des Papes à la chaisne & dans les prisons, mais c'estoit Herode, Neron, ou Theodoric qui les y tenoient. Que sera-ce si les idolatres accusent la Religion des defauts de ses Ministres & s'ils viennent à douter de sa saincteté en voyant nos crimes? Nostre grand Dieu n'aura-il pas suiet de nous faire la mesme plainte, que Iacob fit autrefois à ses enfans ; & de reprocher à ses Prestres, qu'ils ont deshonoré son nom parmy les Nations ? Que mes persecuteurs soient assez adroits pour empescher que la mauuaise odeur de cette action ne sorte point de l'Europe, ils n'arrestent iamais le murmure des libertins. Toute l'Italie est pleine de mes malheurs, il n'y a personne qui ne connoisse mon innocence, & qui n'accuse l'indignité de mes supplices. S'imaginer que la consideration de leurs personnes retienne les langues, c'est trop se promettre de leur discretion, & supposer beaucoup de vertu, où il y a tousiours eu trop de liberté. Plaîse à la bonté de nostre grand Dieu, que l'impieté des hommes ne fasse point douter de sa iustice, & que la bonne fortune des heureux scelerats ne contraigne iamais le pauvre Celestin d'ouyr ce funeste langage. Il n'y a point de pouuoir de vanger les sacrileges dans le Ciel, ou du moins il n'y a point de iustice des bons, quoy que tout leur soin soit de plaire à Dieu, gémissent dans les miseres d'une languissante vie. Ce Ciel n'a des tempestes & des orages que pour eux, autant qu'ils rendent d'honneur à leur souuerain Maistre, autant en reçoient-ils de trauerses. Le seul trafic qui est entre luy & les gens de bien, est de seruices, & de respects, de souffrances
de

& de peines : toute la recompense qu'il rend à leur vertu, c'est de luy en donner des affronts. A voir comme il traite les innocens , on croiroit que leur merite luy deplaist, & que leur saincteté l'offense. Au contraire les impies , sans craindre le chastiment de leurs pechez , reçoivent les recompenses de la vertu. Toutes choses sont complaisantes à leurs projets : le Ciel qui deuroit vanger leurs impietez, fauorise leur desir. La fortune n'a point de mauuais accidens pour eux ; leurs champs & leurs vignes sont à couuert du mauuais temps & de la gresle ; leurs personnes & leur famille ne connoissent point les incommoditez de la vie. A voir l'estat inalterable de leur santé , on croiroit que leur corps est d'une autre matiere que la commune , ou qu'ils ont dispense generale de toutes les maladies. Ce qui monstre encore plus clairement, que la iustice de Dieu ne s'interesse pas beaucoup dans nos affaires , c'est que les meschans ne se contentent pas de recueillir la recompense des bons, mais encore ils les punissent par leur oppression , de leurs plus innocentes actions. Où void-on vne vertu dans le monde qui ne soit point affligée ? où trouue-t-on vn homme de bien , qui ne souffre, ou qui ne serue ? Le scelerat braue dans le throsne , & l'innocent gemit sous les fers , & puis on nous veut faire croire, que le Ciel regarde les deportemens des hommes, qu'il en recompense le merite, & punit les desordres : Voilà le mauuais discours que ie crains : voilà l'impiereté que i'apprehende. De moy qui suis le mal-heureux exemple qu'on peut produire sur ce sujet, ie n'ay garde de rendre mes sentimens à de si mauuaises raisons : si faut-il pourtant aduoüer , que si ie ne murmure , peu s'en faut que ie ne doute , & que si ie ne tombe, ie chancelle. On me doit pardonner cette foiblesse,

foiblesse , puisque Daud qui auoit beaucoup moins de miseres que moy, osoit bien adresser cette plainte à celuy qu'il sçauoit veiller à sa deffense.

III. POESIE.

*Arbitre souverain du Ciel, & de la Terre,
Qui pesez iustement les œuvres des Mortels,
Et quoy vostre iustice à qui sert le tonnerre,
Permet-elle qu'on dresse aux crimes des autels ?
Que le vice triomphe, & la vertu gemisse,
Que l'impie ait la paix, & le bon le supplice,
Et que l'iniquité se vante désormais
Qu'il faut estre des siens, pour viure sans detresse ;
Grand Dieu ! ie suis contraint d'adnouër ma foiblesse,
Le bon-heur des meschans inquiete ma paix.*

*Mais quoy ? Dieu d'Israël dont la bonté Divine
A fait goûter aux bons ses liberalitez,
Voulez-vous qu'il soit dit qu'une troupe mutine,
Ioüyssse pleinement de vos prosperitez ?
Seigneur , lors que ie veux comprendre vos iustices,
Mes pieds à chaque pas trouuent des precipices,
C'est en vain que mon zele enflame ses ferueurs,
Contre l'impieté ma plainte est inutile,
Les meschans a souhait viuent sous vostre azile,
Et m'apprennent qu'ils sont l'objet de vos faueurs.*

*Le voy que la nature applique son estude
A destourner leurs yeux des mescontentemens ;
Et pour flater l'aigreur de leur inquietude,
Elle fait à leur gré de nouueaux elemens :
Si de loing elle void que rien les importune,
Elle change soudain leur mauuaise fortune,
Et les comble si bien de tout contentement,*

Qu'ils

de la Theologie.

3

Ce n'estoit pas assez que leur langue rebelle
Eust passé sur les maux qui sont en ces bas lieux,
Encore falloit il que leurs bouches infidelles
Espanchast son venin iusques dedans les Cieux,
Et que Dieu (disent-ils) connoistroit nos pensées?
Acheuons a souhait nos festes commencees,
Fut-il iamais de Dieu, qui nous ayt empesché
De rendre nos momens de solides iournées,
Et goustier a loisir l'heur de ces destinées,
Qui nous rendent heureux apres auoir peché.

Et ie dis a mon ame , a quoy bon tant de zele?
Tes souspirs redoublez ne te seruent de rien,
Si tu veux estre heureux, il faut estre infidelle,
Et faire tout le mal pour auoir quelque bien:
Voy comme les meschans par excez d'injustice,
Font croistre leur bon heur avecque leur malice :
La crainte de la mort ne les estonne pas,
Car si bien quelquefois dans le cours de leur vie,
Ils souffrent quelques traits d'une funeste enuie,
Ils trouuent du support, mesme dans le trespas.

III. PROSE.

COMME la douleur eut arresté mes plaintes , la Theologie feignant que ma liberté luy étoit agreable , me demanda : Et bien, mon cher disciple, as-tu dit tout ce qui t'afflige ? surquoy , ie repartis, Madame , ie serois sans doute importun de vouloir vous entretenir de tous mes maux , & certes comme i'en ay beaucoup plus que ie ne scaurois souffrir, aussi en ay ie beaucoup dauantage que ie n'en puis expliquer. Quoy que ie sois plus eloquent que fort , ie

C

trouue dans cette conioncture , que i'ay aussi peu d'eloquence que de force. Veux-tu (reprit la Sapience) que ie fasse clairement voir que tu as moins de miseres que d'impatience , & que c'est toy-mesme qui te blesse , lors que tu crie qu'un autre te frappe ? C. Quoy ma bonne Mere ? me voulez-vous faire croire que ie suis heureux parmy les fers ? Th. Nenny, puis, que tu ne le veux pas estre, mais bien que tu n'es pas à beaucoup près si affligé que tu penses. C. Sans doute il manqueroit quelque chose à ma douleur , & mon infortune n'auroit pas toute sa perfection , si vous qui la deuriiez consoler, ne l'augmentiez. Ne voulez-vous point que ie m'auouë criminel , pour me persuader que ie ne suis pas miserable ? Th. Tu parles comme tous les impatiens : quand on ne flatte pas leur mal , on les persecute : ie n'ay iamais dit que ta plainte fust iniuste , ny accusé le ressentiment que tu as de tes peines. A moins que de me declarer d'une Secte que i'ay combattuë, ie ne scaurois te desirer insensible. Je ne pretens pas mesme de te persuader ce veritable paradoxe du grand Chrysostome : que personne ne peut estre offensé que de soy mesme : & que nous nous faisons tout le mal que nous souffrons : Ce que ie veux , C'est apres t'auoir auouë , que la persecution de tes ennemis est iniuste , te montrer qu'elle n'est pas grande ; ainsi que tu dois apporter de la moderation à tes plaintes, ou souffrir qu'il y ait tant soit peu d'aigreur dans ma censure. Je ne dis point que si tu n'es le criminel du Pape , tu es celuy de Dieu, qui le peut aussi legitiment choisir pour Ministre de sa Justice , que pour dispensateur de ses misericordes. Je laisse que tes pechez pour petits qu'ils soient , sont tousiours plus grands que tous les maux de ta Nature. Je maintiens seulement , qu'il y
a de

a de l'excez dans ton murmure , & non pas dans la haine de Boniface. Pourueu que tu connoisses encore la raison , tu ne me scaurois contredire. Dequoy te plains-tu ; ce Pape t'a fait sortir de Rome , en cela il exécute ton dessein, il obeit à ton desir. Combien de fois as-tu accusé ta condition , lors que les Roys & les Princes se traïsnoient à genoux, pour te baiser les pieds ; Combien de fois au milieu de la foule & parmi les acclamations du peuple as-tu souhaité le repos & le silence des forests ? Tu ne parlois que de ta cellule , de retraite, de la douceur du desert, & de la paix de ton petit Hermitage. Pourquoi t'affliges-tu ? on te procure ce que tu as demandé. Si la compagnie des hommes est vn mal , comme tu l'as souuent dit , tu possèdes vn bien dans la solitude , personne ne vient icy en interrompre ton repos : toutes les Creatures respectent le commerce que tu as auecque le Ciel. Pourrois-tu estre plus seul que tu es ? ta chambre est fermée à tous les mauuais accidens de la Fortune : les murailles qui te cachent au monde te recourent à ses disgraces. Tu ne vois pas les villes & la compagnie : aussi n'en vois-tu pas les desordres : aussi n'es-tu pas obligé d'en plorer les miseres. Oüy-mais on esloigne tes amis de toy ; en peut-on esloigner Dieu ? Celuy-là ne te suffit-il pas ? son entre, tien n'a-t'il point des charmes assez doux , pour te faire mespriser toutes sortes de compagnies ? A vray dire , celui qui ressent de l'ennuy dans ce doux commerce , n'a iamais gousté les delices de l'esprit. Mais en fin tu es banny de Rome & de Moron : tous les Monarques de la terre le sont de tous les lieux qu'ils n'occuperont pas. La France est bannie de l'Espagne, de l'Italie, de toutes les deux, & le reste du Monde du Chasteau de Fumon. Si ton persecuteur t'a decerné

ton exil en Champagne, marque luy le sien à Rome. De quelque cruauté que les hommes vsent en ton endroit, ils ne sçauroient te chasser que de la terre, quoy qu'à proprement se seruir des termes, ce seroit plustost te renuoyer dans ton pays, que te bannir, puisque nous ne sommes icy bas qu'Estrangers, & que le Ciel est vostre veritable patrie. D'où il t'est facile de comprendre que Socrate ne merite pas toute la loüange qu'on luy donne, pour auoir respondu à celuy qui l'interrogeoit de sa ville : Qu'il estoit du Monde. Je te prie considere vn peu l'aueuglement des hommes : ce que chacun d'eux nomme son pays, c'est l'exil de tous les autres, & ainsi Rome, où les Dieux ont iadis tenu leur Olympe, & où les plus honnestes gens de la terre demeurent maintenant, sert de bannissement aux Mores & aux Scythes. Dymoy, n'y a-t'il pas beaucoup de sages & de saints dans la contrée, où tu me voudrois faire croire, qu'il n'y a pas mesme des hommes ? Mais quand on n'y verroit ny la figure ny l'ombre d'une creature raisonnable, iamais elle ne sera deserte, puisque Dieu y est tousiours. Tous les Tyrans du monde ne vous sçauroyent separer de luy, il se coule au trauers des marbres & des murailles de fer, pour consoler ses seruiteurs : l'horreur des plus noires prisons ne l'empesche pas de leur tenir compagnie, & de soustenir de ses Toutes-puissantes mains, les chaines qui les oppriment. Quel bon-heur a vn homme de bien d'estre tiré de la foule & de se voir dans vn lieu, où rien n'interrompt l'entretien qu'il a avecque Dieu ? Ne me parle point de ton cachot & de tes fers, c'est vne faueur que tu tiens de tes ennemis. Que si la prison est vn mal, la plus petite est la meilleure, si vos chaines empeschent vos courses, elles empeschent

pareillemen

pareillement vos cheutes. Mais de grace, monstre-moy les fers & la prison de ton esprit, où sont les menottes qui lient le vray Celestin ? où sont les cordes, qui attachent ta volonté ? Que si tu es libre de cette principale partie de toy mesme, pourquoy te plains-tu que tu es à la cadene ? Le voy bien que tu ne fais cas de l'homme que des yeux, puisque retenant toute la liberté de ton ame, tu te plains encore que tu es captif ? Quoy, Celestin ? n'est-il plus qu'un peu de chair & d'os ? ne possède-t'il plus rien de ce grand interieur, qui le rendoit capable de l'immensité, & de toutes les perfections de son Createur ? Passons à l'avantage de la foiblesse humaine, que ce que vous appelez mal ait la nature du nom que vous luy donnez, ie maintiens pourtant que vous estes aussi iniustes de vous plaindre des maux que vous souffrez, que vous estes ingrats de ne pas rendre graces des biens que vous recevez. Certainement i'ay de la peine de trouver tant soit peu d'équité dans vostre conduite : le Ciel se resout continuellement en manne & en benedictions sur vos testes, & personne n'y leve les yeux, parfois s'il en coule quelque petite disgrâce, tout le monde murmure. Qui remercie Dieu de ce que tous les iours il nous donne le iour, de ce qu'il regle les saisons, qu'il couvre la terre de beautés & de richesses, qu'il fournit aux delices & aux necessitez de la vie, de ce qu'il comble les corps & les esprits de biens, de santé, de vertus, & de sagesse ? Il faut avouer à la confusion des hommes, que ces faueurs tombent à terre, & qu'à Dieu faire, & perdre les bien-faits, c'est vne mesme chose. Et toutesfois si vne petite fièvre s'allume dans vne ville, si la peste attaque quelque coin de Prouince, bien moins que cela, si la gresle tombe sur un champ, ou qu'elle ruine

vne vigne, le Ciel n'est plus que d'airain & de bronze. On accuse Dieu qui est l'amoureux-pere de ses enfans, d'en estre l'assassin & l'homicide. Cette consideration n'est pas tellement dans la generalité que tu n'y puisses prendre part : oserois-tu dire que le Ciel t'ait fait dauantage de maux que de biens , & neantmoins tu as plus de plaintes que de reconnoissances ? Ie ne te parle point de ce culte, & de ces hommages que tu as receus pendant les dix huit mois de ton Pontificat : non, ie ne veux pas te reprocher les respects du Conclau & de toute l'Eglise , pour te faire condamner tes larmes. C'est assez pour comprendre le motif de ton obligation, de rapeller cette iournée , qui te fit voir deux puissans Monarques à tes pieds , & qui donna deux cens mille tesmoins à ton triomphe. Tu n'auois garde d'accuser le Ciel de dureté, quand tu faisois du petit Dieu à Naples , y creant tes Cardinaux. O ! que tu étois alors de bonne intelligence avec la Fortune ? Mais pour ne point considerer vne grandeur que tu fais gloire de mespriser , ne contes-tu pour rien vn nombre infiny de miracles que tu as fais en te iouant : cette presence visible des Anges qui t'ont fait escorte , ne merite-elle point ton souuenir ? As-tu oublié que Dieu t'a cent fois visité dans ton desert ? qu'il t'entretenoit familièrement, & que pour t'animer dans la poursuite de la vertu , il faisoit vn Paradis de ta solitude ? Ie consens que tu perdes la memoire de toutes ces faueurs , pourueu que tu te souuiennes de la douceur avec laquelle il prenoit luy mesme soin de ton instruction. Mon cœur se fonde de ioye, quand ie me represente d'vn costé Celestin demy-mort & glacé comme vn poisson dans vne fosse , & d'autre-part, que ie vois & entens Iesus-Christ qui le console de sa dou-

le us

leur, & qui le blasme amoureusement de son trop de ferueur. Iugeant avec équité du merite des choses, quelles souffrances peux-tu comparer à cette diuine faueur ? Mais quand ie n'aurois pas dans cette seule cauerne dequoy vaincre toutes les incommoditez de ta vie, i'y trouuerois au moins dequoy en adoucir les ressentimens, par la comparaifon de ce que tu souffres d'autrui, & de ce que toy-mesmes as inuenté à ta propre ruine. De grace dis-moy, y a-t'il rien dans ta vie presente, qui esgale les rigueurs de ses cruelles austeritez ? quoy que ta chambre ne soit que de trois ou quatre pas, elle a de longues promenades, si tu la mesures à ce tombeau où tu estois enseuely. Et si l'abandon de tes amis & la pauureté de ta vie touchent ton esprit, rappelle dans ta memoire, ie te prie, la compagnie que tu auois dans ton hermitage, & les delicates viandes dont tu entretenois la friandise. A ne rien dissimuler, tu condamneras ton impatience, & confesseras que le plus cruel persecuteur de Celestin a esté Celestin mesme. Ie pourrois de cette veritable reflexion tirer vne grande preuue de l'amour propre, qui vous fait trouuer bon tout ce qui vient de vostre choix, & insupportable ce qui depend de la volonté d'autrui. O ! qu'il y auroit bien d'auantage de merite à receuoir avecque patience ce que Dieu ordonne ou permet de vos peines, que de vous aneantir vous mesme d'austeritez & de ieunes. Vous seriez simple au dernier point de croire que vos haïres, vos cilices & vos chaînes de fer fussent plus agreables au Ciel que les moindres souffrances qui partent de sa disposition. Auriés vous donc oublié que les ieûnes & les Festes, les Iuifs furent reprouuées, parce qu'il y auoit d'auantage de leur volonté, que de celle de Dieu dans leur morif

Sur la fin de cette longue & ennuyeuse deduction de
tes maux , tu as finement donné vne atteinte à la Iu-
stice: ie pardonne cette faillie à la violence de ta dou-
leur, quoy qu'elle fust mesme digne de supplice dans
ces libertins dont tu feins d'apprehender l'insolence.
Ton esprit n'est pas capable maintenant d'une verité,
qui est de la seule intelligence d'une ame tranquille
& toute exempte de trouble. Possible que mon dis-
cours te disposera à cette connoissance, en attendant
cette serenité, & ce repos d'esprit necessaire aux gran-
des veritez , ie veux que cette Iustice que tu accuses,
& te parle en sa propre cause : rends-roy attentif à
ses raisons , elle aura autant de discretion que toy,
qui ne luy as parlé que par la bouche d'autrui. Et
bien petits hommes de bouë & d'argille, croirez-vous
tousjours que le Ciel soit obligé de vous rendre rai-
son de sa conduite, & que ce grand Monarque que
vous devez adorer , soit iniuste s'il se trouue parmy
vous quelque mescontent ? N'aurez-vous pas au
moins autant de respect pour luy, que vous avez de
crainte pour l'autorité de vos Magistrats ? si par fois
ils ne punissent pas le mal que vous connoissez , ou
qu'ils retiennent le prix que vous ordonnez aux
bonnes actions , vous expliquez fauorablement leur
procedé & cherchez d'ingenieuses raisons pour ap-
prouver leur conduite. Qui empesche que vous n'a-
yez pour le gouvernement vniuersel du monde, la re-
uerence que vous rendés à la police d'une ville ? N'e-
stimez-vous point que Dieu aye une plus estroitte
obligation de contenter vostre humeur, qu'un Maire
de village n'a d'ordonner sa petite Republique à vo-
stre fantaisie ? N'est-ce point une liberté punissable
de la foudre, que de petits animaux attachez à la
terre osent leuer les yeux au Ciel , pour examiner les
projets

projets de celuy qui est aussi équitable en ses desseins, qu'infailible dans sa conduite. A vray dire, j'aurois plus de sujet de chastier cette impudence, que de l'instruire; ie veux neantmoins faire mon apologie à ceux qui n'ont ny le droit, ny le pouuoir de me faire mon procez: Et tout premierement, qui vous a dit que ceux qui font le mal n'en souffrent point les supplices? Que sçavez-vous si l'hypocrisie ne cache pas aussi bien le desplaisir des meschans, que l'humilité couure les contentemens des bons, & si leur conscience qui a mille tesmoins, n'a point vn million de bourreaux? Que l'impieté fasse toute la bonne mine qu'elle voudra, qu'elle die qu'elle est contente: à mesme qu'elle rit par dehors, elle creue & enrage interieurement. La pensée de Platon n'est pas mauuaise, quand il veut que la peine suiue le crime & luy fasse compagnie, mais le mot d'Hesiodé me semble meilleur, lors qu'il assure, qu'elle est de mesme aage que luy, & que leur naissance est commune. Personne ne peche impunément: quoy que les plus puissans criminels paroissent fuir leur gibet, ils le traignent. En quoy certes ils sont semblables à ces demons, qui souffrent leur enfer dans les energumenes où ils esclatent de joye. Peut-estre croyez-vous, que les foietz, les rouës, les croix, la galere, & le feu, soyent des supplices plus cruels que les craintes, le desespoit, la rage, & ces autres furies qui vangent sur l'esprit les crimes de la chair. S'il estoit ainsi, Neron ne se plaindroit pas dans les mortelles langueurs de la vie, que de tous les hommes il est le seul qui n'a point d'amy ny d'ennemy: d'amy pour consoler les douleurs, par la compassion; ou d'ennemy, pour les finir par la mort. Rien ne vous oste la pitié des meschans, que l'ignorance de leurs gesnes, possible que ceux qui sont

les plus ardens à solliciter les vengeances du Ciel contre eux , seroient les plus charitables à implorer les misericordes en leur faueur, si leur tourment estoit aussi palpable que leur iniquité. Il est pourtant vray, que ie n'ay pas deu accorder , que le supplice tint fidele compagnie au peché , & qu'il nasquit auecque luy. A bien considerer la verité , il preuient sa naissance, & sa venue , de sorte que ce peu de plaisir, & d'auantage qu'il y a dans le crime , semble plustost vne legere recompense des peines qui le precedent, que la peine n'est vn iuste chastiment qui le suiue. N'appeliez donc plus le brigandage d'un homme qui tient les bois , vn vol, l'argent qu'il oste au passant, est vn salaire qu'il exige de son trauail, & de ses veilles. On doit dire le mesme de la plus part des mauuaises actions des pecheurs. Je veux neantmoins croire , qu'il est des scelerats tellement accoustumez à mal-faire, que l'horreur du vice, & les frayeurs d'une mauuaise conscience, ne leur donnent aucune inquietude. Je veux qu'ils soyent heureux dans les incestes & les sacrileges , & qu'ils sauourent les douceurs du peché sans en apprehender ny sentir le supplice. Oüy, ie veux que ces vengeances interieures & secretes, qui s'exercent sur l'esprit d'un pecheur le laissent en repos, & que Dieu ne trauerse ses iouissances d'aucun remord. Helas ! que la condition de ce pauvre malheureux est desplorabile , & que les roües & les gibets sont bien plus à desirer , que cette cruelle impunité. Comprenez ce que ie vais dire , petits mutins, qui murmurés tousiours , comprenez bien la verité d'un important paradoxe : iamais Dieu ne chastie plus seuerement le pecheur , que quand il ne le chastie point. Sans doute cette proposition choque vos esprits , ie pretens toutesfois qu'elle les persuade, & ie me

ie me promets v^otre conuiction, si vous m'accordez v^otre audience. Mais parce que cette verité est extraordinaire, ie luy choisis des raisons hors de l'at- teinte du vulgaire. Ie ne dis pas que la vengeance d'un crime en est le remede, & que punir vne liber- ré, c'est la corriger : & partant que Dieu ne chastie iamais vn pecheur, qu'il ne luy donne ce qu'il peut posseder de meilleur apres l'innocence perdue. Ie ne dis pas que l'impunité d'un vice est comme vne per- mission tacite de s'engager d'auantage au mal, & vne licence de se faire plus vicieux, pour estre plus crimi- nel. Qui est la mesme chose que de permettre à vn malade tout ce qui luy est agreable, quoy qu'il luy soit dangereux. Ie ne dis pas que la peine d'une mau- uaise action est vn bien de Iustice, & en suite qu'il est plu sdesirable de la souffrir que de l'éuiter, puisque le bien meslé au mal pour grand qu'il soit l'amoin- drit, & par la confusion, qu'il se fait de ces deux con- traires, compose vn object moins odieux, qu'une pri- uation toute pure du bien. Laissons toutes ces bon- nes raisons, quoy qu'elles fassent clairement voir, que Dieu oblige vn pecheur, quand il le chastie ; & en suite que la plus rigoureuse vengeance est de ne le punir pas. Comme l'excellence de mon objet se re- leue infiniment au dessus de toutes les sciences, mes preuues doiuent excéder la solidité de tous leurs rai- sonnemens. Pour establir cette subtile verité que ie r'ay auancée, ie suppose vn fondement que personne ne peut disputer, pourueu qu'il croye Dieu equita- ble, sçauoir qu'il n'est point de peché pour leger, & peu important qu'il soit, auquel le iuge souuerain des hommes, & des Anges n'ait ordonné son supplice. Voilà pourquoy cette bonté infinie qui vous pouuoit gratuitement pardonner vos offenses, a voulu que

Ierus-

Iesus-Christ y satisfait , afin que ce qui estoit vne infinie misericorde en vous , fust vne exacte iustice en luy. Il n'est pas difficile de conclurre ma proposition de ce veritable principe. Dieu ne laisse aucun crime impuny ; nous voyons des pechez sans chastiment en cette vie ; donc il reste quelque autre temps , où il exercera les rigueurs de sa iustice , & où il fera rendre compte à l'homme de ses impietez. Je me trompe , il ne reste point de temps apres cette vie : le temps passe , & s'escoule , il s'eschappe , & en fuyant il emporte tout ce qui luy est attaché. Eternité , hélas tu demeures tousiours ! rien ne passe de toy , parce que tu es tousiours presente , & ton arrest immobile arreste dans le pecheur vn eternal repentir de sa vie , & vn interminable chastiment de son crime passager. Le flux des siecles , l'entresuite des iours , des mois & des années , & l'inconstance que nous pouuons imaginer dans les plus longues estenduës du temps : ne promet ny trefue ny repos aux cruelles gésnes de ces coupables eternels. Malheureuses & infortunées victimes de l'Enfer ; obiect immortal des rigueurs de Dieu : viuante matiere d'un feu qui durera tousiours , hélas ! qu'il vous eust esté souhaitable de souffrir toutes les cruantez de la Nature , & que vostre Iuge eust vsé d'une grande misericorde en vostre endroit , de n'en point vser tout à fait. Car ie vous prie , dire au pecheur par son Prophete Ezechiel , que sa colere ne s'irrite plus contre luy ; n'est-ce pas l'asseurer qu'il ne veut pas auoir vne colere qui passe , pour en exercer vne qui dure tousiours , & qu'il pardonne quelques momens , afin de punir vne eternité ? Hélas ! que c'est vn redoutable malheur que d'auoir vn Dieu , qui ne s'interesse point dans la vengeance des pechez : vn Dieu sans jalousie , c'est vn Dieu sans amour , à mesure

mesure qu'il ne frappe plus le pecheur, il mesprise son salut. Je ne veux point de cette misericorde, s'escrivaient le deuot saint Bernard, non, ie ne veux point de cette misericorde, plus impitoyable mille fois que la plus inhumaine cruauté, tout mon desir c'est que vous me chastiez vne bonne fois pour ne me pas chastier tousiours. Et bien iugez-vous que la condition des meschans vous doieue donner des souhaits, & que la priuation des peines qui vangent les impietés, soit vn raisonnable sujet d'enuie ou vn pretexte specieux de vos murmures ? ô que vous obligeriez les pecheurs, si l'impatience de vos plaintes obligeroit Dieu de punir leur crime aussi tost qu'il est conceu ? Ce prompt chastiment seroit l'esperance d'un pardon eternal, & cette seuerité passagere vous courroiroit de cette fureur qui ne passera iamais. Ce discours est assez solide pour vous faire comprendre le defastre d'un pecheur impuny : en voicy vn assez subtil, dont la delicatesse n'appartient proprement qu'aux ames de choix. L'homme ne scauroit estre en vn plus mauuais estat que celuy où il est indifferent à son Dieu. Certes ie ne sçache rien de plus euitable à vne creature doiüee d'intelligence & de raison, que de se voir tellement mesprisee de son Createur, qu'elle ne soit digne ny des tendresses de son amour, ny des auersions de sa haine. A bien considerer cét estat, il est aisé de iuger que c'est celuy du pur neant, puisque Dieu a de l'amour pour le bien & de la haine pour le mal. Or le neant ne possede ny l'un ny l'autre, ne possedant point l'estre, qui est le mesme bien, & le propre & le naturel sujet du mal, puisque le mal est vne priuation du bien, & qui partant suppose quelque chose en existence où ce defect de bien se trouue. Vous dites proprement que l'œil ne void
goute

goute : que l'air est tenebreux, attribuant l'obscurité à ce qui est capable de lumiere, & l'aveuglement à vn organe qui appartient à la veüe. Mais vous parleries auecque incongruité, si vous disiez qu'une chimere est aveugle, & que le rien qui n'est point, est tenebreux : d'autant que pour estre tenebreux ou aveugle, il faut necessairement estre, & estre capable de ces defauts. Suiuons cette pensée. Dieu n'ayme pas le neant, il ne le hait pas aussi, parce que le neant ne possède pas l'estre qui est le principe du bien, & en suite la cause de l'amour ny le mal, puisque c'est vne diminution du bien qui ne se peut treuuer dans ce qui n'est point du tout. Qui de tous les hommes pour pesant qu'il fust, se pourroit consoler en cette pensée : ie suis si peu dans les sentimens de mon Dieu, qu'il n'a ny amour ny auersion pour moy ? l'amour suppose qu'on possède quelque bien, l'auersion qu'on en est au moins capable. Et quoy ? ne comprenez vous pas encore, que la haine d'un ennemy est obligeante, en ce qu'elle nous considere auec estime, & que son mespris est insupportable, à raison qu'elle nous regarde auec indifference ? Au moins ne sçauoit-on nier, lors que Dieu se met en colere contre les crimes d'un pecheur, & qu'il les chastie, qu'il n'ayme sa personne, & qu'il ne luy desire du bien, puisqu'il l'a deliuré d'un mal par la peine, qui est son remede & sa medecine. Il est donc vray, que le Ciel ne punit iamais plus rigoureusement l'impieté, que quand il ne la punit point du tout. Je veux, me dira quelqu'un, que le supplice precede ou suiue tousiours le peché, au moins ne sçauoit-on dissimuler que les mesmes peines qui chastient les coupables n'affligent les innocens ; en quoy certes ils ont vn tres-iuste sujet de se plaindre, voyans leur vertu traitée auecque la mes-

me

me rigueur que leurs vices. La gresle n'est pas assez discrete pour choisir les heritages de l'impie, l'orage n'espargne pas le vaisseau du iuste, la tempete est vn accident commun des bons & des meschans, la cheute a des rauages pour tout le monde, mais elle n'a point de respect pour personne. Voire mesme il arriue, les maux de cette vie dependans de la mauuaise volonte de ceux qui seuls deuroient en souffrir les incommoditez, que les gens de bien en sont les mieux partagez. Voilà le second sujet de murmure de ceux qui se flatent d'innocence ? & bien, ie m'auoue injuste quand cela arriue, pourueu que vous confessiez que vous estes coupable, s'il n'arriue iamais. Mais ie vous prie faites moy voir ces Innocens qui endurent des peines qu'ils n'ayent pas meritees ? Adam a-t'il quelque fils dont il ne soit pas le pere ? Qui peut dire sans se tromper soy-mesme, qu'il n'a point de peche ? Qui osera faire vanité de iustice, puisque le iuste tombe sept fois le iour, & que Dieu trouue des taches & de l'impureté dans les purs esprits ? De tous les hommes celuy seul qui les a sauuez & celle par qui Dieu les a sauuez, sont exempts de toutes sortes de defauts : tous les autres sont aussi-tost criminels qu'ils sont hommes. Pourquoy accusez vous donc le Ciel, puisque vous estes tous coupables, & que la moindre faute d'un pecheur merite au delà de tous les tourmens de la Nature. Ce m'est assez de justifier la conduite de Dieu contre les calomnies des libertins, sans que l'entreprene de leur persuader, que la souffrance des maux de cette vie est la moins dangereuse de ses faueurs, & que ce qui paroist vn effect de la colere du Ciel, est vne illustre marque de son amour. Le temps viendra que vous ouurirez les yeux à cette verité, & que ceux qui perdent maintenant leurs larmes à plaindre

plaindre les afflictions, les employeront à les demander. Gardez-vous donc, petits vers de terre, gardez-vous de blâmer désormais les secrets desseins de vostre Dieu, adorez des iugemens que vous ne connoissez pas, & si vous ne voulez pas esprouver à vostre dam qu'il y a vne iustice dans le Ciel, ne dites jamais qu'il n'y en a point. Que respondrois-tu à cela, mon cher Nourrison, si la iustice que tu as accusée en la personne des libertins te parloit ainsi dans sa propre cause? Veritablement (repris-je aussi-tost) j'aurois aussi peu de parole pour luy repartir, que les hommes ont peu de raison de l'accuser. Car encore bien que ce beau, & solide discours ne guerisse pas entierement ma douleur, il arreste mes plaintes, & s'il ne ferme pas mes playes, il peut au moins fermer ma bouche. Voilà vn bon commencement de santé (adiousta la Sapience) il faut acheuer ta guerison, puisque tu confesses que les souffrances, & les miseres de cette courte, & languissante vie sont iustes, tu me donnes moyen de prouuer qu'elles sont desirables. Neantmoins de peur que cette importante verité à laquelle tu te sembles accorder, ne vienne à s'esuanouir, ie te veux decouvrir les principales causes de ton erreur, & te faire comprendre que tes plaintes supposent deux grandes ignorances, la premiere de l'absolu domaine de Dieu sur ses creatures, & l'autre de son amoureuse Prouidence sur toutes leurs affaires, voire mesme sur celles qui paroissent les plus indignes de ses soins, & les moins importantes à vos interests. Quand tu auras compris que tu es le sujet d'un Monarque, qui peut tout ce qui luy plaist, & qui pourtant ne veut rien qui ne soit à vostre auantage, ie me promets, que tu auoüeras, que s'il est redoutable par la consideration de son pouuoir, qu'il est digne

est digne d'amour, par celle de sa douceur. Ces deux veritez bien establies sont capables de guerir des esprits plus dangereusement malades que le tien. Car d'un costé si nostre Dieu ne peut excéder son pouvoir, qui le sçauroit accuser d'injustice, quelque chose qu'il fasse au prejudice, & mesme à la ruine de ses Creatures? D'autre part, s'il a les mesmes passions pour vous, qu'un bon Pere ressent pour ses enfans, n'aurez vous pas un raisonnable sujet de luy abandonner vos vies & vos fortunes, sur cette confiance, que son amour l'interesse dans tous les accidens qui vous touchent. Mais parce que mon discours doit esleuer ton esprit à des connoissances qui demandent un peu d'attention, il me plaist bien de t'y preparer par les doux charmes d'une Poësie qui servira de responce à celle que l'impieté a produite en faueur de ses sentimens contre la Prouidence de Dieu.

IV. POESIE.

*Taisez-vous langues criminelles,
Ne parlez plus legerement,
Vos mesdisances sont mortelles,
Quand elles vont au Firmament :
Jamais l'œil de Dieu ne sommeille
Sur les affaires d'icy bas,
Toujours sa prouidence veille,
Pour regarder vos maux & conter vos combats.
Ignorez-vous, infames bouches,
Que vostre Dieu n'est pas de bois,
Et qu'il ne tient rien de ces fouches,
Que l'on adoroit autrefois ?
Il a des yeux & des oreilles,*

D

Il oyt, il voit les insolents ;
 Lors que vous accusez ses veilles,
 Il medite ces coups, qui vous paroissent lents.

Il n'est point de broüillars ny d'ombre,
 Qui puisse courir vos forfaits :
 Tous est a nud & rien n'est sombre
 A des yeux qui sont si parfaits :
 Tout ce qu'imagine la Fable
 De la vigilance d'Argus,
 Est beaucoup plus que veritable,
 S'il se peut expliquer de ses yeux tous aigus.

Cachez vous au centre du monde,
 Couvrez vous des plus noires nuits,
 En vain vostre attente se fonde
 Dans l'estoignement des ennuis :
 Tous vos plaisirs ne sont que verre
 Vostre fortune est un roseau ;
 Pendant que vous ionez sur terre,
 L'amour vous met au liét, & la mort au tombeau.


Par fois il semble que le vice
 S'assure de l'impunité,
 Et que le Ciel se rend complice
 Des excez de l'iniquité :
 Mais qui ne sçait que pour resoudre
 Le coup d'un arrest odieux,
 La Justice suspend sa foudre,
 Et pour mieux l'assener, qu'elle cligne les yeux.

Tandis que les hommes se flattent
 Des esperances du bon-heur,
 Les vengeance du Ciel esclatent,
 Et les accablent de douleur :
 Alors que ces ames haütaïnes,
 Vous chargent de croix & de fers,
 Elles s'en vont faire les vaines

Dans

Dans les throsne de feu, qu'elles ont aux Enfers.

*Dans ces flames avec usure,
Elles payent leurs courts plaisirs,
Quand l'excez a fait la mesure
De leurs reprochables desirs:
La les delices & la ioye,
Qui soustenoient la vanité,
Trouuent une triste monnoye,
Changeant peu de momens à leur eternité.*




ARGVMENT DV II. LIVRE.



Ans le second Liure, la Theologie establit deux principes, qui peuuent servir de remede à toutes nos plaintes, & de motif à cette parfaite resignation, qui nous doit soumettre à Dieu. I. La premiere Prose monstre clairement, & par autorité de l'Escripture, & par raison tirée de la Philosophie, que la souveraine Jurisdiction dans le monde appartient à celuy qui luy donne l'estre. On peut voir en cet endroit la difference des Empires créez, & de celuy dont il est impossible de marquer le commencement, & ridicule de craindre la fin. II. La Poësie suiuvante inuite les Creatures raisonnables à reconnoistre ce Puissant Roy, à l'exemple de celles qui n'ont point de raison. III. Dans la seconde Prose la Sapience prouue, que Dieu est le Proprietaire de l'Vniuers, par toutes les considerations qui nous peuuent acquerir le domaine d'une chose. Au mesme endroit elle monstre que le Createur conserue inmediatelement & sans interruption son Ouvrage; d'où elle conclud, qu'entre Dieu & l'Homme il ne peut y

auoir obligation de rigoureuse iustice. *IV.* La seconde Poësie fait voir par les sentimens, & le discours d'une mere Machabée, que nostre Souuerain peut user de nous comme il veut, puisque c'est luy qui nous a tirez du neant. *V.* Apres que la Theologie a monstré a Celestin, que Dieu le peut perdre, elle luy prouue, que les mesmes raisons qui luy font craindre sa ruine, le doiuent assurer de son salut. *VI.* Son discours donne tant d'appuy a cette verité qu'il porte sa resolution dans la troisieme Poësie, a braver tous les desseins & toute la puissance de la mort. *VII.* La dernière Prose touche les solides raisons de la Prouidence de Dieu sur ses creatures, & particulièrement sur celles qui sont capables de l'aymer, marquât la regle infailible de leur conduite dans le decret de ses diuines Volontez. *VIII.* Tout le Liure se conclud par un aduen de la Prouidence, & un reproche à ces auengles, qui luy substituent le hazard.



L A

CONSOLATION DE LA THEOLOGIE.

 LIVRE DEUXIESME.


A promesse que j'auois faite de voir la source de mes errears, me donnoit tant de desir, que l'harmonie de ce doux motet ne finit pas, que ie commençay cette priere. Sainte Maistresse des hommes, l'inclination que j'ay de guerir de mon impatience, me presse de vous supplier de me vouloir

loir plustost instruire que recreer. I h. Cette inquietude m'agree(mon cher Celestin) aussi mon dessein n'est pas de differer plus long-temps l'effect de ma promesse. Neantmoins auant que d'entrer en discours , ie veux sonder la disposition de ton ame de quelques demandes. N'est-il pas vray que les plaintes que tu fais de ta disgrâce supposent qu'on te fait injustice ? C. Je ne scaurois dissimuler ce sentiment, & quand i'en aurois le dessein, ie n'en aurois pas l'adresse. Th. Quand ie t'auray monstré que Dieu est la premiere cause de vos souffrances , & qu'il a droit d'vser de ses creatures , comme bon luy semble , ne changeras-tu pas de creance ? C. Au moins ie condamneray mon murmure , si ie n'en puis retenir les saillies. Th. Et au cas que ie te contraigne d'auoier, que ces accidens que tu prends pour des coups de Fortune , soient des effects d'une Prouidence , qui n'a des yeux & des soins que pour tes interests, ne diras-tu point que ta pensée est criminelle au lieu d'estre reconnoissante ? C. Malgré tous les artifices de l'amour propre, il faudra que ma raison porte cet arrest contre mon erreur. Th. Je t'assure de l'heureux succez de ta guerison , puisque tu me promets tant d'équité contre toy-mesme. Rends-toy seulement attentif , & ne souffre pas que la douleur diuertisse ton esprit d'une attention , qui luy doit être salutaire. Souuerain Arbitre des deux Natures intelligentes, Monarque absolu de ce vaste Vniuers , agréez que ie cherche les tiltres de vostre Empire, non pas pour en examiner la force & la raison , mais pour en reconnoistre & adorer l'équité. Je ne pretens pas de vous faire vn procez sur vos droits, mais ie tasche de fournir des motifs d'honneur & de respect à vos Creatures. Aidez mon dessein de vostre secours, & éclai-

rez leur esprit de vos lumieres. Toutes les Escholes distinguent deux sortes de Domaine, l'un qu'on nomme de Iurisdiction, & l'autre qu'on appelle de propriété. Considerons les droits & deuoirs de l'un & de l'autre, afin de voir s'ils appartiennent à Dieu. Et pour commencer par la nature du premier : qui ne sçait que la iurisdiction est dans le Maistre vne puissance de gouverner son vassal ? ce qu'il execute par le commandement, la defence, la permission, les peines & les recompenses. Le commandement impose obligation de faire quelque chose, & la defence de la laisser. La permission donne liberté de faire ce qu'on ne sçauroit entreprendre sans crime, ou du moins sans supplice. La punition est vn acte, qui empesche la coulpe par la crainte, ou qui l'efface par la peine. Au contraire la recompense attire à l'action par le desir du prix, & paye le merite d'une bonne œuvre, par la couronne qui luy estoit promise. Voilà en peu de mots ce que peut vn souuerain sur son sujet, & ce qui luy donne la qualité de Seigneur. Je ne croy pas qu'il soit besoin de prouuer, que Dieu possede ce droit sur toute la Nature créée, puis qu'ordinairement il se nomme le Roy des Rois, le Seigneur des Seigneurs & la seule Majesté par excellence. Et à parler sainement, si le Prince des Philosophes veut avecque raison, que les Sages ayent vn droit d'empire naturel sur ceux qui ont de moindres lumieres, qui sera assez auégle, pour ne pas reconnoistre dans l'eminence de son estre la subjection de toutes les Creatures. ? qui pourroit mieux commander que ce Monarque, en qui l'auersion du mal est aussi naturelle, que l'approbation du bien est necessaire ? Qui sçaura donner des loix, faire des deffences, permettre des actions, punir les vices, & recompenser les vertus,

tus, sinon vne sagesse qui ne scauroit faillir, vne Puissance qui peut contraindre, vne Bonté qui a de l'indulgence, vne Iustice qui est forte, & vne liberalité qui est riche ? Certains peuples ont deféré le gouvernement de leurs estats, à ceux qui auoient leur extraction plus reculée dans les siècles precedens. Il s'en est veu qui ne demandoient que la seule hauteur du corps pour meriter le sceptre chez eux : si bien que c'estoit assez d'estre grand & de riche taille, pour estre Roy. La beauté qui est vne si chetive perfection dans l'homme, a quelquefois fait regner ceux qui la possédoient, assuiettissant à son hommage, tout ce qu'elle fraploit de son esclat. Par toutes ces considerations on ne peut refuser le domaine de l'Vniuers à Dieu, puisqu'il est eternal dans sa durée, & qu'il n'est pas moins impossible de trouuer le commencement de son existence, que la cause de son estre. Pour sa grandeur elle est tellement excessiue, que le vaste globe du monde n'est qu'une boule dans sa main, mais si petite, qu'elle eschapperait à sa veüe s'il n'auoit les yeux extremement aigus. Et quoy ? nostre Dieu n'est il pas le beau par excellence, puisqu'il l'est par nature, & que la beauté n'est pas vn accident en luy comme celle qui esclaire dans les Astres, sur les fleurs & dans les visages ? A vray dire, quand Dieu ne tiendrait pas l'Empire de l'Vniuers de l'infinité de son Essence, ny de la perfection de ses Attributs, & que le seul choix de l'homme & de l'Ange en donneroit les droits & l'investiture, il faudroit par necessité luy en deferer le gouvernement pour faire vne raisonnable eslection. Dieu tient donc le domaine du Monde & de l'excellence de son estre, & par vn taillable auen de la Creature, qui choisit par discretion ce qu'elle reçoit avecque necessité. Il ne faut pas

pourtant s'imaginer qu'il ait cette puissance avecque les foiblesses & les limitations que nous voyons dans les Rois de la Terre & les Magistrats de nos Republiques. Il n'a pas besoin du consentement du Peuple, ou de l'advis des Sages pour gouverner son Empire. Comme il possède assez de prudence pour conduire ses vassaux, il a assez de force pour les deffendre. Les troupes estrangeres luy sont vn secours inutile, & la raison d'autrui vne lumiere superflüe. Sa teste & sa main ont assez de conseils & de puissance, sans recourir aux voisins, ou emprunter les resolutions du discours & de la sagesse des Anciens & des Philosophes. Ces Rois que vous adorez ne peuuent pas tout ce qu'ils veulent, parce que leur autorité vient de Dieu, qui limite leur pouuoir, ou des Nations qui reglent leurs obeyssances. I'auouë bien que les sujets ne sont plus libres à recevoir ou rejeter les volontés du Prince, lors qu'ils ont tous conspiré à luy donner vn droit sur leurs hommages. Mais il y a des bornes dans leurs seruices, puisque le Monarque n'a pas vne puissance de tous points absoluë : De sorte qu'à bien considerer les choses, vn Prince d'élection n'est que le Heraux public, qui declare ce que les Peuples se sont resolu de faire. Que s'il tire des profits & quelques auantages de sa charge, c'est plustost vne aumosne qu'il reçoit de la Communauté, qu'un tribut qui soit deu à sa personne. Ou si vous ne souffrés pas que ie rabaisse tant sa dignité, au moins me pouuez-vous accorder que c'est vn present qu'on luy fait, ou bien vn seruice qu'on luy paye. Pour ces Majestez privilegees & en quelque façon naturelles, qui tiennent leurs Couronnes de la naissance, & qui les portent quelquefois dès le ventre de leurs meres, il est vray qu'elles n'ont pas cette dependance des Peuples

ples. Mais certes elles ont vn Souuerain dans le Ciel, qui ne leur communique pas les droicts auecque toute leur estenduë. Cette imperfection (comme i'ay insinuë) vient dans l'autorité & les iurisdiccions des hommes, de ce qu'ils n'ont pas leurs domaines d'eux mesmes, mais de la volonté de ceux qui obeissent, ou de celuy qui commande par eux. Au contraire nostre Dieu tient tout son pouuoir de soy-mesme; d'autant qu'il fait ses suiets: si bien que la dependance essentielle, qui soumet l'estre de la Creature à son empire, acquiert à sa grandeur, l'hommage de nostre seruice. Et ainsi il est esgalement impossible à l'homme de refuser son obeissance à Dieu, & de trouuer vn autre premier principe de sa vie. Par cette raison, on peut comprendre, que le domaine de Dieu s'estend sur toutes les Creatures, puis qu'il n'y en a pas vne, qui ne le regarde comme cause de la naissance. Aussi se rendent-elles souples à la voix qui les a tirées du neant: & quoy qu'il y ait des suiets insensibles dans cette grande Republique; ils ont du sens & de la raison, quand cette haute & adorable Maiesté leur parle ou leur commande. Les vents & les tempestes luy obeissent, la mer esleue ou abbaïsse ses flots à sa voix: la Terre qui est la plus lourde & la moins ciuile de toutes les choses creées, s'espuise dans ses productions, quand il luy plaist, & ne fournit pas mesme le necessaire, lors qu'il l'ordonne. Dieu n'est pas vn de ces petits Roys qui partagent vne atome & qui distinguent de grandes Prouinces dans vn poinct, à cause qu'ils ne sont gueres plus que ce neant, qui sert de sujet à leurs partages & de matiere à leurs ambitions. Aussi ne faut-il pas croire que la durée de son Empire ne s'estende qu'à certain nombre d'années, comme son regne est le regne de toutes les Na-

tions , il est la domination de tous les siècles. Il n'a point reçu sa dignité d'un Ancestre, parce que personne ne le devance en ordre d'existence, il ne la cèdera pas aussi à un successeur, parce qu'il est immortel dans la possession de sa gloire. Vos Histoires vous apprennent, que ceste visible Majesté qui regne parmi les hommes, a esté aussi peu iudicieuse au choix des personnes, qu'elle a fait commander, que constante à s'arrester aux lieux de sa demeure. Des Assyriens, elle est passée aux Medes, de ceux-cy aux Grecs, des Grecs aux Romains. En fin toute la grandeur de Rome s'est esvanouie avec les Césars : & l'on treuve maintenant aussi peu de Cyrus & d'Alexandre, d'Agamemnon & d'Auguste, que de leurs valets, & de leurs esclaves. Tous ces redoutables Princes n'ont plus qu'un peu de poussière dans leurs tombeaux, & quelques-uns des Illustres trois ou quatre syllabes dans l'Histoire. Ce défaut ne peut tomber dans le Monarque souverain de la Nature. Car encore bien que son Empire se renouvelle tous les iours, par la production des nouveaux estres, ce n'est que pour imiter cette vigueur éternelle, qu'il possède dans son interminable durée. Que si la grandeur de ce Domaine paroît en ce qu'il atteint du petit ver au Seraphin, & qu'il s'étend depuis la naissance des Créatures jusques à leur consôation, le pouvoir de donner des loix, & de faire des ordonnances n'en declare pas moins la Souveraineté & l'eminence. Et certes s'il n'auoit point d'autres vœux que celle de ses droits, il vous pourroit commander toutes les bonnes ceuvres que vous pouvez faire, & vous défendre généralement, sur peine de mort : les plus innocens plaisirs de la vie. Ces conseils dont vous faites la précieuse matière de tant de vœux, seront quand il voudra

voudra des necessités indispensables. Que vostre imagination se represente ce qu'il y a de plus dur dans la Nature, qu'elle ramasse les rigueurs du desert & les reglemens des Monasteres, les ieunes, les veilles, les haires, les disciplines, les fers & toutes ces autres penitences des ames saintes; ce n'est qu'un essay des austeritez qu'il vous peut commander, puis qu'il vous peut commander de mourir. Quand ce sage Legislateur le trouuera bon, il ordonnera au Pere des Croysans de luy sacrifier, non seulement son Isaac, mais Abraham mesme. Et pour dire tout en peu de mots, il n'est rien de si peu important à vostre salut, qu'il ne luy rende necessaire, s'il luy agrée; rien de si leger dans l'estenduë de vos actions, mesme indifferentes, qui ne deuienne considerable, s'il le veut & l'ordonne. Et partant, petits esprits, ne murmurez plus de ce que Dieu a si rigoureusement puny le premier homme, pour auoir violé vne loy que vous iugez peu importante: son pouuoir & ses droicts s'estendoient, s'il luy eust pleu, iusques à luy defendre l'attouchement & la veuë du fruct qu'il goustâ. Bien d'auantage s'il luy eût commandé de ne pas respirer, il falloit obeir & creuer. D'où vous pouuez apprendre vne notable difference du pouuoir de Dieu & de celui des souuerains de la Terre: puisque leur autorité ne va pas iusques à commander des choses legeres sous de griesues peines: quoy que par condescendance, ils puissent commander les importantes, avecque des supplices peu euitables. Et de plus que les choses mesmes qu'ils peuuent ou commander ou defendre, ils le peuuent avecque certaines modifications & circonstances, qui marquent moins d'autorité que de dependance. Pour exemple, le plus absolu Monarque de l'Yniuers ne scauroit obliger son sujet à leuer

à leuer vn festu de terre, ou à feindre vn souris à peine de pecher mortellement, non pas mesme de perdre la vie, d'autant que vous ne pouuez auoir vne telle dependance d'une personne, à qui vous appartenez avecque beaucoup moins de droitz que de reserue. Cette autorité de faire tout important par la seule consideration de son vouloir appartient à Dieu seul, qui peut aussi peu souffrir de limites dans sa Iurisdiction, que dans ses autres perfections, qui se mesurent toutes à son Essence infinie. Il est vray qu'il n'vse iamais de tout son droit, mais c'est vne indulgence de sa Bonté, & non pas vn defect de puissance. Son extreme douceur le portant à la compassion de vostre foiblesse, retient ces excéz de pouuoir, & determine vostre subjection à certains deuoirs si faciles, que rien ne vous scauroit empescher de luy rendre ces petits hommages, qu'une extreme ingratitude ou vne criminelle malice. Mais tant s'en faut que cette moderation doie diminuer l'estime de sa grandeur, qu'elle peut en augmenter l'idée. Car ie vous prie, n'y a-t'il pas sujet d'adorer vne bonté qui se contente de peu, pouuant exiger beaucoup de la Creature? Je ne dis point que ce redoutable Monarque a vn Enfer pour se faire craindre, & vn Paradis pour se faire aimer. Ces Princes qui taschent de faire du bruit dans le Monde, n'ont point de tourmens qui passent le corps, ny de recompense qui regarde l'ame; vn bon courage peut mespriser leurs promesses, & se rire de leurs supplices. Leur puissance est trop foible, pour interesser fortement vos seruices, & leur serierité trop molle pour arrester vos crimes. Il n'y a que le Roy des Roys, qui ait des attraits assez puissans au bien, & des craintes assez efficaces pour diuertir du mal. Aussi ne doit-on considerer les autres Majestés que comme
les

les petits vassaux de ce grand Monarque : que s'ils sont vn peu au dessus du reste des hommes , ils sont infiniment au dessous de Dieu. Mais la plus importante reflection qu'on doit faire sur cet Empire eternal & infiny , c'est de vous aneantir dans vostre bassesse , & agréer toutes les dispositions de cette haute Majesté, qui ne peut rien faire d'injustice, quoy qu'il fasse beaucoup de choses qui vous sont desagréables. Soyez, si vous voulez maistres d'une partie du Monde : commandez à la plus genereuse nation de la Terre ; que le Soleil ne se couche iamais chez-vous , il faut confesser vostre dependance & reconnoistre son Domaine. Que si l'orgueil vous esleue au dessus de ce que vous estes, il sçaura bien vous abaisser au dessous des moindres animaux. Il n'a pas perdu cette puissance, qui courba Nabuchodonosor à la pasture: il s'en peut seruir si vous pouuez vous oublier de vostre deuoir. Pour acquiter quelque partie de vos debtes , respectez toutes ses volonte, quand mesme il choisiroit de declarer ses droits par vos pertes , & de se faire auoüer le Souuerain de vos biens & de vos fortunes, par leur entiere ruine. Que s'il use avecque moderation de son pouuoir, louez son extrême Bonté , sans le soupçonner d'impuissance : au contraire dans vos plus rudes obeissances, adorez son Empire, plus glorieux mille fois d'estre esclaués de ce grand Dieu, que d'estre Monarques de toute la Nature.

I. P O E S I E.

*Peuples , qui habitez dans l'un & l'autre Monde,
Pour qui l'Eau, l'Air, le Feu, & la Terre est seconde,
Accourez promptement & venez reuerer*

Celuy

Celuy que sa grandeur nous rend si venerable,
 Il est seul adorable,
 Venez donc l'adorer.

Comme luy pourriez-vous refuser vostre hommage,
 Estans de sa bonté le plus parfait ourage :
 Vous tenez de sa main les lumieres du iour,
 Offrez-luy vos respects, le deuoir vous conuie,
 Ils vous donne la vie,
 Donnez-luy vostre amour.

Rien n'est sorty du rien, que par son assistance,
 Tout prend l'estre de luy, tout luy doit sa naissance:
 Foibles ombres du rien, impuissans hommelets,
 Rendez-luy vos deuoirs, signalez-en les marques,
 Vos plus puissans Monarques
 Ne sont que ses valers.

C'est sa puissante main, qui lance le tonnerre,
 C'est sa puissante main, qui balance la Terre,
 Il donne aux Elemens, & leur rang & leur lieu,
 Il n'est rien que douceur, il n'est rien que puissance,
 Il est tout providence,
 En un mot il est Dieu.

A qui reseruez vous ce precieux seruice,
 Qui pourroit acquitter la premiere iustice ?
 Ceux que vous adorez sont hommes comme vous,
 Sotte profusion, apprenez à connoître
 Ce veritable Maistre,
 Et ne soyez plus fous.

Ce beau Pere des iours, qui dore le porphyre,
 Dont cette Majesté compose son Empire,
 Reçoit ses mouuemens de son iuste pouuoir :
 Le Ciel n'a pas moins d'yeux qu'il possède d'estoilles,
 Qui sont tousiours sans voiles
 Seulement pour le voir.

Quey que la Terre soit: un amas de poussiere,

*Vn immobile corps , vne masse grossiere,
Quand ce grand Roy le veut , elle a du mouvement :
A peine luy dit-il vne seule parole ,
Elle court , elle vole
A son commandement.*

*La mer enfle par fois l'orgueil de ses orages,
Jusqu'à faire pastir les plus hardis courages,
Et leur ostant le cœur , les reduire aux abois :
Mais elle tient ses flots , aussi-tôt qu'elle arrive,
Sur les bords de sa rive,
Qui luy montrent sa voix.*

*Les oyseaux dans les bois , luy font vne Musique,
Afin de l'honorer de quelque beau Cantique,
Bien qu'ils soient sans esprit , ils connoissent sa Loy,
N'ayans point de raison , ils ont prou de science,
Pour rendre obeysance ,
Aux ordres de leur Roy.*

*Les Tygres, & les Ours civilisent leurs biles,
Les plus lourds animaux sont accords & faciles,
Pendant cette fureur , qui nous les fait haïr,
Leur nature deuient de tous pointets accomplie,
Et leur humeur se plie,
S'il luy faut obeyr.*

*Ces poissons que la mer esleue dans ses ondes,
Nourriture & pays de ces troupes fecondes,
Sont bien assez polis , pour le complimenter :
Quoy que sourds & muets , ils ont langue & oreilles,
Pour oïr ses merueilles ,
Et pour les raconter.*

*Les Anges dans le Ciel n'ont point d'autres delices,
Que le contentement qui vient de leurs services :
Rien autre ne leur plaist , rien autre ne les meut,
Pour s'en mieux acquiter ces Essences fidelles
N'ont-elles pas des aïles,*

Pour

Pour voler quand il veut ?

*Peuples accourez donc rendez luy vos hommages,
Son pouuoir vous a faits ses parfaites images :
Sa crainte & son amour vous doiuent animer :
Refusans le tribut de vostre obeysance,
Craignez vne puissance
Qui vous peut abysmer.*

II. PROSE.

CERTAINEMENT il est difficile de connoistre la grandeur de ce Monarque & de murmurer de sa conduite : si faut-il pourtant auoir, que Dieu a des tiltres qui semblent luy acquerir plus de droit sur sa Creature. Ne vous imaginez pas que ce grand Roy soit entré dans le Monde, comme dans vn pays de conqueste, ou bien comme dans vne terre deserte. Cette riche possession ne luy vient de la liberalité d'aucun bien-facteur, il n'en jouit ny par achat, ny par succession de ses Ancestres: son droit & ses pretentions ont des tiltres plus glorieux & plus authentiques. I'en trouue trois principaux, qui luy assurent la propriété de toutes choses sans restriction ny limites. Vous luy appartenez en qualité de premier principe, de moyen, & de dernière fin. Comme premier principe, il est l'auteur de vostre estre, comme moyen, il conserue vostre vie dans l'ordre de la Nature, & deliure vostre ame du peché; dans celuy de la grace, comme dernière fin, il dresse l'homme à de hauts & nobles desseins, la rapportant au seul interest de sa gloire. De tous les tiltres qui vous assurent le domaine de quoy que ce soit, il n'en est point de plus iuste ny de moins contesté, que l'honneur de l'auoir

l'auoir faite : à meſme qu'elle ſort de voſtre main, elle entre dans le compte des choſes qui vous appartiennent, vn laboureur qui eſt comme le pere de ſes moiſſons , pretend auecque raiſon aux productions de la terre : celuy qui plante la vigne en doit recueillir les fruitſ. L'artifiſan eſt le maĩſtre & le ſeigneur de ſon ouurage : à moins que d'offenſer la Juſtice , on ne luy peut rauer ſon buffet, ſa ſtatué ou ſon image. Que ſi vne maiſon eſt à ſon architecte , & que le marbre & le porphyre commencent d'eſtre au ſtatuaire, auſſi-toſt qu'ils ont receu vn peu d'ordre & de figure de ſa main , qui ne iuge beaucoup plus raiſonnable , que l'homme ſoit la poſſeſſion de Dieu , puis qu'il eſt ſa Creature ? Vne pierre ne ſçauroit receuoir qu'un peu d'éclat de celuy qui la taille ; ſ'il la met au fondement , il la cache ; ſ'il l'eſleue dans l'air, il l'expoſe à ſes injures. Quand Phidias toucheroit tout vn ſiecle ſes ſtatues , iuſques à eſtudier leurs moindres traits, touſiours le marbre ne luy dévrait qu'un peu d'exterieur & de poſture. Son cifeau ne paſſe point dans les entrailles de l'image , mais quoy qu'on accordaſt à l'Art de luy former le cœur & les autres parties ſecretes , il n'en ſçauroit produire la matiere. Les plus nobles cauſes de la Nature ne ſont pas la moitié de leurs effets, outre qu'elles ne peuuent agir ſans ſecours, auant que de rien produire de leurs forces , il faut ſuppoſer vn ſujet, qui pretend pour le moins la moitié de leur gloire. Au contraire noſtre grand Dieu n'eſt pas tant l'Ouurier du dehors qui limite ſa puiſſance, en terminant ſon ouurage, que du dedans, qui porte des traits plus exprez de ſa nature. Bien d'auantage , ſa main s'eſtend iuſques au fond de la ſubſtance & à l'interieur de l'eſtre , qui meſme ne ſeroit pas poſſible , ſi elle n'eſtoit toute-puiſſante. Il n'y a

rien de l'homme, ny dans l'homme, qui ne releue de sa bonté : ce grand Architecte ne suppose point de matiere qui luy soit collegue dans les droits qu'il a sur vos naissances & sur vostre vie. Vous estes donc bien plus la possession de Dieu, que les ourages de l'Art ou de la Nature ne le sont de leurs Principes : d'où il faut, que sans estre vsurpateurs, vous ne vous pouuez soustraire à son Empire. Dieu ne fait pas ses Creatures auecque le secours d'une infinité de causes secondes, il en est donc proprement le seul Maistre, puis qu'il en est le seul ourier. Le Peintre ne produit pas sa toile ny les couleurs, le pinceau l'ayde dans l'expression de son idée, & toutefois personne ne luy dispute son tableau. Cette image pouuoit recevoir l'estre, bien que Zeuxis n'eust iamais esté, & la gloire d'Adonis n'estoit pas tellement attachée à la main d'Appelles, que sa peinture ne peust partir d'un autre Maistre. Mais la dependance que vous avez de ce principe est si essentielle à vostre estre, que rien du monde n'en peut suplée le besoin. Supposé neantmoins que la Creation ne donnast à ce Monarque souuerain qu'un commencement de droit sur vostre vie, nous en trouuerions tous les momens engagez à son Domaine, dās la continué successiue de la mesme faueur. Où vous deuez remarquer, que la necessité qui vous oblige à la premiere cause, est bien d'autre condition que celle qui vous attache aux secondes de vostre naissance. En fin le cours de quelques années vous emancipe de la subjection d'un pere, parce qu'il n'est pas raisonnable qu'un homme qui n'a donné qu'un foible commencement à vostre vie, en possède toute la liberté. Dieu n'est pas capable de la cruauté de ces peres, qui perdent le soin de leur petits auecque le plaisir de leur conception. Aussi-tost que sa

Toute-puissance vous a fait sortir de son amoureux sein , par la premiere production, la prouidence vous y remet , par vn soin continuél de vostre nourriture. De sorte qu'à proprement parler , toute la vie des Creatures n'est rien qu'une Creation continuée iusques au moment de leur mort : & comme les Mathematiciens disent, que la ligne se fait de l'escoulement du point, on peut avecque proportion asseurer, que vostre durée n'est rien que le flux & la fuite de vostre premiere existence. Par la mesme consideration on doit tenir , que ce grand Ouurier n'a iamais acheué ses-productions, mais qu'il les acheue tousiours. En quoy , pour ne rien dissimuler de vos auantages , il honore ses creatures d'une glorieuse ressemblance avecque le S. Esprit & son Verbe, qui est leur Principe. Puisque le Pere les a tellement produits de toute eternité, qu'il les produit encore maintenant, sans que iamais ces deux diuins termes des diuines emanations demeurent sans l'influence actuelle de leurs Principes. Il est vray que le Verbe procede du Pere, & le S. Esprit de tous les deux sans subjection, parce que leur production se fait avec necessité, & sans dépendance. Là où celle des estres créés étant libre, elle les attache si fortement à leur Créateur, qu'il ne peut cesser vn moment de les soutenir dans la Nature, sans les la iſſer cheoir dans leur neant originaire. La lumiere a vne liaison si naturelle avec le Soleil qui la produit , qu'elle s'estend aussi-tost dans l'air, qu'il se cache dans le Ciel. Et ces images inuisibles ou ces couleurs spirituelles, que les objets produisent dans tous les corps transparans, ne sont-elles pas tellement vnies aux corps qu'elles representent, qu'elles les suivent par tout , sans pouuoir demeurer vn seul moment destachées de ces causes de tout leur

estre. Si faut-il auoüer que cette dépendance n'explique pas entierement celles que les Creatures ont de Dieu, dont elles ne sont que les foibles especes, & de legeres ombres. Cette necessité qui vous attache à ce premier principe de vostre estre, fait vn fondement de telle importance à la vie spirituelle, qu'il est à propos d'en establir la verité. Je ne prétens pas neantmoins de t'apprendre vn nouveau secret; ce que ie veux, c'est de te faire souuenir d'une connoissance, que tu as tirée de l'Escripture & des Peres, qui assurent tous, que Dieu retirant sa main du soustien, & de l'appuy qu'il donne au monde, quil retomberoit aussi-tost dans son neant. Pour cette raison saint Augustin nous aduertit, qu'il ne se faut pas imaginer que Dieu ait basti cét Vniuers, comme les Architectes leurs edifices; parce que ceux-cy mettent en fin la derniere main à leur besongne, qu'ils abandonnent après, où celuy-la tient tousiours les fondemens de la Nature en estat, sans interrompre ny relascher d'un moment ce premier effort, qui l'a fait sortir du rien à l'existence, l'Eschole est le propre lieu des preuues que ie pourrois produire de cette premiere maxime, & certes ie ne te puis esclaircir icy sans t'importuner. Neantmoins afin qu'il ne manque rien à son appuy, lors mesme qu'elle n'a pas la moitié de ses forces, ie te prie de considerer ces solides raisons. Si la dépendance des Creatures à leur principale & premiere cause est essentielle, ou du moins necessaire, sa durée ne scauroit estre interrompuë, si elle ne l'est pas, elles pourroient reconnoistre vn autre Principe que sa puissance. De mesme qu'un fils peut auoir d'autres parens que ceux qui l'ont mis au monde; d'autant que sa naissance ne depend pas tellement de leur action, qu'une autre cause n'en puisse suppléer le defaut.

faut. Qui ne iuge cette suite dangereuse, puis qu'elle donne droit, ou du moins ouverture à l'homme, de se croire la premiere source de son estre, ou de la chercher, & feindre autre part, que dans la bonté, & le pouuoit de son Dieu? Quoy vostre grand Soleil seroit-il donc inutile dans la Nature, & celuy que tous les vrais sages ont reconnu pour vn acte pur, demeureroit-il tousiours oisif dans les occasions, qui peuvent exercer sa puissance? Ne luy deurez-vous point dauantage qu'à vos Ayeux, & moins que l'ombre au corps, la lumiere aux Astres & les especes visibles aux choses qu'elles monstrent? Les Philosophes tiennent que les plantes; & les animaux sont tellement sujettes au secours du Soleil, que s'il manquoit de les regarder, ils perdroient la vie aussi-tost qu'il leur refuseroit son influence. Et toutesfois ce grand Astre ne donne pas la vertu de produire aux arbres; toute l'assistance qu'il leur fait, c'est de les voir avecque faneur; comme le Maistre aide l'industrie de son apprentif, lors qu'il conduit sa main, & qu'il regarde sa besongne. Mais ce qui establit plus puissamment la dependance actuelle, qui soumet les Créatures à leur premier Principe, c'est qu'il ne seroit pas autrement facile à Dieu, d'aneantir les substances spirituelles; comme l'Angé & l'ame de l'homme. La raison est qu'il ne scauroit rien produire contraire à vne Nature simple, & mesme qu'il vous est impossible de feindre quelque chose qui ait impossibilité d'existence avec elle. Et ainsi vn estre spirituel ne peut perir ou cesser d'estre, par l'effort & la violence d'une nature estrangere, puis qu'il n'en est point ny d'actuelle ny de possible, qui mette de l'empeschement ou de l'obstacle à son eternelle durée. Il faut donc auouer, Dieu pouuant ruiner tout ce qu'il peut faire naistre, que

l'Vniuers depend si absolument des continuelles faueurs de cette cause vniuerselle, que le seul refus de son appuy, le peut reduire au neant, qui est le lieu de son origine. Voilà pourquoy quelqu'un l'appelle le fondement & l'hypostase de la Nature, & que d'autres le representent comme vne grande main, qui soustient le vaste globe du Monde sur vne abyfme, ou comme vne secreete vie, qui est cachée au fond de chaque chose pour luy continuer l'estre sans aucune defaillance. Je laisse que l'homme appartient encore à Dieu, parce qu'il l'a retiré de la seruitude de l'Enfer, de la mort, & du peché, non pas en payant vne somme d'or ou d'argent pour sa rançon, mais en versant iusques à la derniere goutte de son precieux Sang pour lauer ses offenses. Je ne veux pas aussi m'estendre sur les droicts qu'il a sur vous en qualité de derniere fin, qui luy fait pourtant le premier de tous ses tiltres. Car outre que la fin donne plus d'autorité sur vne chose, qui luy est ordonnée, que le Principe qui l'a produite; entant qu'elle est cause de sa cause, il est certain que c'est elle qui luy fournit le motif de son action, qui regle & qui mesure toutes ses forces. Que si l'homme est le Monarque absolu de tant de choses, qu'il n'a pas faites, sur cette seule raison qu'il est leur fin, qui pourra refuser leur Domaine à Dieu, fin derniere de l'homme mesme, non seulement, quant à l'usage & aux seruices, mais bien plus, quant à son estre & tout le fonds de son Essence? Cét Empire a des fondemens si solides & si estendus, si naturels, & si attachez à leur sujet, que Dieu ne se sçauroit obliger en rigueur de iustice à la creature. D'autant que l'homme, l'Ange, ou quoy que ce soit ne peut sortir de son domaine, ny faire vne personne parfaitement separée de son Souuerain, par la
 propriété

propriété d'un bien qui ne soit plus sujet à sa puissance. Bien davantage, quand il auroit un droit tout séparé de celui de son Roy, & que nous supposerions une obligation rigoureuse en sa personne; il la feroit cesser sans injustice, par l'entier aneantissement de vostre estre, qui en est le fondement & le principe. De cette grande, & importante vérité, on doit premièrement recueillir, que la recompense des bonnes œuvres est un present, & non pas une dette, & que dans la retribution de la gloire, Dieu couronne plustost ses bien-faits que vostre mérite. De plus, que le bonheur des saints leur appartient si peu, que leur bien-facteur le pourroit retirer d'eux, sans leur fournir aucun raisonnable sujet de murmure. L'avoué bien en ce cas-là que Dieu n'estant pas injuste, il seroit inconstant & infidelle; mais cette considération conclut seulement qu'il est obligé à sa promesse, & qu'il ne scauroit manquer à sa parole. De la mesme sorte, avec proportion, qu'un Maître pecheroit contre soy-mesme, refusant d'acquitter les promesses qu'il a faites à son Esclave, quoy que sa parole ne luy donne aucun droit de justice, puisque toutes ses prétentions, voire mesme sa propre personne, sont du domaine de son Seigneur. Or qui ne void que les biens de l'homme & de l'Ange sont tellement à leur Createur, qu'il luy est autant impossible de se despoüiller de son droit, que de cesser d'estre sa fin & son principe. A n'en point mentir, cette pensée vous peut tenir dans une haute estime de l'infinie grandeur du Dieu que vous adorez. Toute fois vostre plus ordinaire, comme vostre plus iuste sentiment, doit estre de reuerence & d'honneur, à l'endroit de ses diuines volontez, sans que iamais vous trouviez mauuais ce qui vient de son ordonnance. Je veux qu'il abandon-

ne vos vies à la rage d'un ennemy, qu'il expose vostre reputation aux langues, & qu'il permette à la Fortune de faire un de ses exemples de vos miseres. Tout-cela ne vous donne point de iuste sujet de murmure: puisque vostre vie, vos plaisirs & vos honneurs sont des biens de son Domaine, qu'il peut garder ou perdre, sans consulter vostre inclination ny addoucir vostre dominage. Et que personne ne soit assez temeraire pour l'interroger de son dessein, bien moins pour le iuger de sa conduite. Il appartient à son pouuoir de choisir un petit villageois & d'en faire un Prince à son peuple, mais il n'a pas moins de droict de precipiter le plus auguste Monarque de la Terre, de son throsne dans la fange. Quand il l'aura fait, c'est assez pour iustifier son action, de dire qu'il luy plaist, sa volonté vaut mieux toute seule que vos meilleures raisons. Et quoy: il sera permis à un homme de donner, vendre, changer & mesme de tuer son cheual, s'il le trouue bon? parce qu'il en est propriétaire, & il ne seroit pas libre à Dieu de disposer de l'homme en toutes les façons, qui pourroient agréer à sa Majesté? Un Peintre pour auoir esbauché la figure d'un animal sur vne toile, peut sans que personne murmure, plier son tableau & le ietter derriere un coffre, en faire un présent ou le debiter à tel prix qu'il voudra, le donner pour rien, ou bien en faire un eschange, puis qu'il a donné quelques traits à sa peinture. Personne ne luy demande raison de ce qu'il fait, si au lieu de glacer son ouurage, & de le vernir pour l'acheuer d'auantage, il le biffe avecque du noir & de la bouë. Et toute fois il n'est pas le createur de sa table d'attente, ce n'est pas luy qui produit le blanc, l'azur, le vermillon, & les autres couleurs, qui seruent de matiere à sa besongne. La toile qui sou-

tient

stient ces belles & éclatantes qualitez vient d'une herbe qu'il n'a pas semée ; & l'huile qui en fait l'alliance, naît d'un arbre qu'il n'a peut estre jamais veu. Sans aucun doute ce tableau seroit bien d'avantage à luy, s'il auoit tissé cette toile, & si les couleurs qu'il a mêlées venoient de son inuention & de sa peine. Si au lieu de peindre une beste ou une forest, il s'estoit luy-mesme portraict ; s'il auoit fait & pris le pinceau, pour ce seul dessein de donner du plaisir & du diuertissement à son esprit & à ses yeux, il seroit difficile de luy trouuer iustement un autre Maistre, n'ayant point d'autre fin ny d'autre principe. Quoy que sa main ne porte pas iusques-là, c'est assez pour luy acquerir un droit de Seigneur d'auoir estendu le linge, couché les couleurs, habillé les figures, donné les ombres & fait leur posture. Le Peintre est plus à soy que chose du Monde, & partant s'il tiroit son tableau, qui ne peut estre qu'un autre luy-mesme, personne ne luy en disputeroit la parfaite iouissance, Dieu a fait l'homme tout entier : sa main a tiré sa matiere & sa forme du neant, ces accroissemens mesmes qui luy viennent de la nourriture, sont de nouveaux traits qu'il adiouste à son ouurage. Cette illustre & glorieuse image qu'il a tracée dans son ame est un portrait de sa divine Nature : rien n'est en l'homme qui ne soit de luy ; & pour luy : de luy, comme principe ; & pour, luy comme fin : donc il luy appartient sans reserve. Un Potier dispose à son gré de ses ouurages (l'Apostre explique le Domaine de Dieu par cette comparaison) d'une mesme argille, il moule des vases qu'on sert avec honneur sur le buffet & sur la table, il en destine d'autres avecque mespris, sous le liét & à la cuisine. Quoy ; petits hommes, auez-vous oublié que vous estes des pots d'une terre,

d'où vous tirez aussi bien vostre extraction, que vostre nom ? celuy qui vous a faits, vous peut renuerfer d'un coup de pied s'il le veut, il a le pouuoir de vous esleuer s'il le trouue bon , & de vous confondre de nouveau dans la masse de cette bouë , qui vous sert de matiere , ce qui luy sera le plus agreable , sera le plus iuste. Que si vous auez moins de droit sur vos personnes, qu'un vase d'argille sur sa figure, ayez autant de silence que luy , pour adorer toutes les volontez de vostre Maistre. Qu'il vous esleue , qu'il vous abaisse , il ne fait rien au delà de sa puissance: vous serez iustement le centre , & le sujet des opprobres & des douleurs, s'il l'ordonne. S'il veut , il peut vous aneantir, & s'il pouuoit auoir quelque satisfaction de vous voir eternellement brusler, il ne feroit qu'un faisceau de vous & des demons: quoy que vous fussiez sans crime, il seroit sans injustice. O que vous auriez peu de raison de vous plaindre , quand il en auroit ainsi ordonné : puis qu'il a tant de droits de faire tout ce qui luy plaist. Vous estes à Dieu , parce qu'il vous a créés , à luy, parce qu'il vous conserue, à luy , parce qu'il vous rachetez , & que de son propre Sangt il a retracé l'image que vous auiez effacée; à luy, parce qu'il est vostre derniere fin. Ne murmurez donc plus , de quelque façon qu'il dispose de vos personnes ; vous ne perdez rien dans l'entiere ruine de vostre estre , d'autant que vous n'avez rien à perdre qui soit à vous. Son empire ne souffre point de dechet ny de diminution, car encore que tout l'Vniuers se coulât à son premier cahos , que toutes les Creatures s'euanouïssent dans le neant , il est toujours trop riche, puis qu'il se possède toujours.

II. P O E S I E.

*Moins sensible à son sang, qu'une insensible roche,
Une Mere voyoit sans crainte de reproche,
Ceux qu'un Prince cruel enleuoit de son sein,
La Nature taschoit dans ses tristes allarmes*

*De luy donner des larmes,
Mais la grace improuuoit cét innocent dessein.*

*D'une part la douleur luy fait sentir sa rage :
De l'autre ses vertus soustiennent son courage :
L'amour choque le zele, & le zele l'amour ;
L'un pretend allumer, l'autre esteindre la flamme*

*De sa genereuse ame :
L'un console son cœur, l'autre en est le vautour.*

*Les interets de Dieu combattent la Nature,
Elle a bien des enfans, mais elle est Creature :
De sorte que l'amour employant son pouuoir,
Afin de l'affliger & de donner atteinte*

*A cette ame si sainte,
Le respect du grand Dieu parle pour son deuoir.*

*Quand la compassion luy touche les entrailles,
Du pitoyable objet de tant de funeraillles,
Le Ciel donne à son cœur un desir tout nouveau :
Car si la pieté leur souhaite la vie,*

*Qu'on leur auoit rauie,
Le zele de la loy les consacre au tombeau.*

*Pendant que le Tyran tourmente la belle ame,
Et le cœur innocent de cette illustre dame,
Le Ciel prenant le soin d'adoucir ses douleurs,
Au dessus de son sexe, au dessus de son aage,*

*Il luy donne un courage,
Qui soustient leurs assauts & qui tarit ses pleurs.*

A

A peine souffre-t'il, qu'une mere offensée,
De ce peu de discours, allége sa pensée,
Victimes de l'amour plusiost que de la mort,
Si l'excez de vos maux afflige vostre mere,

La foy veut qu'elle espere,

Que ces beaux flots de sang vous porteront au port.

Je ne puis vous cacher, ce que ie vous puis dire,
En vous voyant mourir, ie souffre le Martyre;
Mais quoy que vostre mort frappe & blesse mes yeux;
La ioye & la douleur disputent la victoire,

Quand ie pense à la gloire

Que cette belle mort merite dans les Cieux.

On blasmeroit à tort ma vertu d'injustice,
Je peux estre constante & n'estre pas complice
De cette cruauté qui m'oste mes enfans:
Je sçay tous leurs tourmens, ie sens que ie suis mere

Par leur propre misere,

Mais si ie les voy morts, ie les voy triomphans.

Et quand vostre interest ne me pourroit reduire,
A benir la douleur qui semble vous destruire,
Vne forte raison me déuroit secourir;
Car en fin doux Agneaux, innocentes victimes,

Ce ne sont pas vos crimes,

Mais la gloire de Dieu qui vous a fait mourir.

Pour toy, mon cher cadet, objet de mon estude,
Doux, & triste motif de mon inquietude,
N'accuse point mon cœur sur le ton de ma voix:
Je puis sentir tes maux, quoy que ie semble dire,

Certes ie les endure,

Et si tu vas mourir, ie dois mourir sept fois.

Ce qui console un peu mon extrême misere,
C'est que perdant mon Fils ie le rends à son Pere,
Puisque de verité mon sein n'est que le lieu
Où du rien il a pris sa premiere naissance,

Par la seule puissance

De ce grand Artisan, que nous appellons Dieu.

C'est la sçauante main de ce puissant Monarque,
Qui te doit retirer de celles de la Parque :

Elle a durcy tes os, & disposé leur rang,

Elle mesme a creusé les vaisseaux de tes veines,

Comme autant de fontaines,

Où se deuoit couler la vie avec le sang.

Tes bras, tes pieds, tes mains, ton cœur, tes yeux, ta face,

Tienment de son pouuoir leur matiere, leur place :

Tout ce tout separé, c'est luy qui l'a lié,

Et pour mieux assurer l'honneur de nostre hommage

A ce parfait ouurage,

Il estend sur sa chair vn crespé delié.

Luy seul sçait tous ces nœuds, qui font les sympathies
Des membres de ce Tout & des moindres parties :

Luy seul void le secret de leurs secrets ressorts,

Il range sous ta peau les nerfs & les arteres,

Et de tant de contraires,

Il a diuinement composé ce beau corps.

C'est sa seule bonté qui d'un peu de poussiere,

Et des impuretez d'une sale matiere,

Imitant son idée a pû te figurer,

Et quoy que son dessein ait trouué de l'obstacle,

Elle a fait ce miracle,

Qu'on ne peut iamais voir, & ne point l'admirer.

Que pouuois-je adjouster sans son aide a ton estre ?

Je te faisois mourir mesme auant que de naistre :

Mon sang se fust changé en vn cruel poison,

Mon flanc te prestoit bien sa demeure secrette,

Pour estre ta cachete,

Mais c'estoit sans ses soins, ta tombe ou ta prison.

S'il a fait ton esprit, il a fait sa peinture,

Tes biens sont les effets de sa bonne Nature,

Et

*Et tes perfections les traits de sa beauté ;
Puisque tu tiens de luy cette divine image,*

Rends-toy le tesmoignage,

Autant de son pouuoir comme de sa Bonté.

*Il peut t'aneantir, parce qu'il t'a fait naistre,
Il peut te consumer, parce qu'il est ton Maistre :*

Que s'il le fait ainsi, souffre sans murmurer,

Il use de ses droits, reuere sa puissance

Sans user de defence,

S'il nous donne du bien, il le peut retirer.

*Laisse couler tes pleurs, tesmoigne par ta plainte
L'excez de la douleur dont ton ame est atteinte ;*

Mais ne rends pas ton cœur à l'infidelité :

Trois ou quatre momens finiront cette peine,

Et ton ame hautaine

Bravera les tourmens toute vne eternité.

Ce sera dans le Ciel, où la rage estouffée,

Servira pour iamais de sujet de trophée,

A ceux que la vertu choisit pour ses guerriers :

Là ces Ames de choix, triomphantes & calmes

Iouïront parmy les palmes,

Et se reposeront à l'ombre des lauriers.

Voilà les bons aduis & la parfaite idée

Qu'une Mere donnoit aux meres de Judée,

Lors mesme que l'effort d'un injuste dessein

Pouuoit iustificier le torrent de ses larmes,

Puisque ses tristes armes

Luy rauirent sept fils en un mesme matin.

III. PROSE.

ET bien mon cher Nourrison (continua cette
auguste Deesse) où pourrois-tu rencontrer vn
homme qui eust plus de force que cette femme? N'ap-
prends

prens-tu pas de sa generosité, que toute la gloire des Machabées n'est pas dans ces Illustres qui ont acquis tant de triomphes par leurs combats à leur Patrie? N'est-il pas vray que la patience a son éclat particulier aussi bien que le courage ; i'estime, si tu as autant d'intelligence de mon discours, que tu sembles y auoir apporré d'attention, que tu ne doutes plus du pouuoir de Dieu, apres le recit de ce grand exemple, & que tu condamnes les creatures de rebellion, si tu les peux conuaincre d'impatience. C. Madame, vous m'auiez tellement éclaircy ses droits, que ie ne doute plus de ma sujétion : mais certes ie ne vous puis dissimuler, que vous m'auiez dit des choses qui estonnent autant mon esprit qu'elles l'instruisent. Helas! tous les trauaux de nôtre vie, toutes nos sueurs, & nos vertus sont-elles bien de si peu de poids aupres de Dieu, qu'il n'en daigne considerer le merite? Se peut-il faire que ce qui coûte tant à ses pauvres seruiteurs, ne les assure pas contre la crainte d'une eternelle misere? l'auouë vne dépendance absoluë de tout ce que j'ay, & de tout ce que ie suis, mais elle m'espouente plus qu'elle ne me console. Th. Tu as bien raison de reconnoistre que tout ce que tu possedes luy appartient, & qu'il a le droit, s'il en a la volonté, de te perdre & de t'aneantir. Mais tu as tort de craindre que iamais il vueille vser d'un pouuoir qui ruinerait sa creature, sans tirer aucun auantage de sa perte. Ce grand Monarque n'est pas de l'humeur de ces Princes inhumains, qui tirent du plaisir de la misere de leurs sujets : tout ce qui choque leur fortune, touche son cœur. Quoy que Neron fust vn monstre, on a peine de luy pardonner d'auoir regardé avec ioye l'embrasement de son Empire. L'émeraude qui luy desguisoit les flammes qui consumoient Rome, n'a peu

n'a peu tellement changer cét objet, que tout le monde ne le condamne de rage & de folie. Dieu n'est pas capable d'un diuertissement si brutal, ; bien que son Domaine s'estende au delà de la ruine de ses vaisseaux, il ne change jamais leur fortune, que pour la rendre meilleure. Il est vray que toutes les Creatures appartiennent si absolument à ce puissant Monarque, que l'homme mesme, qui fait la plus noble portion de son Royaume, ne se sçauroit soustraire aux rigueurs de sa Justice. Mais tant s'en faut, que le peu d'assurance que vous auéz de vostre part, vous doieue donner de la crainte, puisque c'est de là mesme que vous pouuez tirer vne confiance parfaite. Vous estes de pauvres pupilles qui manquez de prudence, & de force pour conseruer vos biens ? Dieu vous a mis en vne honorable tutele, voulant luy-mesme vous seruir de garde-noble. Ne vous troublés pas de sçauoir que tous vos interets dépendent de sa volonté ; au contraire assurez-vous que rien ne vous peut perir ayans sa parole sur vostre seure & bonne conduite. Il n'est point d'accident qui puisse surprendre son amour, & sa vigilance : Israël n'a rien à craindre estant assuré de ses bontez. Tout autre soin que le sien seroit inutile, mais s'il y a sujet de prendre la confiance de son salut sur l'appuy qu'il luy donne, il y a danger d'en douter sur les vaines frayeurs de l'amour propre. N'apprehendez pas qu'il se veuille enrichir aux despens de son Mineur, ny que les finesses ou les forces d'autrui, puissent luy rien enleuer des biens qui vous appartiennent. Son esprit est plus éclairé que les ruses de la chicane, & son bras plus puissant que tous les efforts de l'enuie. Il ne perdra rien, ny par mauvais mesnage ny par impuissance de le conseruer. Si ie t'ay donné quelque pensée qui t'ait effrayé ;

frayé ; en voicy vne tres-capable de l'asseurer. Penetre bien ce que ie te vais dire , mais garde-toy bien d'estimer mon discours plus esclatant que veritable : il n'aura pas moins de solidité que de merueille. Quand Dieu seroit la creature de l'homme, l'homme ne seroit pas plus asseuré de posseder Dieu : qu'il en est certain , n'étant qu'un de ses moindres ourages. Ie le dis hardiment , si vous auiez fait Dieu, si vostre main le soustenoit dans la Nature, iusques à l'empescher de n'estre rié : s'il s'estoit perdu par sa faute, & que vous l'eussiez sauué par vn excés de bien-vueillance, si toutes les grandeurs infinies , & ses perfections independantes , n'estoient que pour vostre seruice , la iouissance de ce bien infini ne vous seroit pas plus asseurée qu'elle l'est pourueu que vous ne taschiés point malicieusement de le perdre. (Ces suppositions imaginaires rehaussent la bonté de Dieu , & ne peuuent abaisser son excellence.) En voicy la raison. Il est autant impossible que Dieu manque d'estre veritable, que de manquer absolument d'estre, ce seroit rendre sa Nature sujette à la defaillance, que de supposer sa parole capable de mensonge ; s'il est le souverain être, il est la premiere verité, non seulement à cause de l'exact rapport de ce qu'il est à tout ce qu'il doit estre, mais encore à raison de l'infallibilité, qui sert d'inébranlable appuy à toutes ses promesses. Or si nostre grand Dieu ne peut estre infidele, sans cesser d'estre tout à fait & d'autre part que vous soyez asseurez de la necessité de son existence, vous ne pouuez vous defier de sa parole sans soupçonner l'immutabilité de son essence. Vous auez la promesse d'un Dieu, pour caution de vostre bonne fortune, pourueu que de vostre part rien ne manque du peu que vous y deuez contribuer : doutez en beaucoup moins , que si

elle estoit appuyée sur vne necessité de nature. Quoy que ce fondement soit exterieur à vostre gloire, vous en pouuez moins douter, que si vous en auiez le principe naturel dans vous-mesmes à cause que Dieu est plus invariable en sa fidelité que toutes les Creatures ne scauroient estre necessaires en leur existence. Cette eternelle verité qui ne peut tromper par malice, & qui ne peut estre trompée par imprudence, proteste que l'homme de bien sera eternellement heureux, & que rien ne choquera ses interests, gardez-vous bien d'en douter quelque disgrâce qui vous arriue. Les Elemens periront, le Ciel passera & les solides fondemens qui portent la Nature s'esbranleront, mais la parole de Dieu demeurera tousiours inuiolable. Il veut estre la possession de sa Creature, il luy donne sa foy sur cette promesse, Quelle assurance scaurions-nous desirer apres le iurement d'un Dieu ? Pour te confirmer de plus en plus dans l'attente de ce bonheur, ie te prie de considerer, que les memes raisons, qui luy donnent les droits de vous perdre, luy fournissent les motifs de vous conseruer. Dieu est vostre premier principe, & vostre derniere fin, il est vostre Redempteur & la seule cause qui vous continuë le bien fait de la naissance par la conseruation. Tous ces tiltres luy acquierent vn pouuoir absolu sur vostre vie & vos fortunes, personne ne luy scauroit nier cette autorité, qu'il ne luy dispute la qualité de Monarque. De moy sans m'arrester aux promesses qu'il vous fait, ie veux tirer de vostre dependance parfaite vne suite toute contraire à celle de vôtre ruine. Dieu est vostre Createur, il vous conserue dans l'estre, il vous a dégagé de seruitude, il vous rapporte à foy, comme à la fin de toutes choses, donc vous deuez tenir pour tres-certain, qu'il aura tousiours vn grand soin

soin de vos personnes. L'amour que toutes les causes ressentent pour leurs effets, a ses fondemens dans la Nature; ce mouuement est la passion du cœur, si plustost ce n'est la vie. La raison qui oblige les parens de s'aymer eux mesmes, produit ce doux escoulement sur leurs enfans, qui ne sont que des portions de leur propre substance. Vous estes bien dauantage les participations de l'estre diuin, que vous n'estes les parties de ceux qui vous mettent au monde. Dieu vous regarde comme des biens qu'il possède hors de soy, & comme de beaux abregez des rares perfections de son essence. On voit des meres, qui estouffent leur fruit, à mesme qu'il en reçoit le iour & la vie, mais cette cruauté vient de ce que leur naissance leur est reprochable, pour n'estre pas legitime. Quelquefois le dépit persuade vn peintre d'effacer son trauail, & de gratter en vn moment les traits de beaucoup de semaines: parce qu'il ne les peut acheuer. Le grand Autheur de la Nature ne peut estre sujet à ces defauts, qui marquent de la dureté ou de l'impuissance. Ses ouurages ne luy scauroient estre reprochez, s'il entreprend la production de quelque effet: rien n'est capable de l'empescher d'atteindre l'idée qu'il en a conneuë. Et quelle apparence que Dieu recherchast la ruine des choses qu'il a tirées du neant sans contrainte? n'eût-il pas esté plus aisé à sa main de ne rien faire, que de faire quelque ouurage pour le destruire? Qui se pourra persuader que celuy qui n'a point d'autre motif de ses productions, que son immuable bonté, manque de cette douce inclination, qu'il inspire à toutes les causes, de cherir, & de conseruer les choses, qu'elles produisent? Croyons-nous que cette misericorde infinie, qui a conceu des pensées eternelles d'amour pour l'homme, qui l'a fait l'aisné de ses

creatures, qui l'a preuenü de ses graces pour l'esleuer en vn estat surnaturel, changeast de dessein & qu'elle ne l'eust relcué avec honneur, que pour luy faire sentir avec desespoir l'infortune de sa misere? Les soins continuels qu'elle prend des moindres choses qui vous seruent, font yne preuve euidente du desir qu'elle a de vous continuer ses faueurs. Depuis combien de siecles sa puissance tient-elle la Nature en action pour soulager vos besoins & entretenir vos delices: le Ciel ouure autant d'yeux qu'il a d'estoilles pour regarder sans cesse & avec application en quoy il vous peut obliger de son seruice. La Terre n'a-t'elle pas vn commandement exprez de s'espuiser chasque année en de nouuelles profusions, afin de vous recréer de ses fleurs, & de vous nourrir de ses fruits? Ce grand, & redoutable abyssine, qui ne semble auoir esté fait, que pour les tempestes & les naufrages, n'est-il point l'officine, où la Nature traueille secretement, pour les commoditez de l'homme? N'est-ce pas dans l'air & dans l'eau, où elle luy prepare ses festins dans la prodigieuse multiplication des oyseaux & des poissons? que si la mer paroist par fois en colere, ce n'est que pour luy former l'ambre gris & les perles. En vn mot, tout le bien que les autres Creatures reçoient de la main liberale de Dieu, ne leur vient que du dessein qu'il a de vous obliger par le seruice & les hommages qu'elles vous rendent. Et puis, la crainte voudroit vous persuader, que vous n'estes dans le monde que pour y perir: qu'un blasphemé si horrible ne vous engage pas dans l'ingratitude. Le bien fait de vostre Redemption vous donne des assurances encore plus certaines des bonnes volontés de cette puissance qui vous est suspecte. Enfin vous n'ignorez pas ce que vous coustez à Dieu :

vous

vous sçauiez que vostre premier Pere ne vous a pas plustost perdus, qu'il est venu luy-mesme vous chercher. Apres vn tesmoignage si esclatant de sa charité, ce seroit vn crime indigne de pardon, de soupçonner qu'il pût iamais prendre des resolutions au preiudice d'une si chere creature. Quoy ? apres auoir souffert d'insupportables mespris, essuyé des honteux opprobres, & soustenu des douleurs, qui ont autant duré que sa vie, le pourroit-il resoudre à perdre le fruit de toutes ses peines ? & que luy seruiroit d'être né dans vne cresphe, d'auoir traîné parmy les gueux & la besace, & pour dire tout en peu de paroles, que luy seruiroit d'auoir respendu iusques à la derniere goutte de son sang & expiré dans les bras d'une croix infame & cruelle ? Qui seroit assez peu sage, pour quitter les aises de sa maison, & de trauerser les mers, afin de chercher de l'or, & des diamans, à dessein d'en faire vn naufrage volontaire au port, apres les hazards, & les risques, ie n'estime pas qu'on puisse trouuer assez d'imprudence parmy les hommes, pour s'exposer à des dangers si peu utiles. Et neantmoins ceux qui apprehendent leur ruine apres tous les trauaux du Sauueur, le supposent capable d'une plus estrange folie. Il est vray qu'il y a cette différence, qu'un peu d'or, est beaucoup, comparé à un petit Marchand, & que la perte de tous les hommes ne scauroit incommoder vn Dieu, ny beaucoup moins troubler ses aises. Certes ie n'ignore pas cela, mais qui ne voit aussi que les trauaux d'une personne diuine valent infiniment plus que les peines d'un chetif mercier, & que ce ne seroit pas vne esgale profusion que d'en exposer le merite. On doit adjoûter à toutes ces assurances de l'Eternité de vostre beatitude, celles qui viennent pareillement de Dieu comme derniere fin

fin de tous les estres. Il n'y a point de doute qu'il n'ait produit ses creatures , comme autant de beaux portraits de son essence. Les moindres effets de son pouuoir sont de parfaites images de sa bonté ; sur tout, l'Homme a dans son ame de tres-illustres marques de sa grandeur, & de sa gloire. Et quel auantage tireroit-il de la ruine de ce precieux ouurage ? peut-estre qu'il monstreroit son pouuoir absolu ? ouy , mais il cacheroit sa bonté infinie. En abyssant ce qu'il a fait, il declarera, qu'il n'a aucun besoin de vos seruites , ouïy , mais, il feroit pareillement voir que vous n'auriez plus de necessité de ses graces. Il prouuera par ce bouluersment vniuersel de la Nature, son independance parfaite ; ouïy, mais il n'establira pas dans cette solitude l'entiere sujction de vostre estre à son Domaine. Apres vous auoir aneantis, outre qu'il perdrait les spectateurs de sa gloire, il n'auroit plus de preuues ny d'exemples de sa toute puissance. Adioustez à cela que ce n'est pas vn glorieux tesmoignage de pouuoir , de ruiner & de perdre, voire mesme, il semble qu'il y ait de la foiblesse : car s'il faut de la vertu pour tirer les creatures du neant : n'y a-t'il pas de l'infirmité à les laisser choir dans ce precipice ? A vray dire , si les choses contraires ont tousiours des principes opposez , on doit accorder qu'il y a de la foiblesse à destruire, puisqu'il y a de la force à bastir. Voilà , si ie ne me trompe , l'appuy que vous deuez donner à vostre confiance , sans ouyr iamais ces outrageux soupçons , qui raschent de vous faire douter de la bonté de vostre Dieu, en vous persuadant qu'il pretend vostre ruine , ou du moins que vostre salut luy est vne chose indifferente.

III. P O E S I E.

*Mon amé est du tout asseurée
Contre les cruantez du sort,
Et les vaines peurs de la mort :
J'ay caution de sa durée,
Je n'apprehende plus sa fin
Elle est presque un Seraphin.*

*Je veux que ce premier abysme;
D'où sortit ce vaste Vniuers,
Tienne ses gouffres entr'ouverts
Depuis son fond jusqu'à sa cime :
Je crains seulement de perir
Quand l'immortel pourra mourir.*

*Que le despit de la Nature,
Porte tous ses ressentimens
A renuerser les elemens,
En vne seule sépulture :
Je verray ce cercueil sans peur,
Dieu ne peut estre mon trompeur.*

*Si le Soleil perd sa lumiere;
Dans l'éclypse de sa beauté,
Ma foy n'a point d'obscurité,
Elle demeure toute entière :
Quoy que l'ombre couure les Cieux;
Elle ne touche point mes yeux.*

*Que les cruantez de la Bise,
Fassent flestrir toutes les fleurs,
Que l'Aube nourrit de ses pleurs,
Mon cœur ne craint point cette crise :
Mes esperances sont d'un ver,
Qui n'apprehende point l'huyet.*

Les ardeurs de la Canicule,
Plus redoutables aux moissons,
Que les plus rigoureux glaçons,
S'approchent sans que ie recule :
Je ris & mesprise l'assaut
Aussi bien du froid que du chaud.
Par fois la noire difiance,
Tasche bien d'esbranler ma foy,
Mais la parole de mon Roy
Remet mon cœur en assurance :
Quoy qu'il puisse m'anéantir,
Il le fera, s'il peut mentir.

Que l'enfer attaque ma vie,
Je suis si fort auprès de luy,
Et si ferme sur son appuy,
Que ie mesprise son envie :
Sa rage me peut assaillir,
Mais elle peut bien me faillir.

Je sçay bien qu'un nombre d'années,
Ayant vuidé tout mon fuscau,
Me doit preparer un tombeau,
Et terminer mes desinées :
Mais Lachesis ny Atropos
Ne sçauroient troubler mon repos.

Il est certain que tout succombe
Sous les attaques du destin,
Et que tout est de son butin :
Mais qui ne sçait point que la tombe
Ne me doit pas tousiours tenir,
Et qu'en fin ie dois rajeunir ?

Comme on void apres les gelées
Renaître la rose & les lis,
Que le froid tient ensevelis
Dans les plus secondes valées :

*De mesme si i'entre au tombeau
C'est pour en ressortir plus beau.*

*La mort est vne medecine,
Qui guarit toutes nos douleurs,
Et qui met fin à nos malheurs :
Elle nous purge & nous raffine,
Quoy qu'une parfaite santé,
Ne vienne pas de sa bonté.*

*Vn corps pourry sert de semence
A nostre resurrection :*

*J'ay certes de la passion
Pour cette seconde naissance :
Pourquoy craindrois-je le tombeau,
Puisque c'est mon second berceau ?*

*Fieure, calcul, goutte, migraine,
Ruinez si vous pouvez mon corps,
Je me mocque de vos efforts,
Je tiens à faueur vostre haine :
Car si ie meurs vn seul moment,
C'est pour vivre eternellement.*

IV. PROSE.

MA D A M E, vous avez vne adresse incroyable pour donner & guerir des apprehensions, comme il vous plaist. Mon esprit s'est tantost troublé par la consideration de cette dependance, qui nous soumet à nostre Souuerain ; & voilà que vous me forcez d'auoir à cette heure, que cette parfaite sujétion nous doit garantir de tous les mal-heurs où elle nous peut reduire. Je ne croy plus que la merueille de cette lance qui rejoint les playes qu'elle ouuré, soit vn conte fait à plaisir, puisquo la mesme raison qui

me desespere , m'assëure. Th. A ne rien dissimuler, Celestin , ce mystere est bien digne de ton admiration, mais il l'est beaucoup dauantage de ton amour. Quel sentiment auras tu , lors que ie te feray voir que ce Monarque à qui rien n'est impossible pour te perdre, fait tout ce qu'il peut pour te sauuer, & qu'il n'a de la sagesse que pour s'occuper au bien de sa creature ? Ce n'est pas neantmoins mon dessein de m'estendre aux prenuës de la Prouidence, qui gouuerne ce grand Vniuers, & qui en regle les actions avec autant de iustice que de iustesse. L'opinion d'Epicure, & de ceux qui veulent, que le hazard & le rencontre fortuit des atômes compose, & gouuerne le monde, n'a plus de rang que parmy les plus ridicules Fables. Toute la Nature reconnoist & publie vne Prouidence autant charitable en ses soins , qu'infailible dans ses ordres. Je suppose donc vne verité appuyée de l'auëu des Nations, & que l'impieté mesme ne contredit , que pour la faire dauantage paroistre. Ne peut-on pas charger nostre Dieu de la tutele de ses Creatures, sans craindre de luy donner trop d'affaires, ou d'interrompre le repos de sa parfaite beatitude ? Son pouuoir ne rencontre point d'obstacle qui l'empesche ; sa bonté ne se rebute d'aucune malice qui le trauerse , & cette profonde lumiere d'esprit, qui fait sa connoissance , ne souffre point d'eclipse, qui luy cache la veüe de vos moindres necessitez. Son amour infiny ayant des pensées de douceur pour ses plus chetiues Creatures, ne soyez pas si peu raisonnables, que de croire qu'il manque d'inclination pour vous, & qu'il mesprise leur Prince. Il faudroit auoir renoncé au bon sens , pour se persuader qu'un pere prenne soin du laquais de son fils , & qu'il ne pense iamais à cette chere personne. Que si vous ne pouuez feindre cette

cette imperfection dans vne bien-veillance, qui peut souffrir de l'illusion & de l'imposture : gardez-vous bien de croire que celuy qui se vante d'estre le pouruoueur des petits corbeaux, lors que la blancheur de leur plumage les fait repudier comme illegitimes, abandonne le doux obiect de son cœur & le chef-d'œuvre de sa puissance. Dieu ayant honoré l'homme d'une ressemblance de sa Nature, luy a passé contract de l'amour qu'il luy porte, & des soins qu'il prend de sa conseruation. Il s'ayme quand il vous fait du bien, d'autant que le prototype se reflexchit en quelque façon sur soy-mesme, par la sympathie qu'il a pour son image : cét escoulement d'amour que la necessité semble exiger à vne cause sur ses productions, ne sort de son principe que pour y retourner. Celestin, ce n'est pas vne petite consolation à l'innocence affligée, de sçauoir qu'elle combat à la veuë de son Roy, & qu'il ne luy arriue aucun accident, qui ne luy vienne de son ordre. Ouy, mon cher Celestin, toutes ces traueses que vous appelez improprement malheurs : ces maladies, qui flaistrissent vn corps, ces disgraces, qui ruinent vos fortunes : ces calomnies, qui souillent vostre renommée : ces outrages qui offensent vos personnes, & ces cruautéz, qui attaquent vos vies, ont vn decret eternal dans la volonté de Dieu, par lequel non seulement il ordône que vous souffriez, mais encore, il veut ayder ces causes secondes, que vous chargez avecque tant de murmure du blasme de vos souffrances. C'est Dieu qui donne le mouuement à cette main qui tuë, qui remuë la langue qui detraite, & qui fait tout le mal qui vous afflige. S'il le fait, il le veut : s'il le veut, sa volonté est eternelle. Les esprits vulgaires ont de la peine de comprendre cecy : parce que ne pouuans desmesler ces actions de la malice

lice du peché qu'elles portent, ils consentent plustost, qu'une bonté, qui ne peut faillir, ne contribue rien à ces accidens, que d'avoir vn commerce qu'ils ne voyent pas exempt de crime. Mais certes cette pieté est trop scrupuleuse, car encore bien que Dieu travaille, avecque la Creature, il n'est pas moins incapable de sa faute que l'ame des mauvaises démarches d'une jambe boiteuse, qu'elle anime. Or c'est une verité rereuë quasi de tous les doctes, que Dieu ayde l'action de ses creatures, non seulement, parce qu'il leur donne la faculté d'operer : mais encore parce qu'il concourt immediatement avec elles. J'ay desia insinué quelques raisons de cette dependance ; & de vray si vous n'auiez besoin de cette assistance coniointe, & prochaine, il manqueroit une perfection au domaine de Dieu, qu'on luy pourroit souhaiter. Ce discours fait grandement à mon dessein, car si Dieu travaille avecque l'homme dans le temps, il est necessaire qu'il en ait pris la resolution dès l'Eternité, à raison, que les causes libres n'agissent iamais sans deliberation. Si bien que Dieu ayant determiné par une extrême condescendance, de donner secours aux causes secondes, & preuen les resolutions qu'elles deuoient prendre, il s'est obligé dans son Cōseil eternal de les ayder de ses forces & d'operer coniointement avec elles. Voila ce qui me fait dire, qu'il n'arrive rien dans le cours de toute vostre vie, qui n'ait une volonté eternelle dans Dieu, par laquelle cette disgrâce vous est decretée à telle heure, & dans telle ou telle circonstance. J'auoüe qu'il a deux sortes de volontéz, pour les deux sortes de maux de coulpe & de peine, puis qu'il permet seulement les premiers, & qu'effectiuelement il ordonne les seconds. Avecque cette distinction, le Prophete Amos nous auertit, qu'il ne se fait point

point de mal dans la Cité, que Dieu ne fasse, Isaye declarant la mesme verité, assure que c'est luy qui produit la lumiere, & les tenebres, c'est à dire, qui dispose des beaux iours de la fortune, & des mauuais de l'aduersité. N'est ce pas assez pour vous faire respecter vos miseres, de sçauoir que Dieu vous les enuoye, & que c'est vne pensée eternelle, qui conduit & qui regle tous les accidens de vostre vie. Je veux que la personne qui vous procure du desplaisir peche, il est tousiours vray que Dieu veut positiuement son action, quoy qu'il en permette seulement la malice. Certainement cette reflection doit satisfaire vne Creature raisonnable, car enfin cet ennemy ne vous nuiroit pas s'il n'en auoit le pouuoir & l'intention. L'Apostre nous apprend, que toute puissance vient de Dieu : & que ceux qui taischent de luy resister, outre qu'ils trauaillent inutilement, ils s'opposent à ses ordonnances. Peut-estre qu'il n'y a que la mauuaise volonté de l'homme, qui vous fasche : le veux croire que vous auez assez de zele, pour considerer le principal interest de vos offences : neantmoins quoy que vous dissimuliez le dommage qu'elles vous procurent, i'estime que la mauuaise intention d'autrui ne trouueroit que du mespris dans la pluspart des hommes, si elle estoit impuissante à leur faire du desplaisir. J'ay monstre, que Dieu veut ce mal entant qu'il est mal de peine, & mesme qu'il le fait, & le produit de sa main amoureuse. Passons, que la malice de l'ennemy soit la seule chose qui vous desplaise ; vous estes iustes de ne la pas souffrir, puisque vostre Dieu la souffre, & qu'avecque des douceurs incroyables, il en dissimule l'iniure. Quelque rage que la creature ait contre vous, elle ne sçauoit mesme pecher, si le Createur ne luy permettoit, pour des fins

tres-

tres adorables , quoy que secretes, La necessité que vous auez de son secours dās vos actions est tellement absoluë , que s'il refusoit son assistance ou sa permission , toute la Nature demeureroit impuissante , & paralytique. Cette dependance paroist de telle consideration à quelques Philosophes , qu'ils tiennent que les causes secondes ne produisent rien dans leurs ouvrages, mais que la premiere fait tout à leur seule presence. Pour exemple (disent-ils) ce n'est pas le Soleil qui esclaire & qui eschauffe, mais Dieu qui produit la lumiere & la chaleur : lors que ce bel astre regne sur nostre hemisphere , & qu'il regarde nostre terre. Cette opinion declare parfaitement la necessité qui vous attache à Dieu , mais elle condamne sa sagesse , d'auoir mis tant d'organes inutiles dans les Agens, & offense sa bonté le faisant tout seul Auteur de vos crimes. Il n'en faut point douter , l'homme opere , & dans ces actions que vous'appelez naturelles , & dans celles qui sont morales. Toutefois il ne pourroit seulement en former le dessein, si vostre Createur n'auoit de toute eternité vne volonté positive de luy donner dans le temps la vertu d'agir, & de l'assister en ses operations , avecque vne permission, par laquelle il souffre que son action soit mauuaise, & coupable. Or ie ne croy pas qu'une prouidence qui s'interesse dans la cheute d'une feuille d'arbre, qui conte les brins d'herbes de la campagne, qui tient conseil sur les funerailles des passereaux, & qui proteste qu'il prend soin du plus petit de vos cheueux , neglige les principaux accidens qui vous arriuent. Pour accorder cela , il faudroit penser encore plus bassement de Dieu , que de cet Empereur , qui s'amusoit à tuer des mouches dans son cabinet , ou que de cet autre faincant, qui s'occupoit à imiter de
vieux

vieux contrats, au lieu de traiter des affaires importantes de son Estat. Non, non, vostre grand Monarque n'est pas spectateur oisif de vos combats, il se coule, & s'insinuë subtilement dans toutes vos disgraces, mēme dans vos pechez : non pas comme partisan ou complice, mais comme luge qui les condamne & les corrige, & comme vn diuin Alchimiste, qui en tire de glorieux & d'vtils auantages. En quoy il nous donne vne signalée preuue de sa bonté, de tirer du bien du souuerain mal, qui est le secret d'vne sagesse infinie. D'où tu peux apprendre vne cognoissance, que tout le monde ne penetre pas, sçauoir, que si le bien n'est la cause finale du mal, il est au moins vne condition necessaire à sa permission. Ainsi ie tiens le sentiment d'Augustin fort raisonnable, qui veut que Dieu n'eust iamais souffert la faute d'Adam, s'il n'eust eu le dessein de resoudre l'Incarnation du Verbe, & que cēt Innocent n'eust pas eu la licence de faire vn homme pecheur, si vostre grand Createur n'eust voulu faire vn Homme Dieu. Pour cette raison l'Eglise appelle la rebellion d'Adam, vne heureuse faute, & luy attribue le merite de la Redemption. Cette desobeissance est heureuse; parce qu'elle est occasiō de la plus grande gloire que Dieu ait iamais receuë, car si le premier homme n'eust peché, il y eust tousiours eu vne Majesté infiniment adorable, mais il n'y en eust iamais eu d'infiniment adorée. Elle merite de plus cēt ineffable mystere, non pas qu'elle possede de la dignité, pour obliger vne personne diuine à vne alliance indigne d'elle, mais parce que celuy qui pouuoit empescher cette reuolte, ne la pouuant approuuer, ne l'eust iamais permise, s'il n'en eust deu tirer ce bien in finy. Auecque proportion, ie maintiens que Dieu a des veuës admirables sur vos

sur vos souffrances , & qu'il n'en permettroit pas la cruauté s'il n'auoit de tres-iustes raisons , & s'il ne pretendoit d'en faire reüssir vostre gloire & vos auantages. Abel s'est veu massacrer par son propre frere, ie ne doute point que sa mort n'ait conserué son innocence , & que la perte d'une vie passagere ne luy ait aisé l'éternelle. Les maladies, & la pauvreté ont fait vn spectacle d'horreur de Iob; mais ces malheurs luy ont doublé sa bonne fortune. Ioseph a esté vendu aux Ismaélites, par ses freres, mais c'estoit pour soulager leur faim, & pour regner en Egypte ; s'il n'eust esté esclau, il n'eust iamais esté Roy , s'il n'eust senty les miseres d'un captif , il n'eust pas receu les honneurs d'un Dieu, parmy les peuples. Saül a persecuté Dauid de son consentement , mais c'estoit pour donner un bon Prince aux Hebreux, & luy apprendre à ne pas faire souffrir aux autres , ce que son experience luy auoit fait connoistre. Daniel entre sur son aieu dans les flammes d'une fournaise , mais il veut conuertir un Monarque , & persuader toute une Nation sur sa puissance. Il souffre encore que le monde ait des Tyrans, mais afin que le Ciel ait des Saints , & des Martyrs. Voilà une des principales fins, qui portent la bonté de vostre Dieu à permettre les accidens, & les malheurs, qui trauerfent vos fortunes. Y a-t'il un moyen plus puissant pour auancer la perfection des hommes , que de leur offrir des occasions de patience ? peut-estre que la plus grande part des Bienheureux n'auoit pas eu une premiere pensée de la vertu, si l'affliction ne les eust resueillez de l'assoupissement où la prosperité les tenoit endormis. Peut-estre que le premier moment, qui les a rendus misérables les a faits saints. Mon cher disciple , hélas ! en quel estat serois-tu maintenant , si la bonté de celuy
qui te

qui te gouuerne, ne t'auoit osté la puissance de te perdre, en t'ostant le moyen de l'offencer ? Il n'y a que ton Dieu qui le void ; mais il ne faut point douter, que ton malheur est preferable à ta premiere fortune, puis qu'il a trouué bon de la changer. Quand les miseres du monde n'auroient point de meilleur effect, que de nous donner la pensée & le dessein de la vertu, qui seroit assez aueugle, pour n'en proferer pas les incommoditez aux plus douces faueurs qui flatent nos esprits ? qui n'en receuroit les occasions avec de l'applaudissement, & des ioyes, plustost que de les fuir avec de l'horreur, & des craintes ? Le dessein que i'ay de parler à loisir des heureux fruiets de la souffrance m'arreste maintenant à des considerations hors de ton interest, & de tes auantages. Ne iugez-vous pas qu'il est iuste que Dieu maintienne les Causes dans les droicts, & dans la propre condition de leur estre, puisque c'est luy, qui determine leur Nature à certaines fins, qui supposent des certains pouuoirs, & de certaines qualitez pour y atteindre ; Pour cette raison, si elles sont libres, il les doit laisser dans leur franchise, si elles sont necessaires, pourquoy destourneroit-il leur action, leur imprimant des mouuemens contraires aux inclinations qui sont comme des parties de leurs essences ? faudra-t'il faire tous les iours des miracles, pour contenter les impatiens, & forcer la necessité mesme, pour ne point donner de sujet à leurs plaintes ? Quand ce sage Gouverneur de l'Vniuers permet à l'orage de tomber, où le vent le pousse, n'observe-t'il pas vne iustice generale & vniuerselle qui l'oblige d'ayder ses creatures, sans changer leur instinct, ou leur faire violence ? Quand la fievre a gagné par de successiues & naturelles indispositions la masse du sang, son ardeur a

droit d'en alterer la temperie, on ne peut empescher son actiuité sans faire vn miracle & vne iniustice. Quand vn homme s'est resolu d'en offenser vn autre, soit en attaquant sa vie, soit en des-honorant son estime, Dieu contreuendrait à sa propre conuention, s'il luy refusoit sa permission & son assistance. C'est vn ordre qu'il a mis dans le monde, il ne doit pas le renuerser sans des raisons importantes. C'est vne loy qu'il s'est donnée, il la faut garder, s'il n'arriue de grands subjects de dispence. Ne voyons-nous pas que la terre monte quelquefois, & que le feu descend contre leur poids, pour conseruer le bien de toute la Nature? Et qui ne sçait, que les plus insensibles parties de l'Vniuers quittent leur interest particulier, afin que le general ne souffre deschet ny atteinte? Jugés par là de l'equité qu'il y auroit de pretendre qu'une loy vniuerselle se changeast, pour s'accommoder aux humeurs d'une personne priuée. Encore pourroit-on dire que les disgraces ont mesme quelque attrait, qui les doit faire desirer à celuy qui les souffre, puis que leur amertume, rend les douceurs de la vie beaucoup plus agreables par leur meslange. Vne bouche accoustumée aux delicatesses, en perd le goust: pour sentir les meilleures viandes avec plaisir, il faut quelquefois irriter l'appetit par l'usage de celles qui luy sont importunes. La friandise n'ignore pas ce secret, puisque par le ieûne & les dietes, qui luy sont insupportables, elle se prepare aux delicces d'une bonne table, qui luy sont douces. Vous ne comprendriez pas ce que vaut la santé, si la maladie ne choque iamais vostre temperament: vne forte migraine vous apprend ce que vaut vne bonne teste. Et bien, ie veux que les miseres, qui troublent vos prosperitez, n'ayent point d'autre fin, que de vous en faire remarquer

remarquer les douceurs , croyez-vous n'auoir point d'obligation à cette sagesse, qui trouue l'artifice, sans lequel vous n'auriez point de bonne ny d'agreable fortune ? La vie de l'homme est vne Musique, qui reüssit du concert de toutes ses actions , il y faut des feintes , des souspirs , des tremblemens & des dieses, afin que l'harmonie en soit iuste & parfaite. Que toutes les notes soient blanches & qu'une mesme ligne les soustienne dans vn ordre esgal, ce qui rait ordinairement le cœur , aura aussi peu de charmes pour l'oreille que de varieté pour les yeux. Si l'art trouue l'inuention de mettre les faux accords & les tritons en vñage , & de reconcilier des tons irreconciliables, pourquoy la grace n'emploiroit-elle pas vtilement vos mauuaises fortunes ? Mais comme ie t'ay promis, ie reserue à vn autre temps le discours des profits de la souffrance. Ce que ie veux à cette heure de ta raison, c'est qu'elle plie sous cette verité : que ton Dieu decrete, ou du moins permet tous les maux qui t'affligent. Il les veut & les fait, s'ils sont purement maux de peine ; il les permet & ne les fait pas, s'ils sont de coulpe. Mais de quelque nature qu'ils soient, iamais ils n'arriueront ; si Dieu , qui les peut empescher, n'auoit vne volonteé eternelle de les faire , ou de les permettre. D'où ie conclus que cette Prouidence qui est assez puissante, pour destourner vos mauuais accidens, & assez bonne, pour les vouloir, ne le faisant & ne le voulant pas, est assez sage, pour les dreïer à vostre gloire. Cette maxime ayant la premiere verité pour appuy, il ne me reste plus (mon cher Celestin) que de t'exhorter à suiure de gré vne disposition, qui te peut entraïner par force. Laisse la nécessité aux estres qui n'ont point de raison, & vñe de ton discours, pour faire par amour ce qu'on peut exiger de toy par

crainte. Rien ne sçauroit résister aux decrets de Dieu, & tout s'efforce d'obeir à ses commandemens. Iette les yeux dans le Monde, & tu verras que les moins sensibles creatures sont tousiours en action & se rendent complaisantes aux volonteiz de ce Monarque souuerain. La Terre fait bien quelquefois sortir des meuglemens de ses abysses, qui sont des marques de sa repugnance & des preuues de nostre tyrannie. Elle demeure pourtant immobile au centre de l'Vniuers, sans que nos outrages & ses refus interrompent son obeissance. Ne souffre t'elle pas pour obeyr, que nous la creusions en valées, que nous l'esleuions en colines, & que contre l'inclination que sa pesanteur donne esgalement à toutes ses parties, nous luy ostions, par tant d'inegalitez la plus parfaite des figures. Qui la contraint à cette complaisance? Dieu luy a commandé d'accommoder quelques vnes de ses conttées à la demeure des hommes, de luy faire des reservoirs dans ses abysses, de luy esleuer des refuges sur ses montagnes, & de luy ouurir ses precipices, pour y chercher les thresors qu'elle cache. D'où vient que la mer ne sort iamais de son liét, où ses continuelles agitations monstrent bien qu'elle souffre. Certes si la volonté de Dieu ne tenoit ses saillies, les frissons qui la souleuent, les vents qui la battent, & les tempestes qui la renuersent, luy feroient bien tost franchir ses bornes & chastier vostre insolence. Elle se haussé quelquefois iusques au Ciel, mais ce n'est que pour faire vne plus profonde reuerence à la voix de son Dieu, qu'elle trouue escrite sur les bords de sa riue. En fin elle obeit, & pour tesmoigner sa soumission à l'esgal de son respect, elle se courbe sous vos vaisseaux, & permet que trois planches de bois triomphent de son orgueil, parce qu'elles portent vn homme

homme. L'air se soumet volontiers, puis qu'il permet sans inquietude que ses voisins vsurpent son domaine avecque force. La terre & l'eau sont eschauffez à cete entreprise, par l'ardeur du Soleil qui les attire. Pour mieux couvrir leur dessein, & dissimuler leur ambition; ils se desguisent en vapeurs & exhalaisons, mais à peine sont-ils au pays de conquette, que le feu portant leur iustice, les allume en esclairs, & en foudres. Que si parfois il les resout plus doucement en pluye, & en rosée, ces gouttes qui coulent de l'Air, sont des larmes qu'il espanche, plustost pour favoriser le travail des laboureurs, que pour tesmoigner sa contrainte. Je veux que le feu se rende inuisible dans sa sphere, afin de se soustraire à l'Empire de son Monarque; il ne scauroit toutesfois luy refuser ses seruites & son hommage. Il est l'esclau de vos volontez dans les vsages communs, & domestiques: vous le mettez en prison dans les fournaux, & les cauernes: & quoy qu'il tasche de s'eschapper par diuers esclans, des ouuertures du Mont Gibel & du Vesuue, vous le resserrez encore plus à l'estroit dans vos canons, & vos grenades. Que si dans l'esclat de son tonnerre, il donne des marques de son impatience, il ne laisse pas de vous rendre des effets de son seruice, parce que Dieu luy en donne l'ordre. En vn mot toutes les creatures trauaillent à l'exécution des commandemens de ce grand Roy, il n'y en a pas vne qui ne soit en mouuement, pour suiure son ordonnance. Quoy que le Firmament soit immobile, il n'est pas oisif puis qu'il ne demeure dans ce repos que pour marquer, si elles sont dans l'obeissance, ou si quelqu'une s'en emancipe. Ne t'étonne pas que ie parle de ces estres insensibles comme s'ils auoient du discours, & de la raison; car de vray leur seruice est si parfait, & si re-

glé, qu'on iugeroit que cette perfection ne leur manque pas, afin d'oüir les volonte^z de leur Monarque. Pour ne point dissimuler ce que ie pense, leur soumission fourniroit vn iuste reproche à l'homme, manquant au tribut que la plus farouche & la moins intelligente nature rend à celuy, qu'elle ne peut connoistre. De moy ie n'attens rien moins de ton courage que de la vertu de ceux qui ont tousiours regardé ces diuines volonte^z, comme la reigle infailible de leur conduite. Quoy que souuent elles leur ayent semblé rudes, ils les ont tousiours estimées adorables : moins ont-ils eu d'inclination à les fuiure, plus ont-ils esperé de gloire à s'y soumettre. De sorte que iamais ils n'ont considéré leurs disgraces ny leurs Tyrans, que comme des Ministres de Dieu qui leur intimoient ses volonte^z, & les aydoient à les accomplir. Ainsi les Neron^s & les Diocletians, les Domitians & les Deces, & le reste de ces illustres bourreaux du genre humain, ne les ont pû estonner auecque tous leurs tourmens & toutes leurs gesnes ; à cause qu'ils sçauoient bien que dans leur mauuaise volonte^z, il y en auoit vne bonne qui demandoit du courage & de la constance à leur vertu. Il me seroit impossible de te produire vn plus glorieux exemple que celuy du grand saint Loup. Comme ce genereux Euesque, à qui rien du véritable Pasteur ne manquoit, que le nom, apprit qu'Attila, qui traifnoit la mort & le Martyre par toute la terre, s'approchoit de Troye, pour en faire les funerailles, il resolut de luy aller au rencontre, pour coniu^{er} cette tempeste. Le Barbare touché de cette inuisible Majesté, qui oblige mesme les Tyrans de rendre h^{on}neur à l'innocence, luy ayant dit pour excuse de la charité, qu'il pretendoit luy persuader, qu'il estoit

estoit le fleau de Dieu. A ces mots le bon Prelat n'eut que ces memorables paroles pour response. S'il est ainsi ; venés aymable fleau de mon Dieu , venez : ie n'ay garde de vous fermer les portes de ma ville. Si vous desirez le Pasteur & toutes les brebis en sacrifice , nous sommes prests , ô mon Dieu ! de rendre cét hommage à vostre bonté , ou bien à vostre iustice. Venez fleau de mon Dieu , ie vous ouvre mon cœur & ma ville. Hé ! qui pourroit vous empêcher d'auoir le mesme sentiment dans les afflictions qu'il vous enuoye , ou comme peine ou comme esprenue ? Peut-estre qu'on veut nos biens & nos fortunes : venez fleau de mon Dieu , venez sainte pauureté , ruinez ma famille , ostez moy le pain & la vie , il m'est iuste de mourir , puis qu'il luy est agreable. Je ne vous cacheray rien , entrez dans tous les coins de ma maison , menez-moy à l'hospital , faites-moy languir de faim , ie le desire , mon Dieu le commande. Possible que l'affliction en veut à mon corps , ie sens les dispositions d'une longue maladie , qui fait lentement les approches. Venez fleau de mon Dieu , ie m'abandonne à vos douleurs. Tenez ma teste , fendez-là d'une cruelle migraine : Voilà mes pieds , attachez-les sur vn peu de paille avecque les gouttes : voilà mes reins , deschirez - les d'une pierre : voilà mes os , consommez - les d'une ardante fièvre , peste , chancre , fer , & feu , si mon Maistre le veut , estouffez , rongez , coupez , bruslez ces mains , ces pieds , ce cœur , & ce corps , ce qui plaist à mon grand Dieu , doit agréer à sa chetive creature. Mais on attaque mon honneur : ce n'est pas assez à mes ennemis de me faire mal-heureux , pour contenter leur cruauté , il faut me rendre infame. Venez , venez fleau de mon Dieu. Je consens à mon entiere

ruine : ie donne ma reputation en proye aux langues & à l'enuie. Que ie sois noir, que ie sois blanc, il ne m'importe, pourueu que mon souuerain Monarque soit content, rien ne m'est insupportable. Celestin, il n'y a rien dans cette resolution que tu ne doïue dire à ton Dieu : car enfin c'est luy qui te chasse de Rome : c'est luy qui t'enferme dans cette prison : c'est luy qui te charge de tes fers ; c'est luy qui entretient cette langueur qui te consume. Tu serois iniuste de te plaindre de ceux qui ne sçauroient seulement te regarder, s'il ne leur en donnoit la permission & la force. Ce ne seroit pas neantmoins assez pour former dans ton ame vne resignation parfaite, de considerer la volonté eternelle de nostre souuerain Maistre, comme vn principe exterieur à vos souffrances. Pour gouster auëc extase la douceur de cette pensée, il faut que vostre raison vous la face voir cooperant à tous vos maux & produisant par elle-mesme cette douleur & ces ourages qui taschent de vous tirer à l'impatience. Et afin qu'il ne manque rien aux charmes de cette consolation, souuiens-toy continuellement, que comme l'immenfité de Dieu, qu'il estend par tout, le met tout en chaque chose, de mesme son extrême bonté qui arreste sa Prouidence à la conduite generale du monde, en applique tous les soins aux moindres accidens de vostre vie.

IV. P O E S I E.

*C'est vne vieille resuerie ,
 Qui n'a maintenant plus de cours
 Et qui ne fournit au discours,
 Qu'un beau sujet de raillerie:*

De

De vouloir que cét Vniuers
Dans ses mouuemens si diuers,
Se gouuerne sans Prouidence,
Et que tout aille à l'abandon
Du hazard & de l'imprudence,
Dieu negligant le soin de son precieux don.

De moy qui connois la nature
Et qui marque son reiglement,
Je me croirois sans iugement
De l'accorder à l'auanture ;
Dieu seul qui l'a tiré du rien,
Est son Autheur & son soustien,
Qu'il laisse un moment sa conduite ,
Elle tombe en confusion ,
Et se verra bien-tost reduite
A retourner au lieu de son extraction.

Il n'est rien d'assez inutile
Pour ne pas sentir le secours
De ses vigilantes amours ;
Il est le Tuteur du Pupille :
Sa bonté s'estend sur les Rois,
C'est elle qui leur fait des Loix :
Mais quoy qu'elle pense aux Monarques,
C'est sans mespris du villageois,
Qui void esgalement les marques,
Les soins de sa douceur , & l'effet de son choix.

N'est-ce pas sa main qui preside
A la naissance des serpens,
Et des autres monstres rampans ?
C'est son œil qui leur sert de guide :
Le moucheront & le lezard
Ne souffrent iamais le hazard,
Mesme l'aspic & la vipere,
Quoy qu'elle naissent sans honneur ,

L'ont pour protecteur & pour pere,
Jamais le moindre d'eux ne demeure mineur :

Qui peut ignorer que l'austruche,
N'a point de cœur pour ses petits,
Qu'elle abandonne aux appetits
Du dragon qui leur fait embusche ?
Mais qui ne sçait que leur berceau
Demeure seur au bord de l'eau
Tandis que sa bonté les veille,
Et que ce nid n'est pas éclos,
Qu'il vit, qu'il dort & qu'il sommeille,
Dieu se chargeant du soin d'asseurer son repos.

Le corbeau jugeant à son aïse,
Que le crime d'un autre oiseau
A fait blanchir le poil nouveau
Des vrais enfans de sa femelle s
Piqué d'une jalouse humeur,
Sans se flechir à sa clameur,
Il desavoue sa nichée,
Dieu qui ne peut la voir mourir
Luy vient apporter la bechée,
Quand sa bonté luy dit, qu'il la faut secourir.

Si le passereau solitaire
Gemit sans cesse dans les bois,
Par le ton mourant de sa voix
Il entretient son Tutelaire,
Et par de si charmans appas,
Luy recommande son trespas,
Dieu s'enclinant à sa priere :
Dispose l'heure de sa mort
Et prepare son Cimetiere,
Quand pour ne plus veiller, une fois il s'endort.

Mais quoy cette bonté suprême
Qui daigne penser aux Oyseaux,

Estend

Estend ses soins aux arbrisseaux,
 Elle les plante, elle les sème:
 C'est Dieu qui met dans leurs pepins,
 Les hauts Cedres & les Sapins:
 C'est luy-mesme qui desuelope
 Les Lis, les Rosés & le Tin;
 C'est luy qui fait leur horoscope,
 Lors qu'il couvre leur corps d'un delicat satin.

Que s'il pare les plus superbes,
 Il peint aussi ces moindres fleurs
 Que l'Aube sème avec ses pleurs:
 Il sçait le compte de ces herbes
 Qui ne sont fruit ny ornement
 Du plus bas & vil Element:
 Sans son congé la moindre feuille
 Ne tombe pas de son rameau,
 Avant que la Bise la cueille,
 Il faut avec respect s'approcher de l'Ormeau.

Sans une coupable ignorance,
 Qui peut reprocher les tesmoins
 Des doux & charitables soins
 D'une eternelle Providence:
 Croiroit-on que les moindres maux
 Ne touchent pas les Animaux,
 Sans les ordres de sa Sagesse,
 Et que l'Homme leur puissant Roy,
 Souffre l'assaut de la tristesse
 Contre l'intencion & l'aieu de sa Loy?



L A

CONSOLATION DE LA THEOLOGIE.

LIVRE TROISIEME.

I. PROSE.



Mesme que ie goustois la douceur de cette Poësie, & que i'en considerois les veritez, comme autant de belles Esclaues attachées à la delicate chaîne du vers, la Sapience rompant cette importune contrainte, continua son entretien en ces termes. Je me trompe ou tu comprends assez par la consideration de ce Domaine, qui soumet absolument toutes choses à Dieu, qu'il ne peut rien faire dont les creatures puissent murmurer. C. Madame vous m'avez parlé avecque tant de clarté de la dependance des estres à leur principe, que tout abatu que ie suis, il m'est impossible de douter. J'ay pareillement compris de vostre excellent discours, que la Prouidence a ses veuës si arrestées & si tenduës sur nos actions, que tout ce qu'on a feint d'Argus, n'est qu'une fable imparfaite; pour me declarer cette continuelle attention. Mon desir seroit maintenant d'apprendre vos instructions, pourquoy cette Prouidence, qui gouverne tout, souffre que l'homme, qui est le plus cher

cher object de ses amoureuses veilles , soit ordinairement le deplorable sujet de l'infortune. Th. Ce seroit vne curiosité sacrilege de chercher la raison de la conduite de Dieu , si cette connoissance ne deuoit servir de motif à l'amour , que merite sa magnifique bonté. L'estime que j'ay, que c'est là le dessein de ta demande , m'oblige de ne te pas refuser vne fauteur à laquelle de moy-mesme ie me disposois , sans ta priere. Et pour ne te point faire languir apres vn secret de telle importance , ie te diray sans aucun destour , que le dessein de Dieu dans les souffrances de ses Esleus , est de les separer des creatures pour les vnir à soy-mesme. Voilà le projet de cette aimable Prouidence , dont ie t'ay entretenu : voilà l'heureuse fin , qu'elle se propose dans ces rudes espreuues , où elle semble vous abandonner. Or pour comprendre la grandeur de ce dessein, il se faut souuenir d'vne verité , qui ne trouue point de contradiction , mesme dans ces esprits qui font vanité de combattre toutes les autres. Et à vray dire, il est impossible de nier, que l'vnion avecque Dieu , ne soit le souuerain bonheur de l'homme , puisque le souuerain bonheur de l'homme est l'vnion avecque le souuerain bien , & que Dieu est le souuerain bien. La beatitude d'vne creature est , où elle a son repos : ainsi voyons-nous que la pierre demeure immobile au centre, & que le feu n'a plus dans sa sphere l'impatience, & les inquietudes, qui l'agitent lors qu'il en est esloigné. Et pour laisser vne deduction, qui te pourroit apporter plus d'ennuy , que d'instruction , il n'y a point de doute, que l'vnion avecque Dieu ne soit vostre souueraine felicité, puis que c'est vostre derniere fin. Vous avez cette grande obligation à vostre Createur, qu'il n'a pas dressé vostre naissance autre part , & que comme

vous estiez dans luy deuant que d'estre ; par l'eminence de sa Nature , il vous y veut remettre , par la possession eternelle , & l'attache bien-heureuse de toutes vos puissances à cét objet infiny, cela supposé, il faut auouer, si les miseres de cette vie vous approchent de Dieu , & que les prosperitez vous en separent , qu'on doit changer le nom aux choses , & appeller faueur, ce que vous nommez persecution. D'autant que ce qui procure nostre bien, & nos auantages , ne scauroit souffrir qu'on le traite avecque tant d'outrage & d'ingratitude , que de luy oster vne qualité, dont il fait ses offices & acquitte tous les devoirs. Je te coniuire , mon cher disciple, de ne pas refuser de faire vn tour, qui peut estre te semblera long, quoy que tu le puisse iuger profitable. Ces labyrinthes, qui meslent vos promenades dans les allées confuses & couppées d'un parterre , ne vous perdent enfin que parmy des fleurs , & des odeurs. l'espere, si ie laisse ton esprit, que ce ne sera que pour le conduire à son repos. L'union avecque Dieu est le vray bien de l'homme , donc ce qui rompt ses chaines, au lieu de l'affliger , l'oblige. Cette consequence est naturellement liée à ce principe, & partant tout le monde en void la suite necessaire. Reste maintenant de faire connoistre , que les souffrances & les larmes sont ces heurteuses eaux de depart , dont l'amertume separe vostre cœur des attaches viciennes qui empeschent ses saillies vers le Ciel. Je n'en veux prendre les preuues, que d'une experience, qui est autant sensible que domageable. La prosperité que les hommes estiment toute la douceur , & le bien de leur vie , a ce mal qu'elle trompe leurs esprits en flatant leur nature : au contraire l'affliction decouure l'inconstance, & le peu de valeur de ce qui tasche de les seduire. Toute la

Philosophie

Philosophie s'employeroit inutilement pour vous persuader qu'il n'y a rien d'aimable parmy les creatures : les sens charment d'une fausse douceur qu'ils en retirent démentent les plus solides raisons de la Morale, & font soupçonner les meilleures maximes d'impostures : un pauvre cœur se fond dans les delices, & la volonté n'ayant de l'inclination que pour ce qui luy promet de la ioye, se porte & s'arreste à aimer ce qui luy paroist desirable. Ainsi elle s'endort dans la poursuite du bien qu'elle recherche, ou du moins elle s'amuse à l'apparence qui l'a surprend, & qui la trompe. Il est vray que les inquietudes qu'elle souffre dans ses plus molles jouïssances, luy font assez comprendre, que son Createur luy a préparé d'autres felicités que les sensibles. Mais l'alliance de l'esprit avecque le corps, contraint toutes ses faillies, & empesche les nobles mouvemens que le Ciel luy inspire. La flamme n'est pas allumée pour languir dans vos fournaux, ny pour noircir vos cheminées, toutefois pendant qu'elle trouve du bois, elle s'y arreste, de sorte que ce qui la nourrit, la captive. Bien d'avantage, elle rencontre par fois des matieres si gluantes, que contre toutes ses inclinations, elle y vole, & s'y attache avecque tant d'auidité, qu'on jugeroit que c'est sans violence. Ah ! qu'il n'est que trop vray, que vostre pauvre ame demeure comme colée à la terre, tandis que les sens y trouvent leur amorce ! Pour lors, cette illustre captive n'a pas la liberté de s'occuper aux grandes fonctions de ses puissances : l'exercice de sa vertu luy est une pratique inconnue, les vices la tyrannisent, & sous l'injuste Empire de la chair, luy sont une insupportable servitude. Qui peut rompre ces chaînes & remettre la raison dans ses droits ? rien plus puissamment que l'adversité. C'est elle qui

elle qui vous fait comprendre , que vos yeux, vostre goust, & vos autres sens sont les trompeurs, les Tyrans & les Demons de l'homme: trompeurs, puis qu'ils persuadent l'ombre pour la verité: Tyrans, puis qu'ils font vne si iniuste violence à la raison: Demons, puis qu'ils vous tentent avec vn danger euident , & presque ineuitable de vôtres ruine. C'est elle qui vous descouure l'infidelité des creatures , & la vanité de leurs charmes. C'est elle qui esproute les amitez, separant ceux qui adorent la fortune , de ceux qui aiment la personne. C'est elle qui dans les plus ameres aigreurs de cette vie, ouure de secretes sources de douceurs à l'ame, qui luy font mespriser les plus delicieuses voluptez. Que si le plus scrupuleux aphorisme reconnoist qu'un mal en soulage quelquefois vn autre, & qu'une playe peut guerir vn malade, ce n'est pas vne petite faueur de Dieu , que l'affliction nous attaque ; & au contraire, c'est vn grand malheur d'estre tousiours heureux, Dauid possedoit sans doute de signalez bien-faits de la liberalité de son Monarque: De Pasteur il l'auoit fait Roy , & d'ignorant , Prophete ; & neantmoins il ne creut iamais sa Muse mieux obligée de luy chanter des Cantiques , que quand il se vid humilié. Ce fut lors qu'il auoia que la Prouidence de Dieu prenoit soin de son salut , & que Dauid estoit vn des amis de son cœur. Il faudroit auoir la douceur , & les charmes de sa harpe, pour te dire les sentimens de son ame. Ne prens ce que ie tasche de t'en exprimer , que pour vne legere expression d'une extase parfaite, & d'un mouuement, dont le seul esprit est capable.

I. P O E S I E.

*Le bon-heur de mes sens empoisonne mon ame,
L'absynthe & le sené nous tirent du tombeau :
Si i'ay de la vertu, dois-je quoir de la flame ?
Son esclat est trompeur, quoy qu'il paroisse beau.*

*Le charme du plaisir n'est qu'un fatal buscher,
S'il flatte mes desirs, c'est pour me rendre infame :
Je me brule aussi-tost que i'en veux approcher :
Le bon-heur de mes sens empoisonne mon ame.*

*Tout ce qui luit à l'œil ne le doit pas conduire,
Vn ardent dans la nuit est un mauvais flambeau :
Mon cœur fuit la douceur qui pretend te séduire,
L'absynthe & le sené nous tirent du tombeau.*

*L'esclat des vains honneurs veut estre mon vainqueur,
Je ne peux le souffrir sans meriter du blasme :
Esloigne ma raison leurs attraits de mon cœur,
Si i'ay de la vertu, dois-je auoir de la flame ?*

*La chair n'a point d'appas pour une ame immortelle,
Ses infames plaisirs sont leurre de corbeau
Mefrise ses douceurs, oppose-leur ton zele,
Son éclat est trompeur, quoy qu'il paroisse beau.*

II. P R O S E.

Fidèle appuy des ames desolées (repris - je aussi-tost) vous mettez tant de graces & de douceurs dans vos remedes , qu'ils guerissent les malades en les flattant. Et certes de moy, i'y prens vn tel goust, que la moindre interruption de vos charmans discours me donne plus d'impatience que l'excez de mon mal

mon mal ne me cause de peines. Toutefois puis que vous m'aués appris que i'y dois plustost chercher ma guérison, que le plaisir, & qu'il vaut mieux qu'une medecine soit vtile qu'aggreable, ie me veux moy-mesme sevrer de la douceur, & mettre quelques facheux momens dans ces bons interualles, que vous donnez à ma douleur. Ie comprends assez que la mauuaise fortune nous détrompe des illusions de la prosperité : mais comme vous m'auéz aduertty qu'elle nous separoit des creatures, ie desirerois bien voir les liens inuisibles, qui nous y attachent, & comme quoy cette heureuse separation se fait. Ta demande (repartit la Sapience) m'aduertit de mettre vn peu plus de iour dans mon discours, & de dresser plustost ma pointe, suiuant la methode des Philosophes, que l'artifice & les destours des Orateurs. Cette franchise m'oblige, parce qu'elle me fait connoistre le desir que tu as de mes enseignemens. Rens - toy donc attentif, & tasche de suiure ma pensée. Tu as sagement dit, que les liens qui arrestent l'homme aux creatures sont inuisibles : par-là ie iuge que tu comprends son attache toute spirituelle. On doit distinguer deux sortes d'vnions, l'une naturelle & l'autre morale, le vulgaire ne connoist que la premiere, & ne s' imagine pas que deux choses soient conjointes, s'il ne void des cordes, des clouds, ou quelque matiere qui frappe ses yeux. Mais les doctes, & ceux qui ont la veüe delicate, apperçoient mesme entre les choses separées de lieu, de certains nœuds, qui les approchent, & vne subtile cole qui les vnit. Et quoy que l'ignorance ne voye pas des liens que tout le monde sent, il ne faut pas sur cette mauuaise raison les rejeter, ny croire qu'il y ait de l'extrauagance à vouloir persuader ce secret. Lors que l'aimant agit sur le fer, & qu'il

+ l'attire avecque tant de violence, nous ne laissons pas d'accorder vne puissante qualité, ou quelque substance deliée entre deux, qui est la main cachée de cet insensible amoureux. Ainsi deués-vous supposer, qu'il y a quelque chose, qui vous attache aux creatures, quoy que personne ne touche & ne voye ces liens. Et ces attaches sont vos desirs, vôtres amour, vos complaisances, vostre ioye, & ces autres mouuemens de l'ame, qui regardent le bien ou le mal sensible. Le desir tire le cœur vers son obiet, l'amour l'en approche, la complaisance l'y cole, & la ioye l'y plonge. En vn mot, de vostre part, vos affections sont vos liens, si vous desirez ou aymez quelque chose, vous luy estes attachez. Du costé de l'obiet la bonté & la beauté, sont les cordes qui vous serrent. Et voilà ce qui du Roy de l'Vniuers fait vn Esclaue plus malheureux, que les criminels de la Galerie. Ce n'est pas mon dessein de condamner tous les souhaits & toutes les inclinations de l'Homme : ie sçay trop bien que ce sont des presens de la Nature, ou pour mieux dire des bien-faits de son Auteur, qui regardent la commodité & les delices de vostre vie. Il n'y a que leur excez qui merite du blasme, & qui soit digne de correction. Dieu par vne haute prouidence a mis des attraites, & de l'amour dans ses creatures, afin d'en entretenir le commerce & les amitez. Autrement, l'homme n'y trouuant pas ses aduantages, & son plaisir, ce qui a esté fait pour son seruice, ne seruiroit plus qu'à son mespris. Vn grand Roy ne s'abbaisse à regarder ses vassaux, & ses suiets que par la consideration des hommages qu'il en reçoit. Mais comme on blasmeroit vn Prince qui obeyroit à ses laquais, aussi ne peut-on approuuer l'excessiue passion que vous auez pour les choses créées. Ce desordre arriue

dre arriue neantmoins quelquefois, & on ne voit que trop souuent, que le Maistre flatte son valet. Tu n'ignores pas que Dieu a mis l'homme dans le Monde pour y commander, que ses parties estendent les Prouinces de son Empire, & que tous les Estres sont les vassaux de ce Monarque. Or comme vn seruiteur possede par fois si absolument son maistre qu'il perd sa dignité, soit que l'assiduité de ses seruices, la complaisance de ses humeurs, soit que l'effet de quelque charme attire ses bonnes volonte. De mesme, pour ces trois principales causes nous voyons que l'homme qui doit posseder les biens de la Nature, se laisse trop souuent posseder à eux. N'est-il pas vray en premier lieu, qu'il y a des personnes, qui s'estiment si peu qu'elles se donnent gratuitement, ou du moins se vendent presque pour rien? Ces petits soulagemens que le corps tire des richesses, de la gloire, & de la volupté, le commandent avecque tant d'empire, qu'il ne luy est plus libre d'agir en Souuerain, ny de receuoir les seruices qui sont deus à sa naissance. Que ne m'est il possible de t'esleuer sur cette haute montagne, d'où le grand Cyprien monstroir toute la terre à son cher Donat? ô Dieu! que tu verrois vne longue chaisne de forçats, & qu'il te seroit aisé de remarquer la verité de ma proposition: Iettant les yeux dans les villes, tu apperceurois vne grosse troupe noire, qui n'ayant point d'autre liurée que les fourmis, n'a point aussi d'autre occupation, que de traifner iour & nuit quelques grains de bled dans leur tas de poussiere, ou de faire vne infinité d'inutiles tours pour les conseruer. Les autres rampent en limaçons dans l'ordure, mais avecque tant de contrainte, que tu les croirois colés de leur braue, où ils semblent uoir quelque mouuement. Et quoy que l'employ

des premiers ait le pretexte de la Iustice , ceux mesmes qui la rendent aux autres, se la refusent, ne pouuans rompre vne seruitude qu'ils nommment injuste. Pour les seconds (ce sont les voluptueux) bien que la chair les chatoüille, & tasche de les contenter , ils confessent que leur plaisir n'est pas d'autre nature, que celuy d'une personne qui se grate. Et neantmoins tu en verras vn qui file dans le sein d'Omphale , vn autre qui chauffe des souliers à sa maistresse : vn troisieme qui prend medecine , & à qui la complaisance ouure la veine, lors qu'il se porte bien : vn quatrieme qui donne de l'encens à son Idole , & qui la traite d'immortelle quand elle commence desjà de pourrir. J'ay honte de te dire que Hercule est le premier de ces infortunez esclaves , vn Roy Goth le second, Themistocles le troisieme, & Aristote le dernier. Que si tu portes la veuë à la cāpagne, tu y verras des hommes qui courent la poste , trauersent les forests , passent les mers , & qui font mille courses dans le monde. Garde-toy pourtant bien de croire qu'ils n'ayent point de chaîne : leur longe est vn peu plus grande que celle des autres, mais ils sont liez, & si tu escoutes leurs plaintes , leur attache est beaucoup plus importune, que celle qui est plus courte. Que si tu veux vne deduction plus claire: dis-moy ie te prie vn homme qui ne peut aller dans son grenier , sa caue , son verger, ses prez, & sa vigne ? a il de la liberte, ou plustost n'est-il pas retenu comme ces bestes , qui n'ont point d'autre campagne que l'estendue d'une corde mediocre ? Celuy que la volupté traîne où il luy plaist , peut-il fuir à son gré ? Celuy que l'ambition gouverne, se flatte-t'il sans mensonge, d'une franchise sans contrainte ? Mais pourquoy l'homme se l'aisse-t'il ainsi mettre les fers ? i'en ay marqué la premiere cause

cause dans ces chetifs seruices que vous retirez des creatures , & dans cette aveugle persuasion, où vous êtes, que ce seroit ingratitude de refuser vostre amour à ce qui vous consacre son obeysance. En quoy vous oubliez vostre dignité : puis que vous receuez de vostre part avec obligation de retour , ce qui n'est de la leur que l'acquit d'un hommage deu à vostre excellence. De plus j'ay adjousté , que comme il est des seruiteurs qui gagnent leurs maistres par la flatterie, qu'ils apportent à toutes leurs inclinations , à cause que cét estude complaisant , qui ne regarde que leur fortune paroist d'abord vn veritable amour de leur personnes : ainsi nous voyons que les creatures , soit par sympathie à vos humeurs , soit par inclinations à leur propres interests, cherchent de se mettre en credit aupres de vous, par cette officieuse dissimulation de bien-vueillance , dont elles surprennent vostre credulité. En dernier lieu j'ay attribué cette seruitude de l'homme aux secrets d'une Magie, qui trompe son iugement , pour corrompre sa volonté, non pas que ie vueille dire , que les estres sans raison soient capables de cette ruse ; mais bien que l'opinion commune , leur donnant trop d'estime , elle cause cette illusion dans vos esprits , & vous en persuade le merite. Et à parler sincerement, il n'est pas aisé de se defendre d'un charme si vniuersel, & d'une peste si generale. De quelle sagesse faudroit-il estre doiué , pour mespriser ce que tout le monde adore, de quelle hardiesse, pour choquer les sentimens communs , & de quelle force pour resister au courant d'un fleuve, qui se respand sur la pente de vostre Nature ? Voilà à mô aduis trois fortes raisons de vostre esclavage, qui font les nœuds de cette triple chaisne, qu'on ne rompt pas sans peine , & qu'on souffre tousiours avecque

douleur. Il vous reste vne seule difficulté à former sur ce sujet : d'où vient que l'ame qui a des preten-
 tions eternelles , & qui n'est sortie du rien, que pour
 entrer dans la possession du tout (ie veux dire de
 Dieu) laisse ainsi vaincre ces genereuses faillies, qui
 la portent vers le Ciel : que si l'esprit s'abaisse par
 le corps, pourquoy le corps ne s'esleue-t'il quelque-
 fois par l'esprit ? Sans peine on peut respondre auec-
 que satisfaction à cette doute. C'est vne des incom-
 moditez du mariage , que l'espouse suiue toutes les
 volonteze de son mary , & prenne mesme les inclina-
 tions de sa mauuaise humeur. Et quoy qu'il semble
 que cette loy soit injuste , & qu'il n'y ait point de
 raison d'obliger vne honneste femme d'achepter
 auecque son doiuaire, & les attraits de son visage, les
 caprices d'un homme , il en faut neantmoins passer
 par là , d'autant qu'il est inéuitable au foible de sui-
 ure l'impression du fort , s'ils ont vne attache com-
 mune. L'ame est l'espouse du corps. L'alliance qui
 ne fait qu'un tout de ces deux parties, serre les nœuds
 de l'obligation qui l'attire aux auengles passions , &
 aux déreglez mouuemens de la chair. On ne peut
 douter de cela, puisque le corps qui se corrompt, ab-
 baisse l'esprit qui est incorruptible. Voilà d'où vien-
 nent les plaintes de ce grand Apostre , à qui Iesus-
 Christ n'auoit pas osté la loy de la chair , quoy que
 par l'abondante infusion de ses graces , il l'eust sou-
 mis aux mouuemens de l'esprit. Que si tu desires pe-
 netrer plus auant , & connoistre ce qui forme dans
 l'ame cette injuste necessité d'obeyr au corps , & qui
 luy oste la puissance de l'esleuer , ie te diray premie-
 rement qu'un esclaue n'en peut deliurer vn autre. Et
 partant , que l'esprit estant tout lié au corps , il ne
 le peut déprendre des attaches qui engagent sa li-
 berté aux

berté aux creatures, & qui forcent la resistance. Mais ce qui fait penetrer le fonds de cette difficulté, c'est, comme j'ay infinué, que nous n'auons de l'attache que pour les objets, pour qui nous auons du desir, & de l'amour, & que nous n'aymons, & desirons que ce qui nous est connu. Or toutes nos veuës, & nos connoissances ayans vne forte liaison au sens, & rien ne nous estant connu que par l'œil, l'oreille, le goust, l'odorat, & le toucher, est-ce merueille que l'esprit n'ait point d'amour pout des choses inconnuës : & que le cœur n'esleue pas ses mouuemens hors du sensible, où il est arresté, & par le goust qu'il y trouue, & par le defaut des reconnoissances spirituelles, qu'il n'a pas? La volonté de l'homme est vne pauvre auengle, si elle manque de conduite, elle n'a point de mouuement. Il est vray que la Foy vient au secours de l'ame attachée au corps, mais la reuelation estant obscure, elle ne communique pas assez de iour pour percer les tenebres, qui luy cachent l'excellence de son bien. Il n'y a que ceux qui ont des-ià vaincu la tyrannie des sens, qui soient disposez à voir les sombres beautez de cet excellent objet. Encore est-il dangereux, que l'ame n'estant pas tout à fait degagée de la societé de la chair, elle ne tire son propre bien aux defauts du sens, & forme vne idée imparfaite de ce qui est tout parfait. En quoy elle souffriroit vne plus dommageable imposture que l'œil qui iuge toutes les couleurs iaunes, s'il est malade de cette couleur. C'est ce qui a fait la manie de Manez, & de tous ceux de sa secte, qui se sont imaginez vn Corps diuin, ou vn Dieu corporel, Parce que leur esprit opprimé sous la chair, ne pouuant rien conceuoir au dessus de son imputeté, donne de l'encens à ses feintes, au lieu d'adorer son Createur. Si tu veux maintenant

comprendre la dureté de ces chaînes , & l'iniustice de leur violence, tu le pourras par cette consideration: que l'homme estant composé d'esprit, & de corps , il seroit bien raisonnable , que la plus basse moitié de luy mesme suiuiſt les elans de la plus haute , ou du moins , qu'elle ne la trainast plus dans ses imperfections, pour produire vne preuue sur ce sujet qui soit de l'intelligence du peuple , il me plaist bien de te faire ouyr les plaintes d'un de ces captifs d'eux-mesmes. Ce seroit celles de ce grand Disciple à qui j'ay communiqué les plus claires lumieres de ma science, & que j'ay esleué dans ma chaire, pour l'instruction de toute l'Eglise. Incomparable Augustin, tu as senty la contrainte de ces lacets : au moins ne scauroit-on te couvrir au soupçon d'impatience, si tes souspirs ne sont pas vne preuue de ta douleur. Ce genereux Esclaue touché de sa trop longue , & trop iniuste seruitude, apres auoir parlé des empeschemens de s'vnir à celuy qu'il connoissoit pour son vray, & souuerain bien, adjouste. C'estoit là l'vnique sujet de mes souspirs , arresté à cette vaine occupation , non pas avec vne chaîne de fer , mais par ma volonté beaucoup plus dure que ce metal. C'estoit la matiere dont mon ennemy inuisible auoit fait les menottes , dont il m'attachoit. D'autant que d'une mauuaise volonté naist vne opiniaſtre conuoitise , & pendant qu'on se relasche honteusement à la conuoitise , il se forme vne coustume , de la coustume se fait vne necessité. Tout cela comme autant de chaînons , & d'anneaux (ce qui m'a obligé de nommer mon desastre vne chaîne) me tenoit captif dans vne insupportable contrainte. Pour ce desir que vous m'avez inspiré de vous seruir, & de me consacrer entierement à la poursuite de la vraye ioye (qui n'est autre que vous, mon Dieu)

Dieu) il n'estoit pas encore assez fort pour vaincre ces premieres inclinations que tant d'années fortifioient. Et puis , ayant expliqué le combat de deux volontez en soy , pour marquer l'effort d'un captif qui veut rompre son attache , il continuë. Les pensées que j'auois de me porter à vous , estoient semblables aux efforts de ceux , qui taschent de se leuer , & qu'apres s'estre mollement tournez dans leur lit , s'y l'aislent vaincre par le sommeil. Et quoy que les veilles soient preferables au sommeil , souuent neantmoins le paresseux marchande de quitter le lit , & bien qu'il sçache qu'il est grand iour , un certain engourdissement l'attache sur le duvet , & le contraint d'y demeurer apres le iour. De la mesme sorte ie scauois bien qu'il eust mieux valu suivre les attraits de vostre amour que d'obeyr aux mouuemens de la Passion. Mais si la genereuse resistance de l'esprit m'agreoit , & taschoit de me faire vaincre , les flatteries de la chair charmoient , & lioient mes desirs. Je disois bien , tout maintenant , tout maintenant attendez un peu , mais ce tout maintenant , ne s'auançoit iamais , & ce tout à cette heure ne venoit point , & ce moment duroit des années. Pature miserable , hélas ! qui me deliurera de ce corps mortel , sinon vostre grace , mon Dieu , par les merites de Iesus-Christ mon Seigneur ? Te semble-t'il qu'on puisse rien adjouster pour faire voir la tyrannie de l'affection , qui nous attache aux creatures ? certainement , ou elle est inexplicable , ou ces paroles l'expliquent. Tu luy auras l'obligation d'auoir voulu estre l'interprete , & l'exemple de ces conuulsions , que le cœur ressent lorsqu'on luy rend sa liberté. Que si tu veux peser ces derniers mots , tu apprendras , que la seule grace du Sauueur fait cette heureuse separation. Mais pour

concevoir

concevoir ce mystere , remarque que nous pouvons distinguer deux sortes de graces, l'une qu'on doit appeller la grace de Dieu ; d'autant qu'elle consiste dans la communication d'une chose qui luy est propre ; l'autre, qui appartient à Iesus-Christ entant qu'homme : parce que c'est la participation d'un mal, dont la Divinité ne se trouve capable que dans le commerce qu'elle a avec que vostre Nature. Or ie ne veux pas nier que nostre grand Dieu ne peut retirer l'homme de l'attache vicieuse qu'il a aux creatures, s'ils agreeoit de luy montrer le veritable objet de ses amours. Je sçay trop bien que cette immobilité qui arreste les Saints à leur bon-heur , vient de ce que cette felicité les rait si puissamment, que rien au dehors n'est capable d'offrir à leur esprit des biens, qui ne soient dignes de mespris , comparez à l'infiny, dont ils ont la parfaite jouissance. O que vous quitteriez bien-tost la terre, si les richesses du Ciel vous étoient connues ! La pierre ne presse pas sa descente vers le centre avecque tant de diligence , le feu n'a point d'eslans qui ne peussent servir de comparaison, & toutes ces sailies, qui portent le fer à l'aimant, & les choses legeres à l'ambre , ne sont que des langueurs pesantes, & des mouvemens endormis pour exprimer le transport qui vous rauiroit à Dieu. Mais il reserve certe heureuse violence pour l'autre vie, où la necessité de vostre beatitude servira de recompense à ces actions qui doivent être libres en leur principe, pour en avoir le merite dans leur valeur. C'est donc aux graces du Sauveur de faire ce souhaitable divorce de l'homme avecque les choses sensibles , & de rompre les liens qui tiennent son ame captive. Mais qui sont ces graces ? ie l'ay desia insinué : c'est la perte des biens , & des plaisirs, l'eclipse des honneurs, & de la gloire : la

ruine

ruine des amitez & de la fortune : la souffrance des peines & des opprobres. Ce sont-là les seules richesses de l'homme-Dieu , voilà le cher thresor de son cœur & les delices de sa mourante vie. C'est donc de ce fonds qu'il doit tirer les faueurs de ses Esleus , & les graces qui les doiuent attirer à son Empire. Ah ! douces participations des amertumes de Iesus, honorables ignominies de sa Croix , riches pauuretez de sa misere , delicieux dégousts de son fiel ! que vous meritez de desirs , & d'amour , puisque vous retirez les hommes des chaînes , & des fers qui les oppriment. On pourroit auoir du doute de cette verité , si on n'auoit l'experience presque de tous ceux qui possèdent les fruiets de la vraye liberté. Celuy qui t'a fait comprendre les peines d'un cœur engagé aux biens perissables de cette vie , te peut satisfaire sur le projet, & le progres de sa deliurance. Ne te souuiens-tu point d'auoir l'eu, que le moyen d'ont Dieu se seroit pour le gagner à sa grace , fut de l'affliger de ses peines ? Vous estiez (dit-il) au dedans de moy , & par vne bonté qui n'est conceuable qu'à ceux à qui elle est sensible , vous détrempez mes ioyes d'amertume , & avec vne misericordieuse rigueur, vous me remplissiez de miseres , & d'angoisses. Pour ce bien fait , mon aimable Sauueur , ie veux auoir d'immortelles loüanges, puis que ie vous ay d'éternelles obligations. Cét aueu solennel d'une personne si absolument engagée au monde , te pourroit persuader sans contredit , que la grande , & generale methode de Dieu pour attirer les hommes , c'est de seindre qu'il les rebute. Renouuelle vn peu ton attention , pour suiure mon discours. Il n'est point de plus puissant remede pour nous déprendre d'un objet , que de le despoüiller de tous ses attraits qui luy fournissent son

amorce,

amorce, où de monstrier clairement, que ce qui paroist vn bien dans la creature, n'est qu'un erreur dans nostre pensée. Pour guerir vn malade d'amour y a-il rien de meilleur que de luy rendre ses yeux, & luy faire voir qu'il n'aime que du fard, & du plastre ? Quand on aura osté vn pied de patins à cette riche taille, que sa teste n'aura plus ses ornemens : quand elle sera despoüillée de son or & de sa soye, & qu'on luy aura arraché cét yuoire qui iaunit dans sa bouche, pourra-t'on trouuer vn homme assez insensé pour aimer vne naine, & vn chetif reste de femme, qui n'est qu'un peu de phlegme caché sous vne peau delicate. Voilà ce que Dieu fait contre vn cœur qui est sourd à ses semonces, & rebelle à ses volonte, voyant que ces petites ombres de bien, qui sont dans la creature, sont vne si criminelle diuersion de vos amours à son desauantage, ou à parler plus veritablement, au preiudice de celuy qui se laisse tromper. Quoy (dit cette adorable Majesté) faut-il qu'un peu de richesses fasse mespriser mes thresors, & que ce que j'ay mis dans l'or, & l'argent, pour seruir l'homme, le corrompe ? Procez, pertes, malheurs, renuersez cette famille, ruinez ce Palais, desolez cette Province : que la pauureté m'ameine cét insolent à l'hospital, & que pour tant de debtes, la misere l'execute iusques à sa chemise. Se peut-il faire qu'une beauté si legere que celle d'un visage, donne du dégoust de mes perfections infinies ? vn peu de couleur, & de proportion l'emportera-t'il sur vne Essence eternellement adorable ? Maladies, effacez ces joies, auuglez ces yeux, coupez ce front, retirez cette bouche, & de toutes ces belles apparences faites vne horrible figure. Peut-estre que la complaisance des creatures flatte ce cœur, & que pour conseruer vn
amy, il

amy, il ne se soucie pas de perdre son Dieu. Je veux que le soupçon attaque cette intelligence, que la jalousie la trouble, que l'infidelité la traaverse, & que le desdain la dissipe. N'est ce point la vanité qui me ravit les hommages qu'on doit à mon excellence: confusions, mesdisances, hontes, mespris, ternissez ce faux esclat, qui esbloüit, & n'esclaire pas: abaissez cet orgueil, qui enfle l'homme, & qui ne l'esleue point. A ce commandement de Dieu, vne grande fortune se renuerse; ce qui auoit attiré vn nombre infiny d'idolâtres, n'a plus que des moqueurs: cette beauté que l'on considéroit avec admiration, n'est pas seulement regardée avec indifférence; la cause de tant de desirs embrasés deuiant par vn changement fort leger l'objet d'une auersion inuincible. L'esclat de ces grands honneurs se perd; ce qu'on auoit porté iusques au plus haut du Ciel, n'a pas mesme place au fond des abysses, le pauvre cœur ne trouuant pas dans ce qu'il aymoit les qualitez d'attache, n'y repose plus: que s'il ne rencontre pas la contrainte d'une prison, où il paye avec usure, l'intérest des petits contentemens qu'il en auoit tirez, il ne faut point douter au moins qu'il n'y soit sans plaisir, & sans complaisance. D'autant que l'utile, & l'agréable étant l'unique motif de nôtre poursuite, si on les separe de l'objet qu'on aime, on oste au cœur la fin de sa recherche, & en suite le principe de son action: l'aduersité est donc vn maistre qui nous apprend que les choses sensibles n'ont rien d'aimable, ou si elles possèdent quelque aduantage estans beaucoup plus mêlés, du mal que de bien, elles sollicitent moins le desir qu'elles ne prouoquent la haine. Et pour ne rien déguiser, si les hommes se donnoient le loisir de considérer les seruices, & les incommoditez de ces bigeours

geouts auxquels ils prostituent leur amour : si leur consideration estoit serieuse, leur seruitude seroit courte. Regarde, ie te prie, la fortune, par ce qui paroist de plus esclatant en ses faueurs. Ces grandes dignitez ne sont-ce pas des cordes, & des chaisnes, qui pour estre d'or, & de soye ne laissent pas de vous rauir la liberté. Vn homme qui en est chargé, se possede t'il soy-mesme ? s'il est Iuge, le moindre artisan a droit sur son sommeil, & sur ses veilles : à peine a-t'il pris son repàs qu'il perd son repos. On luy vient dire mille petites nouuelles : l'un se plaint qu'on luy a desrobé des choux, l'autre qu'on luy a enforcélé vne cheure : ce troisieme qu'on a remué d'un poulce les bornes de son champ, & vne infinité de semblables querelles, à qui vostre sortise donne le nom de grandes affaires. S'il est Gouverneur de Prouince, le voilà attaché comme vne araignée au centre de sa toile, pour espier de tous costez ce qui pourroit en troubler la tranquillité. Pendant qu'il traueille aux asseurances de la paix d'un porte-faix, & d'une lauandiere, il perd la sienne, tellement miserable par son propre bon-heur, qu'il ne scauroit gouter le contentement ; que ses soins procurent aux plus mal-heureux. Ne croyez vous point, que la condition des Roys, & de ces souueraines Puissances, qui commandent aux ames soit exemptes de cette contrainte ? Plus ils ont de grandeur, & moins possèdent-ils de liberté. Ce grand esclat qui les enuironne les descouure à tout le monde, & fait qu'ils ne conseruent pas la liberté de leurs moindres actions. Leurs paroles, leurs gestes, leur mine, leur contenance, leurs regards sont examinez de leurs moindres suiets : s'ils font bien, ils s'aquitent de leur deuoir : s'ils font mal, ils ont ce des-plaisir d'auoir leurs valets, & leurs laquais pour cen-
seurs &

seurs , & pour iuges. Je ne dis rien des craintes , des ialousies , de soupçons , & des deffiances que les caresses de leurs plus affidez donnent à leur esprit. Le glaiue qui menace leur teste n'est pas tousiours soutenu mesme d'un foible filet. En un mot , iamaïs ils ne sont exempts des inquietudes, qui ne leur font apprehender la cheute , que lors qu'ils sont au bas de leur rouë. Il arriue souuent que la grande foule de ce perpetuel flux d'affaires, où vivent les Princes, diuertit leur esprit de cette pensée ; mais en fin un moment de repos , dans cette agitation continuelle , & le moindre relasche de leur obsession fait auoüer aux plus idolatres de la fortune, que les choux, & les laitues de Carunte ont un goust , qui manque aux delices de Rome. Voulez vous qu'un homme soit riche? il est malheureux : car sans soupçonner temerairement , que son bonheur vient de la misere d'autrui, & que ses thresors sont des larcins publics: qu'il a des terres , parce qu'il les a rauies à une pauvre vesue; qu'il possède des maisons , parce qu'il en a chassé des orphelins , que ses commoditez viennent du deshonneur de sa famille , & que pour auoir de l'or , & de l'argent , il a vendu ses filles , & sa femme. N'est-il pas vray que tous ces grands biens sont des chaines qui le captiuent , des aydes qui luy facilitent le mal, & d'esclatans demons qui le poussent à sa ruine , Iamaïs il ne sera iuste qu'il ne soit pauvre : pour luy donner du repos, il luy faut oster la cause de ses veilles : pour le deliurer de ses peurs , & de ses frayeurs, il luy faut raurir ses diamans , & ses perles. Tandis qu'il luy restera de l'or , il craindra tousiours d'auoir enfermé quelqu'un dans ses sacs avec ses pistolles , il regardera par le trou de la serrure s'il n'y a point de voleur dans son coffre : il se leuera quatre fois dans

I

vne seule nuit , pour voir si vne porte qu'il a fermée luy-mesme de trois verroux , ne s'est point ouuerte. Vne souris dans la paille luy persuade que sa maison est pleine de brigans. Le Ciel menace-t'il de pluie ou de gresle, il a tousiours les yeux sur ses champs, & sur ses vignes. Dauantage ce n'est pas assez de se tourmenter des accidens dont il voit les presages , la crainte luy souleue des tempestes qui ne seront point , vn torrent qui n'aura iamais vne goutte d'eau, entraïne sa maison : le naufrage abyssme sa marchandise, bien qu'elle soit dans sa boutique. Et ainsi, l'amour qu'il a pour les richesses, luy donne des imaginations , qui chastient sa conuoirise. Je ne parle point d'une personne sur qui la volupté s'est acquis du pouuoir , d'elle plus que de tout autre , il est vray de dire , que si elle a de l'amour , elle a vne attache. J'ay pitié de la gese que souffrent ces insensez , & horreur de la tyrannie de celles qu'ils adorent. Vne seule de leurs paroles ne leur appartient plus, on examine la contenance de ce pauvre fou , vn soupir est suspect de trahison , quoy qu'il soit sans dessein, s'il regarde sans congé , ce ne sera pas sans punition. Ce n'est pas assez que la passion possede son cœur , il faut que la flaterie corrompe son iugement : il y a obligation d'estudier des mensonges , pour desguiser ses defauts. Si vne maistresse est farouche , elle est graue , si elle a vne humeur dissoluë , elle est gaye : vse-telle de dédains, elle esprouue, si elle rebute, elle chastie. Et pour faire d'un Esclaue vn idolatre, le poil que la vieillesse ou la maladie luy arrache, doit tenir lieu de reliques , il faut conseruer les ordures du nez, & de la bouche, comme vn precieux baume, & de la ciuette. Et puis , vous vous plaindrez (petits hommes) si l'on vous deliure de cet esclavage , & vous n'adorerez

n'adorerez pas la bonté de Dieu, qui vous oste vos chaisnes en vous ostant vos amours, vos biens, vos dignitez, & vos richesses ? Ah ! que c'est vn grand bonheur d'estre miserable. Tu comprends, ou ie me trompe, que ce que vous appelez improprement de-fastre, sont de douces faueurs du Ciel, & qu'une main, qui vous blesse, vous guerit ; puis qu'elle coupe ce qui vous attache. Je ne finirois icy ce discours, si ie n'estois obligée de te faire voir à l'auantage de l'aduersité, vne separation bien plus delicate que celle dont ie t'ay entretenu Il n'est point de Metaphysique qui fasse des precisions si deliées, mesmes cét entre-deux qu'elle trouue dans les Essences toutes simples, & spirituelles, n'a point de traits plus minces, que celuy qu'elle opere dans l'homme, lors qu'il se diuise de soy-mesme. Il n'appartient qu'à Dieu qui est le premier principe de toutes choses, de s'en establir la derniere fin : & en suite, il est seul de tous les estres, qui doit auoir de l'amour propre, & qui puisse terminer ses actions à son Essence. Tous les autres ayans des natures sujètes ; & inferieures, sont obligés à quelques rapports, & à certains ordres, qui les dressent aux estres plus parfaits. Ainsi l'insensible se rapporte au sens, celuy-cy à la raison, & la raison à l'intelligence. Ainsi toutes les creatures regardent l'homme comme la fin de leur estre, faisant seruir ce qu'elles possèdent de bien, & de commoditez à ses besoins, & a ses interests. Et l'homme se doit entierement referer à Dieu, & en soy rejoindre toute la nature à la source d'où elle est écoulée, afin de reduire le nombre à l'vnité, & par cette vnion, & cét approche, conseruer ce qui se pert dans l'esloignement par la diuision. Mais il arriue tout autrement, parce que l'homme qui est si rigoureux dans l'exaction de ses

droits, se rend fort negligent en l'acquit de ses devoirs. Et bien qu'il ne puisse souffrir que ce qui luy doit de l'hommage le retienne, il s'oublie de rendre à Dieu ce que son excellence, & ses bien-faits exigent de sa reconnoissance. De plus, l'amour de soy-mesme qui luy est naturelle, deuient propre, & par le rapport qu'il fait de toutes choses à son seruice, & l'arrest de ses actions à sa personne, il s'establit sa fin, comme s'il estoit luy-mesme le principe de son estre. Ne crois pas qu'il soit inutile de te descouurir la naissance de l'amour propre, dont le funeste progresz va de l'estime du rien au mespris du tout, i'entens de l'homme à Dieu. Amour propre, ou à parler plus proprement, haine cruelle, qui attache si fort l'homme à l'homme, qu'il ne pense qu'à soy, n'adore que son merite, n'ayme que ses commoditez, & ne cherche que ses auantages: adherant à soy-mesme avec vne cole si forte, & vn glu si subtil, qu'il est autant difficile de le separer, que malaisé d'en reconnoistre la soudure, Il n'est rien que l'affliction qui puisse rompre cette attache, & trouuer la ioincture, où vous tenez si fortement à vous mesmes. Et cela se fait premierement, par la ruine de tous ces biens exterieurs, qui nourriſſent vôtres flamme, & par les ennuyes qui émoussent le goust de vos delices. De sorte que l'homme n'ayant plus dequoy se remplir, il se vuide de soy-mesme, avec vn desgagement si parfait que du desir, & de l'ambition d'une vie immortelle, il passe au mespris de la mort, souhaitant de finir des langueurs qu'il ne peut contenter, perdre des ennuyes qu'il ne sçauoit guerir. Que ne m'est-il possible de produire tous ceux que la mauuaise fortune a deliurez de ce Tyran? tu reconnoistrais sans doute la puissance de ce remede, par la malignité du mal dont il guarantit.

Il garantit. Tu verrois comme insensiblement elle les a fait passer de l'amour à la haine, & d'un estude importun des aises de l'homme-exterieur, à l'innocente recherche de sa ruine. Mais il n'est pas necessaire d'en parler plus long-temps, à vne personne qui toute sa vie a estudié ses artifices, & combatu ses inclinations. Tu en sçais la nature, il reste seulement d'en considerer les ingenieuses sortises : ie n'ay garde de te priuer d'un plaisir qui sans doute, te peut recréer s'il ne te peut instruire. Peut-estre te souuiens-tu de ce que l'Antiquité feint de Narcisse : ce malheur que la Fable depeint dans sa mort, est vne parfaite image de l'amour propre. Represente-toy donc ce pauvre chasseur aupres d'une fontaine, & te rends attentif à son discours : il te veut soulager de l'ennuy qu'une attention trop tenduë t'a sans doute causé.

II. P O E S I E.

*Vous qui de vos beautez en faites des Idoles,
Pour vous faire la cour,
Apprenez les effets des dernieres paroles,
D'une derniere amour.*

*Echo, Nymphes des bois n'auoit pas veu Narcisse,
Qu'elle perdit son cœur,
Et tascha de gagner par quelque bon office,
Celuy de son vainqueur.*

*Heureuse ! si deslors n'estant plus qu'une bouche,
Elle n'eust point eu d'yeux,
Pour voir ce vain objet qui maintenant la touche
D'un regret odieux.*

Mais estant toute d'yeux pour ce Chasseur aimable :

*Au temps de son erreur,
Son corps n'est plus que voix, dont le cry pitoyable
Accuse son mal-heur.*

*Le superbe mespris qui l'auoit outragée,
Ne trouble pas ses sens,
Iusques à s'oublier du soin d'estre vengée
Par ses piteux accens.*

*Que l'objet de tes vœux (dit cette folle Amante)
Puisse tousiours fuir;
Que sa legere humeur soit seulement constante,
Afin de te haïr.*

*Tout aupres de ce lieu couloit vne fontaine,
Dont les parlantes eaux
N'auoient ouuert le cours de leur seconde veine,
Que pour les arbrisseaux.*

*Le ruisseau murmurant sembloit dire à Narcisse,
Viens reposer icy :
J'ay bien prou de mes eaux, agreant mon seruice,
Pour noyer ton soucy.*

*Ne crains pas la chaleur, ce lieu semble assez sombre,
Pour te mettre à couuert :
Je croy que le Soleil se peut cacher à l'ombre
Sous ce fueillage vert.*

*Si tu veux estre seul, & que ma compagnie
T'apporte de l'ennuy,
Pour ne point offenser l'humeur de ton genie,
Tien, voilà que ie fuy.*

*Narcisse se mussa pour soulager sa peine,
Dessous vn arbrisseau,*

S'exposan

S'exposant au Zephyr dont l'agreable haleine
Ioüoit avecque l'eau.

Contemplant ce beau jen , il se mira dans l'onde
Du crystal qui glissoit,
Et vid en se voyant la beauté de ce monde,
Que seule il cherissoit.

La verité d'un corps paroissant dans l'image,
Il ayma ses attraits,
Et laissa surmonter son orgueilleux courage
A de si foibles traits.

Rien ne pouuoit partir de cette main sçauante,
Qui forma Cupidon,
Qui ne cedast aux traits de la beauté flotante
Que vid ce Corydon.

Le bronze à qui Myron donna iadis la vie,
N'auoit rien de si beau,
Et mesme le Cretois fust trespasé d'enuie,
S'il eust ven ce tableau.

Aussi nostre Chasseur ayant ven cette face,
Il en fust abusé.
Et bien que ce ne fust que l'ombre d'une glace,
Il en fut embrasé.

Narcisse, c'en est fait, ta volonté captive
N'a plus de liberté ;
Mais ne crains pas d'aymer, puis qu'aimant cette riuë,
Tu cheris ta beauté.

Admirant ce portraict , toy-mesme tu t'admires,
Tu te vois, s'il est beau,
Et si tu veux laisser les flos, où tu te mires,

Ce n'est plus que de l'eau.

*Ce visage pourtant te doit bien estre aymable,
Son merite est le tien,
Si tu te crois heureux il n'est pas miserable,
Ton bon-heur est le sien.*

*Ne luy refuse pas ce que ta bien-vueillance
Luy peut donner de prix :
Si tu l'estimes peu, ton iugement t'offence ;
Son blasme est ton mespris.*

*C'est perdre mon discours que d'exciter Narcisse
A se mettre en prison :
Puisqu'il n'est plus desla libre dans le service,
Qui force sa raison.*

*Pensif aupres de l'eau, dont il est idolatre,
Il va tout à l'entour :
Et voyant son portraict il s'amuse folastre
A luy faire l'amour.*

*Il se panche dessus, & y cole sa bouche
Afin de l'embrasser,
Mais aussi-tost il sent que le flot qui le touche,
L'a pensé tout glacer.*

*Il adoucit ses yeux, il polit son visage,
Corrigeant sa rigueur,
Et l'aimable ruisseau luy monstre dans l'image
Vne mesme langueur.*

*S'il espanche des pleurs, il espanche des larmes,
Et semble l'asseurer,
Qu'ayant dessus le front l'esclat de tant de charmes,
Il les veut adorer.*

Narcisse

Narcisse ne fait rien, que cette vaine Idole
N'imite dedans l'eau,
S'il s'esloigne, elle fuit, s'il s'approche, elle vole,
Pour quitter le ruisseau.

En fin ne pouvant pas ny soulager sa peine,
Ny souffrir son tourment,
Il tasche de tromper, parlant à la fontaine,
Son cruel mouuement.

Agreable sujet du paresseux supplice,
Qui me fait malheureux,
Si tu me veux haïr, n'vse point d'artifice
Pour m'estre rigoureux.

Peut-estre mon transport se rend illegitime,
Parce qu'il est amer,
Certes si mon amour peut passer pour un crime,
C'est crime de s'aymer.

Cesse de soupirer, Chasseur trop veritable,
Modere ton ardeur,
La neige de ce teint, monstre qu'il est capable
De sa seule froideur.

A iuger des attraits qui parent ce visage,
Le Ciel fait son tableau :
Mais la raison conclud de son humeur volage,
Qu'il est fils de cette eau.

Laisse, laisse l'amour d'une beauté glacée,
Que le soin de guerir
Descourant ton erreur, oste de ta pensée
Le soin de l'acquérir.

Veux-tu donc inhumain t'abandonner toy-mesme ?

Tu te perds ma raison,
Regarde ce ruisseau, son onde devient blesme,
De voir ta trahison.

Vois tu pas qu'il se plaint ? vois-tu pas qu'il murmure
De ma legereté ?
Ne crains point, cher objet par toy-mesme ie iure
De ma fidelité.

Esloigne de ton cœur les cruelles allarmes,
Que te donne ma foy :
Rien ne sçauroit iamais (quand i'aymerois tes l'armes,
Me separer de toy.

Quoy ? tu me tends les bras, & quites la demeure
De ces palais flottans ?
Sans doute tu le fais de peur que ie ne meure,
De souffrir si long-temps.

Inconstant tu me fuis, & laisses dans mon ame
Ta seule cruauté,
Tu feignois de brusler, & tu n'as de la flame,
Que la legereté.

Que ton visage feint marque bien l'inconstance
D'une vaine amitié !
Si tost que le Soleil retient son influence,
Il se cache à moitié.

A Dieu donc cher ruisseau qui faisois mes delices,
A Dieu mon cher tourment,
Je prens congé de vous souhaitables supplices,
A Dieu mon doux Aimant.

Quoy tu reuiens à moy recompensant ma plainte,
Du bien de te reuoir ?

*Si tu t'estois caché, ce n'estoit que par feinte,
Pour tenter mon deuoir.*

*Tu le dis, ie l'entends, non pas de ton langage,
Mais du clin de tes yeux :*

*Je te voy bien parler, mais ie n'ay pas l'usage
De la langue des Dieux.*

*Je veux croire pourtant, que cette humide source
Glace ta passion,
Et t'apprend à fuir d'une eternelle course
Ma chaste ambition.*

*Mais certes la raison accuse ton courage
De m'auoir offensé :
Et moy pour me vanger i'auouë en ton image
Que i'ayme vn insensé.*

*On dit que l'amitié naist de la ressemblance,
Je suis semblable à toy :
Accorde à nostre amour l'effet de sa puissance
Te transformant en moy.*

*Les Nymphes m'ont appris que i'estois desirable,
A leurs chastes amours :
Je suis de leur aduis, car leur fin miserable
Approuue leur discours.*

*Et voyant dans tes traits, les traits de mon visage,
Et mes yeux, dans tes yeux :
Je croy sans me flater estre vn parfait ouurage
Du pouuoir de nos Dieux.*

*Sa voix n'en pouuoit plus, quand sa mourante vie
Se confondit dans l'eau,
Laisant son triste corps sujet de son ennue*

Cheoir

Cheoir sous un arbrisseau.

*Neantmoins ce beau corps coula dans la fontaine,
Par les feux de l'amour,
Et Narcisse voulut de ce lieu de sa peine,
Faire son beau séjour.*

*Depuis le riche flot de cette amoureuse onde
S'enit à ce metal,
De qui les qualitez font voir à tout le monde,
Le monde en un crystal.*

*La glace du miroir retient si bien empreinte
La vertu de cette eau,
Qu'on y void aussi bien son image dépeinte,
Comme dans un tableau.*

*Et de là vient aussi la charmante folie
Qu'on ne peut se mirer,
Qu'on n'ait à mesme temps l'ame toute remplie
Du soin de s'admirer.*

III. PROSE.

CE doux concert flattoit encore mon oreille, lors que j'adressay cette priere à la Theologie. Sainte Maistresse des vertus, il m'est aussi difficile de taire ma satisfaction, que de l'exprimer : vostre discours rait toute ma raison ; & l'incroyable douceur de vos paroles charme entierement mes ennuy. Il n'y a rien d'asseuré au monde, où il est vray que l'aduerfité nous separe de nos mauuaises affectiōs : j'ay mon experience là dessus, & celle de beaucoup d'autres personnes. Et certes il me souuient qu'à mes-

me que

me que mes ennemis me persecutoient , il me sembloit que mon cœur se retiroit avec ioye des obiects dont il auoit fait autrefois la recherche avec ardeur. Ton obseruation (me dit la Sapience) vaut bien vne de mes meilleures preuues : car outre la persuasion qu'elle met dans ton esprit, elle rend la liberté à ton ame. Mais sçais-tu pourquoy cette heureuse deliurance arriue, lors que vous estes accueillis de quelque disgrâce ? il me semble (repris-ie aussi-tost) que cela arriue , parce que l'affliction respand des dégoûts sur les choses qui nous sont agreables : ou bien parce qu'elle nous ouure les yeux aux impostures qui nous trompent. En quoy ie remarque que nostre grand Dieu vse de la douceur de ces meres, qui pour porter leurs petits à de plus solides viandes que le lait , frottent le chicheron de leurs mammelles, de quelque liqueur bien amere. On peut adiuuster, que dans l'attaque des souffrances, il se fait vne suspension de nos fausses ioyes, pendant laquelle nostre raison descouure les deffauts de son objet , & se premunit dans ce bon interualle, contre ses nouueaux charmes. O que tu es heureux mon cher Nourrisson (s'escria cette auguste Deesse) de comprendre ces importantes veritez : n'estime pas pourtant que ce souhaitable diuorce soit le plus considerable effet de l'aduersité. Ce n'est pas assez , qu'Israël connoisse la misere de sa condition , que Ioab regarde l'embrasement de ses bleds , que l'Enfant prodigue sente sa faim : il faut que ce pauvre peuple sorte d'Egypte, que ce Capitaine coure au Palais d'Absalon , & que ce Fils desbauché reuienne à la maison de son pere. Je veux dire, Celestin , que ce seroit peu si l'affliction n'vnissoit l'homme à Dieu , apres l'auoir heureusement separé des creatures. Et c'est ce qu'elle fait parfaitement,

faitement , d'autant que nostre volonté ne pouuant arrester ses inclinations au vuide, ny se terminer à la priuation de son propre bien ; elle s'eslance vers le Ciel où l'entendement luy en monstre le séjour. Et quoy qu'elle ne s'y porte pas avec le mesme aueuglement que le feu , elle y vole avec la mesme promptitude, & s'y joint avec des liaisons beaucoup plus fortes. Mais souuiens-toy de la distinction, que j'ay proposée au commencement de mon discours , & que mon dessein n'est pas de feindre vne vnion substantielle de Dieu avecque l'homme affligé. Cette faueur s'arreste en Iesus-Christ seul , bien qu'elle se puisse estendre à toutes les autres Natures. De mesme, quand ie dis que l'aduersité , nous approche de nostre souverain bien , ie ne pretens pas aussi donner des bornes ny de l'estendue à vne Essence , que son vnité tres-simple met dans les moindres atômes ; sans l'y enfermer, & que son immensité respand hors de toutes choses , sans l'en exclurre. Ce n'est pas à tire-d'aissles, ny à course de cheual, qu'on s'approche de celuy qui est présent à tout : le carrosse, & la poste ne seruent de rien, pour faire le chemin qui nous mène à Dieu. Celuy qui est immobile , ou qui n'a point de pieds va plus viste que ceux qui courent, s'il connoist, & aime dauantage. Or tu dois remarquer, mon cher Disciple , que la mesme chose qui nous auance vers nostre Dieu , nous y conioint : d'où il faut recueillir que si la connoissance , & l'amour sont les démarches de vostre ame , elles sont coniointement la cole de vostre cœur. Que si les souffrances de cette vie vous pressent d'aller à la veritable source du souverain bien, & qu'elles vous y vnissent parfaitement, n'avez-vous pas dans cet heureux effet de quoy chercher la triste cause ? Pour proceder avec vn ordre naturel,

tuel, il faut premierement parler de la connoissance, & en suite nous viendrons à l'amour. Comprends bien mon raisonnement. Vn ancien a sagement dit, que la prosperité traifnoit inéuitablement ce malheur, qu'elle couure les yeux de l'homme d'une obscurité tres-épaisse : il veut sans doute insinuer, que celui qui iouit tousjours d'une riante fortune, est tellement auéuglé de ses ioyes, qu'il ne voit iamais les belles lumieres de la verité, semblable à ces oyseaux d'engrais, que l'auéuglement, & les tenebres nourrissent dauantage que le grain, & la paste. Certes on ne scauroit nier, que Seneque n'ait dit vn bon mor, quand il a parlé de la sorte : mais on ne doit pas aussi croire, qu'il ait porté sa pensée, iusques à la premiere verité qui toute seule vous peut doucement occuper, & faire le delicieux objet de vos recherches. Et neantmoins il n'est que trop asseuré que le perissable bon-heur des sens, & de l'homme exterieur empesche l'ame de voir son Dieu en veüe, & d'estre l'vnique sujet de vos recherches. Voilà, si ie coniecture bien, ce qui fait qu'un grand Saint, nomme l'aduersité le moyen de treuuer les choses diuines, ou, si vous me permettez de parler comme luy, le Repertoire, & l'Ephemeride de Dieu, & de ses grandeurs. On treuue Dieu dans la souffrance, d'autant que l'esprit de l'homme ne pouuant estre sans application, il se dresse sur les ruines de ce qui le retenoit, à la poursuite de celui qui le peut pleinement satisfaire. Il le trouue là comme Createur : par cette solide reflection : qu'il ne doit auoir dépendance dans le principe de son estre, que de celui qui luy en continue la iouissance. Il l'auouë pour conseruateur de sa vie, apprenant de sa propre experience que toutes les creatures en conjurent la ruine. Il reconnoist clairement de

ment de l'insuffisance de tous les biens de la terre, qu'il est tout seul son précieux thresor : Il void dans la perte de ses honneurs, & l'escoulement de ses plaisirs, qu'il ne doit point chercher de gloire ny de contentement, hors de celuy qui est la gloire des Bienheureux, & les chastes delices des Anges. Il apprend de l'inconstance de ses amitez, que Dieu est ce fidele, & constant amy, que la fortune ne peut oster. Et pour comprendre tout en vn mot, elle fait cognoistre à l'homme, que son ame estant immortelle, il ne peut contenter des appetits eternels, par des viandes qui se corrompent. Et ainsi il esleue sa pensée à vn bien necessaire, puis-qu'un desir qui n'a point de fin, demande vn objet infiny dans sa plenitude, & eternel dans sa durée. Ce n'est pas assez que cette diuine Ephemeride vous instruisse de ces rares connoissances, elle marque encore les grandeurs, & les perfections de celuy qu'elle monstre. Sa prouidence, sa sagesse, son pouuoir, sa iustice, & sa bonté y éclatent d'un lustre aussi brillant qu'adorable. La prouidence y paroist en ce que Dieu choisit vn moyen autant infaillible dans le succez, que desirable dans sa fin. La Sageffe, en ce qu'il proportionne les souffrances aux forces, qui ne permettét iamais que le malheur qui resueille vostre assoupissement, surmonte vos courages. La puissance s'y void, en ce qu'il brise vos attaches, sans blesser vostre franchise, & que dans vn moment, il renuerse la domination que la tyrannie des sens auoit establie, pendant beaucoup d'années. On y treuve sa iustice, parce qu'on sent ses coups, & sa vengeance. Sa bonté y reluit, puis qu'elle ne cherche dans la peine des crimes, que la correction des criminels, & que Dieu cesse de punir, quand l'homme cesse de pecher. Tu ne dois pas treuver estrange, que ie

que ie tire ces lumieres de la Metaphysique : toutes les sciences estans mes esclaves , le bien qu'elles possèdent m'appartient : si ie me sers de leurs clartez, ie n'emprunte rien d'autrui. Je ne presse pas neanmoins cette raison, puis que j'ay aussi peu besoin du service que du secours de la science profane. Tu n'ignores pas que la foy est la premiere vertu du Chretien, non pas en excellence de merite, mais en ordre d'infusion , d'autant qu'il est aussi impossible d'auoir vn amour surnaturel, sans vne connoissance surnaturelle, qui la precede, comme dans l'ordre de la Nature , de poursuiure , par l'appetit sensitif, vn bien qui n'a pas touché l'imagination. Elle est encore la premiere , parce qu'elle regarde la premiere verité, premiere perfection du premier estre, & parce qu'elle deuance tous les autres actes de l'intellect , & de la volonté , dans la recherche de leur premier objet. Je te marque avecque soin toutes ces circonstances, à cause qu'elles sont vn solide appuy à mon discours. Car si la foy qu'vn ancien Grec appelle vne plante genereuse , ne tient pas sa fecondité des beaux iours d'esté , & qu'elle s'exerce avecque tant de perfection dans l'aduersité , qu'on la peut nommer sa propre saison , qui ne void les beaux fruiets que perd vn homme constamment heureux ? Resueille vn peu tes esprits , & te prepare à vne haute verité : mais auant que de l'oüir , souuiens-toy que ce monde inferieur vîe de la mesme illusion sur nos sens , que la Thessalie , où l'on dit que tout ce qui se void n'est pas , & au contraire , que tout ce qui ne se void pas, possède veritablement l'estre. Et certes si Dieu est : parce qu'il ne presuppose l'existence de quoy que ce soit comme principe, parce qu'il ne dépend de la conseruation d'aucune cause : parce que le passé, ny le futur

ne partagent point les années : parce que c'est en luy où les estres possibles sont quelque chose d'infiny, & par luy qu'ils deviennent au dehors des creatures finies : à proprement parler, & en rigueur, il est vray que tout le sensible n'est point. D'autant qu'il tient l'estre par grace, & avec dépendance de celuy qui le possède par nature, que sa permanence n'est assurée, que sur des causes, qui se ruinent mutuellemēt, & qui ne se conseruent que par le secours de quelques foibles accidens, qui font perir par vne criminelle ingratitude le sujet qui les porte. A raison aussi que, le temps qui est esgalement composé de l'estre, & du non-estre, mesure sa durée, & en fin qu'il a en soy la matiere, premiere source de la corruption qui conduit toutes choses dans le néant. Retournons à ce que j'ay proposé : il faut estre ignorant ou opiniastre, pour soustenir que la Foy ait vn meilleur temps que celuy de la souffrance. Voicy ma preuue. La Foy est vne lumiere qui n'éclate que dans les tenebres, & qui seroit affoiblie par la raison, & les autres connoissances naturelles. Comme elle est l'argument qui nous persuade les choses que nous ne voyons pas, elle doit estre toute seule ce qui leur sert de fondement, & d'hypostase, (pour parler avecque l'Apôtre) puis que rien ne les peut soustenir dans nostre creance, que ce qui les descouure à nostre esprit. Si bien qu'on ne peut douter, que le moment propre à la pratique de cette vertu ne soit celuy, où l'ame est toute recueillie dans soy, sans se respendre au dehors par les sens, qui font ou dégouttez de leurs objets par l'ennuy, ou persuadez de leur imposture par l'experience. Veut-on se rendre capable de connoistre Dieu (dit vn grand Homme) que la chair n'importune plus l'ame de ses inquiétudes : que les images sensibles de
la Terre,

la Terre, des Eaux, & de l'Air, se taisent : que les Cieux fassent cesser leur harmonie ; que l'ame mesme ne parle plus, mais qu'elle s'esleue au dessus de soy, sans considerer les auantages de son estre. Que les songes, & ces subtiles veuës, qui se font dans la fantasie, que les voix exterieures, les signes sensibles, & tout ce qui passe en naissant, s'esuanouïsse. Et pourquoy ? sinon parce que la Foy est genereuse à ce point, qu'elle desdaigne de prendre l'aduis des sens, & du discours, sur les veritez qu'elle embrasse. Donc la mauuaise fortune oblige l'homme en le contrainnant de chercher son appuy en Dieu, & de mettre toute sa confiance en sa bonté. Donc il n'est rien de plus souhaitable que cette heureuse priuation de toutes les choses sensibles, où l'ame s'eslance par vn noble espoir à ce qui la peut contenter. Si ton ennuy t'a laissé quelque memoire de tes estudes, tu te peux souuenir que le diuin Paul, dans l'excellente Epistre qu'il escrit aux Hebreux ; ne recommande le merite de leurs ancestres, que par leur foy dans les souffrances : soit qu'elle s'y exerce parfaitement, soit qu'elle les console solidement. Personne sans la Foy ne peut plaire à Dieu, personne n'a la Foy ou rarement, hors de l'aduersité, donc celuy qui n'est point persecuté ne plaist que rarement à Dieu. C'est la Foy, comme le dit le mesme Apostre, qui tournoit les yeux d'Abraham, d'Isaac, & de Iacob vers cette Cité qui a des fondemens, parce qu'elle demeurera tousiours ; & elle demeurera tousiours, parce que Dieu en est luy mesme l'Architecte, comme il en est luy seul Monarque. Celuy qui croit que Dieu est la recompense des Fideles, s'approche de luy, celuy qui souffre, le croit mieux que tout autre : puis qu'il voit l'innocence dans la priuation de tout autre bien : donc ce-

luy qui souffre s'approche de Dieu. Que personne ne die qu'un innocent affligé soit misérable : il possède toutes les richesses de la Foy, luy en sçauroit-on souhaiter de plus solides ? aux biens de cette aueugle vertu qui possède tout, & qui ne voit rien, on doit joindre les heureuses promesses de nôtre grand Roy, puis que le mauuais vent qui abbat toutes les esperances humaines, releue la diuine. Ouy mon cher Nourrison, lors que l'homme n'espere plus rien au monde, il doit attendre toutes choses de Dieu, & s'il n'espere plus rien que quand il desespere de tout, ne faut-il pas conclurre, que iamais il n'est mieux en estat d'esperer, que lors qu'il est en estat de souffrir ? La patience perfectionne l'esperance : ie parle de celle qui ne trompe personne, & qui n'a rien de ces vaines monstres des creatures, dont l'apparence est aussi belle, que la promesse peu assurée. L'esperance Chrestienne a son appuy sur le pouuoir de Dieu, & sur la volonté qu'il a de donner ce qu'il promet. C'est par cette excellente vertu qu'il attire l'homme aux hommages qu'on doit à sa grandeur, & qu'il assure son domaine, interessant la creature à sa conseruation. Mais qui se peut flater des douces attentes que le Ciel vous promet ? Helas ! ce ne sont pas, pour l'ordinaire, ceux qui vivent dans les plaisirs de cette vie. Ils se font de leurs superbes Palais, & de leurs Edifices, un Paradis, où leur Dieu, qui est leur ventre reçoit les honneurs, & les seruices de la premiere Majesté. S'ils pechent dans l'abondance des commoditez perissables, ils ne peuuent esperer les eternelles, s'ils conseruent l'innocence, ils doiuent craindre que ces petits biens ne soient toute leur recompense. Un pecheur content est vne Victime que l'on engraisse : un innocent qui ne souffre rien, est vne per-

sonne

bonne qu'on expose. Au contraire on ne peut douter qu'un homme affligé ne puisse esperer, car s'il est coupable, on le corrige: s'il est sans crime, il n'a point encore de couronne. Or il est autant impossible à Dieu de laisser vne bonne action sans recompense, que de la punir d'un rigoureux supplice. C'est donc à celuy qui ne possède aucun bien visible, qu'il appartient d'attendre ceux qu'on ne voit pas. C'est celuy qui ne scauroit monstrier ses heritages dans ce petit atôme, que vous nommez la terre, qui les doit esperer dās ce grand monde archetype, que les insensés estiment n'estre que l'idée d'un esprit blessé: parce qu'il est inaccessible à tous leurs sens. O qui vous pourroit faire comprendre (petits hommes de bouë) ce qu'une ame innocente sauoure de charmantes delices dans ses plus dures souffrances. Vous auouëriez qu'elle goûste des plaisirs que la volupté ne connoist pas, possède des biens, dont les riches de la terre sont pauvres, & qu'elle attend des honneurs, que la gloire des mondains n'esgalera iamais. Et qui la pourroit empêcher de dire à son Dieu dans le triomphe de son cœur?

III. P O E S I E.

*Que le Ciel d'un coup de sa foudre
Renuerse les quatre Elemens
Hors de leurs premiers fondemens,
Ou bien qu'il les reduise en poudre:
Parmy des transports si diuers,
Rien ne peut choquer ma constance,
Sans voir fondre mon esperance,
Je verray fondre l'univers.*

Que l'insolence de l'orage
 Attaque mon petit vaisseau,
 Et que la mer enfle son eau
 Afin d'y noyer mon courage :
 Les flots les plus audacieux
 Dans les efforts de cette guerre,
 S'esleuent seulement de terre,
 Pour m'esleuer iniques aux Cieux.

Mais si les vents dans leur colere
 Creusent la mer jusqu'à son fond,
 Et si l'air, & l'eau se confond
 Je croy que la mer me reuere,
 Et que les vents dans leurs combats
 N'ont pour dessein de cette lute,
 Que de m'empescher d'une cheute
 Puis qu'ils ne reposent si bas.

Tel qu'au milieu de la tempeste,
 Le petit nid de l'Alcion
 Braue l'injuste passion,
 Dont le Ciel menace sa teste :
 Quoy que la mer soit un tombeau,
 Les flots amers qui le trauersent,
 Au lieu de le noyer, le bercent,
 Et la Mer deuient son berceau.

Ne croyez pas que cette barque,
 Qui semble s'esloigner du port,
 Conduise Moyse à la mort,
 Croy qu'on le destine à la Parque ;
 Car dans ces fresles glayeux
 La conquête d'un grand Monde,
 Est sur le flux de cette onde.
 Cher, & sauuer ses Ayeux.

Nil prend soin de ce Pupille,
 Que sa nef soit de roseau,

Les flots respectent son vaisseau
 Et le portent à son asile :
 Dieu qui veut estre son Sauueur,
 Conduit sa petite nacelle,
 Dedans le sein d'une pucelle,
 Et luy prepare sa faueur.

Qui peut pallir dans les naufrages,
 Lors qu'il a son Dieu pour Nocher ?
 La mort n'ose pas approcher
 Ceux dont il regle les voyages :
 De moy j'espereray trouuer
 Vn heureux port pendant ma fuite :
 C'est son ordinaire conduite,
 De perdre , quand il veut sauuer.

IV. P R O S E.

C E L E S T I N, peut-estre que mon discours ne t'a pas satisfait , respons-moy , d'où vient que tu parois plus abattu que ie ne t'ay trouué à mon abord ? C. Madame , mon mal seroit bien desesperé s'il s'aignissoit par des remedes de cette nature : Ma tristesse ne vient que du desplaisir de n'auoir pas profité d'une saison qui appartient à la pratique de ces grandes vertus , dont vous m'aués entretenu. Il me resteroit vne seule difficulté sur ce sujet , si vostre bonté souffre que ie l'interrompe. Th. Tu ne me seras iamais importun , tandis que ta curiosité sera de connoistre des veritez qu'il t'est necessaire d'apprendre , & qu'il m'est honorable d'enseigner. C. Il me semble que les raisons dont vous auez appuyé vostre discours sont trop generales, & qu'elles ne prouuent pas seulement que la Foy , & l'Esperance ont leur propre exercice

dans l'affliction. Par le mesme raisonnement, on pourroit conclure que toutes les vertus ont leur regne pendant ces mauvais iours. Th. Si l'aduersité a plus de biens que ie ne t'en ay monstre, elle n'en est pas moins riché, & si tu reconnois toy-mesme des auantages que ie n'ay pas touchez, sa condition n'en est que plus considerable. Il est vray, ta remarque est iudicieuse, la mauuaise fortune ostant tous les biens sensibles aux hommes, leur donne presque toutes les vertus, au moins leur en presente-t'elle les occasions. L'humilité ne trouue iamais mieux les abaissémens qu'elle desire, que dans le mespris, qui accompagne inseparablement la misere. Iamais elle ne comprend mieux la dependance que la creature a de Dieu, que lors qu'elle la voit suiuite à de moindres puissances. Cette vertu qui arreste les legeretez de l'esprit humain, & cette autre qui estend l'ame iusques au bout de la tentation, appartiennent sans contredit à la souffrance. La deuotion qui fait gouster de si delicieux moments à l'homme, & qui recueille les miettes qui tombent de cette table, où Dieu traite ses Saints, ne vous entretient iamais mieux, que dans les amertumes de la tristesse. Pour celle qui soumet vos mouuemens aux dispositions du Ciel, il ne faut pas douter que iamais elle n'est d'usage ou que c'est dans l'affliction. Je te pourrois faire voir le mesme des autres vertus, & te dire au sens qu'un grand Cardinal donne aux paroles de S. Paul, que l'aduersité ne produit pas seulement la patience, comme les doctes l'expliquent plus communément, mais encore qu'elle la cultiue. De sorte que l'aduersité est vn laboureur qui traueille dans la patience comme dans vn champ, qui demeureroit sterile, & infecond, sans son travail, & sa culture. Les larmes que la douleur vous fait res-

pandre

pandre sur cette terre , en sont la precieuse semence : & bien que ce ne soit que de l'eau, elles se germent en des fruiçts tres-sauoureux. Que si ie laisse vne matiere si riche , ie n'y ay pas renoncé : car encore bien que cela fist à mon dessein, puis que toutes les vertus approchent l'Homme de Dieu , comme tous les vices l'en separent , ie n'ay voulu marquer que celles qui vont à luy sans détour. Tu sçais qu'il y a des vents qui poussent les vaisseaux en droite ligne à leur port, & qu'il en est d'autres qui ne les y portent qu'à voile rancade. Je pouuois bien te dire ce que tu as compris de toy-mesme , mais ie n'ay pas voulu auoir cette defiance de ton esprit ; me persuadant que c'estoit assez de te donner le commencement de toutes ces consequences, qu'un esprit moins accoustumé au discours eust laissées dans leurs principes. De plus, si tu veux prendre garde , tu pourras remarquer que les autres vertus appartiennent à la Morale , & qu'il n'y a que la Foy, l'Esperance, & la Charité, qui proprement soient de mon objet, d'où elles seules prennent le nom de Theologales. A mon aduis tu ne sçaurois douter , que les deux premieres n'appartiennent à l'estat de la souffrance : mes preuues ont eu trop de clarté , & de force , pour te laisser des doutes , & de l'ignorance. Ce qui me reste , c'est de te faire voir, que la charité plus que tout autre reçoit du secours de l'affliction : & de vray si tu y prens garde, comme c'est proprement à l'aduersité de separer, c'est aussi à l'amour d'unir. La Foy descouure à l'ame son objet : l'Esperance l'y dresse : mais c'est la Charité qui l'emporte, qui la rait , & qui l'attache si fortement, que rien n'est capable de l'en retirer. C. Je vous conjure, ma bonne Maistresse, ne me laissez pas languir dans l'attente de cet important secret, & ne retardez point

le contentement que ie me promets d'une si profitable science. Th. Je ne sçauois rien refuser, à ton desir, toutesfois pour te faire comprendre que l'homme n'aime iamais Dieu plus parfaitement que quand il souffre pour sa gloire, il faut icy renouueller vn peu ton attention. Je le maintiens, & il est vray, il n'y a que la souffrance, qui espreuue le vray amour : l'or est tousiours suspect, iusques à ce qu'il ait passé par le creuset, & la coupelle, & l'amitié n'aura iamais sa derniere approbation, iusques à ce que la mauuaise fortune ait tenté sa fidelité. Ne crois pas auoir vn amy (dit le Sage) si tu ne le possèdes dans ton affliction, d'autant qu'il est des hypocrites qui durent autant que la prosperité, & qui se rendent au premier coup qui choque le bon-heur de ceux qu'ils feignent d'adorer. Ces amis sont semblables au lierre qui embrasse la muraille qui le soustient, pendant qu'elle se tient debout, au chien qui flate le passant, quand il luy voit du pain dans la main, & aux arondelles qui s'en vont de chez leurs hostes avec l'Esté. Sathan eut bien la hardiesse de représenter cecy à celuy qui ne le pouuoit ignorer. Comme Dieu se glorifioit de la fidelité d'un de ses seruiteurs, il luy dit : Vrayement ce n'est pas de merueille que Iob demeure inuiolablement attaché à vôtre seruice, qui l'en pourroit diuertir ? Sa famille est pleine d'honneur, & de richesses : la terre, & les autres elemens ne trauaillent que pour luy : il possède plus de biens qu'il n'en sçauoit dépenser, fût-il même prodigue : ses enfans ont toutes les bonnes qualités qui peuvent plaire à vn pere, rien ne choque sa santé, & vous avez si bien réparé sa maison contre toutes sortes d'accidens, qu'elle leur est inaccessible : s'éloigner de vous, c'est fuir le bon-heur, demeurer fidele à vôtre seruice, c'est s'attacher

à la

à la bonne fortune. Voulez-vous connoistre s'il y a autant de verité que de monstre dans son affection, dépouillez-le de sa pourpre, ostez-luy ses biens, & ses enfans, & ie maintiens que vous luy osterez sa fidelité. Il faut voir Iob sur le fumier pour bien connoistre sa constance, tandis qu'il jouïra de son bonheur, on pourra croire qu'il aime vostre liberalité, sans se beaucoup soucier de vostre gloire. Et de vray vn amour qui ne souffre rien pour la personne aimée a tousiours esté vn sujet de défiance à ceux mesmes qui ont aimé. Voilà ce qui a obligé beaucoup de grandes ames de prier la bonté de Dieu, de retenir le torrent de ces diuines consolations qu'elles goustoient à son seruice : voilà ce qui a poussé tous les Religieux à la recherche, & à l'estude d'un martyre volontaire. C'est l'amour qui leur a creusé des sepulchres dans la solitude : c'est l'amour qui a tissé leurs haïres, & leurs cilices : c'est l'amour qui leur a forgé des chaines de fer : c'est l'amour qui a meslé le fiel, & la cendre à leurs viandes. En vn mot, c'est l'amour qui a treuvé toutes ces ingenieuses cruantez, dont les plus innocentes vertus se persecutent, afin de faire esclater leur fidelité dans l'esprenue des plus ameres douleurs. Il faudroit estre Demon, pour haïr Dieu quand il flatte ; mais certes il faut estre courageux, pour l'aimer quand il frappe. La raison de cecy se doit prendre de ce que rien ne combat si fortement l'amour propre, qui est le grand ennemy de l'amour de Dieu, que la souffrance. Il n'y a rien que l'homme apprehende dauantage que la douleur à raison qu'elle tend à la ruine, & à la destruction de son estre. C'est delà que naissent vos auersions, & vos antipathies : c'est delà que viennent ces soins, & ces diligences que vous apportez à fuir les maladies, si elles
vous

vous poursuivent , & à les repousser, si elle vous attaquent. D'où il faut conclurre que celuy qui souffre volontiers, aime parfaitement, puis qu'il ne peut souffrir avec choix, sans renoncer avec violence aux plus puissantes inclinations de sa nature : Mais ie ne m'appерçois pas que i'entretiens vn sublime esprit de considerations populaires, & que pour te dire des raisons inconnuës, il t'en faut dire de rares. Je laisse donc que cét amour souffrant, qui n'a ny commerce ny mélange avec ce qui peut seruir d'attrait à vn cœur, est plus pur que celuy qui n'a que des delices, & des ioyes. Je ne dis pas qu'il est plus considerable, parce qu'il est plus heureux, & plus hardy, que cét autre amour, qui ne regarde que la beauté de son objet, & l'auantage de sa recherche. Je n'e pretends pas mesme tirer sa recommandation de ce que l'aduersité le ire hors de l'interest, & le fait vn mouuement tout pur du cœur vers la beauté qui le charme. De tout ce qui se pourroit produire sur ce sujet, ie chois la seule consideration qui se prend de la necessité de souffrir, si vous aués le desir d'aimer. Je trouue parlant en general qu'il n'y a que deux moyens de tesmoigner ses bonnes volonteés à vn autre, faire du bien, & de souffrir du mal. Le premier est tellement propre de Dieu, qu'il ne reste que le second à la creature, si toutefois Dieu, & la creature sont le terme, & le principe de ce delicieux commerce. Mon dessein ne va pas à destruire l'amour de complaisance, & d'agrément, ce que ie pretens, c'est de te faire comprendre que celle qui s'arreste aux diuines grandeurs de Dieu est vn mouuement sterile dans l'homme, & l'Ange, puis qu'il ne produit rien dans son objet, & qu'il y suppose tout. Et partant la bonté de beneficence estant la source du vray amour, il n'y a que

Dieu

Dieu qui puisse aimer, puis qu'il est le seul qui peut bien faire. Il ne faut pas neantmoins croire que cette bonté infinie qui a vne inclination infinie de se res-pandre, & qui le fait sans interruption, parce qu'elle le fait sans espuisement, se produise dans vn effet de tous points infiny, separé d'elle. La raison se prend de ce qu'une Nature entierement infinie ne peut estre multipliée : parce que la multitude suppose de la distinction, & la distinction de la diuersité, qui ne se peut trouuer entre deux chose entierement infinies : puis que l'infiny de tous points descherroit de cette perfection, s'il luy en manquoit quelqu'un, qui fust principe de distinction hors de soy. Mais cette impuissance au lieu d'estre prejudiciable à l'homme, tourne à son auantage : car Dieu ne pouuant multiplier son Estre, le communique en le donnant, premierement par necessité aux Personnes de la tres-Auguste Trinité, & puis par grace aux hommes dans l'Incarnation. Ce qui est proprement au dedans de Dieu vne admirable communication de soy-mesme, & au dehors vne riche effusion de sa bonté. Vous auies desia les effets sacrés de son amour dans la naissance, & dans ces autres biens que vous tenez de sa liberalité ; mais certes il ne pouuoit satisfaire à vne inclination infinie, que par vn present tout à fait infiny, & il n'en pouuoit trouuer la matiere hors de cette Essence qui ne souffre point de limites. Il appartient donc à nostre grand Dieu de resmoigner son amour à sa creature par ses bien-faits, puis qu'il a des perfections, & elle des defauts. Et l'homme ne peut produire de semblables preuues de sa bien-vueillance à son Dieu parce qu'il n'a rien à donner, & luy rien à receuoir. Heureuse impuissance qui adore vne si grande, & si auguste Majesté, qu'il est impossible à l'homme

l'homme , & à l'Ange de penser vne seule perfection qui luy manque, & qui en possède vne infinité qu'on ne scauroit penser. Quoy ? cette creature que la raison oblige à la reconnoissance , ne peut-elle acquitter son deuoir ? non, s'il faut faire du bien pour prouuer son amour. Il luy reste pourtant quelque voye de retour, si elle se sert de ce qu'elle a : en voicy le secret. Vne des plus belles imaginations de Platon , & qui rencontre mieux qu'il ne pensoit, est celle où il feint que l'Amour est fils de l'Abondance, & de la pauvreté : il est vray que l'amour estant l'effusion d'une plénitude, qui se peut contenir dans son sujet, c'est à celui qui est riche par essence, de se respendre par liberalité, Et certes à parler proprement , il faut que la connoissance qui precede l'amour soit vne connoissance riche, autrement, si elle ne representoit que de la misere dans son objet ; elle ne produiroit que de la haine , & de l'auersion dans la volonté. Ainsi nous scauons que cet amour infiny qui procede du Pere, & du Fils , suppose par ordre d'origine vne connoissance qui l'est aussi. Et dans vos petites amours, n'est-il pas vray, que iamaïs vous n'aymez vn objet , que vous n'en ayez vne connoissance d'estime ? Dieu est donc le Pere de l'amour , puis qu'il est la vraye source du bien. Mais quoy , que ce Fils dont la naissance a tant de gloire , tire aussi son extraction de l'indigence : c'est à dire, au sens de Platon, que la creature qui est pauvre, ou la pauvreté mesme , puis que tout son bien luy vient d'emprunt, & d'aumosne, peut aimer, non pas en communiquant des biens qu'elle ne possède point, mais en rentrant dans l'abyssine du neant, qui luy est propre. Et voilà le mystere que j'ay promis de te decouvrir. Dieu tesmoigne son amour à l'homme, le reuestant de l'estre qui luy appartient, & l'homme

& l'homme luy peut rendre des preuues du sien, en se despoüillant par hommage du peu qu'il possède, mesme en titre d'aumosne. C'est ce qu'il fait dans les occasions de souffrir pour sa gloire, d'autant que le mal estant la priuation du bien, il luy est impossible en souffrant de ne pas perdre vn bien, & ainsi plus on souffre, plus on retombe dans le neant : & plus l'homme retourne au rien, d'où il est sorty, plus honore-t'il l'estre de celuy qui l'en a tiré : voilà comme l'amour naist de la pauureté. En quoy certes il semble que la creature qui cherche, & qui cherit ces priuations pour tesmoigner son affection à son Createur, ait quelque auantage sur luy, en ce que Dieu fait du bien sans le perdre, & sans s'incommoder, où l'homme ne se respand point sans se vider, & ne donne iamais rien qu'il ne se diminuë de ce qu'il donne. Et quoy que ce soit perfection au bien de Dieu, de ne point souffrir de dechet, & de demeurer tout entier à celuy qui le communique, à raison de son infinité : & au contraire que l'espuisement du vostre vienne de sa limitation, il ne faut point douter que ce defect ne vous soit glorieux, s'il vous est volontaire. Or il est tellement vray de dire, que l'amour fait aussi bien preuue de ses ardeurs par la souffrance du mal, que par la communication du bien, que Dieu, qui a comblé l'homme de ses faueurs, a voulu succomber sous ses miseres, afin de luy tesmoigner en toutes les façons, qu'il estoit le cher objet de son cœur, & le riche thesor de sa magnificence. Mais qui ne void que cette bonté qui a fait vn Dieu souffrant, est plus digne d'amour, & d'estime que celle qui nous le rend magnifique ? Et quoy que son adorable Majesté, en quelque estat qu'on la considere, merite tous nos seruices, & amours, puis qu'il
en merite

en mérite d'infinis , qui est-ce qui ne l'aime davantage dans la creiche , sur le Caluaire , que dans ce temple de gloire , où il prend , & execute les desseins de se faire des creatures ? Certes si les bien-faits nous obligent , & les plus grands bien-faits nous obligent d'avantage : il faut conclure à l'avantage des abaïssemens de Iesus-Christ, où l'Apostre asseure par preference , què sa benignité éclate. Glorieuses souffrances que vous estes dignes de nos desirs, puis que vous faites l'illustre preuue de l'amour que nous portons à nostre grand Dieu ! qui ne vous aimera de toutes les tendresses de son cœur, puis que vous estes la monstre du cœur ? qui ne vous cherchera, puis que sans vous la creature ne peut bien témoigner sa-reconnoissance à son Createur ? C'est cette consideration qui animoit tous les parfaits Amans au desir de souffrir ; c'est elle qui donnoit le courage aux Martyrs d'irriter les Bourreaux , afin d'augmenter leur peine. Par elle S. Paul se tenant collé au pied de la Croix de son Maistre, proteste, que la faim ny la soif, la gloire ny l'infamie, les tourmens ny les delices, les hommes ny les Anges, le present ny le futur , le Ciel ny l'enfer , la mort ny la vie, ne le separeront pas de la charité de Iesus. N'est-ce pas elle qui rend ferme vn S. Ignace au milieu des Tygres, & des Lions , & qui luy fait craindre leurs caresses , & exciter leur cruauté ? L'Amour, s'écrie l'amoureux S. Augustin, ne cherche que les rigueurs , il n'aime que la douleur, son desir ne le porte qu'aux choses difficiles , il se nourrit de fer, & de fiel. O aimer, ô perir à soy-mesme, ô mourir, & se fondre pour témoigner à Dieu par nos cheutes , nos souffrances, nos pertes , & l'aneantissement de nostre estre, ce que nous sommes, & voulons estre à Dieu, Et bien , Celestin, celuy qui souffre

qui souffre n'aime-t'il pas, ou plustost, peut-on aimer sans souffrance, & souffrir sans amour ? Tu es sans doute satisfait de mon discours : si tu en comprends la force : & ie m'assure que tu adores la bonté de Dieu, qui n'afflige l'homme que pour le separer de la dangereuse affection des creatures, & l'vnr à soy, où il treuve la veritable source du bien. Alliance honorable, puis qu'elle vous vnit à la gloire assée, puis qu'elle vous attache à l'immuable ; delicieuse, puis qu'elle vous approche des plaisirs eternels de la beatitude. A n'en point mentir il faut estre sans iugement pour ne pas souhaiter cét heureux esclavage, mesme au prejudice de tout ce qu'on peut treuver de charmant, & de doux dans la creature.

IV. P O E S I E.

*Phantomes de plaisirs, chimeres de nos songes,
Fausse ombres du bien, veritables mensonges,
Mesnagez vos attraits ;
Vous m'offrez sans succez la douceur de ces charmes,
Qui font rendre les armes
A qui veut recevoir, sans regarder vos traits.*

*Quel bien possédez-vous, pour posseder une ame,
Qui cherche d'autres biens que le vain, ou l'infame ?*

Produisez vos raisons :

*Quelle amorce avez-vous, que void-on dans le Monde,
Que l'ordinaire ronde*

Du iour, & de la nuit, des mois, & des saisons.

*Ces montres de grandeur, cette apparente gloire,
Qui nous promet un rang dans la plus vieille histoire,
N'est-ce pas un écueil ?*

Soit qu'on couvrent nos os, ou d'or ou de poussière,
Toute nostre lumière
S'esteint, ou ne luit plus dans l'ombre du cerueil.

Qui connoist maintenant ces redoutables Princes,
Qui portotent autrefois le bout de leurs Provinces
Au bout de l'Univers?
Trois ou quatre morceaux de marbre ou de porphyre
Leur dressent un Empire,
Où leurs membres pourris regnent parmy les vers.

Ce brillant Seducteur dont la puissante amorce
Ne trouve point de cœur qu'il n'attire ou ne force,
A-t'il quelque pouvoir,
Qui nous soit caution, & nous donne assurance
De la belle esperance,
Que son éclat trompeur nous a fait concevoir?

La palleur de son teint (quoy qu'un flatteur me die,)
M'est un signe certain de cette perfidie
Qui le fait redouter,
Ses beaux chaisnons dorez composent une attache
Que sa prudence cache:
Pour nous ouvrir un mal qu'on pourroit éviter.

Pour l'infame plaisir qui rend l'homme idolatre,
D'un peu de vermillon couché dessus du plaistre,
Qui n'en sçait le tourment?
Lors mesme qu'il promet de charmantes delices,
Ce sont de vrais supplices,
Qu'il desguise du nom d'un vray contentement.

Generoux Ionathas, ta propre experience
Nous donne la raison de cette connoissance:
Helas! un peu de miel,

Dont


Dont le foible secours te sembloit necessaire,
 Peut-il estre contraire
 Jusqu'à faire aux Hebreux un abysme de fiel ?

Miserables mondains, fiez-vous aux caresses
 De ces honteux plaisirs, qui tentent vos foibleffes,
 Suivez leur vain appas :
 Ce masque de bon-heur qui flate vostre vie,
 Vous tire, & vous conuie,
 Vous offrant ses attraitz à de cruels trespas.

Combien void-on de Grands qui traînent dans la bouë
 Combien de puissans Roys que la fortune iouë
 Dans sa plus belle humeur :
 Elle trouue son bien, elle trouue ses charmes,
 Dans leurs plus iustes larmes :
 Ses Eloges se font de leur triste clameur.

Quand elle nous fait voir tout l'esclat de sa pompe,
 Et nous promet ses biens, c'est pour lors qu'elle trompe
 Nostre ame par les yeux :
 A mesme que sa main nous leue de la fange,
 Aussi-tost elle change,
 Et nous pousse en enfer, en nous monstrant les Cieux.

Mon ame, si la Foy gouuerne ta conduite,
 Corrige maintenant l'erreur qui t'a seduite,
 Mets fin à tes mal-heurs ;
 Romps genereusement cette cruelle chaisne,
 Qui te serre, & t'entraîne,
 Dans des gouffres de maux, & des torrens de pleurs.



ARGUMENT DV IV. LIVRE:

C E V x qui donnent exemple de bien faire aux autres, leur en inspirent le courage pour cette raison, la Theologie apres auoir deduit le dessein de Dieu dans nos infortunes, propose sa conduite ordinaire à l'endroit de ses fauoris. I. La premiere Prose touche en general les souffrances des Iustes, descendant apres en particulier aux Patriarches, & aux Prophetes de l'ancienne Loy, dont la vie a esté toute trauersee de miseres. II. Ces belles ames ayans esté les images du Crucifié, la premiere Poësie en produit vne nouvelle dans vne plante, qu'elle feint estre née de ce sang du Sauueur, qui de la Croix tomba sur le Caluaire. Le Granatille sujet de cette sacrée Metamorphose se trouue es enuiron de Cusco, & dans le Perou aux Indes Occidentales. III. Des Peres du vieux Testament, la Sapience vient dans la seconde Prose à marquer les plus illustres souffrances du Nouveau. IV. La seconde Poësie est vn genereux deffuy que saint Athanase donne à tous les maux de la Nature. V. De l'exemple des Saints, elle passe à celuy de Iesus-Christ, dont elle décrit les douleurs exterieures dans la troisieme Prose. VI. Les larmes de la Vierge au pied de la Croix font le sujet, & le dessein de la troisieme Poësie. VII. Apres vne venue assez legera des souffrances visibles du Sauueur, cette diuine Maistresse conduit la pensée de son Auditeur dans le secret de la Passion, par l'esclaircissement de quelques-unes de ces circonstances plus remarquables. Elle conclud cette Prose par l'accord merueilleux de la liberté, & de l'impeccabilité de Iesus Christ. VIII. Sur sa fin, elle adiouste la resolution d'une ame sainte, dont le plus ardent comme le plus iuste desir, est d'euiriger vn Caluaire sur son cœur aux peines de son Sauueur.

L A



L A

CONSOLATION DE LA THEOLOGIE.

LIVRE QUATRIESME

I. PROSE.

LA Theologie vouloit reprendre son discours, lors que ie preuins en ces termes le dessein qu'elle auoit de parler. Saincte Maistresse des vertus, il faut estre sourd à vos paroles, pour demeurer inuincible à vos raisons. Elles ont tant de clarté, & de force, qu'il n'est point de stupidité assez pesante, pour ne les pas comprendre, ny de malice assez opiniastre, pour leur resister. Neantmoins quoy que ie me rende à tant de lumieres, permettez-moy de vous descouurir vne pensée, qui me laissé encore quelque doute. Je sçay que Dieu est le Seigneur absolu de ses creatures, & qu'il ne peut rien faire qui ne soit sujet à leur censure ny repugnant à sa bonté, Vous m'avez pareillement appris le grand dessein qu'il a de nous attirer à soy, & vous m'en marquez le moyen dans la souffrance: ce qui fait le sujet de mon scrupule. Car ie ne puis conceuoir que celui qui aime le bien de nostre Nature, en cherche la

ruine. Or tous les maux de cette vie (à la reserve du peché , que Dieu ne peut vouloir , mais seulement permettre) les maladies , la pauvreté , les miseres , la douleur , & la mort , tendent à la destruction de l'estre , qu'il nous a communiqué. D'autant qu'elles alterent les dispositions , qui maintiennent les principes de nostre vie , & qu'elles minent sourdement le corps , qui en est le propre sujet, Et à mon aise ne feroit à rien de dire , que Dieu laisse agir les causes secondes, sans vouloir faire violence à celles qui sont libres, ny destourner le cours des necessaires, puisque sans choquer la liberté de l'homme , ny changer la nature des estres insensibles , il pourroit, s'il vouloit, en regler tellement les actions, que l'ordre n'en seroit pas diuert, ny l'innocence offensée. Tu aurois aussi bonne grace (repartit la Sapience) de me demander, pourquoy Dieu n'a pas crée l'homme impassible, pourquoy il ne vous a pas rendu heureux à mesme qu'il vous a fait naistre , pourquoy il ne vous a pas donné les perfections de l'Ange , ou de quelque plus noble creature : Et certes si tu veux suyvre ta pensée, tu verras qu'elle va iusques-là , puisque tu pretends de sa bonté, tout ce qui n'excede pas sa puissance. Et quoy , tu tombes par mesgarde dans vn desir qui n'a point de bornes , & qui ne peut auoir d'effet : ou du moins tu panches à l'ingratitude des biens qu'il t'a faits , par l'ambition desreglée de ceux qu'il te peut faire? Il est à propos que tu comprennes l'impossibilité de ta demande, afin de voir l'injustice de tes plaintes. Tu voudrois que Dieu t'eust choisi vn estat où rien n'eust incommode ta personne, & où son amour t'eust comblé du plus grand bien que tu pourrois souhaiter de sa magnificence. Ce desir est iniuste, puisqu'il renuerse l'ordre que sa prouidence a estably dans le monde,

monde, & impossible, puisqu'il est d'une chose qui ne peut estre. Il renuerse l'ordre de l'Vniuers; parce qu'il en pretend vne meilleur, & il est d'une chose qui ne peut estre: parce qu'il n'est point de condition pour excellente qu'elle soit, qui ne soit deuancée des auantages d'un estat plus heureux. Voicy vne comparaison, qui me peut faire comprendre, mesme de ceux qui n'ont pas ta viuacité. Dieu qui est Tout-puissant ne scauroit faire le plus grand Cercle de tous les Cercles possiblez, d'autant que le plus grand n'est pas possible, puisque sans fin, il en pourroit prendre dans vn corps infiny, qui se surpasseroient tous de quelque excez de grandeur. Et sans supposer l'existence; ny mesme la possibilité d'une masse infinie, il n'est point de si foible imagination, qui ne conçoie à l'infiny des Cercles ou quelqu'autre figure, dans cette immensité demesurée, qui estend Dieu à tous les espaces réels, & imaginables. De mesme ce grād ouurier ne scauroit produire vne creature qui n'ait point de superieure en perfection, puis qu'il reste tousiours sans fin des perfections à communiquer dans ces interualles, qui le séparent si glorieusement de la creature, quelque approche que nous supposions de l'effet à son principe. Et puis, qui ne voit que c'est limiter vne puissance que nous auoions sans limite, si l'on veut qu'elle acheue tellement son ouurage, qu'il ne luy reste aucun trait à y adiouster: donc c'est obliger Dieu de ne rien faire, de le vouloir obliger à faire ce qui est le plus parfait, & priver l'homme de toutes sortes de biens, de ne s'arrêter pas à celui, qui a du defect, ou qui peut receuoir, de nouuelles excellences. Qui ne iuge que ce desir est ridicule, puisqu'il veut que Dieu espuise sa Toute-puissance, & fasse quelque chose aussi parfaite que

foy, ce qui est impossible, ne pouuant au moins luy communiquer son independance, supposé que ce soit vn ouurage de son pouuoir, & vne participation des perfections de son estre. l'auoué pourtant que ce progres qui pousse continuellement vostre cœur au desir d'un bien plus excellent, que celuy qu'il possède, marque le defaut des choses créées, & cette secrète capacité qu'il a de posséder Dieu même. En quoy vous deuez reconnoître vostre noblesse, sans accuser vostre bien-faïcteur d'impuissance ou de jalousie. Ce raisonnement doit suffire pour vous faire comprendre combien il est raisonnable de vous tenir à l'estat où vostre Createur vous a mis, de le iuger le meilleur, & le plus iuste, quoy que vous n'en voyez ny la bonté ny la iustice. Et certes sans escouter vn souhait qui vous persuade, avec l'ingratitude des faueurs que vous auez receuës, l'ambitiō d'une fortune impossible, vous deuriez suiure vn instinct, qui mesmes dans la misere de vostre plus fascheuse condition, vous conduit à la recherche de vostre souveraine beatitude. Toutesfois sans te punir par mon silence, il me plaist bien de te faire connoître, combien il est equitable que l'homme soit sujet à ces souffrances, qui font la matiere de ses plaintes, & de ses murmures. Et d'abord l'auoué que Dieu n'a pas mis l'homme dans le monde, pour le tourmenter, mais que son premier dessein estoit de luy offrir dans le seruice des creatures tout ce qui pouuoit contenter son desir, & remplir son inclination. Pour cette raison, dans ce Paradis où il auoit logé Adam, les fleurs estoient sans espines, les serpens sans esguillon, & la ciguë n'auoit point de venin, ny l'air, & la mer de tempestes. Que si le rosier auoit des pointes, & les Dragons du fiel, Adam auoit de la prudence pour les esuiter,

esuiten, & de la force pour se deffendre, & toutes les creatures du respect pour honorer son excellence, & son domaine. De sorte que le sentiment, qui te persuade, que Dieu ne peut aimer vos peines, & vos douleurs, est veritable, si toutesfois tu te consideres dans la premiere idee qu'il auoit de ta conduite. Mais si tu regardes l'homme dans les infirmités de sa chute, tu ne dois pas treuuer estrange, qu'il se serue d'un autre regime, puis que son intemperance l'a mis dans vne constitution, qui ne luy est pas naturelle. Les drogues n'ont iamais esté faites pour nourrir l'homme, elles seruent neantmoins pour guerir ou pour soulager vn malade. Pour vous plaindre avecque pretexte de vos maux, il falloit conseruer vostre innocence sans tache : vous avez manqué aux hommages que vous deuiez à Dieu, il a retiré les faueurs, qu'il vous auoit faites. En quoy, pour ne rien dissimuler, vous avez vn tres-iuste sujet de desplorer votre malheur, puis que vous en estes la cause, & d'aimer la bonté de vostre Dieu, puis qu'il ne punit pas vos fautes avecque la rigueur que pourroit exiger sa iustice. Il faut donc considerer l'homme en deux estats, d'innocent, & de pecheur : dans le premier, c'est le mignon de son Roy, à qui tous ses vassaux doiuent du respect, & de l'obeissance : dans le second, c'est vn criminel de leze-Majesté, qu'ils sont obligez de poursuivre. Dans le premier, les maux, & les souffrances n'estoient pas conneuës : dans le second, elles ne peuvent estre esuitées. Aussi-tost qu'Adam eut violé cette Iustice originelle, qui luy estoit vn rampart d'airain contre ses ennemis, les maladies, la douleur, & les miseres, eurent bresche raisonnable pour l'attaquer, & assez de force pour le vaincre. La mort est entrée dans le monde, par le peché, assure le grand Apo-

„ltre) & en vn autre endroit , La mort est le salaire du peché. Ce qu'il dit de cette Meurtriere vniuerselle, se doit pareillement expliquer des autres maux de la Nature , qui sont ou ses precursseurs ou ses satellites. Seroit-il equitable que l'homme pecheur joüit des auantages de l'homme innocent , & qu'il possedast les biens d'un Estat , dont il n'a pas le merite ? Ce grand monde n'est plus le Louure, ny le Palais où Dieu a logé vn Monarque , mais la prison où il tient ses criminels : que chacun souffre son supplice , & que personne ne s'en plaigne. Le moins coupable des pecheurs souffre moins de maux qu'il n'en fait : & quand bien il n'auroit que ce seul peché qui naît avecque tous les enfans d'Adam , & qui est leur iumeau, ce seroit vne misericorde infinie de ne luy faire sentir que tous les maux de la Nature , puis qu'il pourroit iustement estre puny de ceux de l'enfer. Et de vray, si tu veux jetter les yeux sur les Monasteres, & mesme te souuenir de ce que tu as fait dans la solitude, tu iugeras de la seuerité dont les plus innocentes ames punissent leurs moindres foiblesses, ou que vous estes cruels, ou que Dieu n'est pas iniuste. Mais quand l'homme se seroit acquis la pureté des Anges, il se deuroit resioüir de n'auoir pas leur insensibilité, puisque la sagesse de nostre grand Maistre change l'effet des souffrances , faisant de la peine de vos crimes la riche, & seconde matiere de vos vertus. Que l'enfer s'esteigne pour le iuste , que ces legeres fautes qui sont inéuitables à l'innocence mesme, ne tachent pas sa vie, s'il n'a point de peché à effacer, il luy reste beaucoup de graces à acquerir , plus le Ciel luy ennoye de disgraces , plus luy offre-il de couronnes. Aussi tous ceux qui dans les siecles passez ont fait cilat, & profession de la vertu , ont regardé les miseres, &

seres, & les afflictions, comme l'objet de leurs meilleurs desirs, & les ont demandées à Dieu comme ses principales faueurs. D'où ie dois inferer, que celuy qui veut estre exempt des infortunes de cette vie, „pretend d'estre traité en Esclaue. Mes fauoris ont „marché par des sentiers difficiles (dit-il chez vn de ses Prophetes) desires-tu vn grand chemin, & tout plain, tu veux marcher dans la voye des bestes de charge, & avecque la canaille. Celestin, tu ne peux l'ignorer, Dieu a tousiours traité ses enfans avec rigueur sans qu'il soit besoin de faire vne énuieuse deduction, tu te peux souuenir que la terre n'a iamais possédé vn Saint, q^uelle n'ait eu vn Martyr. Et certes les souffrances ont esté des tesmoignages si asseurez de la bien-vueillance du Ciel, que ceux que l'aduersité n'a point choquez, ont tenu leur condition suspecte, & apprehendé que cette belle fortune qui les flatoit ne leur couurist des precipices, & des abysses. Que si le Ciel a paru serein à ces genereuses ames, elles-mesmes se sont fait des orages, & des tempestes. Elles se sont iectées dans les deserts, afin d'y treuuer la faim, le froid, & la nudité: & pour y auoir des Tyrans, & des bourreaux, elles ont occupé tout leur esprit à chercher nouueaux martyres, & des morts inconnuës. Quelques vns comme toy, se sont enseuelis tous vifs: d'autres se sont exposez tous nuds aux guespes, & aux mouches, comme les Stylites, afin d'être eux-mesmes leurs Diocletians, & leurs Nerons. Certains se sont plongez dans des Lacs, & des Estangs glacez: & puis pour goûter les deux extremitez de la Nature, ils se sont allumez des feux, & des braises ardentes. Voilà vne petite monstre de ce que les bons courages ont pratiqué pour cooperer au dessein que Dieu auoit de leur faire part du Calice de son

de son Fils. Ne sont-ce pas ces Illustres de Iesus Christ qu'on a veus parmy les chaînes , & dans les prisons? n'ont-ils pas fait l'esprouue de tous les mespris, & les opprobres , que la rage des hommes pouuoit inuen-
 ter? les cailloux les ont moulus, le cheualet estendus, le fer decoupez , les rouës brisez, les scorpions des-
 chirez , le rasoir escorchez. On les a noyez dans le plomb fondu, & dans la poix bouillante, on les a fait
 brusler comme des flambeaux, on les a sciez, leur ver-
 tu les rendant plus immobiles aux douleurs, que des
 troncs de bois , & des marbres à la scie. Et pour leur
 faire sentir la mort , & sauouer les tourmens, on a
 guery des playes qu'on vouloit aussi-tost renouueler.
 La cicatrice qui demouroit sur leur chair , seruoit
 seulement de marque pour montrer l'endroit où ils
 estoient sensibles, & où l'on pouuoit les bleßer. Pour
 animer les bestes farouches au meurtre , & leur ap-
 prendre vne cruauté qu'elles ne sçauoient pas, les
 hommes ont vestu leurs freres de peaux d'Ours, & de
 Pantheres. Que si la persecution s'est quelquefois
 renduë plus douce , au moins a-t'on veu ces grandes
 ames, que le monde ne meritoit pas de posseder , er-
 rantes parmy les solitudes , cachées dans les antres,
 & les spelonques, desguisées des despouilles de mou-
 tons, & de cheures, abatuës de pauureté, & d'ennuy,
 extenuées, & aneanties de ieûnes, & de miseres. Voilà
 ces mignons , & ces privilegiés dont nostre Dieu se
 vante , voilà les caresses qu'il garde à ses meilleurs
 amis. Si tes ennuis ont tellement effacé ou diuertie ta
 memoire que tu ne te souuiennes plus de ces glorieux
 exemples , conduis ta pensée depuis le commence-
 ment du monde iusques à ton siecle, & tu verras la
 preuue de ce que ie dis , Regarde les Patriarches , &
 les Prophetes de l'ancienne loy, les Martyrs, le Con-
 fesseurs,

fesseurs, & les Vierges de la nouuelle, & ie m'asseure que tu seras pour ma remarque. Je ne veux pas te faire voir deuant la naissance du Messie, les Roys de ce peuple que Dieu aimoit, à la cadene, & dans les cachots, ces exemples sont trop esloignez de toy pour te toucher. Que la fortune creue les yeux à Beliffaire, apres luy auoir fait voir toute la gloire de l'Orient à ses pieds, que cét inuincible demande son pain de porte en porte, & qu'il traîne sa vie parmy les gueux, apres auoir mis la plus glorieuse nation de la terre dans ses chaînes. Que Charles le Gros vn des Roys de France deuienne Marguillier d'une des Eglises de Tréues, ie ne t'en proposeray pas ces inconstances, pour te persuader mon sentiment. Je n'ay garde de te produire des miseres, que tu puisses estimer des effets de la iustice de Dieu, ou des cheutes de l'imprudence des hommes. Je n'ay que des Saints à te faire voir, mais si ie t'en monstre quelques-uns, ne me crois pas obligée de les conter tous l'un apres l'autre. Je t'ay desia auerty qu'il me faudroit faire vne Litanie ou vn catalogue de tous ceux qui ont aimé la vertu, si ie voulois te parler de tous ceux qui ont souffert. Car pour te dire vne derniere fois, ce que ie m'oblige de ne te plus repeter, ie maintiens qu'on n'a pas veu vn seul Innocent, qui n'ait enduré les peines des criminels, & qui n'ait trouué quelque Tyran dans son siecle. C'estoit trop à cét ancien Philosophe de demander les noms de trois personnes heureuses pour resusciter vne Reine. Sans estre contraint à faire miracle il se pouuoit hazarder sur l'exemple d'une seule, pourueu qu'elle n'eust iamais rien souffert. La premiere Innocence qui parut au monde, n'y fut elle pas persecutée? pauvre Abel! quand ie te voy sous la main sanglante de ton propre frere, ie cherche tes crimes,

crimes , & ie ne voy que des vertus. La mort que tu reçois de celuy que le sang, & la naissance obligeoient à ta conseruation , est-ce la recompense que Dieu destinoit à tes sacrifices ? Le Ciel ne scauroit-il payer autrement tes seruantes prieres , & toutes ces agreables offrandes que tu luy as faites ? Abel est vn Sainct , il faut qu'il souffre. Peut-estre qu'Abraham, Isaac , Iacob , & les autres Patriarches seront impunément vertueux ? Non , non , celuy qui se glorifie d'estre leur Dieu, n'a pas si mauuaise opinion de leur courage , il est trop sage pour les mesconnoistre , & trop amoureux pour les espargner. Il faut pour paroistre dignes du choix , que le Ciel a fait de leurs personnes , qu'ils apprennent de la fortune , ce que vaut cette preference. On pourra douter de la vertu du Pere , & du Fils , iusques à ce que l'un se resoluë d'estre le Sacrificateur , & l'autre la Victime. Et pour Iacob , le ventre de Rebecca luy seruira de Theatre, où son innocence sera attaquée , & de Circ , où l'enueie le poursuiura , quoy qu'immobile ; & afin qu'il n'ait pas vn moment exempt de peine , il faut qu'il soit conceu avecque son persecuteur. Des ayeux passons au neveu : Helas ! ie voy le pauvre Ioseph dans vne cisterne : ie le voy attaché à vne chaisne , ie le voy enfermé dans vne geole. Ses freres sont ses bourreaux , & ses traistres : sa propre vertu se rend complice de la femme de Putiphar, pour le jetter dans les incommoditez, & les horreurs d'une fosse. Que peut-on penser du Dieu d'Abraham , & de ses promesses, quand on void son petit fils à la cadene ? Je ne scay ce qu'en dira l'impieté ; de moy, ie iuge par ses souffrances de son election. La patience de Job a receu trop d'Eloges des siecles passez , pour estre ignorée des hommes , qui viuent aujourd'huy. C'est ce puissant

fant Athlete qui a lutté contre tout ce qu'il y a d'horrible dans les maux , de sensible dans les douleurs , & d'infame dans les opprobres. Du throsne il tombe sur vn fumier, au lieu de soye, & de pourpre, il void son corps couuert de playes , & de lepre. Pas vn de ses membres n'a esté exempt des douleurs : les maladies contraires , & compliquées ont conspiré contre sa vie , leur inimitié s'est accordée dans le dessein de le desesperer. Chose du monde n'a consolé son affliction ; ses seruiteurs n'auoient des paroles, que pour luy apporter de nouveaux malheurs ; ses Amis pour luy faire sentir ses peines, luy veulent persuader des crimes. En fin la mauuaise Fortune n'ayant plus rien à luy oster , sa femme tasche de luy oster son Dieu. Qui ne croira que ce reste d'homme , qui acheue de pourrir sur son fumier , est autant coupable qu'il paroît horrible ? Et neantmoins la main, qui semble l'abatre le releue : Dieu se glorifie de sa fidelité, & declare son innocence. Et afin que tout le monde sçache l'estime , qu'il doit faire d'un patient, il veut que le premier liure de nos Bibliotheques se face de s^{on} histoire, & que le recit des miseres de Iob soit vn des Euangiles de son Eglise. Ce sentiment ne peut estre soupçonné de faux, soit que Moysè en soit l'Auteur, ou seulement l'interprete, il faut auouer, que cette lamentable histoire ayant esté proposée , pour consoler les trauaux d'Israël dans l'Egypte, que l'Eloquence a consacré sa premiere voix à la gloire des souffrances. Je ne m'estens à ce peu que l'ay touché d'une si estrange auenture, que pour te dire, que comme tous ces grands Heros ne sont que les figures du Messie , leurs plus cuisantes douleurs ne sont aussi que de legeres ombres de son Martyre. Il falloit donner ces illustres precautions à la passion de ce Roy
de la

de la patience, afin de disposer vos esprits à la creance de ses excez par les auis que le Ciel vous en a donnez dans tous les siecles qui la precedent. Auant que ie t'en propose de plus expresses images, ie t'en veux produire vne, où la nature mesme semble s'estudier à crucifier les fleurs. C'est le Granatile; dont ie te fais voir la naissance, & la figure.



I. P O E S I E.

*Ainsi finit ses iours le genereux Theandre,
Lors qu'il força la mort, par sa mort de se rendre :
Son funeste trespas ietta l'esfionnement
Dans le corps tout glacé du plus lourd Element.
Le Ciel dans cet accez esleignit sa lumiere ;
La Lune, & le Soleil changerent leur carriere.
La Nature pasina dans cet horrible effroy,*

Et choisit

Et choisit son tombeau dans celuy de son Roy.
Pendant que l'Vniuers attendoit que la foudre
Confondist ses beautez en un amas de poudre,
Theandre desirant delaisser un portrait,
D'un genereux vainqueur, & d'un amant parfait,
Opposa ses bontez à sa triste auanture,
Et d'un de ses soupirs guarantit la nature.
A mesme que sa mort fit l'eclipse du iour,
Il nous fit eclatter les feux de son amour.
Pere, dit cet amant, si ma perseuerance
Merite les effets de vostre Bien-vueillance;
Faites voir aux ingrats par excez de faueur,
Que s'ils sont mes bourreaux, que ie suis leur Sauueur,
Ie veux que leur peché merite le supplice,
Ie vous offre mon sang, que veut vostre Iustice.
Pourriez-vous exiger un plus iuste payement,
Que mes tristes douleurs, & mon cruel tourment?
Il faut que mon amour triomphe de l'enuie,
S'ils me donnent leur mort, ie leur donne ma vie.
Ne regardez pas tant leur fiere cruauté,
Que vous ne regardiez l'excez de ma bonté.
La cause de mes maux est dans leur ignorance!
Celle de leur espoir est dans mon innocence.
A ce dernier soupir de ce braue vainqueur,
L'amour tira le sang qui luy restoit au cœur.

La Terre alors prit le dessein
D'eterniser ce parricide,
Pour le faire, elle ouurit son sein,
Et receut ce corail liquide.

Ce sang aida de sa chaleur
La seiche humeur de son argile,
Et fit naistre avecque douleur

* * *

M

Le mourant corps du Granatile.

Son tronc toujours panchant, & las,
Sorty du sang qui le fait naistre,
Soustient son corps d'un échelas,
Pour marquer la Croix de mon Maître.

Le fer qui perça son costé,
Dans sa fucille forme une lance,
Et nous despeint la cruauté
De sa plus cruelle souffrance.

* * *

Pour porter le dueil d'un grand Roy,
Sa fleur veut estre violette,
Et rien que sont riste conuoy,
Ne doit composer sa rosette.

Vn delicat filet de sang
Fait les rebords de sa figure,
Le seul vermillon de leur rang,
Met du meslange à sa teinture.

Cinq rougeurs distinguent son fond
D'où naist le corps d'une colonne,
De qui la pointe se confond,
Dans les replis d'une couronne.

Tout à la cime de la fleur,
On voit trois clouds de couleur noire,
Qui nous monstrent dans leur palleur,
Ceux de qui parle nostre histoire.

Le temps desseche ce fleuron ;
Pour nous produire des delices,
Sous la ianne peau d'un Citron,
Qui peint de fruit de ses supplices.

La fleur

*La fleur qui despire la mort
Du brave Ajax, & d'Hyacinthe,
Me cause aussi peu de transport,
Que le pavot ou bien l'absinthe.*

*Celle qu'une jalouse humeur
Forma du beau corps de Clytie,
Me donne beaucoup moins d'ardeur
Qu'une feuille morte d'ortie.*

*Celles qu'Adonis, & Junon
Font esclater de tant de gloire,
Ne pourront iamais de leur nom
Flater mon cœur ny ma memoire.*

*Narcisse est sujet de rebut
A ceux qui connoissent ma plante,
L'odeur de l'Ambre gris me put
Quand ie songe à mon Helianthe.*

*Ce qui fait mon affection
Sensible aux miracles de Flore,
C'est la fleur de la Passion,
Que j'ayme seule, & que j'adore.*

*Doux Zephyr Createur des Fleurs,
Change mon cœur en un Calvaire :
Donne-moy ces belles douleurs,
C'est une fleur de Cimetiere.*

II. P R O S E.

LEs Apôtres qui ont veu, & vescu avecque celuy
qu'Isaïe appelle l'homme des douleurs, ne l'ont
approché que pour avoir meilleure part aux amer-

tumes de sa Croix. Que si l'ambition en a porté quelq'un à desirer la premiere place d'un Royaume, dont il a eu tous les iustes titres, sans goustier vne seule de ses commoditez, il luy a fait aussi-tost comprendre que toute la preference qu'on doit attendre de son amour, estoit vne plus abondante participation de son calice. Et certes à les considerer par ordre, il'est impossible d'en remarquer vn seul, qui n'ait glorieusement suiuy les traces de ce grand Capitaine. On ne s'est pas contenté de les chasser des villes, pour estouffer en eux l'Eglise naissante : on s'est efforcé de les exterminer de la Nature. Tout ce que la cruauté a de plus inhumain s'employa pour leur oster ce reste de vie, que la pauvreté, les miseres, les jeunes, & les veilles leur auoient laissé. On les jette dans les huyles bouillantes, on les attache en croix, on les écorche tous vifs, on les scie par le milieu du corps. Pas vn d'eux n'est arriné à cette gloire qui estoit deuë à leur merite, que par les opprobres, & les confusions d'une mort, qui offensoit leur innocence. Les plus legeres incommoditez qu'on leur a fait souffrir, ont eu aussi peu de iustice dans leur rigueur, qu'ils auoient de crime dans leur vie. Que s'il est vray que S. Iean n'ait pas gousté la mort (comme beaucoup de bons Autheurs l'estiment) c'est seulement pour attendre le dernier, & le plus barbare des persecuteurs de l'Eglise. Et à vray dire il y a quelque sujet de croire, que le Sauueur, qui luy a promis de boire son calice, luy en garde le fond, & la lie, comme au plus cher de ses amis. Il a esté le mignon du cœur, & le cher disciple que Iesus aimoit, il faut donc que l'Antechrist, dont l'humeur, & la vie doit estre contraire à celle du Messie, luy fasse la mesme part dans la haine, qu'il a eue dans les amours de ce doux

Ma &c

Maistre. Et s'il est ainsi, qui ne void la verité de ce que j'ay dit, que tous les fauoris de Dieu n'en doiuent esperer que des douleurs, & des souffrances? Ceux qui ont suiuy les Apostres n'ont pas foulé vn autre chemin: les Amphitheatres sont encore rouges de leur sang. On a armé les Elemens contre leur vie: les hommes ont instruit les Tygres à deuorer les hommes. Que si la sainteté de ces pitoyables Victimes treuuoit du respect où la cruauté leur preparoit la mort, on les animoit avec des artifices, à des meurtres, pour qui les forests n'auoient pas assez de capacité. Mon discours ne donneroit pas seulement de l'ennuy, mais encore de l'horreur, si ie voulois toucher toutes les différentes tortures qui ont consumé les meilleurs amis de Dieu. Le funeste trophée, que ie dresserois des rouës qui les ont brisez, des poëles, qui les ont bouïllis, des rasoirs, qui les ont decoupez, des potences, qui les ont soustentus, des lances qui les ont percez, & les taureaux de bronze, où la douleur les a fait mugler, seroit vn spectacle à ébranler, & faire fremir les plus genereux courages. Et puis, ie parle à vne personne, qui a plus estudié les combats des Martyrs, que les victoires des Cefars. P'auouë bien que la douleur des enfans du Caluaire, & de ces Benonis du Sauueur, n'a pas tousiours esté sanglante, & que par fois on a espargné leur vie: mais ç'a esté pour prolonger leur mort, & leur faire sauourer à loisir les tourmens. Leurs peines ne pouuans estre longues, & violentes, la rage de leurs Tyrans a trouué plus de satisfaction à leur en mesnager l'ennuy, qu'à les opprimer tout à coup, sous la violence des tortures. Quand on meurt promptement, on ne meurt qu'vne fois: lors qu'on languit long-temps, on meurt tousiours. C'est faueur à vn criminel de luy

ordonner vn poison qui le tuë, aussi tost qu'il le touche : pour allumer vn feu insupportable, il faut qu'il soit petit , & sa flamme lente. Et de vray , ces bourreaux qui semblent auoir de la douceur pour ceux qu'ils persecutent , ont vne secrette , & malicieuse cruauté, qui leur donne de l'auantage sur les Diomedes , & les Proustes. La raison est qu'ils ne donnent pas seulement le loisir à la chair de sentir son supplice , mais encore ils procurent du temps à l'esprit pour perdre sa vertu , & desesperer son salut. C'est trop peu à ces Tygres de ne faire mourir que le corps, pour assouuir leur rage, il faut tuer l'ame, en tuant sa patience. Cecy est en ta faueur , mon cher nourrisson, afin que tu comprènes que ton martyr ne laisse pas d'estre agreable , bien qu'il ne soit pas sanglant. Si Dieu a des Martyrs rouges, il en a de blancs. Ceux-là le plus souuent n'ont eu qu'un moment de mort, & ceux-cy , pour l'ordinaire , qu'un moment de vie. Ceux-là n'ont pas eu le loisir d'esproüuer leur constance, & ceux-cy ont eu des siecles entiers pour perdre leur fidelité : le Ciel veut que tu sois des seconds afin que tu merites vne grande couronne, par la longueur de tes tourmens. Que si la compagnie donne du cœur, Celestin doit estre fort vaillant. Tu n'es pas seul en cetté lice , tous ceux qui ont de la vertu , y tiennent leur rang, & leur ordre. La foule est plus à craindre dans cette carriere , que la solitude. Je laisse pourtant l'agreable montre , que ie pourrois faire de ces braues Heros sans aider ta memoire : tu te souuiens assez du grand Hilaire dont l'Eglise respectera les combats, tandis que les vertus auront du merite. Sa vie n'a esté qu'un tissu d'ennuys , & de douleurs, l'impossibilité qu'il auoit avec les meschans , luy a esté vne seconde source de maux , & de trauerses.

La

La France, qui est l'azile des affligez luy fut ouuerte, mais pour en sortir, & aller en Phrygie, chercher vne haine assez barbare, & inhumaine. On ne scauroit exprimer ses souffrances qu'avec vne langue semblable à la sienne. Toutesfois ny l'impatience, ny l'ennuy ne peurent rien sur sa vertu, il triompha de l'Herésie, & pour luy faire sentir le peu d'auantage qu'elle auoit dans son esloignement, il employa son repos pour combattre, & ruiner ses erreurs. Il presida aux Conciles, il prononça des Articles de Foy à toute l'Eglise, & poursuivit Arius avecque tant d'ardeur, que pour le punir de ses glorieuses actions, & luy trouuer vn exil nouveau, on fut contraint de le bannir en son pays. Ce grand Homme à qui j'ay donné l'illustre surnom de Theologien n'a pas esté plus doucement traité de la fortune. C'eust esté trop peu à l'inuincible Grégoire de n'auoir que les Tyrans ordinaires pour ennemis, il falloit voir tout l'Orient partagé sur les sentimens de sa vie, & de sa doctrine, & que pour appaiser la tempeste, il se presentast comme Ionas, à l'enuie. Son successeur en sa dignité, recueillit pareillement l'heritage de ses souffrances, mais de quelque cruauté que la haine ait persécuté Chrysostome, sa vertu est demeurée ferme, & inesbranlable. Son bannissement iusques aux extremités de la terre, n'a seruy que pour faire esclatter son nom par tout le monde. Constantinople estoit trop estroite, pour contenir la gloire d'un seul homme qui auoit eu l'honneur de souffrir pour la querelle de son Dieu, son triomphe deuoit courir l'Europe, & l'Asie. C'estoit seulement pour monstrier ce fameux Prelat à tout le monde, que le Ciel ordonna qu'on le menast par tant de mers, & de terres à Cucuse. Aussi ne créut-il iamais que la rage d'Eudoxe le peust pro-

scrire, puis qu'elle ne pouvoit l'esloigner de son Dieu. Et quoy qu'il ne fallust qu'un peu de dissimulation pour gagner les bonnes graces d'une Reyne, ce genereux cœur, à qui toutes les paroles appartenoient, n'en pût avoir de lasches ny de timides. Tandis qu'il en resta un moment de vie, il eut de la résistance pour s'opposer à l'impiété du vice. Que s'il expire parmi tant de miseres, il fera trembler, même après sa mort, celle pour qui jamais il ne pût avoir de crainte. Les Empereurs presenterent requeste à son tombeau, & pour meriter le pardon de leur Mere, ils feront amende honorable à ses cendres. Ces beaux exemples n'appartiennent pas tellement aux premiers temps de l'Eglise, que nous ne puissions en trouver dans la suite de tous les siècles. Rome n'a-t'elle pas veu depuis peu l'invincible Thomas de Cantorbie, dont le genereux sang est encore tout frais, & tout bouillant en Angleterre ? Toute cette Isle, qui n'est qu'un coin caché au reste du monde, ne l'a pû cacher à ses ennemis. Il a passé les Mers pour trouver un refuge, il a vu la besace sur l'espaule à tous ses parens à son occasion : si est ce pourtant qu'il est demeuré debout parmi les ruines de sa famille, & que la pitié de tant de misérables, qui le suivoient par tout, ne luy pût donner un mot de complaisance : Mais j'ay tort de rechercher des exemples hors de l'Italie, & de produire devant toy quelque chose de moins que des Papes. De saint Pierre descens jusques à ton âge : tu peux conter au moins quarante Martyrs, tous d'une suite, sans qu'un seul interrompe cette riche succession. Si bien qu'il semble que Dieu n'ait esleué ces genereux courages dans le throsne de son Fils, que pour les monstrer aux Tyrans, & dire que c'estoient des hommes à perdre. C'est-là, que tu peux trouver

trouver des consolations à tes souffrances, & des aiguillons à ta vertu. Mon dessein n'estoit pas de t'entretenir plus long-temps des belles actions de la Patience : mais certes ie serois injuste, si ie craignois d'estre importune : à moins que de trahir ma cause, ie ne puis oublier Athanase : Grand, & invincible courage! que ie ne regarderay jamais, que comme vn rocher immobile, où toute la rage des flots se va briser, tu sçais de ta propre experience ce que Dieu fait souffrir à ceux qui deffendent sa gloire. La premiere iniustice qui choqua son innocence parut au Conciliabule de Tyr, où ce Metropolitain de toute l'Egypte fut contraint de se tenir debout deuant ses inferieurs. Le grand Potamon Euesque d'Heraclee, vid, & plora cette incivilité de l'œil qui luy restoit, depuis qu'il ayma mieux perdre les lumieres du iour, que les esclatantes tenebres de sa foy. Mais sa compassion eut aussi peu de force sur l'esprit de l'Assemblée, que son exemple auoit eu d'attrait pour adjouster Eusebe de Cesarée chef de part contre Athanase, à ce glorieux nombre d'Euesques, qui perdirent la moitié de leur veüe, pour conseruer toute leur fidelité. Ce fut dans cette Synagogue d'impies où l'on chargea l'innocent de la plus noire calomnie que la haine puisse inuenir. Son accusation n'eust pas esté assés iniuste, si elle n'eust esté honteuse : on produit vne effrontée, qui se plaignoit que le Defenseur des Vierges l'auoit violée. A ce crime on joignit celuy de Magie : pour luy donner quelque couleur, on fit montre d'vne main qu'on asseuroit auoir esté coupée par le saint Prelat à son Lecteur Arsene, afin de faire ses enchantemens. Il fut aisé de montrer le noir de ces calomnies en produisant Arsene avec ses deux mains, & par l'equiuoque de cette perduë, qui prit le Prestre Timothée

pour Athanase. Cette justification ne fut pas neantmoins assez forte pour empêcher le saint Euesque d'estre bāny en France. Constantin approuua la mauuaise sentence des Ariens, quoy que le grand Antoine luy en eust descouuert l'injustice par lettres expressees. Le ieune Constantin racommoda la faute du vieux, le renuoyant à son Eglise, mais pour en sortir bien tost, & aller à Rome rendre compte de sa conduite au Pape Iule. Ce fut là qu'il publia ce beau Symbole, qui depuis a seruy à toute l'Eglise. Il ne pût neantmoins retourner en Alexandrie, parce que ses ennemis opposerent le Concile d'Antioche à celuy de Rome, & celuy de Philippes à celuy de Sardes. Il est vray que l'orage s'abbatit vn peu, & que Constance permit son retour, à la consideration de son frere Constans, qui appuyoit son innocence. Mais hélas! faueurs du monde, que vous durez peu! Constance ayant vangé la mort de son frere par l'entiere defaite de Magnence, qui en estoit le meurtrier, il fit condamner nostre grand Prelat à Milan, d'où il le relega en Thrace. Cette affliction fut vne des plus sensibles de nostre Saint, parce que l'iniustice qu'on luy fit, s'estendoit à son grand regret à plusieurs Euesques, mesme à ce fameux Osius, qui auoit presidé à deux Conciles Oecumeniques, & au Pape Libere, mais auecque tant de rage, que le grand Basile prit cette persecution, pour le commencement de celle de l'Antechrist. Cependant le pauvre Athanase souspiroit leur infortune, & les troubles de la Chrestienté dans vne Cisterne, où l'vn des ses Clercs, qui tout seul scauoit sa cachete le nourrit à moitié l'espace de six ans. L'entrée de l'Empire estant ouuert à Iulien l'Apostat, par la mort de Constance, Athanase retourna en Alexandrie, où il reconnut bien tost, que
la douceur

la douceur de l'Apostat n'auoit esté qu'un artifice pour gagner l'esprit des peuples par cette bonté feinte, & dissimulée. Le pretexte qu'il prit contre notre incomparable Prelat, fut que certaines Dames Grecques auoient quitte les Dieux pour suiure le Messie. Sur cette persuasion qu'Athanase contribuoit à ce changement, il escriuit à Eudice Prefect de l'Egypte, qu'il le chassast de sa ville. Mais comme il y auoit commandement secret de le faire mesme sortir du monde apres beaucoup de fuites, & de ruses, il demeura secretement caché dans Alexandrie, iusques à ce que le Galileen eut triomphé de l'Apostat, qui l'auoit renié. Iouinian donna quelques bons interualles aux trauaux de ce braue vainqueur. Mais Valentinian ayant apres sa mort associé Valens à l'Empire, sans luy communiquer sa pieté, tous les Euesques qui auoient esté bannis sous Constance, retournerent à leurs exils. Athanase estoit le Chef de la bande, & si ie l'ose dire, l'innocente cause de ces iniustices, ce qui l'obligea à vne plus prompte obeissance que les autres. Je veux bien auoier, que cet inuincible courage auoit la consolation de voir que Dieu prenoit la protection de sa vie, & que le Ciel faisoit des miracles pour le conseruer, lors que l'impieté faisoit des efforts pour le perdre. Vn iour Constance ayant enuoyé cinq mille soldats à l'Eglise, pour saisir ce S. Patriarche, ils n'eurent pas assez d'yeux pour le voir. Il leur parla, & passant parmy eux sans perdre vn seul point de sa grauité, il se tira de leurs embusches. Vne autrefois, comme les satellites de Iulien poursuioient son vaisseau avecque autant de diligence qu'il estoit impossible de fuir, il en fit tourner la pointe vers eux, pour les asseurer qu'Athanase estoit passé par là depuis peu. A dire le vray, on ne peut
nier, que

nier, que ces heureux accidens ne soient des témoignages visibles du soin que le Ciel prenoit de sa personne. Mais si Dieu le conservoit, il le conservoit à la pauvreté, au mépris, à la faim, à la nudité, & aux douleurs. Jamais il ne jouït d'un moment qui ne fust traversé de quelque mal ou de sa crainte. A bien considérer sa vie, ce n'étoit qu'une fuite continuelle, & une course de l'extrémité de la terre à l'autre. L'Orient, & l'Occident l'ont vu, & comme s'il eût été le Soleil du monde, & que ce mouvement luy eût été naturel, il en faisoit presque tous les ans le tour, & la visite. Ce n'est pas néanmoins suffisamment expliquer ses tempestes, de dire qu'il eut quatre Empereurs pour Tyrans, Constantin le grand, Constance son fils, l'Apostat, & Valens. Je ne veux pas nier que le premier ne le traversa que par erreur : mais si la malice déguisoit Athanase à Constantin, Athanase ne laissoit pas d'estre sensible aux coups qu'il recevoit de Constantin. Les trois autres le persecuterent avec beaucoup plus de rage, Julien, parce qu'il le croyoit l'exterminateur de ses Dieux ; Constance, & Valens, parce qu'ils le tenoient ennemy déclaré de leur secte. Non, ce n'est pas assez, de dire que quatre puissans Monarques furent ses persecuteurs. Car si le monde fut estonné de se voir presque tout Arien, sous leur règne (comme S. Ierosme l'assure) ne faut-il pas conclurre que nostre invincible Prelat eut quasi tous les hommes pour Tyrans, puis qu'il avoit tous les Ariens pour ennemis ? Ce seroit encor' peu de marquer ses quatre bannissemens, ses fuites, sa solitude, & ses autres souffrances. Tout le sujet, qu'Athanase donna à l'envie, fut de ne pouvoir permettre qu'on ravist la divinité au Verbe, en le déclarant inégal à son Pere. Ce motif ne pouvoit iustement animer les

Ariens

Ariens contre luy : mais il obligea Iesus-Christ à reconnoître ce seruice d'une façon que vostre delicatessen a peine de comprendre. Parce qu'estant le Dieu de la gloire , & l'Homme des douleurs , & ne pouvant communiquer ce qui appartient à Dieu , il luy fit une aduantageuse part de ce qui estoit propre de l'Homme Cette diuine chair qui tiroit toute son excellence de son vnion avec le Verbe, deuoit sans doute recompenser de ses propres biens , la generosité de son Athlete. Mais enfin où auons-nous laissé nostre Patriarche , qui le peut cacher aux diligentes poursuites de Valens ? Les solitudes n'ont plus de spelonques assez secretes, la terre n'a pas un lieu de refuge, pour celuy qui merite tout le Ciel en heritage : les mers ne sont pas assez larges pour fuir. Posterité ! croiras-tu ce que ie vais dire ? ce grand , cet incomparable, ce miraculeux , & diuin Prelat est contraint de s'enfouir tout vif , & de se cacher quatre mois entiers , dans le tombeau de ses Ancestres. A quelle extremité de disgrâce peut tomber un miserable, pour estre banny chez les Morts , & sans mourir , de se voir contraint de viure parmy les ombres ? Que l'esprit plus ingenieux s'occupe à former l'idée d'une affliction plus digne de pitié , & d'une misere plus acheuée, que celle de ce grand Archeuesque. Ce seroit à cet affligé que ie permittrois de se plaindre, & si ie voyois couler quelques larmes de ses yeux , ie ne le blasmerois ny de mesleance , ny d'iniustice. A moins que cela , ie ne peux pardonner à un homme qui se laisse vaincre à la douleur , ayant des exemples de constance si capables de consoler les plus sensibles douleurs. Mais il vaut mieux que ie me taise , & que ie te donne le temps d'ouyr l'inuincible Athanase, qui sur le bord de son sepulchre, comme d'une tour d'airain

d'airain se rit de la rage de ses ennemis , & coniure
toutes les plus cruelles rigueurs de la fortune de ne
le point espargner.

II. P O E S I E.

*Precieux restes de mes Peres,
Beau souuenir de mes Ayeux,
Cher, & triste objet de mes yeux,
Sacrez tesmoins de mes miseres :
Si ie descends parmy les morts,
Ne me prenez pas pour un corps :
Athanasie n'est plus qu'une ombre,
L'injuste rigueur des tourmens
Me joint à vostre triste nombre,
Escoutez mes gemissemens.*

*Richesence d'une vie
Qui ne pourra iamais perir,
Et par qui mesme doit mourir
La violence de l'enuie.
Quoy que mes lugubres souspirs,
Meslez au doux ton des Zephirs,
Troublent vostre profond silence,
Ayez pitié de mes malheurs,
Ne me blasmez point d'inconstance,
Vous ne souffrez pas mes douleurs.*

*Ie vis un peu , mais à la peine
La cruauté de l'ennemy,
Qui me fait mourir à denny,
Ne pretend pas de m'estre humaine :
Un cœur tout plein d'inimitié,*

N'est

N'est pas capable de pitié,
 S'il retient les coups de ses armes,
 Ce n'est que pour donner loisir
 Au cours eternal de mes larmes,
 Et prolonger mon desplaisir.

A-t'on iamais veu dans le Monde,
 Vn criminel plus agité
 Du gibet qu'il a merité,
 Et quelque rage plus feconde ?
 Je ne vis pas vn seul moment
 Hors de l'exil & du tourment,
 On me poursuit dessus la terre,
 Et si ie m'embarque sur mer,
 Aussi-tost vn coup de tonnerre,
 M'y vient choisir, pour m'abysmer.

Mais d'où me vient cette pensêe
 Qui semble accuser mon honneur,
 Par le reproche du bon-heur,
 Dont on croit mon ame offensêe :
 Je prefere ce monument
 Au plus beau lieu du Firmament,
 Ces draps de morts me sont des voiles,
 Dont j'aime mieux l'obscurité,
 Que le plus beau feu des estoiles :
 Souffrir, c'est ma felicité.

Venez tourmens, venez martyre
 Riche matiere de mes pleurs,
 Venez souhaitables douleurs
 C'est apres vous que ie sousspire :
 L'abord de ce triste cercueil
 Ne vous peut estre qu'un écueil,

*Si vostre faueur m'en deliure,
 Vous r'allumerez mon flambeau,
 On ne sort iamais que pour viure
 Hors des tenebres du tombeau.*

III. PROSE.

O Dieu ! (m'escriay-ie aussi-tost) qui seroit assez lasche , pour ne point desirer quelque place parmy tant de Heros ? l'auotie, Madame , que ie suis pecheur : en cette qualite ie merite tous les chastimens qu'il plaira à mon iuste Iuge de m'ordonner. Ce me sera trop de gloire estant coupable , de souffrir avecque les innocens , ce qui me reste (Sainte Maistresse) c'est de coniuurer vos bontez d'oublier les plaintes de ce vieillard , dont le foible courage s'estoit rendu à faute de vos belles instructions. Pourueu que Dieu me vueille continuer les connoissances que vous m'avez données , j'espere qu'il ne m'attriuera plus d'accidens, qui blessent ma constance. Sans craindre que la vanité me flatte d'une innocence pareille à celle de ces grands hommes , ie tascheray de porter mes peines avec vn courage qui regarde leur exemple. Th. Je me resioüis (mon cher Disciple) d'apprendre que mon entretien n'a pas esté inutile : sçache neantmoins , que si ie t'ay dit des choses, qui ostent l'amertume des souffrances , il m'en reste, qui luy donneront de la douceur. Tous ces illustres, dont ie t'ay parlé ne sont que de foibles , & imparfaites images du glorieux exemple, que ie t'ay gardé. Adorable Sauueur des hommes , miraculeux homme des douleurs, c'est à vous d'adoucir, & de dissiper les plus cruelles disgraces de la mauuaise fortune. C'est vostre
 Croix,

Croix , qui peut estre le fort appuy des ames opprimées. C'est ce Caluaire que vous auez choisi , pour theatre à vos vertus , qui doit seruir d'eschole à tous les affligez. Hé ! qui se pourroit iustement plaindre, apres auoir veu l'innocence chargée du supplice des pecheurs : vn Dieu exposé aux ignominies des criminels : Iesus souffrant ! Ciel, & terre ! que scauroit-on voir de plus estrange ? mon dessein n'est pas de m'arrester à tous les momens de la penible vie de celui qu'Isayë appelle l'opprobre des hommes, ny d'entendre toutes les humiliations de ce mesprisé , que Daudid nomme vn vermisseau. Quand l'Vniuers seroit changé en vne Bibliotheque de ses douleurs , encor seroit-il plus vray de dire qu'il reiteroit des volumes à escrire plus de ses souffrances , que de ses merueilles , puisque Iesus a moins fait de miracles, qu'il n'a senty de miseres. Vne bonne ame proteste que iamais elle ne se representoit le petit Moyse dans son panier de jonc sans douleur , & le grand Chrysostome assure , qu'il ne pouuoit regarder le tableau du sacrifice d'Isaac sans plorer. Ce n'étoient pourtant que les images des images de Iesus-Christ, & les ombres des ombres de son Martyre. Car il est assuré (mon cher Celestin) que le jonc de ce Prophete marque la cresphe du Sauueur , & le buscher d'Isaac sa douloureuse, & infame Croix. C'est vn spectacle digne de pitié, de voir vn enfant exposé à la mort , aussi tost qu'il reçoit la vie , mais à ceux qui ne scauent pas que la prouidence du grand Dieu est dans ce petit bâteau, & qu'elle le conduit dans le sein d'une Reine. A voir l'Innocent Isaac sous le couteau de son propre pere, sans considerer que ce n'est qu'un personnage de Tragedie, il y a dequoy faire soupirer la cruauté mesme. Mais certes si l'on épanche des larmes ordinaires

pour ces feintes, il en faudra plorer de sang dans l'estable de Bethleem, & sur la montagne du Caluaire, Ces deux extremitez de la vie du Sauueur meriterent des sentimens eternels de douleur, & de reconnoissance, puisque ce sont des souffrances, & des bienfaits d'un merite infiny. A moins que d'estre Demon ou Iuif, on ne scauroit se souuenir des agonies d'un homme Dieu, sans ressentir quelque traitt de leur amertume. Ce dernier moment qui commence l'innocence, & acheue la vie des brigans, & des parricides nous donne de la compassion parce qu'il a de la violence. Et donc quel effect aura la consideration du Martyre de Iesus dont les langueurs n'ont pas moins duré que sa vie? il est mort trente trois ans entiers, sans qu'un seul moment d'une ioye toute pure se soit coulé dans le cours de ses tristes années. Aussi n'a-t'on peu conclurre qu'il fust homme, par cette puissance du rire, qu'on dit être la propre qualité de votre nature, puis qu'on n'a iamais veu, que la ioye luy ait changé le visage. Ses yeux tousiours noyez de larmes, ses jouës passées, & mourantes, cette langueur vniuerselle, qui le faisoit vieux en la vigueur de son âge, sont d'assez visibles preuues de ses trauaux, & de ses peines. On dit, & ie le croy, que la pauvreté, les miseres, le ieusne, les veilles, & la continuelle austerité de sa vie, auoient tellement consumé son corps, qu'il paroissoit approcher cinquante ans, n'en ayant encore que trente. Sa complexion tres delicate, & ses extrêmes besoins, me persuadent aisément cette pensée, & m'obligent d'adorer ceste vieillesse auancée, & cet âge decrepit au milieu du robuste. Je m'engagerois à l'impossible, si ie voulois parcourir toutes les actions du grand Iesus, mais ie manquerois au principal de mon dessein, si ie ne touchois au moins les

les principales. Efforce-toy de me suivre ; mais pour comprendre la grandeur des afflictions dont ie pretends de t'entretenir, souviens-toy tousiours, que celuy qui souffre est le Fils vnique de Dieu, & l'innocence incarnée. Souviens-toy qu'il souffre dans vn pays où l'on le deuoit adorer, & des maux qu'il pouuoit fuir. Et pour commencer par où il a commencé de viure, qui a iamais ouïy parler d'vne naissance si abandonnée que celle de Iesus ? Sa pauvre mere n'a pas vn coin d'hostellerie dans vne ville, où les voleurs, & les sacrileges treuuent des sales tapissées. Celuy qui a basti le Ciel pour y loger l'homme, n'a pas vne chambre dans toute la terre pour se mettre à couuert. Il est contraint de naistre dans vn reste d'étable, qui ne couure les passans du froid, & de la pluye que pour les glacer de la crainte d'vne cheute qui les opprime. Helas ! où est la charité des hommes, mais où sont les soins amonreux de ce Dieu, qui s'humilie iusques à bastir le berceau des Alcyons, & le petit nid des oyseaux ? Où est cette Bonté qui nourrit les Corbeaux lors que la blancheur de leur duët encore naissant, les fait repudier comme illegitimes ? Où est cette Prouidence qui se vante de seruir de sage femme aux petits Couleureaux, & qui du puissant esclat de son tonnerre, facilite les couches de la Biche ? Dieu s'est-il oublié de cette tendresse qu'il ne refuse pas aux bestes ? ne se souuient-il plus que les Sardanapales naissent dans l'escarlatte, & que mesme les reignes sont Porphyrogenites ? Peut-estre que l'obscurité de la nuit luy oste la veüe de ce Fils qu'il a engendré dans l'éclat des splendeurs éternelles, & qu'il ne se souuient plus de celuy qu'il n'ayme pas moins que soy-mesme ? Dieu ne peut rien ignorer, les plus noires tenebres n'em-

peschent pas ses yeux; & toutesfois Iesus souffre. Son daiz, & ses balustres ne sont que le reste d'un toict de paille qui tombe, & d'une claye de bois qui pourrit. Vne mangeoire luy sert de berceau Royal, tout ce qui soulage la naissance de ce petit Monarque, en fait esclater la misere. Hé ! qui ne seroit saisi d'une profonde extase de voir celuy qui embrase les Seraphins dans le Ciel, se chauffer à l'haleine d'un asne, & d'un bœuf, en une estable ? Ne faut-il pas estre insensible pour demeurer sans douleur à la veüe de cet estrange prodige ? mais ne faudroit-il pas estre plus materiel que le bronze, pour ne pas sentir la Circoncision d'un Enfant qui a aussi peu de besoin de la prendre, que de force pour la souffrir ? Passons de sa naissance à sa fuite, laissant à ta propre raison de faire le parallele de ta chambre, & de sa retraite. Ce pauvre petit n'est presque pas sorty du ventre de sa mere, qu'il faut fuir en Egypte. Celuy qui deuoit luy eriger des autels, ou du moins luy offrir son palais, le chasse de son pays, & luy prepare une biere. Pour ne point faillir un meurtre, il en fait quatorze mille; & afin que le Sauueur passast de bonne heure au trauers d'une mer rouge, il espanche tout le sang d'une Prouince. O Dieu ! que ne souffrit pas cet adorable Enfant, de voir que sa vie cauſoit la mort à tous ceux de son âge ? Toutes les dagues qui déchirerent ces vendres Victimes entrerent dans son cœur, pour y faire avecque la pitié, ce que le plus inhumain des Tyrans tacheroyt d'exercer sur son corps innocent. Heureux Agneaux, d'auoir commencé à souffrir en naissant, mais mille fois plus fortunez d'auoir caché la vie de Iesus en mourant. Sans faire un grand effort d'imagination, il est facile de se figurer les incommoditez que nostre-Inconnu rencontra chez un peuple barbare,

ple barbare, lequel outre la haine commune de toutes sortes de personnes, en auoit vne propre, & particuliere pour les Heureux. Mais sans deuiner des souffrances que le Ciel nous veut couvrir, nous n'auons que trop de preuues des miseres, & des pauuretez qui luy ont tousiours tenu bonne compagnie. Quoy que le Messie se soit caché, ou dans les deserts d'Egypte, ou dans la bourgade de Nazareth iusques à l'âge de trente ans, la boutique de Charpentier où il a trauaillé nous fait assez comprendre les aises, & les delices de sa vie. Que si nous le suiuios pendant qu'il court la Iudée pour y faire autant de miracles que de pas, nous y verrons des Aueugles esclairez, des Febricitans gueris, des Paralytiques redressez, des Possédez affranchis, & des Morts ressuscitez. Mais nous y verrons pourtant Iesus mesprisé, & mesme poursuivy de ceux qui luy doiuent plus d'amour, & de reconnoissance. Ne l'a-on pas veu ce bon Sauueur, apres auoir multiplié le pain, pour la nourriture des Peuples qui l'escoutoient, & presché iusques à raurir ses Auditeurs, manquer de tout le necessaire à la vie? N'estoit-il pas contraint d'aller de Hierusalem en Bethanie, pour y treuuer quelque rafraichissement chez son hostesse ordinaire, ou si la faim le pressoit, de courir les champs avecque ses Disciples, pour y chercher dans les espics tous verds, l'aumosne qu'on luy refusoit dans les villes. Les Communautéz entieres n'ont-elles pas deputé vers luy afin de le repousser de leurs demeures, comme s'il eust deu infecter l'air de sa presence, ou troubler le repos public par ses pratiques? Bien dauantage, l'ingratitude est venuë iusques à ce point d'auement, que d'entreprendre de precipiter d'une roche, celui qui les tiroit tous les iours des abysses du peché. Et pour adiouster le

mespris à la cruauté, ne luy a t'on pas dit apres auoir chassé les demons , qu'il estoit d'intelligence avec Beelzebub , & qu'il commandoit aux petits diables, en vertu de l'obeissance qu'il rendoit à leur maistre? Apres cette outrageuse mesconnoissance, il ne se faut pas estonner , qu'on luy reproche d'estre sorty d'une ville, d'où rien de bon ne pouuoit venir. Ce n'est que ciuilité de l'appeller ignorant, & insensé, de luy dire qu'il a vn menuisier pour pere, & des publicains pour amis. Quoy que sa temperance fut aussi visible que son visage , & que ses ieunes parussent sur tout son corps , il falloit avecque le refus de ses moindres necessitez , le traiter de gourmand , & d'yurongne. Si par fois le zele le porte dans la maison des pecheurs, la calomnie dit , qu'il en accroist le nombre, & qu'il aime l'entretien, & la table des prodigues. Mais pour n'affliger personne du recit de ses miseres , qu'une bonne ame ne peut connoistre sans ressentiment, n'est-il pas vray, que toute la vie de ce Dieu glorieux est la vie d'un homme souffrant? S. Pierre, saint Iacques, & saint Iean qui ne l'ont iamais quitté, ne luy ont pas tenu plus fidele compagnie que la Pauvreté, le Mespris, & la Douleur. Iettez la veuë depuis son berceau iusques à sa mort , & vous auouërez, que iamais ces trois compagnes ne l'ont abandonné. La Pauvreté luy a même osté des secours, dont les bestes sauvages n'ont iamais eu besoin. Bien que sa patience soit infinie , il se plaint toutesfois de cette misere, quand il dit : que les Renards ont des tanières , & les oyseaux des nids , & que le fils de l'Homme n'a pas même vn caillou , pour soustenir sa teste. Le mespris , & la douleur ne luy ont pas esté moins fideles : depuis sa premiere entrée dans le monde, iusques à son depart , rien ne s'est présenté de si secret où ces

où ces confidentes de son cœur, n'ayent eu l'assurance de s'ingérer. Ce moment de bonheur, qui sembla separer le Thabor de toutes ses souffrances, ne fut, à bien prendre les choses, qu'un loisir qu'il pratiqua pour s'en entretenir avecque Moysé, & Helie, & gouter l'amertume de sa passion parmy les doux transports de sa gloire. Mais quoy que le Sauveur du monde ait esté sujet à la pauvrete, au mespris, & à la douleur, depuis sa naissance iusqu'à l'extremite de sa vie, de sorte que son enfance ne soit pas exempte de travail, comme luy mesme l'assure, il faut neantmoins consentir, que iamais il n'a si bien esté l'homme du mespris, de la pauvrete, & des douleurs, que pendant les derniers iours de son Martyre. Le Jardin de Gethsemani a veu ses sueurs de sang, & son agonie de trois heures : ce fut là, où toutes les angoisses de sa Croix se representerent à luy avecque des circonstances si funestes, & si effroyables, qu'il se laissa aller à la crainte de ses maux, & abysser son ame glorieuse aux eaux noires, & ameres de la tristesse. Ne doit-on pas iuger que l'orage fut violent, puisqu'une patience diuine parut en ce rencontre, plier sous ses attaques, & qu'en ce delaisement, elle eut besoin de l'appuy, & des consolations d'une creature ? A peine ce Dieu sortit de ses agonies qu'une troupe de Satellites se presenta pour luy ietter la corde au col, comme s'il eust esté voleur ou parricide. Cette insolence criminelle ne fust chastiee que d'une cheute, qui pouuoit faire comprendre à ses persecuteurs, que leur triomphe venoit de sa permission, & non pas de sa foiblesse. Et pour faire esclatter sa douceur, au plus fort de leur rage, il ne parle seuerement qu'à celuy de ses disciples, qui se mettoit en deffense, rendant l'oreille à cet impie, qui auoit esté le premier sacri-

lege. Il embrasse son traistre, il le baise, & l'honore du glorieux non d'amy, sans que l'ingratitude d'une ame si brutale le püst porter à des paroles plus aigres. De ce iardin, on le traîne parmy les ruës de Ierusalem, où ceux mesme, qu'il auoit gueris employent leurs langues, pour le brauer avec insolence. Représentés-vous l'invincible Samson à qui l'amour auoit donné des chaînes, chez les Philistins, & vous aurez vne legere image des moqueries qui accueillirent le Sauueur dans la maison d'Anne, & de Caïphe. Suivons-le dans ces promenades ignominieuses de Pilate à Herode. Chez l'un, on le traite à coups de soufflets, comme s'il estoit vn faquin de la lie du peuple: chés l'autre, on en fait vn Roy de theatre. Pour augmenter ses douleurs, par son mespris, on le couure d'un haillon de pourpre, & pour marquer sa dignité, on luy met en main vne cane. Petits impatients, qui osez demander à Dieu où sont ces foudres, quand on vous fait quelque iniure, aurez-vous désormais vne langue, pour accuser les outrages qu'on vous fait, ayant en veüe les opprobres, & les maux de celuy qui vous a faits? He! que vous estes impuissants, si le silence de Iesus, qui est la parole de Dieu, ne vous apprend à vous taire. Allez, allez au palais de Pilate, & contemplés vostre Maistre attaché à vne colonne, contez, si vous avez assez de courage, les six mille coups de fouet, de nerfs de bœufs, & de scorpions, qui l'ont fait mesconnoistre aux Prophetes. Isaye doute s'il est homme: n'en ayant plus la figure, depuis la plante des pieds iusques au sommet de sa teste, il ne voit pas vn trait, qui ne soit desfiguré de coups ou couuert de crachats. Et certes la rage auoit tellement changé le Messie, qu'il falloit asseurer le peuple en le montrant du Pretoire, que c'estoit vn
homme

homme. Il n'est pas encore temps de iuger de son courage , montons au Caluaire , c'est là où la plus cruelle iniustice triomphé de la plus parfaite innocence qui fut, ny qui puisse estre. Mais, hélas ! combien de fois le doux Sauueur tombe-t'il sous la pesanteur de sa Croix ? Il faut pourtant qu'il la traîne du mieux qu'il pourra iusques au faiste de la montagne , d'où la Nature estonnée, doit contempler son Createur dans les conuulsions de la mort. O Dieu ! que ne suis-je contrainte de voir l'adorable Iesus, dût l'innocente bouche ne prononce pas vne seule parole qui tesmoigne de l'impatience en ses maux, ou de la cruauté en ses ennemis. Ainsi qu'un agneau qui ne sçait pas beſler , il s'estend de luy mesme sur sa Croix, presente ses pieds, & ses mains à celuy qui les clouë, & par vne obeissance qui a mesme du respect pour ses bourreaux , il souffre, parce qu'ils veulent qu'on le dresse entre deux voleurs. On luy donne la place d'honneur , parce qu'on le iuge plus coupable que des brigands : comme on l'auoit preferé à Barrabas, dans l'estime des crimes. Et bien Celestin , n'est-ce pas sur cette montagne , où la Maieſté de Dieu est cachée ? n'est-ce pas là où les splendeurs du Pere eternal se couurent de tenebres, & où la vertu d'un Tout-puissant paroist esteinte ? toute sçauante que ie suis j'auouë mon ignorance, ie ne voy pas les lumieres de cét eclipse, les abyſmes de cét abaiſſement sont au dessus de mes pensées , le secret de ces mysteres m'est caché. Il faut que ie me taise : aussi bien n'ay-je pas le cœur de te parler plus long-temps d'une si lamentable histoire. Veux-tu t'appuyer dans tes foibleſſes ? embrasse la Croix, veux tu apprendre les souffrances d'un Dieu ? iette-toy à ses pieds , & tu y treuueras sa Mere , qui toute consumée de ses douleurs , t'en de-

clarera les excez, par le flux continuel de ses larmes.

III. P O E S I E.

*Telle qu'on vid iadis aux portes de Sicile
La femme d'un grand Roy desplorer son malheur,
Et rendre injustement la raison inutile,
A sa iuste douleur;*

*Telle vid-on aussi languissant sous un arbre,
Cette Mere qui fut le miracle des Cieux,
Quand la mort du Sauveur fit de son corps un marbre,
Et la mer de ses yeux.*

*Tous ceux qui luy parloient d'appaier son martyre,
Luy parloient d'augmenter l'excez de sa langueur,
Estimant que son cœur devoit estre l'Empire
Où regnoit la rigueur.*

*Parlez-luy de gemir, vous flattez son oreille,
Consolez ses soupirs, vous cherchez son trespas,
(car qui veut l'affliger, il faut qu'il luy conseille
De ne s'affliger pas.*

*Celuy qui est piqué du desir de luy plaire,
Qu'il die que son mal n'est pleuré qu'à demy,
Quiconque auancera qu'il est temps de se taire,
Sera son ennemy.*

*Mon cher Fils [s'escrioit cette innocente Dame,]
Celuy qui blasmera l'excez de mes douleurs,
Doit ignorer au vray les tourmens de mon ame,
Pour condamner mes pleurs.*

Si l'on

*Si l'on passe des yeux dans ma foible poitrine,
On y verra l'amour mon immortel vainqueur,
Qui porte dans sa main une cruelle espine,
Dont il perce mon cœur.*

*Les clouds de mon cher Fils, & le fiel de sa bouche,
La douleur de son cœur, & son cruel tourment
Ne touche pas I E S V S, qui aussi-tost il me touche,
D'un mesme sentiment.*

*Plorez, pleurez, mes yeux, n'espargnez point vos
l'armes,
Si chacun de ses maux me devoit affliger,
Il faudroit auoir la foiblesse des armes,
Qui me doiuent vanger.*

*Vos pleurs estans finis, & sa peine infinie,
Quand vos larmes iroient au dela du trespas,
Sa peine neantmoins seroit tres-mal punie,
Ou ne le seroit pas.*

*Las ! où sont les beautez de ce divin visage ?
Où sont les doux esclairs de ces aymables yeux ?
Je ne voy plus ce front, qui meritoit l'hommage
De la Terre, & des Cieux.*

*Ce visage n'est plus, sa lumiere est esteinte,
Ces deux Soleils n'ont plus leur absolu pouuoir,
L'ynoir de ce front, sur qui la mort est peinte
Fait horreur à le voir.*

*Ces membres qui formoient autant de beaux miracles,
Ne sont que le rebut d'une funeste Croix,
La bouche qui s'ouuroit seulement aux Oracles
Na plus mesme de voix.*

Sa langue

Sa langue tasche bien de plaindre l'amertume,
 Qui ronge tout son corps, & consume ses sens,
 Mais les grandes douleurs ignorent la coustume
 De former des accens.

Ce n'est plus une mort, ce n'est plus un martyre,
 Ce n'est plus une Croix, ce n'est plus un tourment
 De pouvoir endurer, & de ne pouvoir dire,
 Il souffre injustement.

Il est vray mon cher Fils, il est vray mes delices,
 Ta bouche ne peut pas seulement soupirer,
 Toutefois si ton sang parle de tes supplices,
 Qui les peut ignorer ?

Les playes de ton corps seruent d'autant de langues,
 Qui forment le discours de ton rigoureux sort,
 Et tes moindres sanglots sont autant de harangues,
 Qui parlent de ta mort.

Et quand bien ta bonté te rendroit insensible,
 Le Ciel prendra le soin de declarer tes maux,
 Chacun de tes tourmens sera rendu visible,
 Mesmes aux animaux.

La terre en a tremblé, les elemens fremissent,
 L'œil du iour s'obscurcit, & se voile le front,
 Tout le Ciel se fait noir, & les Astres pallissent:
 De voir un tel affront.

Mais hélas! mon cher Fils, tes mourantes prunelles,
 Disent que tes douleurs ne doivent point guerir,
 Quoy donc, mon cher amour, des beautés immortelles,
 Peuvent-elles mourir ?

Ab ! Iesvs ne vit plus, son corps est tout de glace,
 Ses

Ses beaux yeux sont esteints, il n'a plus de vigueur,
On ne remarque plus sur sa divine face
Qu'une pisle langueur.

Mon I E S V S ne vit plus, la douleur me l'emporte,
Mon pauvre cœur est mort, il est sans mouvement,
Mais si mon cœur est mort, comme ne suis-je morte
De ce cruel tourment ?

Mon desplorabile fils, tu veux laisser ta Mere,
Afin de soupirer les maux de cette mort,
I'offre donc volontiers à ta douleur amere,
Ce foible reconfort.

Si ie pouuois changer mes deux yeux en fontaines,
Dont le cours eternal ne deust iamaïs finir,
Ie ferois sans delay de l'objet de tes peines,
Mon triste souuenir.

Tantost ie plorerois le tourment de ta teste.
Ie baiserois les trous que t'a fait ce buisson ?
Et puis ie gousterois le fiel que l'on t'appreste
Dans ton aigre boisson.

Mais sur tout, mon cher Fils, sujet de ma détresse,
I'entrerois dans ton cœur, vray throsne de l'amour,
Et ferois de ton sein, à ma iuste tristesse
Vn eternal sejour.

Ce seroit dans ce cœur, que ie prendrois des charmes
Pour adoucir mes maux, & changer mon malheur :
Ce seroit dans ce cœur, que ie prendrois des armes,
Pour vaincre ma douleur.

Mais aussi n'est-ce point offencer ta Iustice
De chercher des douceurs en ton affliction ?

Rien

*Rien ne doit agreer que ton cruel supplice,
A mon affection.*

*Ie renonce aux faueurs d'une douce fortune;
Mon unique repos, mon seul contentement.
Sera, si de jormais ta douleur m'importune,
Sans nul allegement.*

*Si quelque bon conseil veut soulager ma peine
L'oppose mon deusir à toute sa raison,
Car ie croy qu'une main ne sçauroit estre humaine,
Cherchant ma guerison.*

*La perte que ie fais estant toute infinie,
Dois-je finir mes pleurs par quelque reconfort ?
L'assure qui voudra la Nature le nie,
Si ce n'est dans la mort.*

*Tandis que ie viuray, ie veux viure de larmes,
Les larmes seulement me peuuent bien nourrir,
Et si ie dois finir, mes pleurs seront les armes,
Qui me feront mourir.*

*Ce sont les derniers mots, qui finirent la plainte
De celle que l'amour estendit sur la Croix ;
Et de qui la douleur est encore dépeinte
Dans sa mourrante voix.*

IV. P R O S E.

LE doux charme de ces vers m'ayant inspiré ie ne
sçay quelle ferueur, ie m'escriay comme tout
hors de moy mesme. Glorieuse Reine des Sciences.
voilà vn discours capable de fléchir la plus inhu-
maine

maine cruauté : ne cherchez plus d'autre remede contre mes maux : le seul exemple du Redempteur est plus fort que toute ma fortune. Th. Tu aurois mauuaise grace de te plaindre d'une affliction vulgaire, & d'une douleur mediocre apres auoir contemplé les miseres, & les agonies d'un Dieu mourant dans des cruautéz miraculeuses. Rien ne merite plus vos larmes, & vos regrets que le malheur de ces ames insensées, qui ont tout leur sentiment pour elles-mesmes : & qui manquent de compassion, pour les souffrances de leur aimable Maistre. Je ne tiens pas Celestin du nombre de ces impitoyables, ie me persuade mesme qu'il a de la complaisance de se voir le compagnon d'un Dieu. Esleue ton esprit à ce qui me reste. Tout le monde est capable de comprendre ce sensible de la passion, qui se laisse remarquer aux yeux, mais il en est peu qui ne demeurent à l'escorce. Et toutesfois Iesus souffre vn martyre secret, & des douleurs spirituelles, dont l'excez a aussi peu de proportion avecque les peines du sens, que l'esprit en a avec la chair. Toute cette cruauté qui rauage le corps du Sauueur, n'est à proprement nommer les choses, que le materiel de sa passion : la forme, & ce qui est de plus delicat, s'attache à l'ame, & y produit des gestes, dont les espraintes sont d'autant plus violentes, que moins elles sont connues. C'est ce martyre du cœur que ie tasche de représenter, c'est dans l'intérieur de ces souffrances que ie desire mener ta pensée. Il y a beaucoup plus de gloire de souffrir avec l'innocence d'une bonne vie qu'avec les excez d'une conscience reprochable. Il faut neantmoins auouer, que pour l'ordinaire vn criminel a sujet d'endurer ses peines avecque plus de paix, & moins de murmure qu'un innocent. D'autant que le premier sçait qu'on punit

punit le peché, qu'il confesse meriter des supplices, & le second void qu'on persecute la vertu, qu'il iuge digne de recompense. Le premier reconnoist que la rigueur de son Iuge s'attache à son vice, & le second sent que la haine de son Tyran en veut à sa personne. Que si vn coupable soulage ses peines de ces considerations, & qu'un homme de bien en augmente les siennes, quelle agonie deuoit presser le cœur de Iesus, de sçauoir que les Iuifs offensoient en luy vne vertu aussi peu coupable de châtiment, qu'elle estoit souillée de peché ? Pareillement il ne pouuoit ignorer qu'il possedoit vne innocence infinie, & en suite, il voyoit, & sentoit l'outrage de l'injustice infinie qu'on luy faisoit. Il auoit tousiours, l'excellence & le merite de sa personne en veüe, & l'extrême bassesse de ses ennemis. Et comme le ressentiment de l'offence se mesure à la grandeur de celuy qui reçoit l'iniure, & à l'indignité de celuy qui la fait, on ne peut douter que le Sauueur ne conceust vne auersion infinie de ces petits Salmonées, qui du profond du neant, s'esleuoient à l'outrage de sa diuinité. La pensée des biens-faits dont il fauorisoit ce peuple, les tendresses qu'il luy tesmoignoît, & les recherches dont il l'auoit preuenü, les desdains, & les fuites mettoient vne circonstance dans leur ingratitude qui la faisoit passer au de là de l'excez de tous les crimes. Que si la compassion d'autrui vous aide à porter vos disgraces, & que la dureté de celuy qui les void les augmente, quel regret de voir affliger le cœur de nostre aimable Sauueur, de sçauoir que son Martyre estoit la ioye publique de la Iudée ? Personne n'auoit pitié de ses douleurs, sur cette persuasion qu'il les meritoit, puis qu'il ne les pouuoit esuiter. Tous les miracles qu'on auoit veus, ne passoient alors que pour des illusions

illusions, ou des prestiges, qui auoient trompé la populace, & cette grande sainteté, que les plus mauuaises langues auoient respectée, n'estoit plus qu'une fine hypocrisie de la malice. Ce sentiment ne persuada pas seulement le peuple, peu s'en fallut qu'il ne luy rauist mesme ses Disciples. A peine virent-ils leur bon Maistre au pouuoir de ses enuieux, qu'ils chancelerent dans l'opinion de son merite. Celuy qui promettoit vne fidelité, que les tourmens, & la mort deuoient accroistre, se rend à la parole d'une seruante, & pour rejeter le soupçon de son amitié, il proteste n'auoir pas sa connoissance. Quelle agonie à ce pauvre innocent, de voir que celuy qui depuis peu auoit esté le spectateur de sa gloire, se refusoit pour amy à vn Homme qu'il auoit reconnu pour son Dieu? Je ne doute point que cette solitude, & ce délaissement general, dans lequel l'aimable Iesus souffrit, ne luy appesantist sa Croix, & son Martyre. Sa pauvre Mere ne l'abandonna pas, il est vray, mais sa présence augmentoit ses peines, au lieu de les diminuer. Elle estoit proche de la Croix, elle receuoit en son ame tous les tourmens, qui deschiroient le corps de son Fils, mais hélas! ce n'estoit que pour les resleschir, comme vn crystal bien poly sur celuy mesme qui en estoit le premier sujet. Et ainsi, comme les rayons de lumiere se redoublent dans leur principe, lors qu'un corps solide les renuoye à leur source, le Sauueur du monde souffroit vne seconde Passion, que la pitié de la Vierge causoit dans son cœur, par les innocentes mains de l'amour. Iesus souffroit donc purement, sans appuy ny secours de personne? aussi se plaignoit-il de son abandon, representant à son Pere avecque des paroles pleines de langueur, qu'il s'en estoit rendu complice. Mon Dieu, mon Dieu, pourquoy m'avez-

vous delaisfé ? Il l'auoit abandonné à Iudas , qui le vendoit à ses Apostres , qui le fuioient , à ses bourreaux qui le deschiroient , & à sa propre tristesse , qui le consumoit. Il l'auoit abandonné , mais de telle sorte , que Iesus estoit diuisé contre Iesus , vne de ses parties produisant des douleurs , que l'autre estoit contrainte de souffrir. Certainement cette reflection donne quelque idée des angoissés du Sauueur , mais si l'on veut considerer ce que sans doute il regardoit , il faudra confesser qu'il n'est point de douleur pareille à la sienne. C'estoit peu d'auoir tous les Iuifs pour persecuteurs : Iesus estoit le Martyr de tous les hommes. Personne n'est innocent de sa mort , le plus grand Sainct a espanché tout son sang : quel nombre de Tyrans ! quelle multitude de bourreaux ! Ne crois pas que ce soit icy vne de ces hyperboles , qui par l'excez de leurs paroles , portent les plus solides veritez iusques au soupçon du mensonge. Je connois aussi peu cét artifice , que ie le veux pratiquer. C'est vn article de Foy que le Messie est mort pour tout le monde , il n'y a pas eu vn seul homme , qui n'ait esté pecheur , il n'y en a donc pas vn seul qui ne soit persecuteur. Or cette pensée de vos crimes ne pouuoit produire vne douleur mediocre en son ame , puis qu'il connoissoit parfaitement l'obligation qu'il auoit comme pleige , non seulement de souffrir les tourmens exterieurs de sa mort , mais bien dauantage d'exciter vne douleur interieure de vos offenses. Et partant cette satisfaction deuant prendre ses degrez , & son intention de la parfaite connoissance , qu'il auoit de la Majesté offensée , & du dommage des coupables , il ne faut pas douter qu'elle ne fust exessive , d'autant que ce regret suiuoit l'apprehension d'un mal infiny , & à cause de la coulpe , qui attaque
Dieu,

Dieu, & à raison de la peine qui oblige l'homme à vne eternité de supplices. Adioustez à cela l'inutilité de tant de douleurs: Ce bon Sauueur voyoit bien le nombre de ses esleuz, mais comme il estoit extrêmement petit à l'esgard de celuy des reprouuez, la tristesse d'une si precieuse perte, que celle de son sang, & de ses peines, ne permettoit pas à la ioye de le consoler de ce peu de fruit. Cette consideration estoit puissante dans vn esprit qui penetrait, que cette passion qui pouuoit meriter l'union hypostatique à tous les hommes possibles, ne sauuoit pas mesme la moitié de ceux qui deuoient estre. Et ainsi, qu'un sang qui vous pouuoit faire des Dieux, ne vous faisoit pas mesme des biens heureux. De moy, ie ne doute point que cette douleur n'eust mille fois osté la vie à ce doux Aigneau: si par vn miracle extraordinaire, il ne l'eust conseruée dans vne gescne si cruelle. Et certes la ioye estant capable de faire mourir, à cause de cet espanouissement de cœur, qui dissipe la vie avecque les esprits qui la conseruent, il y a bien de l'apparence, que la tristesse rappelant tout le sang au cœur, y produit par la suppression du mouvement naturel, des nuages qui l'estouffent en le chargeant. Le meurtre d'un Fils a souuent osté la vie à vne mere desolée: & comment la damnation d'une infinité d'ames, n'eust-elle point touché celuy qui mouroit pour les sauuer? ô que c'estoit vn sensible desplaisir à cet amoureux Pelican de respandre son sang inutilement sur la terre, & de voir que l'Incarnation, & les souffrances d'un Dieu, n'emportoient pas sur les hommes, ce qu'une chetive volupté faisoit tous les iours. Voilà ce qui causoit le martyre interieur de Iesus: mais ne pensez-pas que cette passion cachée n'ait duré que deux iours comme celle qui deschira son

corps. Dès le premier point de sa conception , iusques au dernier soupir de sa vie , cette cruelle douleur affligea son ame , parce qu'elle eut continuellement vne viue apprehension de tous les pechez, non seulement en general , mais encore en particulier, connoissant distinctement , combien chacun d'eux offensoit la bonté de son Pere, & meritoit des supplices de sa iustice. Cette verité prend son appuy de l'obligation volontaire, qu'il s'estoit imposée dès lors, de satisfaire pour les hommes , en qui (selon le sentiment de plusieurs') le desplaisir de l'iniure doit immédiatement suivre la naissancé du crime. Mais ce n'est pas assez pour concevoir l'excez de ce martyr secret, de s'imaginer , que cet innocent, mesme dans les flancs de sa mere, eust tousiours sa Croix , & les travaux de toute sa vie dans la pensée. Non ce n'est pas assez, il faut employer d'autres reflections, pour esleuer nostre foy à cette sublime connoissance. Tu sçais que le moindre des pechés mortels merite^{des} des peines infinies , sinon en l'intension de leurs degrez, dont ie ne veux rien determiner, au moins en l'estenduë de leur durée, ce que personne ne doit mettre en doute. Chacun des pecheurs estant donc obligé à vne souffrance eternelle , & s'il y auoit plus d'une eternité, à plusieurs, à raison de plusieurs pechez, ie maintiens que Iesus-Christ pour tirer vn acquit tout entier de vos debtes , a souffert toutes les peines eternelles, que Dieu pouuoit exiger des hommes non pas en estenduë de temps , ce qui offenceroit la dignité de sa personne, mais en intension de douleurs, ce qui pouuoit satisfaire à Dieu en rigueur de iustice. De sorte que toutes ces peines , qui deuoient auoir leur estenduë dans l'eternité de Dieu , furent recueillies , & repliées aux trente-trois ans de la vie du Sauueur

Sauueur. Et peut-estre qu'en ce sens, il'est pardonna-
 bie de dire , qu'il a enduré les supplices de ces coul-
 pables eternels , non pas en souffrant les flammes de
 l'enfer, ny perdant la vision beatifique (comme l'im-
 pieté blasphème) mais en produisant dans son ame
 vn tourment qui esgaloit toutes ces cruautez, dont la
 douleur blesse tousiours , & ne ruine iamais. Et ne
 seruiroit rien à dire que ces excessiues peines, n'estans
 pas necessaires, seroiēt superflus, & que ce seroit vne
 profusion en Iesus-Christ , de donner plus qu'on ne
 luy demandoit, ou vne iniustice à son Pere, d'exiger
 par dessus ce qui le pouuoit satisfaire. Je n'ignore pas
 que la plus petite action de cet Homme-Dieu, com-
 me vn soupir de sa bouche , vn mouuement de son
 cœur, vn clin de ses yeux, ou quelque chose de moins,
 a vn merite qui vaut le salut d'un million de mondes
 & qu'il a seulement voulu souffrir tant de trauaux,
 pour vous faire vne redemption abondante , & co-
 pieuse, & pour vous laisser vn illustre tesmoignage de
 son amour. Que si ce discours est vray , comme il
 n'en faut pas douter , ie pense auoir sujet raisonnable
 d'auancer que le Sauueur a souffert en intensiō de
 douleur, tout ce qui estoit deu de supplices, pendant
 l'eternité de Dieu , à tous les hommes. O estrange
 poids de tourmens de Iesus ! ô profond abyssine des
 amertumes de sa vie ! vrayement ie ne m'estonne pas
 de voir cette innocente victime tomber sous le fais
 de sa pesante charge , ie ne m'estonne pas de la voir
 suer le sang, & l'eau lors que son ame permet à cette
 passion secrette de respendre sa violence sur son
 corps. Non, non , ie ne m'en estonne pas, puis qu'il y
 auoit dequoy le faire mourir à chascue moment , si
 on pouuoit n'eust fait autant deffort, pour retenir sa
 vie, que la douleur en faisoit, pour la perdre. Helas!

que les hommes ont peu d'amour pour vn Dieu qui a tant souffert d'angoissés, pour leur salut, & qu'ils ont peu d'horreur d'un peché, qui en est la funeste cause ! Oüy, mortels, cette volupté qui vous flatte vn moment, coute à Iesus, des peines non seulement infinies en leur merite, mais encore en l'impression de leur douleur. Cette ioye passagere qui chatoüille vn peu, produit dans vn cœur diuin, vne mer d'amertumes qui n'a ny fond ny riué. Il ne faut pas oublier dans cette consideration le conflict, & la lutte, qui se fist en son ame lors qu'il accepta la caution de tous les pechez des hommes, & qu'il s'obligea de les en tenir quittes aupres de son Pere. Quelle horreur, & quelle auersion n'eut pas cét innocent, à la veüe de cette effroyable multitude de crimes, dont il pénétoit aussi distinctement la malice, qu'il en receuoit veritablement l'obligation ? Et quoy qu'il consentist avecque liberté, & amour à ce charitable office, il ne laissoit pas de le receuoir avecque de sensibles gesnes d'esprit, à raison de l'impossibilité d'une innocence infinie, & d'une debte qui supposoit de l'offence. L'horreur qu'un corps extrêmement net, & en qui la bonne grace, & la beauté posséderoient tout leur lustre, auroit de se vestir d'une robe souillée de crachats, & de phlegmes, ne seroit qu'une legere image de celle qu'eut le veritable Iacob de se parer de la peau d'une beste morte. L'auouë que cette conioction ne pouuoit sallir vne sainteté infinie, & que Iesus estoit Dieu, mesme sous l'apparence du peché. Vne honneste femme retient tousiours sa vertu sous les ornemens d'une publique, mais ce n'est pas sans frayeur qu'elle s'en voit parée. Le masque ne change pas le visage d'un enfant, il le cache seulement, la robe d'esclau ne le despoüille point des droits de l'héritage,

itige, si est-ce neantmoins qu'il souffre avec peine
cette laideur empruntée, & qu'il ne peut, mesme par
leu soustenir vn deguisement reprochable. Et qui
peut conceuoir vne figure de monstre plus horrible,
que celle du pecheur? ce fut neantmoins celle, que
le diuin Iesus s'obligea de porter en la presence de
son Pere. Pour cette raison, il dit chez vn de ses Pro-
phetes, qu'il a porté nos langueurs, & que Dieu l'a
chargé de toutes nos fautes. Et autre part, il appelle
nos offences, ses crimes, & son iniquité, non seule-
ment, parce qu'il en a volontairement acquitté la
debte, mais bien dauantage, parce qu'il en a porté la
confusion. Cette ignominie n'est conceuable qu'aux
esprits, qui comprennent la haine, que Dieu porte
au peché, & la distance, qu'il y a d'une sainteté par
essence à vne malice infinie. Distance qui met des in-
teruallles si spacieux entre Dieu, & la Creature, qu'elle
la recule infiniment au delà du rien, qui pourtant
ne s'approche de Dieu, que d'un espace qui n'a point
de termes. Certainement Dieu, & l'homme sont deux
extrémités difficiles à conjoindre, toutefois i'ose as-
seurer que cette alliance est beaucoup plus aisée, à
celuy qui l'a faite, que celle de l'innocence, & du
crime. Le Verbe a pris dans l'Incarnation la figure
d'esclau, dans la Circoncision la marque du pecheur,
& dans la Passion il a souffert le supplice des coul-
pables. Si l'on pese avec attention ces abaissemens,
il sera facile de iuger que l'apparence de pecheur a
quelque chose de plus dur, que les tourmens des
parricides, ou la figure d'esclau; & pour ne rien dire
sans appuy, n'est-il pas vray qu'une personne libre se
peut feindre de condition seruite, & qu'un innocent
porte quelquefois la peine des criminels? Car outte
que ces humiliations laissent tousiours à la prudence

de iuger avec estime de ces déguisemens, elles ne hazardent que la perte d'une chose indifferente. Mais le caractere, & la flettrisseure du peché, donne fondement à croire, que celuy qui la porte en a la malice, & qu'il est probable que celuy qui est souillé de noirceur, est brulé de la flamme. Sur cét appuy, ie pourrois soustenir vne pensce, qui m'a persuadé, que Dieu s'abaissoit davantage de s'unir à nostre nature, que s'il auoit fait cette alliance avecque le dernier des estres sensibles. Je ne dis pas cecy pour offenser la dignité de l'homme; ny pour le faire descheoir de l'empire de toutes les creatures. L'estime que tu n'es pas assez amoureux de ta condition, pour me contredire apres m'auoir ouye, & ie m'assure quand mesme tu ne pourrois deferer par ciuilité à ce sentiment, que tu le prendrois sur la force de mon raisonnement. Tu m'aduouëras bien que dans cét admirable composé de la nature diuine, & de l'humaine, l'homme n'adjouste rien à Dieu, & que le Verbe n'est pas moins parfait tout seul, que pris dans ce commerce, qui le fait ton semblable. Or il est aussi veritable, que l'union avec vn estre viuant ou insensible n'osteroit rien au Verbe, qu'il est assuré que vostre nature ne l'accroist d'aucune excellence. C'est donc vne chose desia toute certaine, que Dieu n'abaisse pas moins la grandeur de sa Majesté dans l'union hypostatique avecque la Nature humaine, qu'il l'abaisseroit dans la societé d'une nature inferieure. D'où tu peux apprendre que les creatures, qui ont de grandes distances comparées entr'elles, sont toutes esgales dans le rapport qu'on en fait avec leur principe. Je suppose maintenant, pour la preuue de ma proposition, que Dieu fasse ce qu'il peut, & qu'effectiuement il s'unisse à vn arbre, à vne Aigle, ou à tout autre des animaux

animaux qu'il vous plaira. Et pour arrester dauantage nostre pensée, ie veux que le Verbe esleue vn moucheron à la haute dignité de sa subsistence, ie maintiens que dans cet estat il a moins d'humiliation que dans la société de l'homme. Voicy ma raison. Quelque bassesse que nous imaginions dans cet insecte, il est incapable de peché, & partant il est exempt du plus grand deshonneur de la creature. Ces petits meurtres qu'il tasche de faire, quand il vous picque, sont des efforts aussi innocens que foibles. Quoy qu'il prenne le bien-d'autrui, lors qu'il succe vostre sang, il ne commet aucune iniustice, parce qu'il pouruoit à vne nécessité contre qui la nature luy donne des armes, & de l'industrie. Au contraire, pour excellent que soit l'homme, de soy il a son inclination au vice, & est sujet par son propre poids, à de honteuses, & coupables foiblesses. Pour cette raison, ie conclus, que la Majesté de Dieu ne se raueroit pas tant dans le petit corps d'un moucheron que dans celui de l'homme, puisque cette premiere alliance ne l'exposeroit pas au soupçon du peché, où la seconde luy en laisse au moins l'apparence. Je ne dis pas, que l'union de la nature diuine, & de la vostre conjoigne le crime avec l'innocence, ie n'ay garde d'auancer ce blasphème : puis qu'il est impossible que le peché subsiste auprès d'une Sainteté infinie. L'accorde mesme que si le Verbe eust voulu prendre vne nature fallie du peché, aussi-tôt qu'il l'eust touchée, il l'eust sanctifiée dissipant ces ombres, beaucoup plus puissamment qu'un Soleil infiny n'escarteroit les tenebres qui s'opposeroient à sa lumiere. Mais remarque que ce grand auantage de sainteté ne luy viendroit que de la perfection du Verbe, & que hors de cette alliance cette nature élevée seroit sujete à ses

cheutes , & pourroit retomber à ses propres défauts. Vne paysane honorée de la dignité de Reyne , ne sçauoit sentir les miseres de sa premiere condition, pendant que le Prince continuëra le bon-heur de ce mariage. A mesme qu'il l'espouse , il la couronne, mais s'il vient à s'ennuyer de sa compagnie , il ne la quittera pas plustost qu'elle sera villageoise , & deuiendra comme auparauant sujette aux incommoditez de sa naissance. Je ne doute pas que cette adorable humanité, que Dieu a esleuëe à l'estre diuin, ne peut pecher , mais cette heureuse impuissance luy vient précisément , & premierement de la perfection du Verbe, & non pas des propres conditions de sa nature. Et ainsi si elle ne pouuoit tomber , ce n'est pas que de soy elle n'eust de la foiblesse , mais c'est que par grace, elle estoit puissamment appuyée. D'où ie conclus que vostre nature estant de soy defectueuse, elle a mis dans Iesus-Christ le reproche du peché, parce que tous ceux qui le sçauoient Homme , pouuoient ignorer qu'il fût Dieu. Il falloit vne Foy surnaturelle, pour vous descouurir le secret de cette alliance, & c'estoit assez de le voir sujet aux autres infirmités de vostre nature, pour soupçonner qu'il n'estoit pas exempt de celle qui vous rauale au dessous de toutes les creatures. Or l'vnion avec vne plante ou vn insecte , ne pouuoit donner cet ombrage : puisque tous les Estres qui sont depourueus de raison, sont à couuert du crime , & de son reproche. Voilà le plus bas degré de cet abaissement prodigieux , où l'amour a fait descēdre nôtre grand Dieu. M'étant arresté si particulièrement aux humiliations de l'Homme Dieu , tu ne dois pas treuuer mauuais que ie te marque encore le rencontre de deux grandes extrémités, en la mesme personne, sçauoir de la seruitude

& de la

& de la royauté. On ne peut douter que le Messie ne fut Monarque de l'Vniuers, & par droit de naissance estant Fils naturel de Dieu, par tiltre de donation, & de conquête, son Pere luy ayant donné ce qu'il s'acquit par apres aux prix de son sang, & de sa vie. Si faut-il auouer, que ce Souuerain étoit seruiteur, & par nécessité, & par choix; par nécessité, d'autant que la qualité de seruiteur consistant en la dépendance, & l'inegalité de deux personnes, elle regarde aussi bien la nature, que le suppost. Et partant quelque société de biens, & de grandeurs qu'il y ait entre les deux Natures du Sauueur, à cause de leur vnion hypostatique, cette alliance ne pouuant communiquer à l'humaine, l'essentielle grandeur de la diuine, elle ne luy oste pas sa dépendance, & en suite elle luy laisse tousjours sa sujétion. Mais pour ne rien dissimuler, cette seruitude est honorable, à raison de la majesté du maistre; & si Iesus n'auoit esté sujet par choix, il y auroit plus dans sa sujétion dequoy rehausser sa gloire, que pour exagerer son humilité: il a donc esté sujet à Dieu luy rendant vne obeyssance qui est allé iusques à mourir en Croix, & à la Vierge, s'employant aux moindres seruices de sa maison: il a esté sujet à la loy, au moins quant à sa pratique, obseruant avec estude ce qui estoit de sa conduite. En quoy certes il ne se peut faire que sa dignité n'ait souffert: car en fin les loix ne sont pas plus honorables, que les bandes qui serrent vne playe, ou les cordes qui arrestét vn phrenetique. Que si tu ne peux souffrir la durezza de ces comparaisons, il faut pour le moins reconnoistre, que les loix sont des appuys de la foiblesse humaine, & des remedes, ou des prescriptifs de vos maladies. Je me laisse insensiblement iuir à vn discours, qui de vray est capable d'éclairer l'esprit,

L'esprit, mais certes il peut aussi le lasser. La Theologie ayant fait icy vne pause, comme pour reprendre haleine, ie creus que son silence me commandoit de parler, ce que ie fis en ces termes. Illustre Princeesse du Ciel, ie ne puis nier, que vous m'ouurez vn Sanctuaire, où ie n'étois iamais entré, quoy que i'aye esté souuerain Pontife, ie ne sçauois pareillement dissimuler que du mesme endroit d'où me vient vn amour qui enflame ma volonté, il me naist vne doute qui trauaille mon esprit. Th. Tu te peux esclaircir, puisque tu me peux interroger. C. Vous m'avez autre fois appris que le Sauueur du monde ne pouuoit pecher, & neantmoins vous disiez à cette heure que volontairement il auoit suby les trauaux de sa Passion, & que par sa mort, il m'a tesmoigné son amour. A parler franchement, ie ne vois pas comme quoy Iesus-Christ meurt avecque liberté pour me sauuer, puisque dans la supposition du commandement de son Pere, il ne pouuoit pas ne point mourir estant impeccable. Th. Tu touches vne des difficiles reconciliations de toute ma science : il n'appartient pas à tout le monde d'accorder la liberté du Sauueur avecque son impeccabilité, non pas mesme d'en comprendre ou fermer la doute, car s'il est libre, il peut ne pas mourir, & s'il est impeccable, il faut absolument qu'il meure, que s'il ne meurt pas, il est libre, mais il peche. Il me plaist bien de desmêler le nœud de cette importante difficulté, non pas pour t'esclairer d'une connoissance plus curieuse que necessaire, mais bien pour te donner vn nouveau motif d'aimer celui qui souffre, parce qu'il t'aime. Non seulement le Messie n'a iamais peché, comme les escritures l'as-seurent., & le Concile d'Ephese le determine, mais encore il ne pouuoit pecher. Oüy, Celestin, Iesus étoit

étoit impeccable à raison de la beatitude , dont les lumieres sont si nettes , & si claires, qu'elles empêchent toute autre amour, qui pourroit diuertir l'ame de sa jouïssance. Il estoit impeccable à cause de cette pureté infinie que Dieu communiquoit à son humanité , par l'vñion réele de la Sainteté par essence. Il estoit impeccable , parce que le Verbe , qui ne peut pecher , auoit obligation en suite de l'alliance personnelle avecque vostre nature, de l'assister d'une conduite , qui l'arrestast aux objets de la raison, sans luy permettre iamais de se distraire avec desordre à ceux des sens : De mesme que la volonté est obligée de commander aux mouuemens sensitifs , & que l'ame doit regir le corps , tandis qu'elle luy est conjointe. On ne doit pas pourtant inferer de cette verité, que le Sauueur n'ait pas esté libre à executer le commandement de mourir: qu'il auoit receu de son Pere. Pour te faire comprendre la mauuaise suite qu'auroit cette consequence, ie consens en premier lieu, que la mort, & la mort de la Croix, soit de precepte, ce que quelques-vns contestent , peut estre contre l'expresse declaration des saintes lettres. De plus , ie veux que ce commandement imposast obligation de mourir , en sorte que si le Messie y eust contrenu, il eust peché. Car de dire qu'il pouuoit desobeïr à cette loy sans crime , parce qu'elle ne luy estoit pas donnée avecque cette rigueur de perdre les bonnes graces de son Pere, manquant à son execution, c'est de vray sauuer la liberté de Iesus, & le couvrir de l'offence, mais ce n'est pas l'exempter d'Imperfection. Je ne puis rejeter l'opinion de ceux qui assurent , que la liberté du Fils de Dieu s'estendoit aux circonstances de sa mort: mais ie ne puis souffrir , que vous ne soyez obligez à vostre Redempteur , que de l'anticipation du temps, du choix

du choix du lieu, ou de cette promptitude, & ferueur de volonté qui le portoit à l'obeissance. Vn medecin qui auroit vne cedule de cent pistoles sur vn de ses malades, ne receuroit pas gratuitement cette somme de luy, quoy que pour l'auoir guery, il luy en donnast vne au dessus du conte, & de la debte. Vous ne croyriez pas aussi estre obligé de la vie à vn agonisant, qui pour l'amour de vous, preuiendroît sa mort d'un quart d'heure. Je sçay que le Sauueur du monde vous auroit tousiours obligez infiniment, bien qu'il ne vous eust donné qu'un des momens de sa precieuse vie. Mais pourquoy, ne veut-on pas que vous luy desniez la substance de sa mort, puisque l'Escripture le loüe de cette magnificence ? Iesus a donc souffert librement toutes les douleurs de sa mort, & de sa vie, parce qu'il pouuoit les éuites, non pas contreuenant au precepte, qu'il auoit de mourir, mais se deschargeant de son obligation, par la dispense que son Pere estoit prest d'accorder à sa priere. N'est-ce pas la plus naïue, & la plus naturelle expression de ces mots d'Isaye ? Il a esté offert, parce qu'il l'a voulu. Luy mesme n'a t'il pas dit, que personne ne luy sçauroit rauer la vie, mais qu'il en estoit le seul maistre, qui a le pouuoir de la perdre & de la retenir à son gré ? Et ne tança-t'il pas saint Pierre qui se vouloit opposer au dessein de sa mort, luy declarant que son Pere luy enuoyeroit des legions entieres d'AnGES, s'il auoit le desir de les luy demander ? Et certes pour ne pas obmettre la raison en cette matiere, ie ne voy pas pourquoy Dieu auroit fait vn commandement plus rigoureux à son Fils, que l'Eglise ne les donne à ses Enfans. N'est-il pas vray, quelque obligation qu'elle vous impose par ses loix, qu'elle vous laisse toujours la liberté de recourir à la dispense, dans les circonstances

stances de quelque raison considerable ? Pouvez-vous mesme nier , que la volonté que Dieu a de vous assujettir à ses ordonnances, n'est pas si absolue, quelle soit necessaire, quoy que sans peché vous ne puissiez vous determiner au contraire : Pourquoi refuseroit-on la mesme liberte au Sauueur , si l'on peut conseruer cette souhaitable incapacité à faillir avec- que cette franchise, qui luy estoit principe de la plus meritoire de toutes les charitez , puis qu'il n'en est point de plus grande que de mourir pour ses amis. Ce sentiment est bien conforme à celuy que Dieu daigna luy-mesme reueler à vne sainte Ame, l'asseurât, que la personne de son Fils luy estoit si considerable, que s'il ne luy eust demandé avec d'excessiues ardeurs de mourir , il n'eust iamais permis à la mort ny aux bourreaux de le toucher. Voilà ce qui doit porter vos sentimens au dernier , & plus haut degré de reconnaissance. Voilà ce qui vous peut faire comprendre que ce bon Sauueur est à vous sans reserve. Vous seriez donc ingrats si vous n'aimiez vn Dieu, qui s'est volontairement exposé à la mort, pour vous tesmoigner son amour : & delicats, si vous manquez de resolution contre des maux, qu'il luy estoit aussi aisé de ne point souffrir, qu'il vous est impossible de les euit. Regarde tousiours cet Homme des douleurs, afin de corriger l'impatience des tiennes , & ie m'assure qu'aussi plein de courage que de honte, tu diras à cet vnique sujet de tes amours , interposant le credit de son aymable Mere.

IV. P O E S I E.

*Quelque dure que soit la poitrine des hommes,
Elle doit s'amollir aux traits de la pitié :*

Manquant

*Manquant à ce deuoir, on dira que nous sommes
Indignes d'amitié.*

*Les rochers ont pleuré, la Terre s'est ouuerte,
Et tous les Elemens ont gemy de douleur,
Pour en porter le dūil, la Lune s'est couuerte
D'une triste couleur.*

*Le Soleil se cacha de ses plus sombres voiles,
Pour se mettre à couuert de ce rigoureux sort;
Tout le Ciel esteignit le iour de ses estoiles
Pour esuiter la mort.*

*Les Anges ont pleuré, sommes-nous impassibles?
Sommes-nous sans mal-heur, ou bien sans sentiment,
Le marbre s'est brisé, sommes-nous insensibles,
Ou bien sans iugement?*

*Helas! & qui seroit si laschement auare,
Que de nier des pleurs à la Mere d'un Dieu?
De moy ie ne croy point qu'on trouuaist ce barbare
Le cherchant en tout lieu.*

*Douce Reine des Cieux souffrez que ie partage
Les aimables tourmens de vostre aimable Fils,
L'objet de mes souhaits, l'objet de mon courage
Est dans le Crucifix.*

*Mettez vostre douleur au fond de ma poitrine,
Grauez dedans mon sein toute la Passion:
Le meurs de ce desir, cette flamme diuine
Fait mon ambition.*

*Chaste Reine des cœurs, si vostre bien vneillance
Accorde à mes souhaits cette seule faueur,*

Ie fais

*Je fais vœu de souffrir avecque complaisance
Les maux de mon Sauueur.*

*Au plus hault de mon cœur ie mettray sa couronne,
L'eschelle soustiendra ce qui paroist voulté
L'esponge posera le bois qu'elle enuironne
A son autre costé.*

*Les cordeaux , & les fouëts luy serviront d'ombrage,
S'espondans à l'entour, comme un saint arbrisseau.
L'éguiere tout auprès leur donnera l'usage,
D'un vase remply d'eau.*

*La lance qui marqua la moins sensible playe
Sur celuy que la mort auoit rendu vainqueur,
Pour faire vne douleur plus entiere , & plus vraye
Me percera le cœur.*


*Et puis pour acheuer cet amoureux supplice,
Je planteray les cloux au plus sensible lieu:
J'attends bien du marteau cét outrageux seruisce
Qu'il osa faire à Dieu.*

*La Croix de mon Sauueur luy seruira d'Empire,
Ce sera dans ces bras que de nuict , & de iour,
Sans cesse il souffrira cét innocent martyre
Par les mains de l'amour.*

*Alors mon pauvre cœur , tu feras un Caluaire,
Et i'auray pleinement la fin de mon dessein,
Quand i'auray les tourmens du Fils , & de la Mere
Au milieu de mon sein.*

*La Vierge me dira les cruelles alarmes,
Dont la douleur fendit son cœur par le milieu:
Je liray dans ses cris, & dans ses tristes larmes*


Peut-estre, mon Sauueur, estant en cette escole,
 Auray-ie, le bon-heur d'ouyr ce que tu dis
 A ce braue l'arron, dont la seule parole
 Ouurit le Paradis.



ARGVMENT DV V. LIVRE.

LA Vertu possédant des beautez dignes de nostre amour sans qu'il luy soit besoin d'emprunter des attraits estrangers, il arrive pourtant, à raison de l'intérests qui nous attrache tousiours à nous-mesmes, que si elle est aimable, elle n'est pas aimée. I. Sur cette connoissance, la Theologie se dispose, dans le commencement de ce dernier Liure, à declarer le merite de la souffrance, montrant que dès cette vie elle rend l'homme heureux, & par les marques de la predestination qu'elle met en luy, & par les sentimens d'une ioye qu'il gousté dans ses amertumes. A l'exemple du Sauueur, qui pendant cette vie estoit conjointement bien heureux, & miserable. II. La premiere Poësie admire cette alliance de la gloire, & de la misere dans cette diuine personne, & prend de cette merueille un puissant motif pour animer nostre courage à la patience. III. Dans la seconde Prose, apres auoir auancé ce Paradoxe, que Dieu, tout Dieu qu'il est, ne peut recompenser avecque iustice le merite d'une bonne action, elle releue la grandeur de nostre couronne par l'estime de sa valeur, & de la perpetuité de sa durée. IV. La seconde Poësie décrit la mesme beatitude. V. La Sapience marque dans la troisieme Prose trois principaux degres de la constance Chrestienne : Le premier dans l'indifference à recevoir

cevoir tout de la main de Dieu. Le second dans la conformité aux choix des maux ; & le dernier dans la complaisance à les chercher. VI. L'exemple du genereux Paphnuce , qui ne fut pas plusost ressuscité, qu'il chercha de nouveaux martyres, fait la dernière Poësie. VII. Pour conclurre solidement , la Theologie presse vingt quatre raisons qui peuvent persuader l'amour des souffrances , & la fuite de tout ce qui flatte la Nature.



LA

CONSOLATION DE LA THEOLOGIE.

LIVRE CINQVIESME.

I. PROSE.



Moins que d'estre insensible , on ne peut refuser son amour à vñe Bonté si parfaite : mais certes il faut manquer tout à fait de cœur , pour ne se point sentir animé à la veüe d'un si grand, & si glorieux exemple. C. Madame, ie confesse franchement que ie suis le plus lasche de ceux qui ont besoin de constance, neantmoins vous auez tellement émeu ma generosité, qu'il me semble, que rien du monde ne la scauroit vaincre. Th. La connoissance

que j'ay de tō humeur m'a tousiours fait esperer cette resolution de toy, iugeant bien que ces petites impatiences, qui te sont eschappées, tesmoignoient plus d'excez dans ta douleur, que de deffaut dans ton courage. Veux-tu que ie te montre maintenant, que le prix de vōtre recompense égale le merite de vōtre exemple, & que le salaire de vōstre patience vaut autant que le motif de vōstre vertu ? C. Cette instruction augmentera le sentiment que j'ay de vos bienfaits, & me portera aux deuoirs d'une nouuelle reconnoissance. Car encore bien que ie me sente disposé à seruir Dieu sans esperance, ie sçay que nostre amour se soustient par l'interest, & que rien ne donne plus de suite à nōtre fidelité, que l'auantage de sa recherche. Th. Mon cher Nourrison, cēt auenue marque la sincerité de ton desir : puis que tu ne reconnoistrois pas avecque tant de franchise, le deffaut de ton seruice, si tu voulois seulement te satisfaire. Prepare toy donc à vn discours qui te fera voir, que tu ne souffre pas en vain, & que celuy qui expose les hommes à la fortune, les dispose à la gloire. C. S'il ne faut que de la docilité, & de l'attention, ie vous conjure, ne retardez pas mon contentement, par le delay de vos promesses. Th. Il ne sera pas difficile de te donner cette connoissance, puis que tu l'as desjà : que si ton esprit n'en est pas tousiours persuadé, c'est que la multitude de ses pensées le diuertit à d'autres applications. Pour te conuaincre de cette verité, ie te veux preuenir de quelques demandes, & tout premierement, dis-moy, l'Homme a-t'il quelque beatitude ? C. Vrayement son Createur l'auroit fait de pire condition que toutes les autres natures, qui luy sont sujettes, s'il auoit manqué de le dresser à vne felicité, que sa prouidence procure aux moindres animaux.

animaux. La liberté que les oyseaux treuuent dans l'air, & cette innocence avec laquelle les poissons, & les bestes sauvages suiuent, & contentent les inclinations naturelles, sans qu'il y ait aucun crime dans la poursuite de leurs plaisirs, ny d'excez dans la iouissance de leurs objets, preuuent assez la verité de ma creance. Th. Tu mets donc le bon-heur des animaux à viure selon l'instinct, pourueu que rien n'en transe la recherche, & n'en trouble la possession. C. L'estime que personne ne doit auoir d'autre sentiment, s'il penetre la nature des estres sensibles. T. Je t'ay interrompu pour t'obliger d'esclaircir ton opinion, & non pas pour la contredire. Tiens-tu que la beatitude de l'homme soit à ne rien souffrir de contraire, & à posséder tout ce que l'inclination des sens recherche ? C. Ma vie passée ne persuadera iamais à personne, que ie sois dans cette erreur ; le mespris des richesses, la haine des voluptez, & la fuite des honneurs sont d'assez bonnes cautions de mon estime. Th. Je t'interroge, pour te faire enseigner le monde, & non pas pour m'instruire, i'ay trop d'habitude avec Celestin, pour le croire de la secte d'Epicure ou de quelque Philosophie plus lasche. C. Notre beatitude doit estre dans vn objet qui arreste, & contenté le desir. L'or, & l'argent remplissent d'auantage le cœur d'inquietudes que de satisfaction : & quand vn seul homme possederait tout ce que le Soleil en fit iamais, il feroit tous les autres misérables, & ne rendroit pas celui-là content. Th. La volupté a ie ne sçay quoy de si doux, & comme elle s'attache plus immediatement à vostre nature, il semble qu'elle doie mieux terminer sa poursuite. C. On ne peut le nier, la volupté ravit l'homme avecque plus de transport ; mais aussi elle a moins de pureté que cet

éclatant corrupteur, qui se fait aymer iusques dans les abysses. De plus, la volupté pourrit la chair qu'elle flate, & au contraire d'esleuer son sujet à vn estat inalterable, elle l'abaisse à des ordures, qui le changent, & le flastrissent. Th. Pleust à Dieu, mon cher Nourrison, que tous les hommes eussent ce veritable sentiment des plaisirs, & des richesses : que pense-tu de la gloire ? C. Vous m'avez appris que l'honneur, & l'estime des hommes auoient trop peu de solidité, pour donner beaucoup de satisfaction à vne ame raisonnable. Et à parler franchement, outre qu'un sot possède plus souuent la Renommée, qu'un homme sage, ie ne sçay comme quoy l'opinion d'autrui, qui est presque tousiours injuste, ou du moins inconnüe : pourroit donner du bon-heur à ceux à qui elle ne sçauroit donner du merite. Certainement si la pensée qu'on a de ce que nous valons, nous rend bien-heureux, il faut auouer que nous sommes miserables la nuit. quand tout le monde dort, ou du moins que nostre felicité n'est pas grande, puisque pour lors nous n'entretenons pas les veilles de beaucoup de personnes. Encore y a t'il à craindre que leur favorable sentiment ne soit vn songe, estant formé pendant le sommeil des hommes. Mais quand il seroit vray, que ces grandes charges, dont la vanité fut son amorce, auroient autant de bien que d'esclat, il me seroit impossible de consentir que l'homme en peult être content. Rien de tout ce qui se passe, ne sçauroit posséder la nature de la beatitude, & n'en porte qu'injustement le nom : il faut qu'un bien soit eternal, & infiny, pour soutenir cette estime. Voilà d'où il arriue que ces grandes voluptez que les hommes cherchent avecque des desirs si empressez, perdent lors qu'on les possède cette auantageuse opinion qu'on en con-
ceuoit

ceuoit pendant la poursuite. L'esprit faisant réflexion, que ces biens s'eschappent avecque le temps, qui les amene, se rebute de voir tant de peines payées d'une si courte jouissance. Voilà, sainte Maistresse, des vertus ce que ie sçay, ou à mieux parler, ce que ie ne sçay pas de la beatitude. Quoy que ie ne sois pas tout à fait ignorant de la souveraine felicité des hommes, il vaut mieux vous ouïr sur cet important sujet, que de rien auancer, qui soit indigne de son excellence. Sans beaucoup d'adresse on peut marquer vne infinité de points dans le Cercle qui n'en font pas le centre, mais de toucher celuy qui s'esloigne esgalement de toute la circonference, c'est ce que la proposition mesme auroit peine d'entreprendre avecque succez Th. Cette modestie m'agréee (mon cher Disciple) & ensemble m'oblige de te descouvrir vn secret que j'ay gardé pour le dernier de nos entretiens: Dans le commencement, & le progres de mon discours, ie t'ay fait voir que nostre grand Dieu atoit vn empire absolu sur toutes les actions de sa creature; qu'il les regloit avec vne sagesse infinie, & qu'il n'ordonnoit pas vos peines sans dessein ny sans les dresser sur de nobles, & de fameux exemples: il me reste de te monstrier, que sa Bonté ne pretend pas, que vous souffriez sans recompense, & que comme il a mis vostre modele dans la personne de son Fils, il establit le prix de votre merite dans la possession de sa gloire. Et pour m'expliquer davantage, ie dis que comme la beatitude de l'homme est la fin de toutes ses actions, elle est l'effect, & la production des souffrances. De sorte que l'homme ayant deux vies, l'une qui se mesure à certain nombre d'années, & l'autre qui a toute l'estendue de l'eternité pour sa durée, il ne faut point douter que la felicité de la premiere ne

doive consister en ce qui nous prepare au bonheur de la seconde. Je ne voy pas en quoy vous pourriez faire resider la beatitude de cette miserable vie, que dans ce qui vous assure le merite de la bien-heureuse. Or ie maintiens que c'est par l'aduersité que nous meritions la gloire : c'est donc dans l'aduersité que se treuve tout le bon heur de cette vie. Pour esleuer ton esprit à la connoissance, souuiens-toy de „cette grande parole de S. Iean : Nous serons semblables à Dieu dans la gloire, parce que nous le verrons comme il est. Pour auoir la ressemblance d'une chose, il faut estre son image : vous serez donc semblables à Dieu en le voyant, & cette ressemblance que vous aurez avec luy, vous rendra heureux comme luy. C'est à dire, que la mesme action qui met Dieu dans la iouissance d'une souueraine felicité, sera celle qui vous rendra contens dans la gloire. Et comme il est heureux par la connoissance de soy-mesme, & que cette connoissance, qui s'arreste à ses perfections, engendre son Fils, image substantielle de son estre, il suit necessairement, si vous devez estre heureux à sa façon, que vostre beatitude consiste à retirer l'image de son Fils en vous mesme, par la veüe des grandeurs infinies d'une nature infinie. Ce qui est en quelque façon produire, & engendrer dans vous-mesme le Verbe qui est la vraye, & parfaite ressemblance de son eternal principe. Et à dire mon sentiment avecque liberté, puisque Dieu esleue l'homme à la gloire de fils adoptif, en luy donnant entrée à la pretention de son heritage, il y a raison de vouloir en luy du raport à ce Verbe, qui est son Fils par nature. Que si le Verbe increé est dans le Ciel l'idée de la beatitude, ne iugés-vous pas, que le Verbe Incarné doit estre vostre exemplaire sur la terre ? La

Philosophie

Philosophie vous apprend, que pour porter la qualité de Fils il faut auoir vne mesme nature que celle de son principe, non pas en identité ; ce qui ne se treuve que dans la generation diuine , mais au moins en ressemblance. Tous les freres sont enfans d'un mesme pere , donc deuant estre tous l'image d'un mesme principe , il suit qu'ils doiuent tous auoir du raport les vns avecque les autres. Ce raisonnement est si naturel, que tous les doctes conuiennent , que comme vous deuez estre semblable au Sauueur dans la gloire, vous auez pareillement obligation de luy ressembler en sa vie. Peut-estre, se dit-il en ce sens, la voye, voulant insinuer qu'il faut tenir ses routes, & marcher sur ses traces , pour s'asseurer l'entrée à la felicité. Qu'il soit ainsi ou autrement, on ne scauroit douter que le Redempteur des hommes ne soit la cause de leur Predestination, non seulement en ce qu'il est le Principe effectif de vos graces, mais aussi en ce qu'il en est l'exemplaire. Ne croyez pas toutefois qu'il ne soit prototype que dans la fin , qui est de vous rendre à sa mode, les heritiers de sa gloire, en vous meritant d'estre les enfans de son Pere , mais pareillement dans les moyens d'arriuer à cette sureminente adoption. Afin de conceuoir cecy, il faut prendre la predestination, non pas pour le choix que Dieu fait des hommes à la gloire, mais pour cette suite de moyens, qui les dispose à ce choix ; comme l'enseigne le grand Augustin. Que si vous considerez la predestination en ces sens , vous auouerez que vous estes obligez à la souffrance , par l'obligation du rapport que vous deuez auoir à vôtres Sauueur, suiuant l'oracle de l'A., pôtres. Dieu a predestiné ceux qu'il destine à la gloire, à vne parfaite conformité, & vne exacte ressemblance avecque son Fils. Tous les esleus ne seront

que des copies de cét original, c'est donc sur ce modele qu'il faut former, & prendre l'idée de vostre vie, & de luy qu'il faut apprendre ce qui vous peut disposer à la beatitude. Que s'il est ainsi, on ne scauroit douter que la souffrance ne soit vn moyen de necessité, puisque toutes les grandeurs de Iesus sont fondées sur les douleurs de la Croix, & les opprobres de sa mort. Ce fut ce que luy mesme apprit à saint Luc, & à Cleophas, qui se retiroient de Ierusalem en Emaüs, apres cette triste journée, où la rage des Iuifs sembloit auoir triomphé de l'innocence du Iuste. Car comme ils continuoient leur chemin, sans que l'estonnement d'une si funeste auanture leur permit à peine de parler, celuy qui donnoit sujet à cette extase, se ioignit à eux, feignant le mesme voyage que ses Disciples. Et comme il eut compris de leur discours, que la Foy de toutes les grandeurs du Messie s'estoit „esteinte auecque sa vie, il leur fit ce remarquable „reproche. O pauures insensez, & rétifs que vous „estes, dans la creance de ce que les Prophetes ont „annoncé ! ne falloit-il pas que le Christ endurast „toutes les ignominies du Caluaire, pour entrer en sa gloire ? On ne passe à la iouïssance des ioyes éternelles, que par les ennuis de ces miseres passageres : le Ciel a des serrures, & des cadenats qui ne s'ouurent qu'auec la Croix. C'est le sentiment commun des sçauans, pris sur la deposition de S. Paul, que Dieu le Pere laissa au Verbe incarné le choix de la vie qu'il deuoit mener sur la terre. Mais quoy qu'il n'y eût ny auantage de merite dans les peines, ny dechet de perfection dans la iouïssance d'un estat heureux, & paisible, il s'arresta à la Croix, préférant ses agonies, & ses douleurs à la ioye, & à la douce fortune qui luy estoit proposée. Ce fut le seul desir de vous faire
comprendre,

comprendre , que son affection étoit toute pure, qui l'obligea à vne preference si peu fauorable au sens, & à l'inclination naturelle de l'homme. Que si le Fils de Dieu, à qui la gloire appartenoit par droit de naissance , a deu y entrer par ses trauaux , & ses peines, n'est-ce pas assez, pour faire receuoir à des criminels l'arrest de ce grand Apostre ; qui porte , qu'il se faut faire entrée au Royaume de Dieu , au trauers d'une infinité d'afflictions , & d'amertumes ? Je sçay bien que Dieu pouuoit donner son Paradis pour rien , & faire passer les hommes des plaisirs de cette vie au bon-heur de l'éternelle. Mais y auroit-il apparence de traiter des esclaves avecque plus de douceur que le fils unique, & de fauoriser des impies au prejudice mesme de l'innocent ? Voulez-vous donc auoir les marques de vostre predestination ? regardez si vous auez part aux douleurs de la Croix, d'autant que personne ne peut regner avecque Iesus, ny porter la qualité de fils , & d'heritier avecque luy s'il n'a souffert de compagnie. Tout ce discours suffit pour vous persuader , que le bon-heur de ceste vie consiste en la souffrance de ses miseres , puisque l'aduersité vous rend conformes au Sauueur , & vous fait images de cette Image de douleurs , vous donnant l'assurance de la gloire , dans la participation de ses angouisses. J'ay fait voir en vn autre endroit que l'aduersité purifioit la Foy, releuoit l'Esperance, & enflammoit l'Amour : la Foy respond icy bas à la claire vision de Dieu : l'Esperance à la possession ; & l'Amour aueugle à l'Amour esclairé de la gloire. Et partant celuy qui souffre , a toute la beatitude , dont vous pouuez iouir en cette vie. Mais pour comprendre qu'une ame patiente est parfaitement heureuse, remarque, ie te prie , qu'elle ne manque pas d'une certaine satisfaction,

faction, laquelle imite cette excessiue ioye qui naist par vne suite necessaire de la connoissance, & de l'amour de la Patrie. Oüy, Celestin, non seulement ie tiens que les grandes, & eternelles felicitez de l'autre vie ne sont que le fruit de vos trauaux, & de vos peines, & que ces larmes dõt vous arrouses la terre sont la precieuse semence de la beatitude, que vous attendez au Ciel : mais dauantage, ie defends, qu'il y a de la ioye dans ces ennuis, où la foiblesse des petits courages ne se figure que des gesnes. D'où il faut necessairement conclurre, que l'homme est heureux dans son mal-heur, & parce qu'il gouste mesme dans le fiel, des douceurs inconnues à la chair, & parce qu'il merite par ces delicieuses amertumes, les torrens sacrez de l'eternité. C'est icy où l'enigme de Samson se doit expliquer à l'auantage des souffrances, & que la douceur, & la viande sortent du Fort. Car il est certain, & personne ne le scauroit nier, que ces ames fortunées, qui semblent mourir de douleur, languissent de plaisir. Les souspirs qui sortent de leur bouches n'accusent pas leurs maux, ils moderent seulement leur ioye, & ces pasmoisons, que l'on croyroit arriner de l'excès de leurs peines, n'est qu'un effet de leur transport. Ha Dieu ! que ne m'est-il possible de faire gouster à la plus molle volupté vne de ces precieuses larmes qui coulent des yeux de ces fortunez mal-heureux ? elle auoüeroit sans doute que ces iouyssances sont fades, & qu'il n'est rien de si doux que de pleurer. Toute la vaine ioye des mondains se jette au dehors sur le visage, & dans leur mine, pendant que le pauvre cœur se noye de tristesse, & ressent la dure crainte de cette hypochrisie. Au contraire ceux qui paroissent affliger, & qui portent à l'exterieur vne ame desolée, possèdent un Paradis au fond du cœur :

cœur : plus leur rauissement est secret , plus a-t'il de violence. N'a t'on pas ouy quelques-vns de ces enfans de Coré crier dans la surprise de ces assauts delicieux ? Mon Dieu ! ie n'en peux plus , ie meurs , si vous ne retenez l'abondance des consolations que ie sauoure ! Pourquoi saint Paul diroit-il qu'il est dans l'excez du plaisir quand il souffre, si la souffrance des iustes par vne secrette , & diuine antiperistase ne consoloit au lieu d'affliger : Si la patience n'auoit que du fiel, & de l'amertume , saint Iacques asseureroit-il , qu'à mesme que vous tombez dans le sentiment d'une infinité de miseres , vous faites rencontre de toute la ioye ? Les Martyrs ont connu cette verité cachée , quand ils ont protesté à leurs Tyrans qu'ils ne sentoient ny la dureté de leur fer, ny la pointe de leurs flammes. Cette genereuse Potamerice , qui prie son bourreau de la plonger peu à peu dans l'huile bouillante , & le plomb fondu , afin de n'aualler pas tout d'un coup cette mort liquide , ne sauoure-t'elle point de douceur dans les amertumes d'une si effroyable torture ? Et ceux qui dans les Monasteres, & le desert estudient de nouueaux Martyres, n'y trouuent-ils point de secrettes delices ? C'est dans ces Louures de l'innocence, & dans ces beaux vergers de la vertu qu'il se pratique vne iustice que le vulgaire des hommes ressent sans la connoistre. Car ceux qui possèdent les biens du monde , & qui taschent de se noyer dans le plaisir , n'en retirent que des inquietudes, & du tourment, & ceux qui en souffrent tous les maux, sans les meriter, n'en recoiuent que de l'auantage , & des aises. Cette equité est pour le iuste , & l'impie vne excellente misericorde , parce qu'elle detombe celuy-cy de la vanité des choses sensibles , & anime celuy-là dans l'attente des eternelles. I'oserois
mesme

mesme auancer en eux le miracle que Dieu fit trente-trois ans en la personne de son Fils, ie veux dire, que pour les faire souffrir avec merite, & perseuerance, il mesle en eux la douleur, & la ioye. N'as-tu iamais pesé que le Sauueur possedoit pendant toute sa vie, les felicités des bien-heureux, & sentoit la douleur des miserables ? Ce fut vn des artifices de la sagesse de nostre Dieu, de treuuer vn nœud qui arrestast le bon-heur, & la misere dans celuy qui deuoit estre selon la voix de Simeon, vn grand sujet de contradiction. Il l'auoit esté au premier moment de sa Conception, vnissant le Createur à la creature, la force à la foiblesse, la sagesse à l'enfance, & dans sa Passion il le deuoit estre, joignant la mort à la vie. Veritablement on ne peut nier qu'il ne se soit fait des alliances fort incompatibles en cette diuine Personne, & qu'on ne pouuoit voir sans extase l'impuissance de pecher, avecque la liberte de bien faire. Si est-ce neantmoins que la plus estrange vnion, qui se trouuoit dans le Sauueur, fut celle de la beatitude, & de la souffrance. D'autant qu'il fallut trente trois ans de miracles pour arrester l'inimitié de ces contraires, soit que la gloire fust retenuë dans son ame, par vne violente suppression de ses effets, soit que la ioye, & la douleur, par vn empire absolu qui leur commandoit cette courtoisie, s'accordassent à faire en mesme temps, vn homme glorieux, & souffrant. Peut-estre aussi qu'elles partagerent cette sainte humanité, la douleur raugeant sa plus basse partie, tandis que la ioye bien-heuroit la superieure. La plus ingrate humeur du monde doit tirer de cette reflection vne parfaite reconnoissance, & vne genereuse disposition à souffrir au moins avecque patience, ce que vostre Dieu a souffert par miracle. Et ceux qui par estat honorent

honorent cette violence de tant d'années, peuuent par
cét exemple, se confirmer dans l'auen de cette verité,
qu'un homme qui souffre ne laisse pas d'estre heu-
reux.

I. P O E S I E.

*Aymable escueil de la raison,
Naufrage à souhaiter, glorieux precipice,
Je ne puis concevoir ce subtil artifice,
Ny l'inuisible nœud, qui fait la liaison
D'une essence diuine à vostre chair humaine,
Mon effort est ma peine :
Un Cherubin peut sans honte ignorer
De si profonds mysteres,
Sus mon esprit, il les faut adorer,
Ne cherche point le nœud de ces contraires.*

*Sans estude ie reconnois
Du hazard à parler, du merite à me taire.
Un supplice au discours, au silence un salaire,
Je serois imprudent si ie l'entreprendois ;
Je possède en l'auen d'une sage ignorance
Vne haute science :
N'escoute point un desir curieux,
Empesche sa poursuite,
Il blesse un cœur sans esclaire les yeux,
Et perd l'esprit, quand il est sa conduite.*

*Je voy dans un mesme sujet,
L'eternité, le temps, la force, & la foiblesse,
Le silence, la voix, l'enfance, la sagesse ;
La ioye, & la douleur ont un commun objet,*

L'abyssine

L'abyfme du fçavoir fe joint à l'apparence,

Le crime à l'innocence :

Celuy qui vit eft fujet à la mort :

N'entreprends point , mon ame,

De contenter ton inutile effort,

Tu peux brufler , fans luire de ta flame.

D'où vient , ô doux Roy des Amans,

Qu'à vos felicitez vous joignez la mifer ?

Faut-il pour efre heureux une douceur amere,

Et pour ne rien fouffrir , fouffrir tous les tourmens ?

Homme, qui que tu fois , apprends une merueille,

Qui n'a pas fa pareille,

Ce cher Amant eft glorieux pour foy,

Et partant impaffible,

Il doit fouffrir , puis qu'il refpond pour toy,

Ton intereft le rend ainfi fenfible.

Redoutable , & foible vainqueur,

Monarque fans pouuoir, beauté fans bonne grace,

Puiffance fans attrait, douceur fans efficace,

Vous tenez mon efprit , vous raviffez mon cœur ,

Si vous eſtes heureux , vous eſtes miferable,

Et pourtant adorable :

L'offre mes yeux à vos triftes douleurs ;

Qui croira cefte hiftoire,

Vn homme heureux eft fujet aux mal-heurs,

L'homme fouffrant , poffede de la gloire.

Par un effet de fa douceur,

La ioye , & la douleur s'accordent en fon ame,

La gloire la remplit d'une amoureuse flame

D'autre par le tourment s'en rend le poffeffeur :

L'un donne du plaifir, l'autre caufe un martyre :

Certes

Certes ie l'ose dire,
Cette douleur nous acquiert un Sauueur,
Et nous fait de sa peine
Vn beau thresor de la grace, & faueur,
Et de son sang une heureuse fontaine.

Qui pourra iamais auouer,
Dans un mesme sujet vne telle alliance ?
D'innocent , de pecheur , de ioye , & de souffrance :
Ie ne la sçauois voir, mais ie la puis louer ;
Si ie n'ay point d'esprit, i'auray de la loüange :
En faisant cette eschange,
Par mon respect i'acquitte mon deuoir :
Bien-heureuse foiblesse !
Vn peu d'amour vaut beaucoup de sçauoir ;
Ma pauureté vaut mieux que ma richesse,

Honorable persecuteur,
Doux , & cruel Amour, falloit-il que l'enuie
Attaquast l'immortel , & luy rauist la vie ?
La mort a-t'elle osé se prendre au Createur ?
Croiroyt-on sa bonté n'estre pas infinie,
Sans cette tyrannie ?
Vn immortel capable de mourir,
O l'estrange spectacle !
N'est-ce point trop pour me faire souffrir
De voir un Dieu qui souffre par miracle ?

L'exemple de ce grand Sauueur
Surmonte mes froideurs, anime mon courage,
Rien ne peut diuertir mes yeux de cette image,
Ce qu'on estime un mal , ie l'estime faueur,
Contre la cruauté mon amour s'interesse
Et pique ma foiblesse :

Je veux souffrir, ie peux estre vainqueur :

O l'estrange spectacle !

De voir un homme, & de le voir sans cœur,

Lors qu'il void Dieu, qui souffre par miracle.

Quel mal me pourroit assaillir ?

Puis que j'ay mon Sauueur, dois-je rendre les armes ?

Puis qu'il flate mes maux, dois-je fuir les larmes ?

Sur l'exemple d'un Dieu ie ne scaurois faillir :

Autant que j'ay d'amour, autant ie fuis mon aise :

J'ayme cette antithese,

Amour, douleur, contentement, & pleurs,

O l'aymable spectacle !

Quand l'homme heureux recherche les douleurs,

Lors qu'il void Dieu, qui souffre par miracle.

II. P R O S E.

LA beatitude n'estant que la possession du vray bien, ie pourrois rapporter à cette felicité, que l'innocence affligée iouyt dès cete vie, de tous les auantages qu'elle tire de la pratique de cette riche vertu, qui paroist triste à ceux, qui ne s'imaginent point de ioye, où ils ne voyent point de dissolution. Ie laisse volontiers ce dénombrement de vos biens; parce que ie me promets de leur treuuer vne place plus commode. Aussi ie m'apperçois qu'il est temps de te montrer cette couronne, que Dieu prepare à ceux qui sont fideles à ses commandemens, & qui taschent de se rendre semblables à son Fils bien-aimé. N'attens pas neantmoins que ie t'explique cete immense felicité dont l'Apostre ne peut parler mesme apres l'auoir goustée. Ne crois pas aussi, que
ie te

ie te vueille faire conceuoir le bonheur du Paradis par les supplices de l'enfer , comme les Spartes faisoient voir la beauté de la vertu à leurs enfans , en leur découurant les horribles laideurs du vice. P'auouë que la souffrance vertueuse des maux de cette vie, vous destourne de cét abyssme , d'où iamais personne ne reue. Mais ie n'ay garde de mettre vôte souueraine felicité dans la priuation d'un mal infiny, puis qu'elle doit estre dans la iouyssance du bien souuerain. Ce seroit pareillement vne chose inutile , de prouuer que les delices de l'autre vie ne sont que les fruits , & la recompense des afflictions de celle-cy. La sainte Escriture a trop de tesmoignages de cette verité , pour nous en laisser de raisonnables doutes, & puis n'ay-ie pas suffisamment estably, que des criminels ne doiuent attendre l'heritage des enfans, que par l'expiation de ce qui les rend odieux à la Majesté de leur Iuge ? C'est vn arrest prononcé par la veritable bouche du Sauueur , à qui cette distribution appartient, que personne n'y aura part, s'il ne marche apres luy , & n'imit l'exemple de ce Dieu affligé, dont tout le monde desire de posséder la gloire sans pretendre à ses peines. Qui veut regner avecque Iesus-Christ , doit mourir avecque luy : c'est par la Croix qu'il s'est esleué au Ciel, qu'on ne pouuoit luy refuser sans injustice : quiconque refuse d'y estre attaché, ne veut pas oüyr cette douce parole : Tu seras aujourd'huy en Paradis avec moy. Supposant donc que la souueraine beatitude de l'homme consiste dans l'eternelle iouyssance de Dieu , qui ne se laisse posséder, que par la veüe, & l'amour de ses diuines perfections: de plus, que le droit de cette beatitude est dans le merite de la souffrance , ie vais t'en descouurir l'idée , par certaines reflexions , qui portent l'esprit à

cette haute connoissance. Ma premiere consideration se prend de la grandeur de cette couronne , qui est infinie en soy , & excessiue en vous : elle est infinie en soy , n'estant autre chose que Dieu, qui est infiny dans sa Nature , puis qu'elle ne reçoit aucune limitation, & en ses attributs, puis que les qualitez d'un sujet se mesurent à son Essence. Elle est excessiue en vous , d'autant que Dieu qui peut tout , ne sçauroit assez rendre à vne bonne action , s'il ne luy donne trop. Et partant comme il ne peut estre injuste, pour luy donner moins qu'elle ne vaut , il faut qu'il soit prodigue, pour luy donner plus qu'elle ne merite. C'est ce qui l'obligea de dire autrefois à son seruiteur Abraham , qu'il estoit sa trop grande recompense. Dauid s'escrie dans la mesme lumiere : vos amis sont trop honorez. Pour penetrer cette curieuse , & profitable verité, il faut conceuoir , qu'il est de certaines choses, qui ne peuuent rencontrer d'esgale mesure : tout ce qu'on leur ajuste , est ou trop long , ou trop court, laissant leur extremité au deça de leur excez, ou la portant au delà de leur deffaut. La Geometrie reconnoit cette inegalité dans le Diametre , & les lignes du Carré qui le ferment , d'autant que leur disproportion ne leur permet iamais de se rencontrer. Le peché, & la satisfaction de son ouurage est de cette nature. Car si mesme vn Seraphin entreprenoit d'acquiter vn crime par sa peine, pour excessiue qu'elle fût, il faudroit que la bonté de Dieu suppléast au defaut du payement, puisque la iustice de la créature ne peut atteindre à l'entiere extinction d'une debte, qui l'oblige au Createur. Que si vn homme-Dieu luy offre son merite en satisfaction, c'est trop , parce que la moindre de ses actions ou de ses peines vaut infiniment au delà du pardon necessaire à vne offense.

Sur ce

Sur ce fondement ie conclus dans les escholes, que l'Incarnation d'une des personnes diuines étoit de necessité absoluë, dans la supposition que Dieu voulust exiger toute sa debte. Pour retourner au sujet que ie te traite, ie treuve cette inégalité dans le merite des bonnes œuvres, & la valeur de leur salaire, à cause que Dieu est trop, & toute autre chose que luy trop peu: pour recompenser vne bonne action Dieu est trop, puis que la moindre iouissance qu'on en peut auoir, surpasse infiniment tout le merite des hommes, & des Anges; & toute autre chose est trop peu en ce que le prix de tous les biens imaginables separez du diuin, n'egalent pas le moindre de vos seruices animez de la grace. Pecheur, cette pensée te doit faire comprendre, & condamner l'aveuglement de ta conduite. Je veux que tu possedes les plus rares beautez de la nature, sans ces inquietudes qui en troublent la iouissance, ie veux mesme que ce soit avec vn acquiescement tout immobile de ton desir. Je veux que toutes les couronnes de la terre, ne soient que la moitié de la tentation qui te trompe, & que la gloire t'offre toutes ses pompes: cela ne vaut pas le moindre degré de ton innocence. Quand Dieu mesme espuiseroit sa puissance dans la production de tous les thresors que tu scaurois imaginer, il ne te donnera rien qui esgale ta vertu, s'il ne se donne soy-mesme. Et toutesfois pour vn plaisir, que tu desrobes en cachette, pour vn gain qui ne scauroit payer le seruice d'une beste, pour vne flaterie, qui ne deueroit pas dupper vne buse, tu donnes vn merite, que Dieu ne pourroit recompenser de mille mondes. O profusion criminelle, si tu n'es plustost vne brutale stupidité! vn homme ne doit-il pas estre insensible à ses interests, & auoir perdu cette inclination qui

vous presse sans tréues à la poursuite du bonheur, s'il ne s'abandonnoit à toutes sortes de travaux, pour acquérir cette récompense ? Vn marchand va transir dans ces mers, qui se cachent sous le Pole, il penetre iusques aux dernieres extrémitez de la nature. Mais enfin ce n'est que pour rapporter des Perroquets, & des Singes, ou au plus quelques grains d'Or, & de Perles, non pas pour les posséder, mais seulement pour les voir devant que de mourir. Le soldat, qu'un genereux desir de reputation porte à la guerre, n'en fuit pas le hazard, & les miseres, quoy qu'il n'espere point de salaire au dessus de sa peine. Quoy ? saint Paul n'assure-t'il pas, après l'essay de la beatitude, que toutes les souffrances de cette vie ne sont rien dans leur rapport avecque la gloire. Mais si l'excez de cette felicité excite dans vos cœurs vn ardent desir de sa recherche, ie ne doute point que la satisfaction qu'elle donne n'en doive de beaucoup accroistre l'estime. Cette infinité qui estend Dieu sans aucunes bornes, & qui multiplie ses perfections au delà de tous les nombres, remplit toute la capacité de vostre ame, & en comble les appetits. D'où il arriue, qu'elle demeure tellement satisfaite de son objet, que le dégoût ne la diuertit iamais au change, & elle treuve si pleinement tout, que le desir, ne luy scauroit demander aucun bien hors de celuy qu'elle possede. Et quand nous accorderions cette inconstance, qui met tousiours vostre cœur en queste, il auroit de quoy s'entretenir pour iamais, & dans ces perfections qui sont formellement en Dieu, puis qu'il n'en penetrera iamais tout le fonds, & dans celles qu'il a par eminence, puis que leur multitude est sans nombre, & leur intensiō sans aucun conte de degrez. Voicy vne comparaisō, qui t'esclaircira ma pensée.

Quelque

Quelque progresz que fust vn œil, pour descouurir les beautez, & les perfections d'un tableau infiny, iamais il ne les verroit toutes, à raison que son mouuement se feroit avecque succession, & dans vn espace qui n'auroit point de termes. Et ainsi quelque continuë qu'il eust, iamais il n'acheueroit que des longueurs determinées, qui demeurent tousiours infiniment au deça de celle qu'on suppose infinie. Il est veritable que pour former la parfaite idée de ces perfections, il les faudroit cōcevoir infiniment infinies: ie pretens dire, qu'il y a infiniment à penetrer en chacune d'elles. D'autant que ce n'est pas assez d'accorder à Dieu vne esleuation sans bout au dessus de toutes choses, si conjointement on ne luy donne vne largeur, & vne profondeur sans fonds, & sans limites. Or il possède cette largeur, & profondeur dans tous ses Attributs entant que chacun d'eux est d'une intensiō infinie, & qu'il remplit toute la capacité de l'estre. Cette reflexion met vn assez bon remede au dégoust qu'on pourroit apprehender dans la continuelle iouissance d'un mesme objet. De cette infinité, ie conclus pareillement, que la nature diuine est incomprehensible, au lieu, au temps, à l'intelligence, & à l'amour. Au lieu, puis que le sens ne connoît point d'espace, & l'Imagination n'en sçauoit feindre, hors de l'estre de Dieu, qui est tout recueilly dans les moindres espaces qu'on imagine: ainsi sa vie est toute ramassée aux plus petites estendües du temps. Cette supposition est auantageuse à la grandeur de Dieu, sans offenser la dignité de l'homme, puis qu'elle ne luy oste que ce qu'il ne sçauoit posseder. Et peut-estre que si l'imagination se pouuoit retirer de l'attache qu'elle a auëcques les siecles, & les années, qui luy eschappent sans arrest, pour joindre ce repos im-

mobile de l'éternité, qu'elle corrigeroit toutes ces foiblesses, qui luy font, ou nier la prouidence de Dieu avec ingratitude, ou asséurer avecque blasphème, vne fatalité dans la conduite de l'homme. Mais ie laisse ce discours, pour retourner à mon sujet, & te descourir le merite de la beatitude, par l'estime de sa durée. A parler sainement, cette constance perpetuelle ou cette perpetuité constante dans la ioye, rend sa valeur infinie, quand mesme de sa nature elle seroit mediocre. Le plaisir d'un iour est préférable à celuy d'une heure; il croist neantmoins demeurant dans le mesme degré d'intension, s'il s'estend aux mois, & aux années, bien d'avantage s'il passe les siecles, & infiniment, s'il se produit dans vne continuë qui n'ait point de bornes. Et ainsi la perpetuité d'un petit bien en rend la iouissance d'une valeur infinie, mesme au dessus de celuy qui seroit sans comparaison plus grand, s'il ne duroit que quelques heures. Iugez donc de quelle consideration doit estre vostre bonheur, puis que c'est la possession interminable d'un bien, qui est infiny en sa nature, & perpetuel en sa durée. Toutefois pour comprendre parfaitement la grandeur de cette felicité, il faut en quelque façon ramasser cette continuelle suite de ravissements, & les attribuer à chacun des instans de cette perpetuelle beatitude. Car encore bien que j'auouë, que l'ame ne possède pas tout à la fois des plaisirs qui ne luy viennent qu'avec suite, puisque leur durée n'est pas indiuisible, & toute à la fois, ie maintiens que l'assurance, qu'elle a d'en iouyr, les luy fait goustier par anticipation, & ainsi vne esperance certaine luy vaut vne possession presente. De mesme façon qu'un Courtisan tient desia par la ioye la continuation d'une faueur, qu'il n'a encore que dans les infailibles promesses

promesses de son Prince. N'ay-ie pas sujet de croire que les bienheureux tirent de la ioye de leurs ioyes futures, puisqu'il est indubitable que s'ils apprehendoient la fin de leur bonheur, ils en conceuroient de la douleur par la crainte. Ce seroit mettre l'excessiue misere dans la souveraine felicité, de joindre à son estat, le soupçon de quelque terme. D'autant que la parfaicte veüe du bien qu'on deuroit perdre : produiroit plustost le déplaisir de sa deffillance, que la ioye de sa possession. Que si l'attente de cette perte à venir n'empéchoit pas tout à fait la satisfaction de cette iouissance, au moins en troubleroit-elle le goust, & les delices. Certainement les damnez auroient vne solide consolation dans leurs peines, s'ils auoient quelque assurance d'en voir la fin, & de moy, ie ne doute point que ce seul moment de leur deliurance ne respendist vn puissant lenitif sur tous les siecles de leurs cruelles rages. Il est donc certain que la confiance que les Saints ont de la perpetuité de leur bonheur, en redouble infiniment la ioye. Ils n'ont garde de murmurer, comme les petits Dieux se plaignent à Iupiter dans le Tymée de ce que l'eternité de leur vie, ne s'appuye pas sur la necessité de leur nature. Ils lisent trop clairement dans le Verbe, que les Decrets de Dieu sont des fondemens plus immobiles que toute la fermeté, que pourroient auoir les principes de leur Estre. La seule promesse de leur bien-facteur les assure beaucoup dauantage, que si leur existence estoit necessaire, parce que de toutes les impossibilitez qu'on pourroit feindre, il n'en est point de plus absoluë, que le mensonge ou l'inconstance d'un Dieu. Je me trompe, ou cette seule consideration suffit pour animer les plus lasches courages au desir de l'aduersité. Car s'il est assuré qu'un seul

moment de cette vie-heureuse , ne se puisse dignement achepter de tous les supplices d'une eternité, ne faut-il pas auouër, que vous estes infiniment obligez à la bonté de vostre Createur , de vous donner vne eternité de plaisirs, pour vn moment de souffrances ? C'estoit cette pensée qui donnoit de l'extase à saint Paul iusques à luy oster toutes les paroles , qui pouuoient exprimer son sentiment. Pour moy i'estime qu'un des principaux sujets qui vous raura dans des admirations eternelles , se prendra de cette mesme reflexion , & que Dieu ne vous paroistra pas moins incomprehensible , par cette eternelle profusion de bonté , que par la grandeur de son Estre. Et si le Ciel a esté le sujet de vos plus douces consolations , parmy la presse de vos miseres , ie ne doute point que la terre ne vous soit vn objet de complaisance, dans le séjour de vos delices car. Ce sera d'as certain paisible iouissance, que vous comprendrez le merite de l'affliction, que vous benirez les occasions que vous en auez eues , cherirez les causes qui les auront produites, & que vous remercierez tous ceux, qui en auront fourny le morif , ou bien esté les ministres. Ce sera du haut de l'Empyrée , que baissant les yeux sur cette vallée de larmes , vous regarderez avecque ioye , tous les endroits où vous aurez senty quelque disgrâce. Et puis adressant vôtres voix aux compagnons de vostre gloire, vous leur direz , avecque des paroles autant pleines de rauissemens que de gratitude: Voilà le lieu de l'exil, qui m'a conduit à ma patrie : voilà cette prison , qui m'a fait meriter ces beaux Palais : voilà encore les fers qui m'ont acquis vne liberté hors de tout esclavage : voilà le desert où ie me suis rendu inconnu aux hommes, pour me faire connoistre à Dieu. Heureuse , & beniste terre ! qui

as si chèrement conserué mes larmes , souhaitables miseres , abondantes pauuretez , glorieuses confusions, agreables déplaisirs, heureuses souffrances, traueses, maladies, fuites, bannissiemens, outrages, longue mort , courte vie, qu'à iamais l'adorable Prouidence, qui vous a ordonnez, soit adorée ! Vous estes les remedes , qui ont guery mon ame, c'est vous qui auez rompu les attaches qui me rendoient esclaué ; c'est vous qui m'auuez poussé au port , & retiré du naufrage. Mon Dieu! que n'ay-ie vn million de cœurs, pour aymer vostre Bonté paternelle : que n'ay-ie autant de bouches, pour exalter les misericordes infinies que vous m'auuez faites dans les miseres ! Preuiens ces pensées (mon cher Celestin) & ne regarde iamais tes maux , sans considerer les fruiets qu'on en retire. Je m'assure dans cette veuë , que tu auouëras auecque Socrate, qu'Anitus, & Melitus peuuent tuër, mais non pas nuire , & auec vn autre , banny de son pays, comme toy, que Rome, & les isles Gyares sont des demeures indifferentes. Que si la tristesse abbat quelque fois ton esprit à terre , releue-le tout aussi-tost au Ciel , par ces considerations. Dis à ton ame, dans l'effort de sa douleur : Pourquoi es-tu triste tandis que mon ennemy m'afflige ? Espere en Dieu, sa Bonté te sauue , quand sa main te frappe. Il ne,, reste qu'un moment à souffrir pour regner vne,, eternité. Tu es en prison ? Dieu y est auecque toy : tu ne goustes aucun plaisir ? il t'empoisonneroit : tu ne possedes point de richesses ? elles t'inquieteroient : tu es chargé de chaisnes , & de confusion ? c'est la semence de ta gloire. Et puis regardant toutes les felicitez que le Ciel te prepare , à la veuë d'une si riche recompense , releue ton cœur, & anime ton courage par ce beau Cantique.

II. POÉSIE.

*Mon ame, dans l'exil qui retarde sa gloire,
Souspire incessamment le nœud de ses liens,
Aussi-tôt que ses yeux luy donnent la memoire,
Du veritable lieu des veritables biens.*

*La cruauté du mal qui blesse sa pensèe,
Augmente de beaucoup ses plaisirs à venir,
Et les tristes douleurs dont elle est offensée,
Reçoivent du surcroist d'un si doux souvenir.*

*Le plus iuste motif d'un si cuisant Martyre.
Est d'en voir le sujet dans son iniquité ?
Et sentir que ces maux retardent cet Empire,
Que Dieu nous a promis dans son Eternité.*

*Mais qui pourra iamais se former une idée
De l'heureuse Sion séjour des bienheureux,
Et comprendre la paix dont l'ame est possédée,
Quand elle a terminé son exil rigoureux ?*

*Qui pourra concenoir cette solide ioye,
Et les charmans appas de ces chastes plaisirs,
Où le cœur satisfait, de son bon-heur se noye,
Sans souffrir du dégoust dans ses ardans desirs.*

*C'est dans ce beau séjour, où l'art, & la nature,
Pour contenter l'esprit, & pour ravir les yeux,
Disputent de l'honneur de la rare structure,
De ce Louvre eternal, qu'ils dressent dans les Cieux.*

*Le moindre appartement est d'or, & de lumiere,
La perle, les rubis, l'azur, le diamant,*

Est i mem

*Estiment à faueur d'en estre la matiere,
Et d'auoir quelque place au plus bas fondement.*

*Cette grande Cité ne cognoist point de fange,
Son paue tout d'argent n'a point de saleté,
Aussi n'est il foulé que de l'Homme, & de l'Ange,
Qui n'y peuuent porter aucune impureté.*

*L'Hyuer n'a point d'accez en cette heureuse ville,
L'Esté n'y souffle point d'importune langueur :
Contre tous nos malheurs c'est vn puissant azile :
La mort est là sans faux, & le mal sans vigueur.*

*Vn Printemps eternal y fait viure les roses.
Les lis, & les œillets, n'y sont pas d'un matin,
Vne douce chaleur tient leurs fûeilles écloses
Et leur âge n'à plus ny rides, ny Destin.*

*Dans cét heureux séjour l'effet suit l'esperance,
Puis que les fruiets sont joints à la beauté des fleurs :
Les vents n'y regnent pas avec violence,
Le Zephyre tout seul tempere ses chaleurs.*

*Les ruisseaux sont de miel, l'air est tout fait de baufine,
Le musc & l'ambre-gris font son moindre parfum :
Les mauuaises odeurs sont hors de ce Royaume,
Où l'on ne sent iamais le souffre ny l'alum.*

*Le Ciel est en repos, le Soleil immobile,
La Lune n'y fais plus son ordinaire cours :
Vn innocent agneau d'une lueur tranquille.
Y compose vn seul iour, plus grand que tous nos iours.*

*Cette troupe de Saints, qui s'est deffait des voiles,
Qui iadis luy cachotent ce bien-heureux séjour,
Surpasse les clartez des plus belles estoiles,*

Et

Et luisant de ses feux , elle brusle d'amour.

Ces glorieux Esprits à l'ombre de leurs palmes,
Tournent assez souvent leurs regards icy bas,
Ils sont pourtant tousiours autant heureux que calmes :
Quand ils pensent aux coups de leurs rudes combats.

Ils ont dessous leurs pieds ce puissant aduersaire,
Que leur bras genereux a si souvent battu :
Lors que sa vanité preparoit un suaire,
Au lieu de ses Lauriers, à leur noble vertu.

Là l'esprit , & la Chair ont fait vne alliance,
Qui ne souffre iamais de dissolution,
Car les sages conseils d'une iuste prudence,
Reglent les mouuemens de leur affection.

Pendant ce doux accord la Mort , & la vicillesse,
N'osent plus attaquer l'habitude du corps :
Rien ne l'offense plus, n'ayant plus de foiblesse,
L'esprit est son second , pour vaincre leurs efforts.

Sa vie , & son repos est de voir ce visage,
Dont le plus foible traict fait la gloire des Cieux,
Lors qu'il se veut monstrier, & qu'il rompt ce nuage,
Qui cache nostre bien sans nous couvrir les yeux.

Ce qui passe est passé, tout est en consistance,
Le flux perpetuel de la vie, & du temps,
Qui rend nostre repos sujet à l'inconstance,
Deuient sans mouuement , pour nous rendre contens.

Rien ne meurt dans le Ciel , que la Mort, & l'Ennie,
Tout ioïyt du bon-heur de l'immortalité :
Le froid, & la chaleur qui choquent nost re vie,
N'ont plus d'inimizie, dans la felicité.

Ce

Ce souverain bon-heur est dans la connoissance
De celuy qui sçait tout, & qui fait un miroir
Des diuines grandeurs de sa diuine Essence,
Pour combler ce desir que l'homme a de tout voir.

Aussi n'est-il secret que son esprit ne sçachè
Chaque Saint void le cœur de tous les autres Saints ;
Vne ialouse humeur n'a rien là qu'elle cache,
Elle ouure à qui le veut ses plus secrets desseins.

Ce commerce innocent de gloire, & de pensées,
Fait que les Bien-heureux ont mesme affection,
Et que leurs volonteZ ne sont iamais blessées
Des mouuemens diuers d'une autre passion.

Il est vray que chacun a son propre merite ;
Mais l'animosité qui naist du mien, du tien,
Ne plante dans le Ciel, ny borne, ny limite,
Car les loix de l'amour n'y souffrent qu'un seul bien.

Aux nopces de l'Agneau vne seule viande,
Qui possède le goust de toutes les saveurs :
Nourris sans deguster cette celeste bande,
Qu'il daigne préuenir de ses douces faueurs.

Leur bouche a tousiours faim, tousiours elle est contente:
Si la possession remplit tout son desir,
Le desir toutefois d'une nouvelle attente
S'offrant à son esprit, prolonge son plaisir.

Mais pendant que le goust savoure ses delices,
L'oreille sent aussi tous les charmans appas,
Que la voix, & le Luth avec leurs artifices
Adjoustent aux douceurs d'un somptueux repas.

La lettre qui soustient cette riche harmonie,

Raconte.

*Raconte les hauts-faits de ce puissant Sauveur,
Dont le bras glorieux finit la tyrannie,
Qui taschoit d'empescher l'effet de sa faueur.*

*Souhaitable Sion , qu'une ame est satisfaite
Lors qu'elle void son Roy , lors qu'elle void son Dieu,
Et que sa chaste ardeur ne peut estre distraie,
A iamais souhaiter un plus aimable lieu !*

*Les Astres sous ses pieds achement leur carriere,
Sous elle le Soleil commence tous ses iours.
Mais certes ses rayons ne font pas sa lumiere,
Nyl'ardeur de son feu , ses feruantes amours.*

*Dans ce diuin sejour separé des miseres,
Son unique desir est de nous voir fuir
Les fausses vanitez des choses passageres,
Qu'on n'aimera iamais (mon Dieu) sans vous haïr.*

*Inuincible Guerrier , Monarque redoutable,
Iesus l'Aymant du cœur, Iesus l'amour des yeux,
Abaissez vos bontez à l'estat miserable,
Qui retient vos enfans dans ces infames lieux.*

*Vous seul pouuez forcer nos tyranniques charmes,
Et rendre à nos esprits leurs douces libertez :
Vous seul pouuez tarir le torrent de nos larmes,
Et nous faire goustier celui de vos bontez.*

*Après que mon esprit aura quitté ses chaisnes,
Après que vostre main aura rompu mes fers,
Après auoir souffert mes plus cruelles gesnes :
Ouvrez-moy vostre Ciel , fermez-moy vos enfers.*

*Que si vostre bonté s'accorde à ma requeste
Communiquant le bien de sa felicité :*

Assurez

*Assenez pour tousiours cette heureuse conqueste,
Et ne la finissez qu'avec l'eternité.*

*C'est moins mon interest que ceux de vostre gloire,
Qui fait naistre le feu de cet ardent desir :
Et certes si mon gain n'estoit vostre victoire,
Je craindrois de goustier cet eternal plaisir.*

III. P R O S E.

GL O R I E V S E Maistresse des sciences (repartit Celestin) vòs discours me donnent tant de force, que ie commence de desirer avecque zete, ce que ie fuyois tantost avecque crainte. Th. Ces nuages qui couurent le Soleil, ne l'arrachent pas du Ciel, ie n'ay pas aussi creu, que la tristesse qui eclipsoit ta vertu, l'eust esteinte dans ton ame. C. J'ay des obligations immortelles à vostre bonté, d'auoir fait éua-
noüir ce qui empeschoit la serenité de mon esprit, & ensemble de m'auoir produit tout ce qui en peut augmenter la constance. Vous m'avez laissé vn seul souhait à faire, mais ie me promets que vous acheuerés ce qui manque à la perfection de vos bien-faits. Th. Demande ce que tu voudras, ie ne puis rien faire, que tu ne puisses obtenir. C. Peut-estre vous suis-je desjà obligé de la faueur que ie desire, s'il est ainsi, ie demande que vous m'en fassiez vne nouvelle offre. Th. Je m'accorde sans peine à tout ce que tu veux : ou-
ure moy promptement ta pensée. C. Je vous coniure (ma sainte Princesse) pour mettre la couronne à vostre dessein de m'instruire des dispositions qu'il faut apporter au bon vsage de la souffrance, & de me vouloir marquer clairement, & avecque distinction

R

les motifs qui nous y peuuent resoudre. Sans doute vous n'avez pas manqué à cette charité, mais comme ie ne suis pas capable de me resoudre de moy-même dans vne si grande diuersité de remedes, ie vous prie de me choisir vn epitheme, que ie puisse trouuer sans peine, & dont ie puisse me seruir avec assurance. Th. Ie suis bien aise que ton desir preuienne mon dessein : c'est vne bonne disposition à guerir en vn malade, quand il demande ce qui luy est nécessaire. Vn escholier qui presse son regent de luy donner sa leçon, tesmoigne qu'il a quelque volonté de l'apprendre. Rends toy attentif, voicy ma responce dans le mesme ordre que tu la demandes. Ie trouue trois principales conditions, pour souffrir les maux de cette vie avecque profit : la premiere est vne disposition passiuë de l'ame à receuoir tout ce que Dieu luy ordonne : la seconde la met dans l'action à sa recherche : la troisieme l'arreste avecque complaisance au choix qu'elle fait de ce qui est plus fascheux à sa nature. Et pour parler avecque suite, ie maintiens que le moindre respect que nous soyons obligez à rendre à Dieu, c'est d'accepter avec indifferëce ce qu'il iuge bon de nous enuoyer. Si c'est vn bien, qui fauorise nostre inclination naturelle, il faut remercier sa bonté : si c'est vn mal, qui la choque, il faut plier sous sa conduite. N'est-il pas raisonnable qu'un fils ne trouue rien à redire aux prouidences d'un pere, dont l'amour ne luy scauroit estre inconnüe, ny la sagesse suspecte ? Qui ne iugera, qu'il s'acquitte simplement de son deuoir, retenant sa langue dans les accidens, qui luy viennent de son ordre ? Personne n'auroit assez de douceur, pour luy pardonner ses plaintes, si son impatience alloit iusques à examiner ses raisons, bien moins si elle passoit iusques à blasmer sa conduite.

sa conduite. David auoit cette disposition; lors qu'il se dit vn pauvre cheual, qui attend son fardeau de la main de son Maistre, sans le choisir. Qu'il le charge de bois, ou de cailloux : qu'il luy mette le bas, ou vne selle : qu'il monte dessus vn valet, ou vn gend'arme, qu'il l'atelle à la charette, ou au carosse, tout cela luy ste indifferēt, il faut qu'il gagne son foin, & son auoine. L'adorable Iesus estoit dans ce sentiment d'humilité, quand les Prophetes le comparent à vne brebis. Cette innocente beste va d'un mesme pas à la boucherie, & au pasturage : il faut aussi peu de contrainte, pour luy faire voir le couteau sanglant, que l'agreable couleur des fleurs, & des herbes. Comme elle n'a point d'apprehension, pour craindre la mort, elle n'a point de bouche pour s'en plaindre. Elle va où l'on la pousse, elle demeure où l'on l'arreste; elle tient ferme sans agitation, & meurt sans resistance. Mais rien ne sçauroit mieux nous exprimer cēt abandon du Sauueur, que ses propres paroles, lors qu'il proteste à son Pere d'estre prest à receuoir les rudes coups de sa verge. Quoy que la mort qui se presenta à luy au iardin des Oliues, se fut desfigurée des plus horribles traits de la douleur, si ne pūt elle l'obliger à perdre cette resignation parfaite, ny mesme commencer vn premier mouuement d'auersion dans son aine. Vn mot absolu le deliuroit de tous ses ennemis, plus de dix legions d'esprits étoient desia en posture, pour repousser cette cohorte qui se preparoit à sa prise, & abysser la Iudée qui permettoit cēt outrage. Mais parce que la demande qu'il pouuoit faire sans imperfection, sembloit choquer l'indifference, il aima mieux mourir, que parler. A n'en point mentir, de chetifs esclaves ne doiuent pas trouuer estrange de se soumettre aux mesmes deuoirs que le fils unique

du Prince. Il y auroit de la delicatelle à vouloir vn traitement plus doux , & du crime d'estimer celuy dont nostre Dieu se sert, iniuste. C'est vne sagesse de la plus mediocre prudence , de s'accommoder aux loix qu'on ne peut changer , & de suiure vn mouuement , qui entraïne avec effort , s'il treuve de la resistance. Ou vos maux viennent purement des ordres de Dieu , comme les maladies, & les infortunes : ou de la malice des causes secondes : comme les affronts, & les trauerses. Personne n'est assez fort pour s'opposer aux volontés d'une Majesté absoluë , ny assez eloquent pour persuader vne haine enuieillie. Dieu a trop de puissance, & vn persecuteur trop peu de courtoisie : rien ne les fait ceder , que l'humiliation parfaite ou l'entiere ruine de leur aduersaire. De quelle deffence preuiendrez-vous la fievre ou la peste ? quel remede treuuez-vous contre les embrasemens impreueus, & les morts subites des personnes, qui vous sont cheres ? peut-estre que vous tiendrez toutes les langues d'une Prouince sous le cadenas, & que vous defendrés à l'enuie de mesdire ? Que s'il y a de l'aueuglement à tenter l'impossible , il y a de la discretion à suiure le necessaire. Faites ce qu'il vous plaira ; plaignez-vous avecque murmure , resistez avecque reuolte , il faudra tousiours ceder au plus fort : c'est le seul destin que connoist le Christianisme. Mais si le pouuoir de ceux qui vous affligent , rend vostre opposition inutile , vostre propre foiblesse la rend dommageable. Je n'en veux point d'autre iuge que vous : n'est-il pas vray , que l'impatience adiouste beaucoup à vos peines ? lors qu'un puissant poison attaque le cœur, plus il s'enfle, & se dilate, pour le repousser, plus il attire, & boit le venin qui le tue. Que s'il se contentoit de se recueillir en soy-même pour se conseruer,

se conseruer, la mort ne trouueroit pas l'accès que l'agitatio ou la chaleur luy prepare. l'adjoûte encore, qu'un ennemy s'anime par la resistance, & perd son animosité, lors qu'on respecte son attaque. La raison est que la colere vient soustenir la haine, si elle rencontre de l'obstacle, & que la pitié l'adoucit, si elle trouue de l'obeissance. Et partant ie conclus que l'indifference à souffrir sans murmure, ne se doit pas seulement chercher par la consideration de la nécessité, & du deuoir mais encore par celle de l'interest, & de l'auantage. Dieu veut que vous souffriez, souffrez volontiers, & vous ne souffrirez pas. Je veux dire que cette docilité à receuoir ce qu'il trouuera bon de vous enuoyer, fléchira sa bonté à vous deliurer de vos peines, ou du moins appuyera vôtres courage pour les souffrir. De cette égalité qui retient le cœur de l'homme, sans pencher, ny au bien, par le desir, ny au mal par la fuite, il faut passer à la conformité, qui ne sort de l'indifference que pour aimer, & choisir ce que Dieu veut, & ordonne. Cette disposition est sans doute plus noble, & plus parfaite que la premiere; d'autant qu'elle a plus de generosité, & qu'elle luy adjoûte vne preference d'estime, dont le motif se prend du seul iugement que Dieu fait de ce qu'il choisit à sa creature. Celuy qui reçoit le bien ou le mal de la main de son maistre avecque ce sentiment que c'est la meilleure chose, qui luy puisse arriuer, se fait par cet auen, du conseil de son Prince. De plus, s'attachant à la regle infailible des bonnes actions, il s'acquiert vne heureuse impuissance de faillir, par ce qu'il ne fuit, & n'embrasse que les choses qu'une sagesse infinie rejette ou approuue: il est iuste que nous rendions cet honneur aux volonteés d'une Majesté si absoluë, puis qu'il est autant impossible de luy con-

tre dire avec raison , que de les eluder par force. La grandeur de celuy qui commande , vous pourroit bien obliger à suiure ses ordres , sans rechercher cet agrément de sa creature , mais luy ayant donné vne liberré , & du discours, il veut que son obeïssance soit raisonnable. En quoy il vous honore de la mesme faueur qu'un grand Roy fait à ses Parlemens lors, qu'il leur commet la verification de ses Edits, & de ses Ordonnances. Or comme c'est vn crime de leze-Majesté, de resister aux iustes volonteze d'un Monarque, & vne obeïssance loüable de les receuoir , il n'y a point de doute que la reuolte aux commandemens de Dieu, ne soit sacrilege, & la résignation à ses Decrets, toute diuine. Et à considerer exactement ce sujet , n'est-il pas certain qu'un homme qui se fait le censeur de Dieu, qui examine son gouuernement, ou qui blasme sa conduite, l'accuse de cruauté ou d'imprudence ? Veritablement vn esprit qui croira Dieu assez sage, & assez bon, ne luy fera iamais cette iniure de le soupçonner de trop de rigueur, ou de mespris à l'endroit de sa plus chere creature. S'il luy arriue quelque accident fascheux , il le croira necessaire à son salut; il adorera la prouidence, qui l'aura ainsi ordonné, & mille fois il loüera la bonté qui s'interesse en ses affaires. On peut porter vos sentimens à l'amour, & à l'aueu de sa conduite par beaucoup de solides raisons. L'estime que la plus puissante, comme la plus equitable, se doit prendre de sa Bonté, de sa Sagesse. Apres ce discours, Dieu est bon , il connoist ce qui m'est propre , il veut, & peut empescher tout ce qui me scauroit nuire, ie ne croy pas qu'il y ait vn cœur assez rebelle pour resister aux fascheux accidens de sa vie. C'est la consideration de cette bonté , & prouidence paternelle , qui a tiré tant d'actes d'estime , de respect,

respect, d'amour, & de complaisance des Saints, lors mesme qu'il sembloit que le despit, & l'ennuy deuoièr pousser leur patience à condamner leur fortune. Tu as sans doute ouy parler du genereux Babyas, lequel au milieu des tourmens, & de la mort, conjure son Tyran, comme si le fer estoit plus attaché à son corps que son ame, qu'on enseuelissè aupres de luy les instrumens de son Martyre. Ce seul trait marque assez clairement, qu'il aimoit ses souffrances : mais cela n'est pas trop, pour vn Euesque. Vn grand Roy dont la memoire est encore toute fraîche, puis qu'elle ne scauroit iamais vieillir, a bien témoigné auoir la mesme complaisance. Grand, & incomparable Loüys, ie ne m'estonne pas de ce que portez la premiere Couronne de la Terre, ie scay sans doute que Dieu veut que vous soyez sa plus parfaite, & naïue Image dans le monde, puis qu'il veut, que vous soyez le Fils aîné de son Eglise Militante, comme Iesus l'est de la Triomphante. Cét auguste titre n'est pas plus à vous qu'à vos Successeurs, & à vos Ancestres. Ie voy vne chose qui vous estant particuliere, me donne vne reuerence speciale, pour vostre personne. Vous auez, tout Roy que vous estiez, aymé les souffrances, & les confusions de la Croix : voilà ce qui me rait. N'en auez-vous pas laissé vn illustre, & precieux témoignage à la posterité, ordonnant que vos chaisnes, & vos fers fussent marquez dans la monnoye, qui auoit cours parmy vos peuples, afin que l'or, & l'argent prinsènt toute leur valeur de ce qui auoit fait tout vostre merite ? Ie ne scaurois te cacher l'exemple d'vn de tes Predecesseurs, aussi a-t-il des circonstances si propres à mon sujet, que ie ne le puis laisser, sans faire paroistre peu d'inclination au dessein de t'instruire. Alexandre prisonnier au mesme lieu où il

estoit Pape, ayant appris que son cher amy Hermez, depuis peu son fils par le Baptisme, tenoit prison pour la mesme cause que luy, conceut vn ardent desir de le voir, & de le consoler auant que de mourir. A mesme qu'il formoit cette pensée, vn Ange parut qui ouurit son cachot, l'assurant que Dieu qui l'enuoyoit pour le conduire, agreoit cette visite. Le bon vieillard fondant en larmes sur le sentiment de cette faueur, accepta sa promesse, à condition neantmoins que ce seroit sans preiudice de ses fers, & de sa Conciergerie. Apres vn entretien assez court de ces deux Saints, l'Ange reprit son flambeau en main, & remena le Pape dans sa prison. De plus, luy ayant attaché luy-mesme ses fers aux pieds, il sortit de ce cachot, qu'il ferma sur ce genereux Pontife, comme Alexandre auoit auparauant stipulé cette fidelité dans sa courtoisie. Le me trompe, ou ce venerable vieillard aymeroit les miseres, qu'il sçauoit venir de l'ordonnance de son Dieu. Ce n'est pas encore allés à vne ame genereuse, de cherir le mal qu'elle souffre. Pour imiter celuy qui regardoit le sang de sa Passion, comme vn bain delicieux, il faut ressentir de l'inquietude en leur attente, & marcher avecque ioye à leur rencontre. On peut croire d'un soldat qu'il ne hait pas la guerre, quand il se resioiuit d'apprendre le jour d'une bataille, mais on ne sçauoit douter de sa generosité, lors qu'il cherche les occasions par toute la terre. Qui veut souffrir avec la derniere perfection, doit courir au deuant de l'aduersité, & mesme hastier autant que la iustice le permet, le dessein de la tyrannie. Ce n'est pas assez d'auoir de la complaisance, pour souffrir les maux que Dieu enuoye, il faut auoir de l'importunité pour les luy demander. Quand l'amour n'est pas impatient, on ne peut croire qu'il soit fort; s'il anime puissamment,

puiffamment, il faut qu'il transporte. On demande
fouvent au Ciel ce qu'on defire de fa faueur avec pas-
fion : les plus ardantes prieres font tousiours tiedes,
pour meriter des biens si precieux. L'incomparable S.
Augnstin (ie ne te puis diffimuler que i'ay de l'a-
mour pour cét homme) se voyant sur la fin de ses
iours , estendu sur vn liét , parmy les plus sensibles
douleurs de la nature , & à la veüe de la ruine de sa
chere ville , auoit assez de cœur pour desirer davan-
tage de miseres. Mon Dieu (s'escrioit cette belle ame)
ce n'est pas assez , encore plus : ce n'est rien de m'o-
ster la vie avec vne maladie ordinaire : augmentez
ma douleur pourueu que vous augmentiez ma pa-
tience : Je n'ay point d'autre souhait à faire : ma vie
n'est rien qui merite d'être mesnagé ; ne m'espargnez
pas vos tourmens. Vous estes aussi bien le Dieu des
maux, que des biens : mon aimable Sauueur , foyez
aujourd'huy magnifique en mon endroit , mais que
ce soit de vos douleurs. Bruslez , coupés icy bas mon
pauvre corps , pourueu que vous me pardonniez en
l'autre vie : c'est vne grande misericorde de souffrir
quelquefois vostre Iustice. Mon cher Celestin , ie
m'assëure que ces paroles expliquent les sentimens
de ton cœur , & que ie n'ay rien dit que tu ne sentes.
Pour confirmer cette forte resolution , souuiens-toy
tous les iours de ta vie de la courageuse Febronia,
qui n'étant plus qu'un tronc immobile , & sans vi-
gueur , prie son bourreau de l'ayder à mettre un pied
qui luy reste , au lieu où tous ses autres membres ve-
noient d'estre coupez. Souuiens-toy du grand Pa-
phnucce , lequel diuisé en quatre pieces , impetra de
Dieu sa resurrection , afin de courir à de nouueaux
Martyres. Celuy qui l'auoit deschiré par lambeaux,
& qui l'auoit precipité au fonds de la mer , n'estoit

qu'un petit persecuteur, pour souffrir avecque lustre.
 Il falloit aller à Rome treuver Diocletian le plus fa-
 meux des Tyrans, & luy demander vne Croix. Gran-
 des, & immortelles ames, que vos exemples portent
 vn iuste reproche à ces petits cœurs, qui fremissent à
 la veuë des souffrances : Escoute ie te prie, ce gene-
 reux Athlete.

III. P O E S I E.

*Cruelle douceur du Martyre,
 Douce rigueur de mon cruel tourment,
 Peux-tu souffrir que ma bouche respire,
 Et que mon cœur n'ayt plus de mouuement,
 Que pour te pouuoir dire ?
 Cruel dessein, impitoyable sort,
 Helas ! croy-tu ma triste vie,
 Si long-temps poursuiuie,
 Plus digne de pitié que d'une belle mort.*

*Dès long-temps ie suis à l'escrouë,
 Les cruantez ont tout usé mon corps,
 J'ay fait languir mon tyran, & ma rouë,
 J'ay triomphé de leurs puissans efforts :
 Maintenant ie l'aouë,
 Tant de trauaux esbranlent ma raison,
 Que mon ame toute abbattüe
 Cede au mal qui me tuë,
 Et ne peut ny quitter ny souffrir sa prison.*

*Faut-il que la fortune essaye
 Tous ses malheurs pour me faire mourir,
 Et que mon corps ne soit plus qu'une playe,*

Que

Que son aigreur empesche de guerir :
Mais que la Mort dilaye
De me donner un coup de sa faueur ;
Jamais la vigueur de la flame,
Qui possede mon ame,
N'éclipse son esclat , ny ne perd sa ferueur.

N'est ce point assez que l'orage
M'ait obligé de descendre au tombeau,
Et que la mer m'ait ouuert un naufrage,
Pour me sauuer au milieu de son eau ?
Faut il donc que sa rage
Me tienne en vain dans les derniers abois ?
Faut-il que ma perséuerance,
Marque mon esperance,
Et que pour bien aymer ie meure mille fois ?

Seroit-ce trop peu que la terre,
Triste eschaffaut de mes tristes douleurs,
Me declarast une sanglante guerre,
Sans que le Ciel pour combler mes malheurs
L'aydast de son tonnerre :
Quoy ? mon Tyran sera-t'il trop humain,
Si Dieu ne s'en rend le complice,
Et fait que le supplice,
Qui consume mon corps soit un coup de sa main.

Après auoir rendu la vie,
Et veu mon corps deschiré par lambeaux.
Cét inhumain qui me l'auoit rauie,
Me destinoit au ventre des corbeaux,
Pour nourrir son enuie :
Dans cet accez , ie creus que le Dieu fort
Touché de ma triste auenture ,

Vengeroit

*V'engeroit son injure,
Mais belas ! il pensoit à prolonger ma mort.*

*Chaque membre reprit sa place,
Mes os , mes nerfs , se mirent en leur rang,
Toute ma chair ne fut plus qu'une masse,
Tous mes vaisseaux s'ouvrirent à mon sang :
Et pour fondre sa glace
Dieu luy rendit sa premiere chaleur ;
O ciel ! quel estrange spectacle
Mon Dieu fait un miracle,
Pour rendre un trespasse capable de douleur.*

*J'ay tousiours creu que sa puissance,
S'interessoit au soin des innocens,
Et que son œil veilloit à leur deffense ;
Mais la douleur dont il comble mes sens ,
Change bien ma croyance :
Quoy ? mon Tyran sera-t'il trop humain,
Si Dieu ne s'en rend le complice,
Et fait que le supplice,
Qui consume mon corps soit un coup de sa main ?*

*Seroit-ce trop peu que la terre,
Triste eschaffaut de mes tristes douleurs,
Me declarast une sanglante guerre,
Sans que le Ciel pour combler mes malheurs,
L'aydast de son tonnerre ?
L'Amour a-t'il de si cruelles loix ;
Faut-il que ma persèuerance
Preuve ma bien-vueillance ?
Faut-il pour estre mort, mourir plus d'une fois.*

Mais quoy reprochable pensèe,

D'où

D'où peut venir cét horreur des tourmens ?

Si j'ay du cœur, mon ame est insensée

De recevoir ces lasches sentimens,

Sans en estre offensée :

N'escoute plus que cette aymable voix ;

C'est en souffrant qu'une belle ame

Fait esclatter sa flame ;

Paphnuce il faut souffrir, un Dieu t'offre sa Croix.

C'est en souffrant qu'une belle ame,

Monstre le feu de son fidelle amour ;

Sus mon amour delivre-toy de blasme,

Fais voir au Ciel qui te fait voir le iour

Les esclans de ta flame :

Que ton ardeur se monstre en tes exploits ;

Il appartient à la souffrance,

D'espreuver ta constance ;

Paphnuce il faut souffrir, un Dieu t'offre sa Croix.

Je ne fuis pas cette carriere,

O doux Amant, ô glorieux Sauveur,

Je veux souffrir, mais perdant la lumiere,

Mon doux Iesus, j'implore une faueur ;

Escoutez ma priere :

S'il faut mourir une seconde fois ;

Pour recompense de la flame

Qui consume mon ame,

Que ie meure en vos bras, ou ceux de vostre Croix.

IV. PROSE.

Comme la sapience eut remarqué le plaisir que
 ie receuois de son entretien, par l'attention que
 j'y apportois,

i'y apportois , elle adjousta : Et bien ay-ie satisfait à ton desir ? A quoy ie repartis : Madame, si ie peche, ce ne sera plus à faute de lumieres ; vous avez pris vn tel soin de mon instruction qu'on ne me peut soupçonner d'ignorance, sans m'accuser de stupidité. Je vous auois demandé les propres conditions d'une constance vertueuse , & les motifs qui nous y deuoient resoudre : vous avez pleinement satisfait à ma priere, marquant à chasque disposition , des raisons propres à ses degrez. Th. Tu as delicatement demesslé la confusion que i'en ay faite : neanmoins quoy que ce que i'ay dit, peust suffire, ie veux encore proposer plus nettement les principaux motifs de la souffrance. Vne bonne raison perd souuent sa force, quand elle est trop étendue. Le musc , & la ciuette dissipent , & perdent leurs odeurs , si l'on ne les resserre ; & le feu , quoy que fort actif , n'imprime pas l'esmail sur l'or , & sur l'argent , si l'artifice des Orfèvres n'vnit toute sa flamme en pointe. Cette consideration m'oblige de te presenter des verités toutes nuës à la façon des Logiciens, qui ne permettent pas à l'Eloquence de les vestir de ses ornemens, de crainte qu'elle ne les estouffe. I. Qui ne se resoudra de respecter les plus cruelles disgraces de la fortune , quand il considerera que la creature est tellement sujette à l'empire de son Createur , qu'il luy est impossible de s'en soustraire ? N'est-ce pas le deuoir d'un bon sujet de consentir , que son Monarque souuerain , vse de luy comme il luy plaist : s'il est innocent , il manifeste ses droits , s'il est coupable , il s'acquitte de ses debtes. Dieu est si absolu, & l'homme si sujet , qu'il est impossible de refuser ses deuoirs , quand il tesmoigne sa volonté. II. Qui ne sçait , que la bonté a des prouidences si douces , que rien ne luy peut arri-
uer qui

uer qui ne soit pour son bien , & que toute la rage des causes secondes ne sçauroit empescher l'amoureux dessein de la premiere ? De quelque malice que la haine s'arme à vostre ruine , vous auez vn Protecteur assez puissant pour tourner tous leurs assauts à vôtre gloire. III. Ne faudroit-il pas estre delicat, pour se plaindre d'un traitement, que le Pere eternel a fait à son ynique ? Quoy ? l'homme sçaura qu'il est vne rude matiere sous le ciseau de son Artisan, & il trouuera mauuais qu'on le polisse ? il sçaura qu'il est vn peu de marbre dans la main de cét excellent Sculpteur , qui luy veut imprimer sa figure, & il refusera de perdre quelque esclat , pour receuoir la diuine Image de son Fils ? IV. La souffrance est vn illustre tesmoignage de l'estime que Dieu fait de la vertu d'une personne : il appartient à la Sagesse , que l'affliction ne surpasse pas vos forces ; & partant lors qu'il enuoye beaucoup de maux à vn homme , il declare qu'il a beaucoup de fidelité , & de courage. V. Rien n'approche tant la creature de son Createur que l'aduersité, c'est pourquoy, il asseure son peuple, qu'il a seruy avec luy en Egypte ; il dit à Ioseph, qu'il est descendu de compagnie en son cachot , & qu'il ne l'a pas abandonné en ses fers. Pour la mesme raison , S. Paul se vante au sens que la bouche d'or donne à ses paroles , d'estre attaché avecque Dieu à vne mesme chaisne. Par la mesme consideration le Sauueur des hommes , les inuitant à porter sa Croix : proteste que c'est vn joug pour leur insinuer , qu'il l'a porté avec eux. Quelle consolation à vne ame affligée, de sçauoir que Dieu est avec elle, & que quand son immensité ne le mettroit pas par tout, il luy seroit neantmoins present ? A la façon que l'enseigne dans l'hypothese de cette limitation impossible, qu'il seroit
dans nos

dans nos Temples, en vertu de son expresse promesse, que nous auons dans l'Ecriture : que le Pere, & le S. Esprit sont en Iesus-Christ à raison de l'identité de leur nature avec le Verbe, & que ces trois diuines Personnes sont l'une dans l'autre, à cause de leur immanence, & de leur perichorese. Ce Saint qui se réjouissoit de ne voir plus qu'une vieille muraille entre son Dieu, & luy, parce que la douleur ruinoit tous les iours son corps, auoit sans doute cette pensée. VI. Il est avec l'affligé, comme amy, pour comparer à ses miseres, & pour en plaindre l'amertume : comme Iuge, pour en moderer l'excez, & pour en marquer le merite : comme cause, pour produire immédiatement, & par soy-mesme vos douleurs. En cette veüe, Iob dit, que Dieu, & non le Diable, luy a osté ses biens, & sa fortune, & le Sauueur appelle ce calice, que la cruauté des Iaïfs luy preparoit, vn present de son Pere, & non pas vne rigueur de son ennemy. O que c'est vne douce consolation à vn malade, de scauoir que c'est Dieu mesme, qui pique ses reins avec le calcul, qui allume le feu de la fièvre dans ses veines, & qui fait tout le mal qu'il endure ! N'est-ce pas pour rendre les plus cruelles douleurs aymables, de les voir partir de cette main amoureuse ? & n'est-ce pas assez pour conclurre, que Dieu est avecque l'affligé, puis que par necessité, la cause est où elle opere ? VII. Par les souffrances, la grace fait voir sa puissance, & sa force : Où paroistroit mieux son esclat, que dans les miseres ? Les Estoilles sont mortes, pendant le iour, & brillent au milieu des tenebres. Ce n'est pas aux hommes assoupis de sommeil, qu'elles descouurent leurs beautéz : leur ambition est plus iuste, & leur seruice plus honorable : c'est pour Dieu seul qu'elles luisent. Peut-être n'ya-t'il que la nuit
d'vn

d'une mauuaise fortune , qui fasse éclater vos verrus à la gloire de celuy, qui en doit pretendre l'hōmage. Elles ne luy rendent pas l'honneur qu'il merite, dans le repos. Il faut dans vos pertes signaler leurs victoires. Afin que l'impie comprenne , que le Dieu d'Abraham, d'Isaac, & de Iacob est tout-puissant : il faut que Sidrac , Misac , & Abdenago soient jettez dans vne fournaise. VIII. Cette Majesté Souueraine ne tire pas ce seul seruice de l'aduersité : par elle , on prepare vne agreable demeure aux vertus du Messie. L'Apôtre proteste, sur cette consideration, qu'au lieu de s'affliger de ses infirmités, il en triomphe. Quel plus grand bon-heur pourroit souhaiter vn Chrestien, que d'estre la maison, le palais, & le tabernacle viuant de l'innocence de son Sauueur ? Oüy , quand il souffre, comme il faut, & que sa gloire sert de motif à sa patience , il est le magnifique loueur de ses vertus. Oüy, le Iuge souffrant loge la douceur , l'humilité, la modestie , la mansuetude, & l'affabilité de Iesus : bien d'auantage , l'innocence persécutée , manifeste sa diuine vie. Car il est vray , & personne ne le peut ignorer , que la vie du grand Sauueur n'a été sur la Terre qu'une suite de souffrances, & d'agonies. Que si l'on veut encore se souuenir de cette admirable alliance de la ioye , & de la douleur, dont ie t'ay entretenu, on ne pourra desnier vne image de ce Dieu souffrant aux peines d'un homme iuste. A quel point d'honneur pourroit plus legitimement pretendre la creature, pour aller plus haut dans la gloire ? De moy, ie n'ay point de pensée, qui me puisse représenter vn estat plus desirable à l'homme, que celuy de la souffrance , puis qu'il tend à Dieu pour cette demeure eternelle, qu'il luy promet dans soy-même, vn agreable sejour à ses Verrus, & à son Innocence. IX. Que

si Dieu choisit l'ame du patient , pour seruir de Palais au merite de son Fils, on peut dire pareillement, qu'il dresse dans sa personne vne celebre Academie aux veritez eternelles. Je me veux expliquer : il me semble, à mesme qu'un Iuste souffre , qu'il enseigne: & qu'il n'est pas plustost le sujet de la mauuaise Fortune , qu'il deuient le Maistre des peuples. Il n'est point d'heresie ny plus dangereuse, ny plus generale que de croire que la vraye beatitude consiste dans les honneurs, les plaisirs , & les richesses. Comme le desir de la felicité est le desir de tout le monde, & que tous vos petits biens sont des images du Souuerain, il n'est que trop aisé de laisser le corps , & de choisir l'ombre. En quoy les mondains tombent dans la mesme erreur, que ces lourdaux , qui ne connoissent pas l'illusion des lunettes à diuers angles, portent la main sur l'espece multipliée & laissent la solide monnoye. Le consentement presque vniuersel appuye neantmoins cet auuglement , & les petites commoditez, que la nature treuue dans l'usage des biens , fournissent des apparences à leur tromperie. Quelle plus forte raison contre cette opinion, que l'exemple d'un innocent miserable ? certes puisqu'il est impossible de iuger qu'une Iustice infinie punisse la vertu , on doit conclurre que le deffaut des biens de la Fortune n'est pas un mal , & en suite, il ne faut pas mettre la felicité en leur iouissance. Qui ne s'estimerait heureux de seruir à l'instruction de tout un monde ? X. Dieu ne se contente pas de ruiner le mensonge par l'exemple d'un vertueux affligé: il s'en sert encore pour persuader les hommes sur cette importante verité : que la plus sensible misere de cette vie , est la plus haute felicité qu'on y possede. Qui en pourroit douter apres auoir veu , que tous ceux, qui ont quelque auantage
en son

en son amitié ont bonne part dans l'infortune? Il est bien plus aisé à vn esprit qui connoist tant soit peu la nature de cét estre souuerainement bon, de concevoir que les miserables sont heuteux, que d'accorder de l'iniustice dans vne Essence toute parfaite. Car à bien peser les choses, il faut consentir, ou que l'affliction est heureuse, ou qu'elle est iniuste. Accorder qu'elle est heureuse, c'est me donner ce que ie pretens: penser qu'elle soit iniuste, c'est condamner la souueraine Prouidence, qui l'ordonne. XI. A parler avecque sincerité, le Createur employe hautement l'homme, quand il se daigne seruir de luy à des fins si excellentes, & si nobles. Mais sans considerer l'intérest de personne, non pas mesme de celuy qui souffre, n'est-ce pas assés pour faire aimer les miseres, de scauoir que Dieu prend plaisir d'en faire largesse? Vne des pensées eternelles de l'eternel Esprit a esté de treuuer les moyés de faire pâtir les hômes. Vne creature raisonnable peut elle mieûx employer sa raison, qu'à procurer cette complaisance à son Dieu, & faire partie de sa beatitude? Ce grand ouurier veut faire des Crucifix, qui ne s'estimeroit glorieux de luy seruir de matiere? XII. On peut ajouster à ces considerations, que c'est vn incomparable bon-heur à l'homme de souffrir en cette vie, car outre que Dieu le separe par ce discernement des personnes indifferentes, il met en son ame vne marque de son amour, & vn precieux gage de sa gloire. Il faut estre ignorant pour iuger deux fois d'une mesme cause, mais il faut estre méchant, pour luy ordonner vn second supplice. Celuy qui souffre en cette vie, a donc vne assurance de ne plus souffrir en l'autre. Certes j'ay de la peine de concevoir, comme quoy vous pouuez seruir la Fortune avec que cette pensée: ie suis assuré

que celuy qui m'a créé me veut sauuer, i'ay autant de cautions de ce desir, que i'endure de maux, & de peines. Ma souffrance me donne vn titre, pour agir contre Dieu, quand il m'enuoye quelque disgrâce, il fait vne cedula en ma faueur. Oüy, mon souuerain Iuge s'oblige de me pardonuer eternellement, puis qu'il me punit dans le temps. Ne dois-ie pas reconnoistre dans ce procedé, plus de clemence que de iustice? Toutes ces raisons se prennent du costé de celuy qui dispose de vos fortunes: en voicy quelques vnes de la part de ceux, qui en souffrent les disgrâces.

XIII. S'il est iuste de souffrir, il n'est pas moins necessaire: ce grand Roy qu'on nomme raisonnablement l'espoux de la Patience, assure que l'homme vient au monde pour souffrir, comme les oiseaux y naissent pour voler. Et à dire le vray, si nous voulons considerer sa nature: nous luy treuuerons deux principes de cette necessité, dont l'vn est interieur, & l'autre estranger. Les contraires qui le composent, luy sont vn sujet de douleurs, par leur dispute ordinaire, & leurs guerres intestines. Cela peut-estre a donné sujet à la Fable de feindre, que celuy qui composa le premier homme, s'estoit seruy de ses larmes, pour destremper son argile. A peine ce Roy des creatures entre dans le monde, qu'il y treuve ses vassaux reuoltés: au lieu d'en tirer des seruices, il en souffre les insolences. Ce triste accueil luy fait couler les larmes des yeux, & esclater les sospirs de la bouche. D'où l'on obserue, que la premiere voix que l'enfant pousse sortant du ventre de la mere, n'est que la premiere syllabe des noms de nos premiers parens. Car le malle comme plus robuste forme cette voix A. & la femelle plus foible, E, qui toutes deux sont des signes de douleur comme des syllabes des noms d'Adam, &

dam, & d'Eue. De plus, n'est-il pas euident que le dessein de la nature est de le faire plus souffrir que le reste des animaux, parce qu'elle luy donne vn temperament plus delicat : que si elle met en son corps quelques parties capables de plaisir, il y en a beaucoup d'auantage de sujettes à la douleur. A cette naturelle necessité de souffrir s'en joint vne autre morale, dont les loix ne sont pas moins indispensables. Car si l'homme veut viure selon la raison, il faut qu'il combatte sans cesse : il n'est point de combat sans peine, ny de peine sans douleur. XIV. Il est vray que vous pouuez faire de cette necessité vertu, puis que toutes les miseres, qui vous arriuent, sont autant d'occasions de profit, & de conqueste. La patience est le plus iuste titre, sur lequel l'Apostre assure la possession de l'ame. Or la patience ne se pratique que dans l'affliction : cette vertu ne se nourrit que de poison & de choses qui luy sont contraires. Ne considerez donc l'aduersité, que comme vn trafic, & vn commerce, où l'homme se peut faire riche, s'il veut estre courageux. Les souffrances sont les thresors des gens de bien : ce que Dieu apprit au grand S. Dominique, lequel ayant prié vne fille autant bonne d'effect que de nom, de luy donner vn des vers, qui luy rongeoient le sein, il en reçut vne fine perle. Que si vos miseres n'ont pas quelquefois l'esclat, & la figure des pierres precieuses, elles en ont tousiours la valeur, & le merite. XV. Veritablement ie ne m'estonne pas, que l'affliction acquiere beaucoup de biens à l'homme : mais qu'elle le comble de contentement, & de plaisirs, c'est vn paradoxe, qui d'abord reuolte la plus docile creance. Helas ! où doiuent mourir toutes les ioyes, si ce n'est dans la Croix ? vous aués toute-fois l'experience des Saints sur ce sujet, qui auoient

& qui s'en acquitte mieux que celuy qui souffre pour luy plaire ? La vie de toutes les creatures ne vaut pas le moindre de ses plaisirs ; celuy seul qui expose volontiers la sienne , pour procurer les contentemens de son Dieu , merite de ne iamais la perdre. Et que peut-on feindre plus digne de recommandation, que de pâtir pour la gloire , & les contentemens de son Maistre, sans desir de recompense, sans consideration d'interest, sans auantage de plaisir, & sans recherche aucune de satisfaction. Quelle plus grâde, & plus illustre parole peut-on dire à Dieu que celle-cy ? Mon Dieu , ie souffre tout purement pour vostre amour.

X V I I I. Ie ne croy pas que vous puissiez donner vne plus genereuse preuue de vostre affection , que d'endurer de la sorte ; aussi n'avez-vous proprement que ce seul moyen de signaler vostre zele. Il appartient au Monarque souuerain des hommes de leur tesmoigner son amour, par ses bien-faits : vôtre bien-vueillance est toute sterile : si vous desirez luy prouuer que vous l'aymez , receuez paisiblement le mal qu'il vous enuoye, puisque vous n'avez point de bien à luy faire.

X I X. Que si vous craignez d'estre les ingrats de vôtre Sauueur, il faut cherir sa Croix: faire cas de ce qu'il a aimé , & prendre toutes ses amours, & ses haines. Et ainsi vous deuez auoir de la passion pour les souffrances, puisque c'est le moyen dont il a fait choix , pour vous monstrier le chaste feu de son ame. Il n'y a que l'amour , qui puisse payer l'amour, & rien que la souffrance , qui esgale la souffrance.

X X. C'est la flamme qui purge l'or, & qui raffine la matiere : iamais il ne sera demeslé de ses impuretés, s'il ne sent la braise , pour briller, il faut fondre. La coupelle n'est pas plus necessaire à ce metail, que l'aduersité l'est à l'homme: rien ne fait paroistre la vertu,

que ce qui tasche de la perdre. Celuy qui craint de subir cette preuue, se tient desia conuaincu de sa foiblesse. XXI. Simon le Magicien auoit si peu d'inclination à la Croix, qu'il feignit pour excuser sa lacheté, que la seule Image du Sauueur y auoit esté attachée. Basilides treuua vn pretexte plus iniuste, car il veut que Iesus-Christ, pour en fuir les tourmens, se soit transformé en cet heureux Cyrencen, qui le soulagea montant au Caluaire. Tous ceux qui haïssent la Croix, prennent party avec l'Herésie : au contraire c'est se declarer compagnon des Saints, & Disciple du Sauueur, que d'en aymer le rencontre. XXII. On ne peut nier que l'homme souffrant ne soit heureux de tenir rang parmy tant de personnes illustres! aussi ne doit-on pas dissimuler qu'il luy naist vne obligation nouuelle d'endurer, sur cette consideration, qu'il fait partie d'un corps mortel, dont toutes les parties sont sujettes aux souffrances. Le pied auroit mauuaise grace de se plaindre d'une picqueure, estant sous vn chef tout couronné, & meurtry d'espines. Iesus-Christ, & les Saints, sans en excepter vn seul, ont tous vescu dans les peines, & parmy les miseres. Quoy? le cœur, la teste, & les plus nobles parties du corps sentiront de la douleur, & celles qui n'en sont que le rebut, feront paroistre de la delicatesse? l'Aumosnier de Venceslas treuuoit les traces de son Roy toutes chaudes sur la glace, & sur la neige : apres l'exemple du Messie rien ne doit estre difficile. XXIII. Depuis que Dieu s'est fait Homme pour estre Patient, les angoisses ne sont plus que des objets de desir : l'vnion qu'il a faite de toutes vos miseres en sa personne, les sanctifie, & les esleue à vn estat tout diuin, & adorable. Si toutes les douleurs de la nature ont touché sa precieuse chair, pourquoy ne les

ne les receuons-nous comme de saintes Reliques, que sa prouidence vous a laissées, pour renouueller en vos esprits, le doux souuenir de son amour? Quoy la deuotion fait cas des cheueux, & des moindres superfluitez des Saints, & l'homme manquera de reuerence, & d'amour, pour les choses, qu'il sçait que son Sauueur luy a leguées par testament, quand il coniura son Pere, que le Calice où il beuuoit passast iusques à vous? XXIV. On ne sçauroit finir vn ouurage que par sa fin: celle que ie veux mettre au tissu de ces puissantes raisons, n'est autre que la beatitude, qu'on propose à la souffrance. Miserables mondains! quand vous seriez insensibles à tous les motifs que j'ay, ou touchés dans cet abregé, ou étendus dans la suite de mon entretien, ie ne croy pas que le desir d'une recompense eternelle, ne vous fist aimer des maux qui passent. Il n'y a point de chemin de la terre au Ciel que la Croix: Iesus-Christ mesme l'a tenu: il faut donc se resoudre ou de n'y arriuer iamais, ou de marcher genereusement sur toutes les traces qu'il vous a marquées. Voilà non pas ce que ie iuge necessaire pour resoudre ta vertu dans les occasions de se perdre, mais ce que j'ay creu utile pour la faire triompher. Et partant (mon cher Celestin) tu vois l'obligation immortelle qui te lie au seruice de ton grand Dieu, tu vois la douceur de sa prouidence dans l'amertume de tes maux. Qu'à iamais cette pēsee tire des sentimens d'amour de ton cœur, & des eloges de ta bouche. Ne regarde plus les miseres de ta vie, que comme les arrhes de ta gloire. Que chasque moment de ta mauuaise fortune, te soit desormais le gage d'une eternité de bon-heur: que iamais la douleur, ne te touche, que l'amour ne t'enflame. Heureuses infortunes, douces necessitez, illustre deshonneur, de-

licieux desplaisirs, diuines souffrances, que les hommes vous aimeroient s'il connoissoient vostre merite ! Ah ! que leur colere s'irriteroit iustement contre l'impatience, qui les empesche de profiter de vos faueurs ! Que leur cœur auroit de transports , & de rauillemens pour adorer la misericorde de Dieu, dans leurs plus aigres malheurs, si leur esprit en penetrait toute la tendresse ! Oüy (Celestin) leurs pensées n'auroient plus d'autre objet , ny leur amour d'autre motif , que cette ineffable douceur, qui occupe vne eternelle Prouidence à disposer leur auanture. Grand Dieu, adjoustez encore ce bien-fait à leur obligation, ouurez les yeux de ces pauvres Aueugles , faites leur voir ces mysteres cachez , descouurez-leur vostre Sageffe secrette. Je m'assure que si vous leur donnez la connoissance du merite de l'aduersité, vous leur en donnerez le desir ; toutes les plaintes qu'ils feront, ne seront plus que de doux regrets , & d'ardentes prieres , qui vous importuneront sans cesser d'augmenter leur misere, pour accroistre leur amour.

*Fin de la Consolation de
la Theologie.*





LE X E R C I C E

DE LA CONSTANCE

C H R E S T I E N N E.

Les Maximes de l'indifference Chrestienne.



O N Dieu, mon Createur , vous avez souuent dit à l'homme , que tout son bon-heur estoit dans la Croix , & qu'il auroit autant de perfection qu'il auroit de patience. Tous les sentimens de sa nature se reuolent, la raison naturelle aide ses inclinations, & tasche de le rendre infidelle. Je croy pourtant cette verité (ô mon Dieu) mais puis que la nature s'oppose à la creance que ie dois à vos paroles , fortifiez mon esprit de vostre Grace, & l'establissez fermement dans la foy de ce Mystere : que pour vous plaire, il faut souffrir, & que la plus souhaitable preuue de vôtre amour, c'est ce qui peut sembler vn rigoureux effet de vôtre haine. Il est temps (mon aimable Pere) que ie paroisse digne de l'adoption., qui me rend vôtre fils. Donnez-moy assez de lumiere pour voir ce que vous desirez de moy, & assez de courage pour accomplir vos diuines volontés. Je vous en coniuure par les merites de vos Saints, & beaucoup plus, par les vertus de ce premier né , à qui vous ne refusés rien de ce qu'il vous demande

284. *L'Exercice de la constance Chrestienne.*

demande. Sa viande a tousiours esté de faire vôtre volonté : & lors que vous l'avez ordonné, les douleurs de la Croix ont esté les delices de son ame. Vne parfaite indifference est la meilleure disposition que vous desiriez dans nos ames, donnez-la moy afin d'estre vne table rase, où vous puissiez coucher sans opposition tous les decrets de vostre sainte Prouidence. Denant que d'entrer dans le Monde, j'estois vne pauvre creature, sur qui vous iettiez vos projets sans resistance, pourquoy aurois-je l'vsage de la liberté pour en retarder l'exécution ? Le plus iuste arrest de nos irresolutions, & le plus auantageux choix, que nous puissions faire, c'est de rendre nos volontez conformes aux vostres, & suivre vos diuins attraits. Que la resignation à vos ordonnances soit donc désormais toute la liberté de mon ame, & que ie n'aye point d'autre inclination que de suivre la vôtre. Celuy qui se peut ajuster aux ordres de Dieu se rend impeccable : celuy qui s'en separe, ne fait iamais rien qui soit digne de loüange. Quand vous ne m'auriez pas appris, que *mourir ou souffrir*, pour l'amour de vous, est le desir d'une bonne ame : vostre fidele seruante Therese, me persuade assez que c'est la seule deuise du Chrestien, comme c'est son vnique gloire. Sainte Mere de mon Sauueur, innocent sujet de ses douleurs, imprimez ce desir en mon ame, & si ie n'ay point de cœur pour aimer les trauaux, que ie n'en ayé plus du tout pour viure.

Premiere Maxime.

O D I E U de mon cœur, vous daignez nous reueler dans vos escritures que, tout ce qui arriue dans le monde est sujet à vostre direction, & aux vœux

veuës de vostre sagesse. Vne fleur ne se fane point en nos iardins, vn oiseau ne vole pas en l'air ; vn cheueu ne tombe point de nos testes , que vostre Sagesse ne preside à ces petits euenemens. Peut-on croire qu'un peu de paille vous soit plus cher que vostre chef-d'œuvre , & que vous oubliés l'homme appliquant vos diuins soins à des choses qui ne sont que pour son seruice ?

Seconde Maxime.

Vostre prouidence est appuyée sur vne exacte connoissance de toutes choses , puis que tout est à nud deuant vos yeux ; sur vne puissance infinie, puis que rien ne vous est impossible ; sur vne bonté demesurée, puis que nous sommes la prunelle de vos yeux. Qui se peut défier de sa conduite ? Celuy sans doute , qui ne sçauroit pas que vous sçauiez tout , que rien ne vous est impossible , & qui a assez de malice , pour croire que vous manquez de bonté ?

Troisiesme Maxime.

Sainct Paul nous assure, sur l'inspiration que vous luy en donnez , que toutes choses pour fâcheuses qu'elles soient , tournent au bien de vos Fideles. Et partant , il faut , ou renoncer barbarement à vostre amour, ou esperer, en vous aymant , dans toutes sortes de rencontres. Si vous me faites du bien , ie publieray vos misericordes ; si vous permettez que ie souffre du mal, j'adoreray vostre Iustice.

Quatriesme Maxime.

Vostre pouuoir est sans restriction , & vostre domaine sans limites. Nos personnes, nos vies, nos facultez

cultez , & toutes nos actions font à vous , puis que vous estes nostre Createur, nostre Conseruateur, nostre Sauueur, nostre Dieu, nostre Tout. Vouloir quelque autre chose que ce que vous voulez , c'est limiter vostre puissance , & donner des bornes à vostre Empire.

Cinquiesme Maxime.

Outre que la creature ne sçauroit mieux estre que dans l'ordre , où son Souuerain la veut, ny suiure de plus iustes voyes que celle de sa Prouidence , la sujction , qui nous soumet à ses decrets , est si legitime, qu'on ne la peut violer à moins que d'estre sacrilege. Qui se pourroit mieux placer , & se mettre en vne plus souhaitable disposition que celle que nostre Dieu nous a choisie ?

Sixiesme Maxime.

La vie des bien-heureux est de faire la volonté de Dieu, & de se soumettre à ses ordonnances. Peut-on imiter vne plus innocente vie que celle des Saints, & suiure de plus iustes ordonnances que celles d'un Dieu ? Il y a neantmoins cette difference entre un homme qui obeït à Dieu dans le Ciel , & celuy qui s'accommode à ses volontez en Terre, que le premier suit tousiours ses inclinations , & que le second les doit le plus souuent combattre.

Septiesme Maxime.

Saint Paul, la glorieuse Vierge, Iesus-Christ mesme, ont tousiours suiuy les Ordres de Dieu , iugeans tres-iuste ce qui luy estoit agreable. Saint Paul endure mille iniures, la Vierge souffre le martyre : Iesus se prostituë

se prostituë aux douleurs de la Croix , Dieu le veut, il est donc equitable. Si le Fils naturel de Dieu, si la tres-Sainte Mere , si son intime Amy passent parmy les Croix, pourquoy vn malheureux esclave en esui-teroit-il le rencontre ?

Huictiesme Maxime.

Nous reconnoissons la Souueraineté de Dieu, quand nos sentimens suiuent les decrets : Quand nous faisons nostre volonté nous adorons vne idole. Que c'est vn deplorable malheur de quitter Dieu, pour donner de l'encens à vn monstre ou à vn phantome ! La propre volonté est vne plus ridicule , & plus cruelle diuinité , que les Chats , & les Crocodiles de l'Egypte.

Neufiesme Maxime.

Pour posséder son ame dans le repos d'une sainte paix, & gouter le Paradis de cette vie , il faut croire que toute nostre sagesse ne peut seruir qu'à nous tromper , & que nostre infallible conduite ne peut nous venir que de Dieu. Voulons-nous estre Martyrs sans merite , & marcher avec danger de nous perdre ? il faut suivre nos lumieres, & ne rien reconnoître que nostre prudence.

Dixiesme Maxime.

Sortons hors de l'indifference , arrestons-nous à nos choix , la Prouidence de nostre souuerain Monarque trouue tousiours ses fins : Ne vaut-il pas mieux se soumettre par amour à ses diuins vœux, que de s'y laisser attirer par contrainte ? Vn valet se fait traîner par force, vn fils se laisse amoureux-ement conduire.

conduire. Aymons le commandement de nostre Maître, nous ne craindrons pas la baguette.

Les Affections de l'indifference Chrestienne.

L'IMPUISANCE de l'homme est si grande, qu'il ne peut mesme faire de bons souhaits, si la grace de Dieu ne peuent les mouuemens, & n'excite sa paresse: C'est dans les veuës de cette foiblesse, ô mon Dieu, que par vn aueu tres-sincere de mon peu de pouuoir, ie reconnois la parfaite dépendance que j'ay de vostre secours. Il m'est autant impossible de vouloir, & de pratiquer le bien, qu'à vn mort de marcher. Si l'impression de vostre grace ne me pousse, ie suis aussi sec, & immobile qu'un squelete. Neantmoins ie suis tres-aïse de ne pouuoir rien, parce que ce defect m'attache à la necessité de vostre concours; puis que vous me commandez d'aymer la vertu; ie vous en demande les plus saintes affections.

Premiere Affection.

M'appuyant donc sur l'ayde de vostre grace, ie fais vne resolution irreuocable, de me tenir indifferent à tout ce qui me peut arriuer pendant ma vie, soit qu'il regarde les conditions de ma naissance, l'estat de ma vie, l'inclination de mes humeurs, les qualitez de mon esprit, & les forces de mon corps, soit qu'il touche les accidens du dehors: comme la pauvreté, le mespris, les hontes, l'opprobre, voire mesme la mort.

Seconde Affection.

Ie veux, ô mon Dieu, que dans les euénemens de
ma vie,

ma vie, le respect de vostre diuine Majesté force mes sentimens , & estouffe toute ma raison, en sorte que ma bouche ne prononce aucune plainte , ny mesme que mon cœur n'en forme pas le desir. Que s'il échappe vn seul mot à mon impatience , ie renonce à ses murmures , pour me soumettre parfaitement à vos decretz. Adorable Mere de Iesus , j'attends ce courage de vos faueurs.

Troisiesme Affection.

Et parce que vous me permettez de sortir de l'indifference , pour honorer vos volontez , ie pretends me complaire dans tout ce qui m'arriuera , comme en vn objet de vostre diuine complaisance , & comme en vn dessein qui est conduit par vostre supreme sagesse. N'est-ce pas dequoy deuenir glorieux, de sçauoir que les pensées eternelles de mon Dieu s'accomplissent en moy, quand mesme ce seroit au preiudice de mes inclinations ?

Quarriesme Affection.

J'adiousteray à cette sainte complaisance , vne estime tres-aduantageuse de ces accidens, entant qu'ils sont dressez, & conduits par vos sages conseils: protestant de tout mon cœur, que ie ne fais cas de quoy que ce soit, à l'esgal de la soumission , qui vous est deuë. Et si ie pouuois autant meriter dans les ioyes que dans les peines , ie voudrois que vostre seule inclination fust le seul motif de mon choix.

Cinquiesme Affection.

Pour mieux porter mon esprit à l'homme d'un tres-humble vassal, ie coniure vostre bonté toute pa-

ternelle, d'affermir, la resolution que j'ay d'estouffer genereusement mes passions de tristesse & d'anxiété par l'ordinaire pensée du bien qui me reuient de l'exécution de vostre bon plaisir. Je ne veux estre triste que quand il vous plaira, & ie renonce de bon-cœur à la ioye, lors qu'elle ne vous sera pas agreable.

Sixiesme Affection.

Aux mesmes fins, ie regleray mon amour, mon esperance, mes regrets, & mon desir, sur les saintes Loix de vostre volonté, accommodant, & formant mon esprit aux éuenemens libres, ou necessaires, qui m'arriueront, comme aux effets des causes que vostre Prouidence employe, dresse, ordonne, & dirige pour operer en moy vne parfaite sujétion à vostre Empire.

Septiesme Affection.

Sur tout, mon estude sera d'estre indifferent en toutes choses (l'exécution de vos commandemens, & de vos conseils reserüée) ne me portant pas d'auantage à la santé, qu'à la maladie: ny à viure qu'à mourir. L'amour des creatures ne m'étant pas de plus grand poids que leur infidelité, ny leur faueur que leur tyrannie.

Huictiesme Affection.

Cette mesme indifference moderera mes inclinations, dans les succès qui arriueront à mes parens, & à mes amis, empeschant de tout mon pouuoir, que leur mal-heur ou leur prosperité ne me touche, ou au moins ne m'engage. La seule attache de mon cœur sera desormais le soin de vous plaire. Ah ! que ie serois malheureux si ie deuois plier à tous les vents qui m'agitent,

m'agitent , & si ie n'auois de la consistance que lors que ce qui est à l'entour de moy n'aura plus de mouvement.

Neufuiesme Affection.

Pour arriuer à ce degré de perfection , ie m'efforceray avec le secours de vostre grace , de dégager mon cœur , & de le déprendre de toutes les liaisons vicieuses , qui le peuuent attacher aux objets sensibles. Vne creature raisonnable ne doit-elle pas préférer vos desirs à ses propres satisfactions ? Helas ! mon-Dieu , qu'elle seroit indigne de vôtre amour , si elle estoit si peu soigneuse de vous plaire. Quand vous m'aimez pour vous , vous m'aymez pour mon souverain bonheur : lors que la creature me recherche , elle veut trouuer son diuertissement.

Dixiesme Affection.

A cette fin ie me veux défaire de tout empressement , sans que mon amour haste mes desseins , ou que ma paresse les retarde ; & pour estre entierement maistre de mon cœur , ie soumetts toutes mes inclinations à vos desseins, protestant de violence , si vne creature m'oblige à soy contre vostre diuine volonté. Mais puis que ie ne peux acquerir cela , que dans la conformité parfaite aux idées eternelles que vous auez de ma perfection, que le sang de vostre aimable Fils Iesus , que le desir que vous auez de mon salut, & l'aueu de mon impuissance , me meritent cette incomparable faueur.

Maximes de la conformité Chrestienne.

MON pitoyable Seigneur, vous connoissez la foiblesse de vos pauvres esclaves ; tout ce qui choque leur aise, esbranle leur esprit ; tout ce qui surprend leur attente, surmonte leur courage. Appuyez-moy, de peur que ie ne tombe ; esclairez-moy, de crainte que ie ne m'esgare. Les plus effroyables objets de la nature se presentent à moy ; leur seule veüe m'afflige, la resignation que vous me demandez à les souffrir, m'estonne ; secourez-moy, ou ie me perds,

Premiere Maxime.

Il est necessaire de trouuer vne conduite infailible dans les actions de nostre vie, si nous en desirons le succez heureux. La prudence humaine ne fait que faillir, ses lumieres sont foibles, & son adresse dangereuse : c'est donc vne indiscretion de se fier à elle, & vne sublime sagesse de s'appuyer sur celuy qui ne nous peut tromper. Je veûx que cette Prouidence nous soit cachée, les effets en sont sensibles. L'ame qui anime nos corps, ne se laisse pas voir à nos yeux.

Seconde Maxime.

Nous ne sçaurions mieux choisir, que de prendre ce que Dieu nous presente. Il sçait nos besoins, il void leurs remedes. La Creature qui se determine contre la conformité, embrasse son malheur. O Dieu ! qui sera assez aucugle pour se porter arbitre de ce qui luy est conuenable, puisque nous pouuons aussi peu choisir ce qui nous est bon, que le faire, si nous ne suiuous l'idée eternelle qui nous conduit.

Troisiesme

Troisiesme Maxime.

Celuy qui n'a point d'autres résolutions que celles de Dieu , est tout-puissant. Jamais il ne neige qu'à sa volonté : tous les foudres qui tombent , ne tombent pas contre son gré. Il permet les naufrages dans la Mer , il dispose des biens , & des maux sur la Terre. Quiconque sçait vouloir ce que Dieu veut, gouverne toute la nature. Qui refusera de donner le mouvement aux Cieux , de tenir les Elemens dans leur place , estant aisé de vouloir que tout cela se fasse comme il se fait.

Quatriesme Maxime.

Les troubles de nostre esprit viennent des difficultés qu'il a de se refondre. Quand Dieu nous oblige à sùyre son choix, il nous presente la paix. Il faudroit estre brutal , pour se plairre à la confusion , & n'auoir iamais connu la guerre , pour cherir la funeste cause , qui nous l'inspire.

Cinquiesme Maxime.

Nostre Dieu est sage, il ne nous peut tromper ; il est bon , il ne sçauroit le vouloir. L'Homme a assez d'ignorance, & de malice, pour l'un, & pour l'autre. Arrêtons-nous à Dieu , laissons l'homme. La sagesse de Dieu choisit tousiours ce qui est le meilleur , sa bonté nous le desire , nos lumieres nous conduisent souuent à l'erreur , & nostre inclination nous pousse dans le mal. Désions-nous de nous-mesmes , & prenons vne entiere confiance en la bonté de nostre Dieu.

Sixiesme Maxime.

Quand nous treuverions nostre perte dans les offres de nostre Dieu, nostre extrême seruitude demande de la conformité de nous. C'est le deuoir d'un sujet d'auoir son Prince pour sa loy. Il n'est pas vne creature qui ne souffre dans ses inclinations particulieres, pour s'accommoder au bien general du Monde. Pourquoy n'aurois-je pas la mesme obeïssance que les pierres, les elemens, & les bestes, qui renoncent à leur instinct, pour s'ajuster à la volonté de leur Createur ?

Septiesme Maxime.

Nostre amour est des-interessé, lors que la seule volonté de Dieu se fait en nous. Vne marque que nous aimons purement nostre Dieu, c'est quand nous prenons ses inclinations en rejettant les nostres. Si nous consentons aux volontez de Dieu qui nous sont douces, il y a danger que nous n'aymions que nous, & que le propre interest ne soit la seule cause de nostre obeïssance.

Huictiesme Maxime.

Iesus-Christ n'a iamais fait vne de ses volontez en Terre, le decret de son Pere a tousiours esté sa conduite. Puis-je auoir vn plus beau, & plus diuin exemplaire qu'un Homme-Dieu ? Et n'est-il pas iuste que l'esclaue ait au moins autant de soumission que celuy qui est fils par nature ?

Neufiesme Maxime.

Toute la connoissance des Saints dans la gloire
estant

estant de Dieu, il leur est impossible d'auoir de l'amour, & des desirs, pour vn autre objet que luy, ou pour nous, à cause de luy. O ! que nous serions heureux, si nous pouuions imiter cette diuine vie ! nous n'aymerions que Dieu, nous ne desirerions que Dieu, & nous aymerions, & desirerions pour l'amour de luy, tout ce qu'il aimerait, & desirerait pour nous : fust-il doux, & agreable, fust-il aspre, & austere à la nature. Ce seroit assez que nos plus mauuais accidens fussent aimez, & desirez de Dieu, pour meriter nos desirs, & nos amours.

Dixiesme Maxime.

Vn homme est impeccable, s'il est conforme aux desseins de Dieu : parce que Dieu ne peut aimer le vice. Helas ! qui ne desireroit cette heureuse impuissance, de mal-faire, & qui ne voudroit désormais tout ce que Dieu veut pour ne rien vouloir de ce qu'il ne veut pas ? Nous ne pancherons iamais au peché, si nous sommes immobiles dans le propos de n'auoir point d'autres projets que ceux de nostre souuerain Maistre.

Affections de la conformité Chrestienne.

TOVTES les inclinations de la creature cherchent le plaisir ; que puis-je attendre des mēmes, ô mon Dieu, sinon que la moindre souffrance qui se presentera, m'escarte de vostre amoureux Empire ; Vostre grace me peut arrester, mēme dans le choix du martyre, & de tout ce qui est de plus effroyable aux yeux. Ne me refusez pas ce qui me peut rendre conforme à vostre desir ; puis que vous desirez que i'y sois conforme.

Premiere Affection.

Je renonce de bon cœur à tout ce qui peut flatter ma nature ; j'aime , & ie chers ce qui luy est contraire. Quand j'auray de l'inclination pour quelque objet, ie me tiendray suspect dans sa recherche , craignant de n'y trouver qu'une pure satisfaction naturelle, & non pas vostre volonté diuine.

Seconde Affection.

Pour trouver doux vn Calice, quelque amer qu'il soit , ie regarderay tousiours l'aimable main de mon Dieu , qui me le presente, sans m'arrester à la malice des causes secondes , qui me le meslent. Le desir que mon Dieu a que cette medecine me profite , est plus capable de me la rendre douce , que la malice de mes ennemis n'est puissante pour me la rendre inutile.

Troisiesme Affection.

J'appriuoiseray mon esprit, par la veüe , & la pensée des choses les plus fascheuses , & souuent ie mesureray mon courage, sur l'exemple de ceux qui souffrent beaucoup. La familiarité que ie prendray avecque les souffrances me rendra leur rigueur supportable, & la fidelité de vos Martyrs fera rougir mon peu de courage.

Quatriesme Affection.

Cette parole de vostre seruiteur saint François Xauier ; Encore plus, Seigneur, Encore plus, me fera blasmer ma lascheté ; à son imitation , ie diray amoureusement ces paroles : Helas mon Dieu ! il y a dix, vingt,

dix , vingt , trente ans que ie vous connois ; Hé ! qu'ay-ie souffert pour vostre gloire ? Depuis que ie souffre , ie souffre comme les damnez , sans consolation , & sans merite , parce que ie ne souffre rien pour vous.

Cinquieme Affection.

Est-il question de perdre mes biens , mes amis , mes parens ? ie me plaindray que leur mort soit vne des necessitez de toute la nature , & de n'auoir rien de cela que ie puisse offrir librement à mon Dieu. Je diray dans mon cœur , & de tout mon cœur : Mon Dieu ie voudrois bien que la vie , & la mort des miens fust en mon pouuoir. O que volontiers ie vous sacrifierois vn Isaac , si vous le desiriez !

Sixiesme Affection.

Lors que la complaisance des creatures me flat-tera , ie diray au fond de mon ame : Mon Dieu ? si i'ay le merite qu'on me donne , ie l'offre volontiers au pied de la Croix de vostre aimable Fils. Que ie souffre quelque atteinte en ma reputation : pourueu que mon blâme ne vous offense point , il m'agré.

Septiesme Affection.

Mon grand Dieu ! le doux Fils de vostre cœur a embrassé la Croix : parce que vous le vouliez : si le Fils n'a rien trouué d'injuste dans vne si rude obeissance , l'esclau doit-il murmurer de vos ordonnances , & gouter avecque plainte , ce que I E S V S a saouuré avecque plaisir ?

Huictiesme Affection.

On a veu des saints , qui ont esté si fideles à vos

T 5

commandemens, que rien ne les a peu separer de l'obeissance. Vous les avez faits l'opprobre du Monde, & le rebut des hommes. Le mespris, & la confusion leur a agréé, parce qu'ils partoient de vos diuines dispositions. Ces personnes-là estoient de la mesme nature que nous ; pourquoy n'aussions-nous pas la mesme resolution qu'elles ?

Neufviesme Affection.

Les enfans se sont estendus sur les brasiers, & couchés sur des rouës ; parce que vous le vouliez. Le cœur est demeuré plus immobile dans le dessein de souffrir, par la seule volonté de vous plaire, que leur corps aux rouës, & aux gibets, par les cloux, & les cordeaux, qui les y attachoient.

Dixiesme Affection.

Desormais, ô mon Dieu, toutes les rigueurs de ma vie, & toutes les austeritez de ma condition, seront adoucies par cette douce pensée : Je suis le Martyr de l'amour de Dieu, Iesus est mon exemple, mon Dieu m'a choisi pour faire voir ce que peut son amour dans vne ame : il a crucifié son Fils deuant mes yeux, afin de monstrier ce que ie deuois imiter. Puis-je manquer d'adresse sur vn tel modelle, & de courage à la venue d'un si glorieux exemple ?

Maximes de la Patience Chrestienne.

IL est iuste ; mon doux, & pitoyable Pere, que la desobeissance de vos Enfans rebelles soit chastiee. Puis que nous auons voulu nous priuer de l'immortalité, parmy les delices du Paradis terrestre, il faut que

que nous souffrions mille morts parmy les miseres de ce monde : Puis que nous auons perdu l'innocence originelle auecque Adam , Il est équitable que la Iustice de nostre souuerain Maistre nous donne auecque luy en proye aux douleurs, aux ennuys , aux maladies , à la tristesse , & à tous les maux de cette vie, dans les veües qu'il vous plaist me donner de mes peines, ô mon Dieu, i'adore vostre diuine Iustice , & baise amoureuxment la main qui me chastie.

Premiere Maxime.

Rien n'est plus dommageable à l'homme que la prosperité, elle nous porte aisément dans le vice , & nous jette dans l'oubly de Dieu. L'endurcissement de cœur est vn de ses effets , l'insensibilité à tous les doux attraits de la vertu, est sa production. C'est donc vn grand malheur , que d'estre heureux , & vn bien inestimable que de souffrir quelque misere.

Seconde Maxime.

Les afflictions nous humilient , nous ramencent à Dieu, moderent l'excez, & la fougue de nos passions, détachent nostre cœur de l'affection des objets sensibles. Mon Dieu ! que ce m'est vn grand bien (s'escrie Dauid) que vous m'ayez humilié. L'affliction est le remede asseuré des vieux pechés, & vn salutaire preseruatif à nos nouuelles cheutes. Si nous sommes malades, receuons volontiers la medecine qui nous doit guerir.

Troisiesme Maxime.

Vne maladie , vn fascheux succez , vne disgrace vous persuade mieux les mespris du monde, que toutes les

res les raisons de la Philosophie. O l'excellent Maître, que le malheur : Tout ce que la Morale a de bonnes raisons, ne nous peut retirer du vice, & vne petite disgrâce nous en rend ou incapables, ou dégoûtez.

Quatriesme Maxime.

Dieu connoist nos inclinations, il préuoit les pechez que nous ferions dans la prospérité, il sçait que nous perdrons nostre ame parmy les delices : son cœur est plein de pieté, quand il nous priue des contentemens sensibles, il nous oste les causes de nostre ruine. Je dois donc expliquer en bonne part les miseres qu'il m'enuoye, & recevoir avec vne confiance tres parfaite de sa bonté, les plus rudes souffrances de ma vie.

Cinquiesme Maxime.

Vn homme dans l'affliction ; c'est vn grain d'or dans le creuset ; ses flammes l'espurent, & le raffinent. Le Sage nous apprend que nostre grand Dieu se sert de ce moyen pour nous sonder, & nous reconnoistre. Voulons-nous tousiours estre inconnus, & sans approbation ; il faut fuir la touche de Dieu, & résister au dessein qu'il a de nous purifier.

Sixiesme Maxime.

Vne ame qui souffre assez en cette vie, pour l'amour de Dieu, na plus rien à souffrir en l'autre. Helas ! nous sommes damnez de la peine du dam, tandis que nous ne voyons pas nostre bon Dieu : Assujettissons-nous encore icy bas à la peine du sens, & rien ne nous reste à souffrir hors de ce Monde. Il n'y a point de Purgatoire pour ceux qui souffrent-volontiers en
cette vie;

cette vie ; mais il n'y a point de paradis dans le Ciel, pour ceux qui le veulent auoir en Terre.

Septiesme Maxime.

La grace des Bienheureux est le prix de leurs souffrances. Souffrir vn moment penible, c'est meriter vne eternité glorieuse. L'affliction ne retire pas seulement de l'estat du peché, mais elle nous establit dans le merite de la gloire. C'est elle qui nous donne ce que vaut le Paradis, & qui nous met en main de-quoy achepter vne couronne eternelle.

Huictiesme Maxime.

Vn Malade se fait couper le bras, pour prolonger sa vie ; vn soldat s'expose à vne infinité de trauaux, pour la gloire : vn marchand va chercher vn peu d'or au trauers de mille dangers, & de mille naufrages. Helas ! les hommes n'auront-ils du mespris, que pour le Ciel ? sera-t'il dit que nous souffrions les incommoditez de la Mer, & que nous nous exposions aux hasards de la guerre, peut-estre pour trouuer la mort ou le naufrage, & que nous n'ayons pas vne pensée pour le Ciel ?

Neufiesme Maxime.

Tous les Saints ont passé par le martyre des souffrances. Dieu se vante de la patience de Iob, comme d'vn triomphe acquis à sa gloire, il inspire Saint Paul de faire plus de cas de sa Croix que des delices, Saint Iean dit parmy ses fers, que Dieu luy a basti vn Empire : Les chaisnes, & les fers ne seruent que pour rendre la gloire inseparable de luy. Voulons-nous glorifier Dieu ? Souffrons.

Dixiesme Maxime.

IESVS est venu au monde , pour y honorer son Pere en la plus haute maniere qui estoit possible ; il a embrassé la Croix, & choisi vne vie pleine de martyres. A cet effet il a priué son corps des consolations, non seulement sensibles , & naturelles, mais encore de la gloire des bienheureux, se rendant par vn nouveau miracle, sensible dans la Beatitude, en vne partie de soy-mesme, afin d'offrir à son Pere vn glorieux souffrant. Quelle lascheté seroit-ce à l'homme de ne vouloir rien souffrir pour vn Dieu, qui a fait vn miracle de trente-trois ans , afin de souffrir toutes ses miseres.

Affections de la patience Chrestienne.

VNique objet de mes desirs , mon Dieu , mon Createur , que toutes les creatures vous benissent de la grace que vous me faites , de connoistre le merite de la Croix, & la gloire des afflictions. Qu'à jamais soyez-vous adoré, de m'auoir descouvert, que l'estat d'une penible souffrance est le plus heureux estat de l'homme. Je vous remercie (ô mon aimable Pere) de m'auoir reuelé la gloire dans le deshonneur, la ioye dans l'angoisse, & le souverain bonheur dans la Croix. A l'aide de vostre diuine grace, j'espere de m'establir si solidement dans le dessein de souffrir, que ie meriteray d'être vn des chers enfans de vos douleurs.

Premiere Affection.

En suite de ceste reconnoissance, ie vous remercie
de ce

de ce que vous auez remply cette vie de tant d'amertumes, étant bien aise d'auoir ces occasions de desintéresser mô amour, & de vous seruir sans complaisance. Il n'appartenoit qu'à vostre bonté de changer nos iustes chastimens en vn riche, & honorable sujet de gloire, & de receuoir le supplice de nos forfait, comme vn merite digne de vos couronnes.

Seconde Affection.

Sur cette créance j'accepte sans regret, & mesme ie reçois avecque plaisir tous les fascheux euene-
mens que vous me presenterez, souhaitant de tout mon cœur, que vostre adorable prouidence regne sur moy au desauantage de toutes mes inclinations, & contre le gré de la nature. Si ma chair se reuolte contre vos volontez, mon esprit y consent.

Troisiesme Affection.

Pour tesmoigner le sentiment de mon cœur, ie parleray des souffrances avec honneur, & estime, & vous en remercieray aussi-tost que vous me les enuoyerez. Ie veux aussi marquer exactement les iours de mes plus grands defastres, afin de celebrer par des Festes interieures vostre sainte conduite, & adorer l'honneur que vous m'auiez fait.

Quatriesme Affection.

Quand mon cœur sera noyé d'angoisses, & d'afflictions, ie me glorifieray de ce bonheur, forçant toutes mes inclinations à l'agrément de ce Calice. Ie prieray mes plus fideles amis de rendre graces à vostre bonté des douces misericordes qu'elle me communique, & i'interposeray mesme le credit du
grand

grand Maître de la Croix I E S V S, afin d'en remercier son Pere.

Cinquième Affection.

Dans la veüe , & dans l'offre de toutes mes Croix, l'exemple des voluptueux me picquera d'un genereux desir à la recherche des souffrances ; voire mesme ie tascheray de rendre mes ardeurs plus vives , & plus fortes, puis que l'objet de mes affections est plus innocent, & plus iuste. J'auray honte que l'inclination brutale puisse plus sur l'homme que la volonté d'obeïr à son Monarque.

Sixième Affection.

Afin d'imiter les agonies de Iesus vostre aimable Fils, ie veux (ô mon Dieu) tous les iours de ma vie crucifier mon cœur , par de poignantes douleurs de vous auoir offensé, & par de sensibles regrets de voir qu'on vous offense. Comme vostre cher Fils a toujours porté la Croix dans son cœur , ie propose de crucifier le mien par vne sensible comparaison de toutes ses douleurs.

Septième Affection.

Mille fois le iour, & plus souuent, ie vous offriray toutes mes ioyes , & vous demanderay toutes les peines prenant les paroles de saint Augustin , & son sentiment si ie puis , Mon Dieu augmentez ma douleur , pourueu que vous connoissiez ma patience. Je ne puis assez souffrir pourueu que vous me donniez assez de courage.

Huitième Affection.

J'adresseray ma voix aux creatures insensibles , ie
parleray

parleray à toutes celles qui me pourront affliger , & les prieray de m'affliger , les seruant mesme de ma main , dans le mal qu'elles me feront. Ce sera avecque plaisir (mon Dieu) que ie prendray toutes les innocentes armes de la Croix,& les doux instrumens de vos peines.

Neufiesme Affection.

Tout ce qui blessera mes sens, treuuera des respects & des honneurs dans mon ame. Iamais ie ne ietteray la veuë sur la haire & la discipline , qui m'aident à ranger mon corps aux volontez de mon Dieu , que ie ne les baïse interieurement , leur donnant les plus douces œillades d'amour que ie pourray. Ce qui sera le plus rude à mon corps , sera le plus cher à mon cœur.

Dixiesme Affection.

Sauueur de mon ame , mon aimable I E S U S , ie vous coniure par les sensibles douleurs de vostre vie, & par les tristes agonies de vostre mort , d'acheuer vn desir que ie ressents en moy , & de prier vostre Pere , que s'il se peut , il separe la gloire & le merite de ma souffrance , afin que ie luy puisse dire avecque verité : Mon Dieu , ie souffre purement pour vous. Autant que ie puis, ie renonce à mon merite, afin de ne souffrir que pour vostre seul seruice.

V A